



*I, III F. 29*



















IOSEPHI RIPAMONTII  
CANONICI SCALENSIS  
CHRONISTAE VRBIS  
MEDIOLANI  
HISTORIAE PATRIAE  
LIBRI X

MEDIOLANI

Regio Palatio, Apud Io. Baphistam, et Iulium Casarem Malalesiam Regior Typographos.





1641. Die 30. Augusti.

Imprimatur.

Fr. Basilius Commissarius S. Offi-  
cij Mediolani.

Antonius Rusca Præpositus Ec-  
clesiæ Metropolitanæ, pro Emi-  
nentiss. D. Cardinali Montio  
Archiep.

Comes Maioragius pro Excell.  
Senatu ♦



Menda, quae solito officinarum  
more passim irrepere, legen-  
tes peritè aestimabunt corri-  
gentq;

ILLVSTRISSIMIS VIRIS

IO. BAPTISTAE VICECOMITI

VICARIO

ET LX. DECVRIONIBVS

VRBIS MEDIOLANI.

QVOD OMNEM MEMORIAM ET  
MONVMENTA OMNIA VRBIS AB  
Q ANNO cld ccc xiii QVI TRISTANO  
CALCHO PATRIAE HISTORIAE  
TERMINVS FVIT REPETITA QVAM  
ILLE INTERMISERAT NARRATIONE CONTI-  
NVARI AD VSQVE NOSTRA TEMPORA ET EX-  
PLICARI DEBERE CENSVISTIS ILLVSTRISSIMI  
VIRI QVODQVE HVIVS CONTINVANDAE AC  
PROSEQVENDAE HISTORIAE MVNVS MIHI  
MANDAVISTIS EA RES APVD ME FERE ABSO-  
LVTA IAM ATQVE AD EXITVM PERDVCTA  
EST MATVRIVS ALIQVANTO QVAM AVT EX-  
PECTATIO DE HISCE NEGOTIIS PVBLICA  
CREDIDISSET AVT EGO AB INITIO POLLICERI  
AVSVS FVISSEM. IDQVE SORTE QVADAM DI-  
VINITVS ITA EVENIT VT LENTI ALIOQVI MO-  
LIMINIS

LIMINIS OPVS INCREMENTA SVBITA HABERET  
DATVRA PROPERVM HVNC INEXPECTATVMQ;  
FINEM. NAM CVM ANTE XX. HVNC FERÈ  
ANNVM MAGNOS HVIVS PATRIAE CASVS ET  
METROPOLITANA NEGOTIA SVB DIVERSO IN-  
STITVTO ATQ; SVB INDICE ETIAM DIVERSO  
NARRANDA EGO SVSCEPISSEM BLANDIENTE  
SVCCESV COEPI COGITARE VEHEMENTER  
ATQVE CIRCVMSPICERE SI FORTE POSSEM OC-  
CATIONEM INDE ARRIPERE ALTIVS ETIAM DE  
PATRIA BENEMERENDI ITAVT NON PROPRIOS  
ATQVE SEPARATOS ECCLESIAE ANNALES SED  
IVSTVM CORPVS ATQVE COMPLETVM VNIVER-  
SAE MEMORIAE MEDIOLANENSIVM EXHIBEREM.  
EA MIHI CVRA IAM INDE AB INITIO TETIGE-  
RAT SANE ANIMVM. NEQVE IN PRIORIBVS  
ETIAM LIBRIS OMISERAM VLLAM BELLICARVM  
CIVILIVMVE RERVVM PARTEM QVOMINVS PRO-  
FANA EA SACRIS SICVT EVENERE IMMISCE-  
RENTVR. VERVM VBI IN TEMPORA PAVLATIM  
EA DEVENERAM QVAE NVLLVM ECCLESIASTI-  
CAE QVIETI LOCVM DABANT ET RARA  
PONTIFICVM NISI AVT ARMATORVM AVT  
CVM ALTERO DOMINATV A LITIGANTIVM  
FACTA REPERIEBANTVR TOTAQVE IN ARMIS  
ET SEDITIONIBVS ATQVE IN CERTAMINE  
IMPERII

IMPERII ET DEFENSIONE LIBERTATIS STYDIOQ;  
GLORIAE CIVITAS FAMAM PENITVS ANIMOSQ;  
OCCVPARAT NARRATORI QVOQVE MIHI IN  
ARMA HAEC ATQVE IN HOSCE TVMVLTVS ET  
CIVILIA CYNCTA NON TAM DESTINATIONE  
ET ARTE QVAM NECESSITATE IPSA EVNDVM  
FVIT RVRSVSQVE AD ECCLESIASTICA INDE  
REDEVNDVM NECESSITATE EADEM ET QVA-  
DAM PROPRIA CONDITIOE VRBIS CIVIS MA-  
GNITVDINI IAM INDE A PRINCIPIO ETIAM  
MAGNITVDO SACRORVM INEST. ADEOQVE  
SVAPTE NATVRA SEMPER CONNEXA ISTA  
INTER SE FVERE MEDIOLANI VT NEQ; CIVILIA  
ET PROFANA A SACRIS NEQVE AB ILLIS HAEC  
FACILIVS QVAM IPSAM AB TOTO CORPORE  
CIVITATEM DISCREVERIT QVISPIAM ATQVE  
SEPARAVERIT. PRAESAGIEBAT ANIMVS POSSE  
CONTINGERE OLIM VT HVIC HISTORICO MV-  
NERI PVBLICA AVTHORITATE ADMOVERER  
TANTOQVE ATTENTIVS IN PARTEM INCYBVI  
HANC VT CASVS ET NEGOTIA OMNIA CIVI-  
TATIS INCLVDEREM HAVD ALITER QVAM  
SI ADMOTVS IAM MVNERI ESSEM EAQVE MIHI  
PVBLICA AVTHORITAS IMMINERET. AC SICV-  
TI VLYXEM FERVNT IN LONGO ILLO ET FA-  
BYLOSO ERRORE NVSQVAM AB ITHACA SVA  
DEIECTOS

DEIECTOS HABVISSE OCVLOS ANIMOQVE SEM-  
PER ET COGITATIONE INTENTVM FVISSE  
ILLVC: ITA CVM NONDVM PVBLICO DECRE-  
TO ASCITVS VRBIS ET ECCLESIAE MONU-  
MENTA COMPOSERE INSTITVISSEM ACCVRA-  
TISSIMA MEDITATIONE SPECTABAM IMPERII  
STATVM REIP. CORPVS GENERALIS CONSILII  
DIGNITATEM NOMEN ET SEDEM ET DECRETA  
DECVRIONVM BELLA BELLORVMQVE CAVSAS  
TVMVLTVS ET STVDIA POPVLI ORIGINES ET  
INCLYTA FACTA SIVE VITIA SINGVLORVM  
HOMINVM DOMINATIONVM QVOQVE VICISSI-  
TVDINES ET ARTES ET QVICQVID IN MAGNA  
VRBE MAGNOQVE POPVLO OB VIRTUTES SIVE  
NEQVITIAS SORTEMVE MORTALIYM CONTINE-  
GERE POTEST HISTORIA DIGNVM. HAC EGO  
DILIGENTIA IN REMP. VSVS TEXVERAM SERIEM  
ORDINEMQVE NARRATIONIS EX VTROQVE  
STATV QVO CIVITAS ET RESP. OMNIS OMNEQVE  
IMPERIVM CONSTAT EAMQVE AD CAROLI  
CAESARIS FINEM ET INITIA PHILIPPI II. SIMVL  
AD D. CAROLI PONTIFICATVS INITIA PERDV-  
XERAM AC RELIQA DEINCEPS AD EANDEM  
FORMAM SEDVLO MEA SPONTE EXSEQVEBAR  
CVM DE CONTINVANDA CALCHI HISTORIA  
DECRETVM IACCEPI CIVITATIS MAGNOPERE

LAETVS ANIMI QVOD PVBLICA MANDATA  
VLTRO ITA ANTEVENISSEM ESSETQVE PENE  
ACTA RES ANTEQVAM AGENDA MANDARETVR.  
SED NEC SATIS CREDEBAM IPSE MIHI SATISVE  
FIDEM REI CAPIEBAM. ITAQVE ACCEPTO DE-  
CRETO INSTITI EVOLVERE ET RECOGNO-  
SCERE OMNIA QVAE A PRIMORDIO VRBIS  
SCRIPTA EDIDERAM. ATQVE DECEM HOSCE  
PRAESERTIM VELVTI SVA SPONTE NATAE  
CONTINVATIONIS LIBROS SCIRE VOLENS AN  
ET AD CALCHI IPSIVS ORDINEM FILVMQVE ET  
AD PVBLICA MANDATA CONGRVERENT DETV-  
LI AD DECVRIONEM LEGNANVM CVIVS VIRI  
LITTERIS ET SAPIENTIAE OMNE NEGOTII  
HVIVS ARBITRIVM OMNISQVE COGNITIO DE-  
LEGATA EST PETIIQVE AB EO VT PRO INIVN-  
CTA SIBI AVCTORITATE ET CVRA COGNOSCE-  
RE AC STATVERE VELLE ESSETNE MANDATO  
ITA SATISFACTVM AN VERO RETEXENDA  
ATQVE DE INTEGRO ORDIENDA TOTA MIHI  
RES FORET. ILLE SVMPTO AD DELIBERAN-  
DVM SPATIO INSPECTIS QVAE OBTVLERAM  
POST ALIQVOT DIES RESPONDIT NOVA IM-  
PENSATA OPERA NIHIL VIDERI OPVS. SI PERSE-  
QVI VELLEMVS EADEM LABOREM INSVMI-  
VANVM. ACTVM AGI. TANTOQVE DETERIVS  
ACTVROS

ACTVROS QVANTO SEMPER ESSENT ET SEN-  
SVS ET VERBA MELIORA QVAE CALOR INGENII  
PRIMVS OCCVPASSET. SIC ILLE PRONVNTIA-  
RAT. HINC MIHI SVPER ANIMI VOLVPTATEM  
ET QVIETEM QVOD AD DECADEM HANC ATTU-  
NERET ETIAM OTII PARS AD EA TVM ABSOL-  
VENDA TVM EXPOLIENDA QVAE DESTINATA ET  
INCHOATA HABEBAM. ATQVE ITA DVM HAEC  
IN HVNC MODVM PROBATA DECVRIONI LE-  
GNANO PARS HISTORIARVM IVSSV AC NOMINE  
SVMPTVQ; PVBLICO NOVIS TYPIS EXCVDITVR  
DVMQVE FRONTEM HANC INDVIT ET RECIPI-  
TVR INTER MONVMENTA CIVITATIS AD VE-  
TERA PERFICIENDA LIBER EGO ATQVE EXPEDI-  
TVS INTERIM ABSOLVI CVNCTA NOSTRORVM  
TEMPORVM A PHILIPPI II. INITIIS IMPERIOQVE  
ILLO TRANQVILLO AD HODIERNI IMPERII  
TVMVLTVS PERICVLORVM ET SANGVINIS ET  
CLADIVM GLORIAEQVE PLENOS. QVAE SIC  
REPRAESENTASSE VOLVI ET EXPOSVISSE VO-  
BIS ORDINIQVE MAGNO ILLVSTRISSIMI DECVR-  
RIONES HAVD ALITER QVAM SIGVTI TABVLAE  
VETERVM ARTIFICVM EXTANT QVARVM SIM-  
PLICITATE ET FIDE INNOCENTES EGREGII  
VIRI CONDVCTA DE PVBLICO OPERA PVBLICE  
PROBANDA VEL IMPROBANDA EXHIBEBANT

SIVE



SIVE GRAPHIDE CIRCINOQVE FORMAM ET  
MODVM DESTINATAE FVTVRAE MOLIS EXPRI-  
MENTES SIVE VBI MANVM EXTREMAM AD-  
MOVISSENT SIMVLACRA ILLA OSTENTVI COL-  
LOCANTES. QVOD AVTEM NON PRODIT  
TOTA SVA MOLE STATIM VNIVERSVM OPVS  
SED PER PARTES ET MEMBRA EXHIBETVR ID  
QVIDEM OPERARVM ET TYPORVM OFFICINA  
LENTIOR QVAM NOSTRA FVIT IN SCRIBENDO  
CVRA EFFECIT. NAMQVE DVM TAEDIA HAEC  
ET INTERVALLA NECESSARIO EXPECTANTVR  
NOBIS QVOQVE NECESSARIA FVIT MORA PER  
QVAM PARS ALIA DEIN ALIA PRAELO SVBIL-  
CERETVR SICVTI ET FACTVM EST ET FIET  
DONEC EDITIO VNIVERSA ABSOLVTA ERIT.  
NAM ET PRIORES XX. LIBROS QVIBVS EDITIS  
AB METROPOLI CONDITA AD IPSVM CALCHI  
FINEM OMNE POPVLI MEDIOLANENSIS AEVVM  
PARI CVM EO SCRIPTORE INCESSV ET ORDINE  
TEMPORVM EXEGERAM PVBLICA SICVTI SPERO  
LIBERALITAS EXCVDI VOLET IISDEM HISCE  
TYPIS VT NON MODO SERMONIS VNA INDO-  
LES ET VNIVS LINGVAE SONVS SED ADSPE-  
CTVS ETIAM FACIESQVE EADEM IN HOC MO-  
NVMENTORVM CORPORE CONSTET HABEATQ;  
SIBI CONSENTIENS HISTORIAE CORPVS CIVI-

TAS

TAS QVAM CAESARVM ILLE MAGISTER CELE-  
BRI PER GENTES CARMINE ROMAM ALTERAM  
NVNCVPAVIT CVM OB ALIA DECORA OPINOR  
TVM PROPTER VERE ROMANAM ETIAM ISTAM  
IN CVSTODIENDA RERVVM MEMORIA CVRAM  
MAGNANIMITATEMQVE PROCERVVM. MANEAT  
SECVLIS INNVMERABILIVS ATQVE PERENNET  
ORDINE IN ISTO HOC EST IN FLORE ATQVE  
IN CVLMINE NOBILITATIS HEREDITAS ET  
GLORIA TANTI NOMINIS SICVTI MANET NVNC  
FELICITERQVE PERENNAT INGENIAQVE ET  
ARTES IMO ET ARMA EADEM VEL AVSONIO  
TESTE MIGRAVERE HVC,

DE ARGVMENTO RELIQVI OPERIS  
AB DECADIS HVIVS FINE AD IV. ET V.  
QVAE SVBINDE PRODIBVNT.

VT istud est commune

A omnium qui monu-  
menta aliqua com-  
posuere, vt de suscepto suo  
negotio magnifice praefari sibi  
licitum putent: aut nulli vnquam  
Reip. nulliue Populo & Ciuitati  
intra hosce centum annos plura  
& maiora quàm Metropoli huic  
Prouinciaeq; Mediolano accide-  
runt. Et rursus, in tanta varieta-  
te ac magnitudine seculi huius;  
nusquam foecundior, quàm ver-  
gente

gente deinceps aëuo haec ipsa  
Ciuitas virorum casuum actio-  
numque maximarum fuit. Tot  
gesta per hosce annos bella : tot  
partae victoriae : tot clades exer-  
cituum : tot circa Metropolim  
Prouinciamq; hanc semper irriti  
conatus hostium : toties inita, to-  
ties repetita foedera : tanta vora-  
citas impensarum, atque tantum  
hinc pecuniae exhaustum, vt po-  
tuisse sufficere sumptibus Urbem  
aerariumue Regis mirari possint  
etiam Regna, quae gignunt mit-  
tuntue aurum. Iam belli Duces,  
& Romanis quoque temporibus  
aequi-

acquiranda capita, clarissimiq;  
Viri aut profecti & dati hinc, aut  
gloriam hic famamq; adepti. Tot  
etiam flagitia mortalium transfu-  
giaque, & proditiones, & infortu-  
nia, militaresue culpae plures penè  
quàm quae in diuersum clara &  
magnifica memorantur. Guber-  
natores Urbis Imperatoresq; exer-  
cituum, tum ex Regiae primori-  
bus atque natalium magnitudine  
adnexi Regibus ipsis, tum per vir-  
tutem & artem, siue per fortunam  
euecti inter primos, ac proinde  
per animos & instituta similes in-  
ter se, aut diuersi. Prudentes aut

callidissimi quidam: bellatores aut  
remissiore animo: mites in Pro-  
uinciam, aut nimij tributis, quae  
semel necessitate temporum &  
belli malis inuecta nunquam exlu-  
untur. Clari quoque sapientiae  
studijs, & inter arma nutritores  
vere artium, per quas haud minus  
quàm armis gloria ciuitatum cre-  
scit: siue ex diuerso alieni ab cultu  
hoc animorum, profundique tan-  
tùm & impenetrabiles saeuique  
nonnulli: siue etiam infelices &  
meliore animo quàm fama: &  
omnes demum humani animi for-  
mae, omnia imperitantium inge-  
nia

nia in Regijs hisce praefectis specta-  
tata Vrbi huic ad Plebis vsque  
consternationem, nusquam ta-  
men vt publici obsequij reueren-  
tia exsueretur. Ac sicuti Metro-  
poli quas luctandum assidue cum  
ingenijs eiusmodi fuit, siue etiam,  
sicuti decora & subsidia inde plu-  
rima & maxima tulit haec publica  
res: ita materies Operi vberrima  
& certissima inde nobis fuit ob ea  
praesertim, quae temporibus hisce  
proxime exactis acciderunt obti-  
nente Prouinciam, & bellum ge-  
rente Guzmano Marchione de  
Leganes: de quo fama percrebuit  
haec:

haec: ipseque aliquando ita profiteri solitus fuit: neque res tantas ipsum gerere potuisse, nisi Ciuitas suppeditando pecuniarum acervos exercitumque alendo, & capeffendo alsidue belli partem, Regiae curae prouidentiam in se fere recepisset, ac fuisset ipsa quodammodo inter haec arma & consilijs & robore animorum Imperator veluti alter: neque Ciuitatem alio duce & administratore belli aduersu tot pericula, tot coniuratos vno tempore hostes fuisse duraturam. In eius Aula cùm ego viuerem scripsi res variante fortuna



runa gestas, simul ab eo Gubernatore Catholicis armis, simul ab foederatis contra Imperium Prouinciamq; hanc pari contentione, dispare successu gloriaque ingenti etiam inter damna & clades: quae consiliorum & rerum casuumque magnitudo celeritate fama euecta per gentes exercet hodie ingenia, & veluti proposito hoc etiam litterarum certamine fatigat. Scripsi defensam ab Gallica irruptione Prouinciam, atque irruptionis eius metu, posita castra in Vrbe, siue potius versam in castra Urbem, armatamq; Metropolim, & obie-

ctos

ctos hosti terrores ab nobilitate;  
Populoq; tanto. Mox detractos  
ex famolo nemore Gallos eosdem,  
& fortia quoque facta Gallorum,  
ac nobilitatum mutua caede ne-  
mus. Versa deinde in perniciem  
sua munimenta Genti Bremum, &  
Trinum, captasque Vercellas, &  
conseruatam eam Urbem gloria  
maiore, quam si direpta foret: di-  
repta oppida, quae meruerant  
iras: abscissa flumina, vastationes  
horribiles agrorum: & capta per  
arma simul, & somnum etiam  
Augusta Taurinorum, veluti re-  
ductam ab exilio Sabaudam vna  
nocte

nocte Domum, consobrinosque  
Regis post exilium in auiti Impe-  
rij sede collocatos. Nec filui de  
aduersis, per quae gloriae tanta-  
rum rerum statim ab hoste simul  
& ab fortuna insultatum, recepta  
per Gallos Vrbe eadem, & non  
sine clade abstractis ab Casale no-  
stris, cum nisi turbassent semifacta  
opera imbres, arcem vniuersi bel-  
li penè iam hanc tenerent. Ac  
praeter opera cruenti Martis haec,  
artes etiam narraui incruentas,  
quibus haud minus effectũ vtrinq;  
turbatumue est, quàm per arma  
& acies, sollicitatis hinc inde domi-

nationibus : intercepta à Gallis  
Vulturena : & rursus traducta ad  
Catholicas partes Valle, illectisq;  
Rhaetis in amicitiam, & foedere  
hostium penè dissoluto. Haec &  
alia profunda excelsa memoravi,  
non sine quadam interim etiam  
ipse magnitudine animi spirituque  
generoso, nihil plausibile & falsum  
admittendo in Historiam, & nihil  
omittendo, quod verum ingra-  
tumque partibus esset. Euocato  
deinde properis ex Regia litteris  
Guzmano in Hispaniam, & misso  
Velaschio successore, exposui, non  
acta solùm, verùm etiam arcana  
succes-

successionis eius : exulcerata Sa-  
baudum inter & Guzmanum om-  
nia suspicionibus animosque solici-  
tatos tum recordatione veterum  
exemplorum ex mutabili semper  
ea Domo, tum recentibus indicijs,  
posse fratres exules ambigua for-  
tuna simul & mente suspensos  
transire ad Gallum fidemq; trans-  
ferre. Id ne fieret, siue in diuersum  
instrumento adipiscendo huic cer-  
tatum vtrinque praemijs & pro-  
missis, nec minus ipsorum arte, qui  
mercimonium veluti hoc excerce-  
bant. Explicantur inde artes &  
consilia noui Gubernatoris, qui

varie compositus ex tranquillitate  
simul & occulto feruore animi,  
bello nouus, pace probatus, & ab  
Genuensi Legatione recens, veterum  
exemplo bellator philosophus, apta cum modestia rem ge-  
rebat magnis hostium conatibus  
par, & utili per interualla quiete,  
sicuti medici quoque per eam  
interdum magis quam secando &  
vrendo apud aegra corpora pro-  
fecerunt. Haec & alia his similia  
haud equidem ingrata fore legen-  
tibus arbitror. Sed longe maior  
solidiorque voluptas animis, & so-  
lidior verè fructus ex dominatu al-  
tero,

tero, qui religionem & sacra con-  
tinet: qui sua contentus mansue-  
tudine quiescit interdum exsurgit-  
que rursus: eiq; in omni Catholica  
Urbe prior etiam ille sanguinis ar-  
morumque dominatus fasces Im-  
periumq; submittit. Et semper in-  
terea tamen ex obsequio hoc, vel  
ex imagine obsequij lites & iurgia  
existunt certamine partium &  
contentione animorum simillima  
bellis. Inerit Operi grande inter  
haec iurgia Diui Caroli nomen,  
grandisq; Pontificatus, non minus  
ob eiusmodi lites litiumque finem,  
quàm ob miracula moresq; Coelo  
summis immistos,

immistos, ob Animam manifestè  
delapsam illinc, & denique inspe-  
ctante ac plaudente genere huma-  
no receptam illuc. Quod scilicet  
aetatis nostrae decus atque mira-  
culum, & ab vno Ciue Urbis hu-  
ius emendatam penè mortalita-  
tem vniuersam, atque restitutam  
Apostolicis moribus Ecclesiam  
praecipue hanc proprio compre-  
henderam Volumine olim edi-  
deramque & cuncta nunc in hoc  
Historiae corpus transferuntur.  
Treis deinde sequuntur continua-  
to tenore Ciues iidem & Archie-  
piscopi velut in pompam dati  
diuinitus



diuinitus Vrbi huic. Post Diuum  
Carolus, Vicecomes, cui peritia  
legum & animus antiquus, inno-  
centiaq; & morum ac vitae man-  
suetudo loco authoritatis fuere.  
Borromaeus deinde alter breui in-  
teruallo proximus priori, semperq;  
ei comparatus quantum radiato  
& coelesti capiti capita vlla morta-  
lium conferri & aequiparari lici-  
tum est. Et Eminentissimus de-  
nique Montius hic notabili tem-  
peramento inturbidus, quietus,  
atq; acerrimus idem ad Ecclesiae  
tutelam obuia rerum magnitudine  
quae non modò iustum dare Vo-  
lumen,

lumen, sed exemplar absolutissimi  
Pontificatus exhibere seculis pos-  
sit. Borromaeum vtrumque stu-  
dijs & altitudine animi repraesen-  
tabat, demptis siue additis hinc  
inde, quae ratio temporum ex-  
posceret siue improbareret: Et  
Sedis Apostolicae Legatus ante  
Pontificatum Regna Regesque  
tractarat. Vnde dignitas &  
copia rerum in hac operis  
parte maior.

IOSEPHI RIPAMONTII  
CANONICI SCALENSIS

CHRONISTAE VRBIS MEDIOLANI  
HISTORIARVM AB METROPOLI CONDITA  
DECADIS III  
LIBER PRIMVS

*EPI TOME LIBRI*

Ab anno salutis cr̄o ccc xiii. qui Calcho patriae Historiae finis, desumitur noui Operis initium & tempora infecuta memorantur. Sed repetuntur prius extrema superioris Historiae, fusiufque & altius explicantur ea, quae Calchus ipse in parte vltima Annalium suorum perstrinxit tantummodo, siue omittenda putauit: atque temporis proxime anteaacti facies datur in conspectum.



INTER Henrici VII. coronationem Mediolani celebratam, & Caesaris eius ex hac Vrbe discessum (constiterat enim ibi Calchus, cuius Historiae seriem excipiendam, & continuandam esse decreuere Illustriissimi Decuriones) turbulenta primò & miserrima, deinde modesta & tranquilla aliquandiu rerum forma Mediolani fuerat. Ac biennio fere toto illo, quem huic Scriptori terminum indicamus, euenerant rara & memora-

A

bilia

bilia pleraque , & vsui futura legentibus , siue  
 • documenta vitae , siue oblectamina animo pe-  
 tere inde quis velit. Nam tunc accensi magis  
 quàm vnquam antea furialibus inter se odijs  
 Vicecomites , & Turriani : atque armata Guel-  
 forum & Gibellinorum nomina in mutuam per-  
 niciem , & contactae rabie eadem , atque in hos ,  
 siue in illos diuisae finitimae Vrbes : coniectus  
 in vincula Archiepiscopus : prohibita sacrorum  
 • vsu Ciuitas : haec & alia fuerant spectacula penè  
 vltima irarum calamitatumque ciuiliùm. Nec  
 ab singulis interea cessatum , quominus exempla  
 fortunae variantis ac facinora virtutis eximiae  
 • ederentur. Praecipuèq; Matthaeus ille Viceco-  
 mes caput & robur & spes vnica Gibellinorum ,  
 insigni docuerat exemplo , quàm intuta poten-  
 tia esset aduersus artes conspirationesue inimi-  
 • corum : & rursus , quàm nulla satis tuta machi-  
 namenta contra prudentiam astusue maiores.  
 Profugus atque extorris iste videlicet partium  
 vi simul & dolo , redierat arte sua & infimo  
 apud aduersarios obsequio superatis eorum opi-  
 bus insidijsque in Urbem. Reduxerat ipsum ab  
 exilio puer vnus . Latebris ac dissimulatione  
 sui saluus inceserat . Poposcerat acceperatque  
 pacem inimicorum eorundem arbitrio : & stan-  
 tem cum hisce precibus in conspectu Caesaris ,  
 ac dare volentem oscula Philipponus & Fisi-  
 raga Guelfi praepotentes contempnim ac su-  
 perbe repudiarant . Mox. florens ipse opibus  
 ac

ac potentia deiecerat infra se factionem aduersam, non per arma & acies, sed patientia & submissione animi victor. Pulsusque iterum redierat gloria maiore tam prope deinceps ab dominatore & Principe Urbis, quàm ab exule & fugitiuo nuper. Atque ita, per prospera, per aduersa praeceps ad vitae denique finem simul & ad infausta principia Imperij circumegerat vnà secum Ciuitatem & subiectas Vrbes domumque suam in primis, & potentiam illam ex infimo nascentem. Tanta rerum varietas in vno homine, & tanta materies in parte vltima operis, Calcho mihiq; simul, qui vnà cum eo orsus ab Vrbe condita narrationem ad eadem tempora perduxi, non sanè rerum fide vel scribendi arte contendere volens cum Scriptore antiquo, sed existimans crescere patriae nomen latiusq; spargi famam etiam hoc ipso si res eadem pluribus scriptae forent. Nunc, & suscepti negotij amor stimulat, & studio ac voluntati Decurionum obsequor, qui ciuem suum Scriptoremque Calchum hac nostrae continuatione Historiae eius veluti reuocari ad opus morte intermissum & per nos restitui sibi cupiuere. Repetamque altius varietatum vicissitudinumque tantarum initia & causas: atque in principio noui Operis scena proponetur haec, in qua, & prioris Historiae seriem extremam, & secularum initia rerum originemque adspicere legentes possint. Nam, & ea, quae proxime praecessere cum pos-

terioribus hisce connectuntur: & pars haud dubie priorum sunt haec posteriora quae publici Consilij & LX. Decurionum autoritate scribere aggredimur.

**P**osteaquam Archiepiscopus Otho decesserat, non erat alia cura prior antiquiorque Matthaeo, quàm vt ciuitates omneis, quae fauore aliquo imbutae Turrianorum essent, belli terrore aggrederetur; vbi terruisset satis, inuitamenta pacis & amicitiae ostentaret. Id ab Othone patruo secretò fuisse mandatum credebatur inter alia arcana imperij, quae vltimo ad Claram Vallem secessu moribundus senex aperuerat heredi, multumque commendarat. Non autem expectauere Ciuitates, & vnà cum Ciuitatibus validissima quaeque municipia, dum moueretur aliquid: sed vltro statim nudauere animos, & defectionibus laceSSIuere quiescentem, cum funestam adhuc & atratam patruī desiderio domum ille haberet. Bergomi Culleonum factio, quae rem trahebat ad Turrianos, pulsas vrbe Suardis, quam deditam sibi familiam Vicecomes ibi constituerat, simul eiecto quem ipse dederat Praetore, inuaserant arcem; & Praetorem ab Cremona nouum asciuerant. Insensius Nouariae rebellatum, vt Galeacius Matthaei filius aegre vitato populi impetu praeceps inde abiret. Nec ad Ticinum quieti quicquam erat, concitante gentem Manfredo Beccaria, qui  
Turria.

Turrianorum olim potentiae infestus, postquam versa erat fortuna, mutauerat animum, transfuleratque odia in Vicecomitem, quasi non hominum ipsorum, sed dominationis inimicus. Iam ad Vercellas, ad Casalem, ad Vigleuanum, spreta & repudiata Vicecomitis maiestas: & ciuitatum earum pollicitationibus erecti Turrianorum animi. Leucenses item in Abduae ripa, tractu terrarum & positione municipij, veterem exsulum toparchiam attingentes, manifeste illuc inclinarant, prae buerantque tam aperta signa defectionis, vt diruto municipio, quicquid incolarum erat, in Madretiam vallem, quae cis flumen interiecta collibus est, deportarentur ea lege ne remigrare in sedes amplius easdem possent. Sed praecipua erat ob Laudensium rebellionem cura & sollicitudo. Namque vrbs ea, toties victa, toties rebellis, non sine magnae rei fiducia, post tot infelices conatus, hoc tempore sustulisse animos videbatur. Et ducto illuc exercitu, cum post ancipitem pugnam, captiui recognoscerentur, repertus inter eos erat Imberaldus Turrianus, cumque Vicecomes ad Tritium in turre ima detrudi iusserat. Reperti simul erant nobiles aliquot Patauini, qui populum suorum ductores aduersus Metropolim subsidio Laudensibus venerant. Inde metus Vicecomiti ingens, conspirasse pro Turriano longinquas etiam Italiae ciuitates, & minimam partem esse mali quae deprehensa teneretur.

Phi-

Philippus Languscus praeterea, & Marchio Salinarum, Marchio Montisferrati paternarum inimicitiarum haeredes, magnarum domum, & magnorum odiorum nomina torquebant animum suspicione ac metu, ne aduersus tot coniuratos hostes vanum euaderet etiam ipsum Vicarij nomen, quod praelidium munimentumque rebus, tanto nuper consiliorum & simulationum apparatu quaesitum inuentumque erat. Itaque, non ipse solum anxius trepidusque, sed tota in moerore ciuitas versabatur, cum finitimum omnium arma & conatus in hanc partem esse conuersos appareret. Quod si qui erga nouum dominatum, vel inuidia, vel indignatione suffusi aut accensi, iucundè nonnunquam imminetia illa Vicecomiti pericla prospicerent: dulce profecto illud ex altera parte contaminabant proposita sua cuique damna priuatarum rerum: non dubia vastitas ex bello tam atroci: periturae domus, & capita obiectanda ferro. Matthaeus, hisce timoribus anxios priores esse urbis videns, ipseque multum timens tristitiam & desperationem, quae in verbis & vultu singulorum eminebat, vocato in Templum maximum Concilio talia quaedam dixit. Se se rem Mediolanensem iusto ac moderato regentem imperio, persoluentem sua iura subiectis ciuitatibus, bona fide colentem foedera & societates, vidisse repente cooriri rebelliones inimicitiasque illas, quas ipsi quoque coortas  
admi.



admirarentur. Id adeò communi imperitantium omnium conditione accidisse, quos tam benè, quam malè facta premant semper, & rectis sanctisque artibus, eiusmodi praeemia reddant homines inquieti. Non sic apud Deum opt. max. quem etiam rerum euentu propediem esse declaraturum speraret, quod mores isti hominum placere sibi non possint. Ceterùm, & si praeter diuinæ iustitiae fiduciam, humana quoque victoriae pignora in manibus habeat, paratum esse tamen dare pacem & veniam omnibus, qui pacem accipere & ferre ipsam queant. Daturum autem in quasq; velint conditiones, dummodo ne qua fieret iniuria Metropoli & imperio quod ipse vicario suo munere tuendum haberet, Huic etiam tam moderatae professioni suberat artificium, vt per speciem agendi, quae publicae salutis causa in eo negotio agenda essent, Dux rectorque populi in quinquennium aliud ipse crearetur. Nam ad cal. Decembreis eius anni proximas finiebatur ea praefectura Vicecomiti: nec leue momentum in eo, si ad Caesaris auctoritatem, qua Vicarius Imperij erat appellatus, accederet hoc etiam, vt pergeret regnare Ciuitatis & populi iussu. Tentari id agique cùm statim homines sua sponte suspicati essent, tum verò certum habuere postquam Gulielmus Celer ex intima Vicecomitis familiaritate monuit in eo conuentu principem, audientibus, qui aderant, irrita fore quaecunque agerentur, nisi pro-

rogata

rogata praefectura esset. Ita Dux populi Mediolanensis Vicecomes in quinquennium est re-  
fectus. Confirmatis in hunc modum paulisper  
animis, & erecta ad bonam spem nobilitate,  
duo potissimum ab illo agebantur: alterum qui-  
dem ut minueret sibi hostes, alterum verò, ut  
noua praesidia, & amicos pararet. Edixit pri-  
mò cauitq; publica fide, ne cui Vercellenfi ho-  
mini, siue Ticinensi, siue Nouariensi vlla in re  
noceretur, quodocunque in vrbe agroue Me-  
diolanensi reperti essent. Si quis aliquem eorum  
violasset, ut parricidij poena teneretur. Foedus  
inde cum Bononiensibus & Placentinis iniit, &  
quìa nubilem domi filiam tunc opportunè ha-  
bebat, in tanto rerum discrimine occasione ea  
usus, Albuinum Scaligerum sibi generum asciiuit.  
Ab his veniebant quotidie peditum & equitum  
auxilia, dabatque famae Vicecomes, aduersus  
longinquum hostem, Caesaris iussu copias eas  
parari. Parabantur aduersus eos quibus oblata  
pace negligentiam simul afferre voluerat, ca-  
uendi ne quid interim hostile paterentur. Nec  
tamen prouida viri consilia fefellere coniura-  
tos. Ad Ticinum ipsi quoque congregabantur  
molientes inter se atque agitantes longe aliud  
quàm quod in vrbe credebatur. Fuerat enim  
opinio ad pristina tantummodo esse reditum, &  
veteribus suis haerere consilijs rebelles illos,  
scilicet ut carperent modis omnibus obtererent-  
que nouum dominatum, neque iugum imponi  
sibi

sibi id paterentur . Sed rebelles fessi consilij  
conatibusque alijs abruperant omnia spem inter  
& metum : ac sublato Vicecomite , necis vnus  
compendio longi subsellij decidere litem statu-  
rant . Ea res inter ipsos miro silentio suppressa  
& occultata , nonnisi postquam discussa abiecta-  
que est , emanauit . Discussa autem & oppressa  
est mole belli , quo Vicecomes totam eam con-  
iuratorum manum repente circumuenit , donec  
ipse quoque circumueniretur , & intentas in ca-  
put suum insidias calamitate alia euitaret . Nam  
posteaquam , & ab externo , & ab domestico mi-  
lite , satis paratus ad rem gerendam fuit , omissa  
simulatione , quam ob metum assumpserat , ag-  
greditur aperto Marte ciuitates infidas , ipsosq;  
dynastas capita rebellionis , ciuitatum earum  
stimulatores , immisso belli discrimine auertit  
ab spe insidiarum , quibus in ficta pace locum  
fore existimarant . Caeterùm , quia Mediolani  
primores vrbis , torpescabant adhuc proposita  
ante oculos imagine belli , quod cum tota fere  
Insubria , & cum alienigenarum etiam regulo-  
rum opibus gerendum erat : in publico conuen-  
tu , post quem ad arma iri oportebat , paratos  
ex primoribus ipsis habuit , qui acerbè in rebel-  
lium perfidiam sordesque & humilitatem , vera  
& falsa iaciendo , concitarent , simul indignitate  
rerum , simul spe victoriæ animos , ac discusso  
torpore , martiales impetus apud fessa iam &  
uarijs curis aegra pectora renouarent . Trintia-

nus Gauacius , & Facius Pusterula fuere , qui grauissimè inuecti in rebelles instigatoresque rebellium , effecere vt poscerent vniuersi iuberentque bellum haud minore animorum impetu , quàm quo Vicecomes ipse in eo negotio efferebatur . Et quoniam habitoper vrbis regiones delectu , descriptisque in singulas portas quadringentenis , graue certamen ex eo ortum erat , quod pars vnaquaeque dare vrbano huic exercitui ducem volebat , curam eam ambitionis concepta publice in hostem ira discussit : & sine mora egressi infesta signa Ticinensium portis intulere . Ibi vi summa gerebatur : bellum statimque apparuit , vno veluti consiliorum vinculo innexas esse ciuitates aduersus Metropolim simul & Vicecomitem , consiliisque iisdem dynastas externos esse illigatos . Scilicet , vbi Mediolanenses ad moenia illa succedere , quasi dato omnibus signo , persultabant illico campum , aderantque multiplici prius , dein vno agmine , rebellium quos antea nominaui exercitus : eos dynastae ijdem sequebantur cum sua quisque popularium manu , commilitones simul & duces . His accesserat Actius Estensis , qui sub Demarchi nomine Ferrariam obtinebat , & finitimorum Cremonensium stimulis compulsus in eadem arma erat . Ita , duo maximi exercitus , ex varijs hinc inde gentibus misti , paribus etiam in vtraque parte damnis dimicabant , prout oppida , & arces , ipsaue late dispersa agmina occasionem aliquam

aliquam fecissent : nusquam ad vniuersae rei  
conflictum veniebatur . Post ancipites aliquot  
pugnarum euentus , coeperant superiores esse  
Vicecomes & Metropolitani : & pellebantur  
haud dubie coniurati nisi petita pace rem ad  
aequa deduxissent , vt pars ea , quae vincebat ,  
aliquanto postea solitudine & exilio testaretur  
humanarum rerum leuitatem . Cuius spectaculi  
tempus interea dum veniret , erant pleraque  
laeta Vicecomiti , tum in vrbe domoque , tum  
ad exercitum : Ecclesiaeque status , non felix  
ille quidem , sed tamen aliquis Mediolani erat .  
Rufinus Frisetius Lucensis Archiepiscopo suc-  
cesserat Othoni dignus vtique tanto munere ,  
& praebiturus egregij Pontificatus exemplar ,  
si , aut in tempora commodiora incidisset , aut  
vixisset ipse diutius . Forma illa temporum ,  
& occupatus princeps infania & furore patriae  
capiundae , perque negotium illud tota in ar-  
mis & turbis ciuitas , sine actione illustri , sine  
memoria vlla , quae extet , transmisere breuem  
vndecim mensium pontificatum , silentiumque  
& obscuritas cum qua exiguum id temporis  
egit , etiam ipsius nomen comitata est . At  
Franciscus Fontana totidem sedendo annos ,  
quot ille menses federat , & plura , vidit Ecclesiae  
mala calamitatesque ciuitatis , neque actionum  
gloria vel magnitudine clarior fuit : ac de igno-  
bili eius ad Angleriam sine postea memorabo .  
Matthaeus Vicecomes , in quem cuncta hoc

- tempore vergebant , & ab quo etiam cuncta proficiscebantur , obstupefactis terrore belli hostibus , & ad pacis petendae necessitatem adductis , appropinquante anno , qui ipsum ingenti casu pessumdaturus erat , altius aliquanto repentina & breui felicitate attollebatur , quò magis postea casus ille mortalibus caeteris admiratio-  
ni & exemplo esset . Quippe , data Ciuitatibus venia , dynastisque , foedere vel affinitate iunctis sibi , dimissis per totam fere Insubriam Magistratibus , & ordinato apud rebelles ciuiliu-  
rerum statu , domique per omnia clarus & ingens , ne res deesset vlla maiestati augendae , arbiter pacis etiam sumitur , quam Genuenses & Veneti post mutuas clades consensu expeti-  
tam , fore vanam credebant , nisi interposita huius autoritate firmaretur . Venère Mediolanum Ciuitatum earum legati petentes ab Vicecomite , vt cupientibus inter se finire bella duobus  
haud ignobilibus populis , vim nomenque suum inferere ne grauaretur , si stabilem eam fidamque pacem esse vellet . Neque princeps abnu-  
it , & facta pax ipso arbitro per praeconem in palatio vrbis promulgata est . Sub idem tempus  
• Beatrix Actij Estensis soror , quae Nino Gallurae Pisarum domino nupta prius fuerat , Galeacio Matthaei filio vxor datur , estque deducta Me-  
diolanum sponsa tanta publica gratulatione & apparatu , vt vrbs tota principis domus videretur . Inter haec breuissimi temporis gaudia &  
Vice-

Vicecomitis fugam, prodijt è tenebris occultatum diu scelus, quod videri potuit portentum irae numinis in alia hominum scelera cladisque Vicecomiti imminentis, & miseriarum omnium, quae Vrbi aderant. Ac de eo etiam portento referam.

Gulielma fuit plebeij generis muliercula, quae statim vt adoleuit, dictitans velle se domi manere virginem, exorauerat parentes, ne illud animi sui votum impedirent. Ita adspersa nuptiarum mentionem, conditioneq; repudiata, omni, sub patrio tecto inter imitamenta pietatis agebat aeuum, nec corporis velamine, nec victu quotidiano, nec sermonis forma diuersa fortasse ab mulierculis alijs, quales etiam hodie multae intra domesticos parietes referunt sacram virginum instituta & cultum. Ad omnia templa & sacella quotidie ibat, & crebris tota vicinitate colloquijs terens tempus, domique etiam quaesita semper & appellata, mulsitantibus quamquam domesticis, impune cuncta suo arbitratu agebat, quia caritatis & religionis esse negotia credebant, dictitante sic ipsa, & verbum vsurpante istud. Tantum vtique tricarum, atque concursationum, & sermonum erat, vt natum inde prouerbum nondum apud nostros homines exoleuerit. Dicunt enim, plus quam Gulielminam habere negotij eum, qui circa inania districtus cursitet semper ac vagetur. Gulielma haec, siue Gulielmina postquam fama pietatis



pietatis apud proximos, inde apud vicinos, per totam deinde urbem celebrari coepta est, paulatim in eam auctoritatem venit artibus suis, & credulitate multorum, ut sanctae virginis haud dubie nomen obtineret. Atq; increfcente quotidie magis, non solum errore ciuium, sed etiam ipsius audacia, inesse quiddam ei diuinum, vel certe fauore Numinis supra communem humanae naturae conditionem animum mentemque eius attolli constans opinio erat. Quippe vaticinando saepe futura per ambages ac temerè praedicendo multa, diuinauerat fortè aliquid, & quae secus acciderant, flexa ad euentum interpretatione defendebantur. Iam ecstases, & raptus, & omnia alienatae mentis ingenia fallaciaeq; obuersatae intuentium oculis, fidem fecerant, subduci mentem eius in coelum, & ab corporis societate semotam, commercio superum frui, atq; illic in sinu gremioque diuinitatis perfundi delicijs & arcanis inenarrabilibus. Species quoq; oris naturae sorte cum dignitate quadam: & ubi succedere cuncta feliciter vidit, habitus etiam, & incessus, & sermo, composita omnia apte ad fallendum, ut quò inclinabant sua sponte simplicium animi, eodem simulatione inanum pertraherentur, & coelestem spiritum in illud transfusum esse corpus autumarent. Itaque, de rebus fere omnibus ipsa consulebatur, & pabula diuersa eadem habebat, quae alliceret vnumquemque ac detineret. Non viri  
solum



solùm graues & primariae matronae de serijs magnisq; negotijs ad eam referebant; sed amatorias quoque suas sollicitudines, & liuores, & ambitionis odijque curas ad Gulielminae perferre sinum affueuerant quibus aliquis eiusmodi morbus. Ad corporis denique morbos etiam, ad dubios, siue aduersos quotidianae vitae, domesticarumque rerum casus, petebatur ab ea subsidium, & precibus illius quamplurimi se se quotidie commendabant. Insuper, amplissima matrimonia, testamenta & hereditates, & voluntates vltimae morientium in ipsius plerumq; manu erant. Interdum autem, quò plus reuerentiae ex longinquo esset, per interpretes alias consciasque mulierculas ceu internuntias numinis consulta & responsa ferebantur: ipsa abdito in cubili, quasi satiata mortalium adspectu & pertaesa quotidianos coetus delicato languore decumbebat. Et primores interim feminae, quaesito per ambitionem aditu, ac noctibus inter sese diuisis, ad obsequia nutusque decumbentis excubabant. Quibus ipsis in nocturna illa statione mirifica ludibria obijciebantur, vel splendore circa lectulum excitato aliquo, vel exaudita tamquam è coelo vocula, vel quasi egresso in coelum spiritu Gulielminae, membrisque per excessum resolutis. Daemon profectò aliquis erat in parte tantarum ludificationum, & tragico mulieris sceleri, quod ipsa talibus struebat initijs, euocati lemures inferuebant.

uiebant. Ac lemurum utique instar erant interpretes & consciae illae quas dixi. Eae clam expresso & temperato altilium succo congebant ipsi Gulielminae tenues sub lodicem pastillos, quibus dissimulanter in os coniectis opipare nutriebatur, exeunte per urbem interim miraculi huius fama, quod Gulielmina totos absque cibo vltimo menses egisset. Nutritu namque contenta clandestino illo reiciebat cibatum alium omnem, & alimoniam habere se celestem distabat, eratque miraculo fides, quia callidissimae & curiosissimae matronarum, experimenti causa adsidendo vsq; & vsque affirmabant, se se nusquam deiectis ab lectulo oculis vidisse sumentem omnino nihil, & ieiuno semper ore. Haec aliquandiu vita Gulielminae fuerat: talia eius instituta & mores: in cuius feminae audacia & ab hisce moribus inchoato scelere, illud inprimis admirari subit, quod loco nata humili, vnde, nonnisi plebeios hausisse spiritus potuerat, nullis instructa litteris, nullo rerum usu, expertis moris consuetudinisq; nobilium, ignara vitae communis muliercula, tantas, tam varias habuerit illecebras & artes fallendis atque inescandis eorum etiam animis, quos ad fallendum natura & consuetudo imitatione domestica prouisuque omni instruit atque ornat: quorum est superbia & fastus, quos delitiae ipsae clausos impenetrabilesq; tenent. Coeperat primò fallere parentes, adspernando nuptias,  
vota

vota ceterarum, deinde domesticam eam fallaciam auxerat simulatione magnae pietatis: inde procedenti feliciter artificio publice fecerat gradum & struxerat sibi ad summa viam: postremò, daemones ipsi delectati flagitio, quod post tot flagitia nouum parabatur, in partem operis venere sicuti credidimus, & illius excetrae coeptis adfuerunt. Flagitium autem & portentum, & calamitas labesq; per eam mulierem inuecta vrbi sic fuit. Andreas erat quidam Saramita Gulielminae amicus, quem illa ob aetatem integram rubrumque capillum & callidos mores ascitum sibi & dilectum ad quotidiana ministeria assiduum habebat. Sed intimum aliud ei occultumque ministerium apud dominam erat, explere quae fert insania sexus, atque iam inde à pueris ex ipsa vicinia sicuti fit gratus placitusque virgini, effecerat, ne virgo illa vnquam fuisset. Ingenium homini nihilo segnius ad fallacias & dolos, illecebrasque omnes, quàm ipsius fuisse Gulielminae antea demonstratum est. Salax in primis & vafer, & ganeo, fusa per genas barba lacernaq; talari tegensabilem adhuc iuuentam simulatione varia erat affecturus, vt seuerus quidam & sobrius & antiquus homo haberetur. Nouerat omneis domos, omnia diuerticula vrbis, negotijs rebusq; omnibus aderat, siue aduocatus vltro, siue suae virginis nomine: sicut enim eam appellare impudentissime semper solitus fuit. Poterat verò etiam

C ipse

ipse fingere colloquia cum superis, & praedicere nonnulla, & mentiri visiones inusitatas: & quicquid denique aliud Gulielmina inter feminas audebat, id ipsum inter viros Saramita egregie imitabatur, quò denique tutius in publicum proferrent id quod diu fortasse intus coquebant. Fuerit ne mutua satietas & inhonestae libidinis furor, an contemptus & contumelia in urbem ipsam, an omnia simul, nescitur. Certè duo vilissima capita, Gulielmina ista & Andreas, coniurauere, vt instituerent nocturna bacchanalia, quæ contaminarent omnem aetatem, vicissimque ipsi contaminarentur: & instituerunt. Species nomenque sacrorum obtentui sumpta, quasi sacra ea, quæ in aperto fierent, nec pura, nec sancta satis credi liceret: sanctius augustiusque esse faciendum, si fortunæ suis, & votis propitium esse Numen velint. Duæ illæ furiae, apud suum vtraque sexum talia dictitando, praeparauerant multorum animos, vt quodocunque nefaria sacra inchoarentur, aperireturq; delubrum infame, darent nomina in nouos coetus, & ad cuncta obeunda ordine adessent. Extra Portam quæ Noua dicitur, fuit locus, quem isti Andreas & Gulielmina destinarant mysterijs sedem inanibus, & occasione mysteriorum cubile inhonestatis. Flexuosum os, informemque aditum habebat spelunca obsita vepribus quibusue alijs inculta vestiuntur, ad vsus fortasse bellicos olim extructum

tractum opus , deinde neglectum pace , quales passim circa pomœrium etiam hodie cauernae conspiciuntur , iamque dissoluta concameratio procumbebat in ruinas . Saramita corrogata ab suis stipe specum eum partemque campi circumiectam coemerat à magistratibus specioso in publicum hoc usus titulo quòd ponere in parietinis illis Oratorium vellet inuitamentum pietatis ad eos , qui per moenia quotidie inambularent . Fabris confestim adhibitis & purgato loco stetit aedicula profanatura urbem , & posita ara valuisque & claustris additis , Saramita & Gulielma sui iuris omnia fecere titulo vtentes alio , quòd sacra Aedes alioqui profanaretur , Paucos primò , deinde plusculos , deinde cohortem suam illam vniuersam , neque totam vno agmine , sed subinde alios inducebant , donec per singulos in orbem turpitudine iret . Cuius caeremonia haec fuit . Prima infandi coetus nocte , vbi promiscua virorum & feminarum turba in templo stetit , occlusis valuis , trabeati & mitrati diuersa in sede Andreas & Gulielma , ab omnibus , qui aderant , horribile singulatim iusiurandum exegere , nihil eorum quae ibi fierent , cuiquam esse dicturos : si fidem eam fallerent , tum vti Deus optimus maximus se familiam suam peste , fame , malis omnibus contingeret atque infectaretur . Id ipsum , vt quisque nouus gregalis , siue vir , siue femina , siue adulescens erat ascitus , conceptis verbis postea iu-

rabant. Vbi iuratum ita est : tunc Antistites adolent ignibus aras , celebrantq; cantu foedissimi ritus horrenda primordia , queis caetera turba succinit , prout instituti monitique erant. Et compositum in haec verba melos erat .

**CRESCITE ET MVLTIPPLICAMINI.** Momento dein vno symphonia conquiescit , ac lumine simul extincto omni , carmen dissimile aliud , aliosque modos ineunt viri , feminaeque , & his interiecta rudior aetas . Quodque mihi verecundiam huius sermonis auget , licentia tenebrarum & loci , volutabatur in eadem humo , cum filia pater , & cum fratre soror , sicuti facibus extinctis irruerant , & sicuti mysteriorum eorum lege capitale erat aperuisse os , gemitumue vllum edidisse aduersus eum qui primò corripuisset . Insuper ( honos auribus habitus sit ) alia quaedam fiebant , in quibus ne crescendi quidem & multiplicandi excusatio vlla titulusue esse posset . Caeterùm , antequam reliqua negotij huius peragam , minime distulerim id quod ad Patriae huius in tanto malo solatium aliquod magnopere pertinebat , atque in probatissimis repertum annalibus penè praetermisi . Quippe talium rerum authores Saramitam & Gulielminam ex alieno hinc solo oriundos fuisse ; ac sicuti fuerant ipsi peregrinae stirpis , ita coetus eos ex peregrinis instituisse , quorum affatim ad manum fuerit in vrbe semper plena alienigenarum . Cùm igitur prima sacrificiorum nocte,

talìa

talía quaedam gustanda & libanda concioni suae exhibuissent Andreas & Gulielma : per omneis deinde noctes , ad epulas vocati easdem velut inescatae bestiae miserabiliter ruebant. Gulielmina deinde post menses aliquot , seu libidinis intemperantia , seu prouidentia numinis quò maturius tandem retegendi sceleris initium veniret , diem suum obiit , nihil imminuta fama & errore , quem de muliere illâ ciuitas accepisset. In eius funere tanta fuit insania affeclarum , vt quibus studijs , & qua admiratione celebrauerant viuentem , mortuam quoque in coelum extollere conarentur , mentemq; & spiritum eius ad superos haud dubie excessisse populo persuaderent. Admouentes namque rosaria spurcissimo cadaueri , feretrumque coronantes , & eius contactu veluti sacrata gestamina rapientes auide , facere caeteros eadem , vt est procliujs ad talia populus , docebant. Simulata quinetiam coecitate , languoreue aliquo , nonnulli ausi sunt illudere publicae credulitati tamquam adspicerent repente lucem , exuerentque alij corporis alias calamitates , ob quas antea lux ipsa displicuisset. Et ad merita sanctitatemque Gulielminae referebantur cuncta , quasi iam redditus Coelo spiritus ea beneficia mortalibus ab Numine impetraret. Delata ipsa ad Claraeuallis monasterium , ibique collocata in tumulto , non sicuti cadauera caetera habebatur. *Lychnuchus* quotidie pendebat ibi aliquis , ardebatque cerae multum ,



multum, & votiuae tabellae casuum variorum affigebantur ab illis, quibus ludibria ista cordi erant: & conitutis in eam fallaciam multis, cum opinio quoque publica confirmaretur, parum absuerat, quin Gulielmae honoris causa publice etiam aliquid decerneretur. Sed iam tempus appetebat, quo recidere in capita impura fraudem, insigneque aduersus talia sanciri documentum oporteret. Nunquam enim Deus falli & errare sinit Ecclesiam in ijs, quae ad religionis & fidei summam spectant. Ac dissimulans maiestas illa saepe caetera mortalium flagitia, spatiumque poenitentiae praebens, nusquam in eo cunctata est, ubi de inducendo in Ecclesiam prauo cultu fastisque sanctorum inquinandis scelere vel adulatione hominum ageretur. Mortua, sicut dixi Gulielmina, cum sectam Saramita superstes obtineret, euenit quidam huiusmodi casus. Alexander erat Coppia negotiator praediues, & alioqui etiam honestus, ac rei suae bene gerens, nisi impudica vxor, bacchanalia frequentando illa, vulgandoque ibi muliebri decus, labe ea fortunam honestatemque domus conspurcasset. Damnauerat saepe maritus infelix nocturnos mulieris egressus, multumque clamitando dixerat, non placere sibi tantam pietatem: si vellet ad templa ire, satis longos esse dies: & velle scire ipsum, cur silentia noctis & horae destinatae pecudum etiam quieti, cur tenebrae ad id sacrificium delectae essent:



essent : cur sexus , ne media quidem luce com-  
mitendus turbis , per obscurum exciretur domo ?  
Mulier contra , nec voce , nec vultu superiorem  
in iurgio passa esse maritum , assurgit etiam in-  
festior atrociorque . Quid sibi quaereret inter  
feminarum sacrificia delirus senex ? cur non po-  
tius ageret negotium suum ? Non mirum postea  
fore si fortuna domus verteretur , & Numinis  
irâ retro sublabi aliquid inciperet , quandoqui-  
dem repente ditatus mercator ingrato aduersus  
superûm indulgentiam animo inquireret in co-  
rum sacra & ritus : minitari etiam auderet . Itu-  
ram ad nocturna se se sacrificia more suo : &  
tanto promptius frequentiusque ituram , quò-  
magis ille minitaretur latraretque . Aliquoties  
ita iurgati fuerant maritus & vxor , cùm qui-  
dem , remissum credo viri ingenium malitiosè  
olim odorata illa sciret probe aduersus quem  
sibi arietandum in eo certamine esset . Sed ma-  
ritus , quando nihil profici verbis videret , omis-  
sa altercatione , fingens se esse victum , nocte  
quadam , exeuntis vxoris vestigia dissimulanter  
& lenissime subsecutus , tamdiu stetit ad valuas ,  
donec ingredientibus per intervalla multis , ipse  
quoque ceu gregalium illorum vnus admittere-  
tur . Abdidit in angulum se se , quem extrema  
luminis , corporaq; & vmbræ multorum obscu-  
rabant . Ibi tacitus inuolutusque palliolo , quid  
rerum ageretur exspectabat . Videt sedentem  
in sua sede Saramitam , notatque haud ignota  
sibi

sibi multorum ora, & detractis velaminibus rafa capita muliercularum in coronae speciem, quem Gulielmina ritum olim indiderat, siue vt sacris illuderet ritibus, siue vt insigni eo à caeteris distingueret suas. Haec omnia videbat hospes, mirabaturque & inhorrescebat simul. Mox impudicitiae praefatiunculam, & gestientes concepta libidine choros, audit, datoque signo, extingui lumen videt, nec vltra dubitauit, quorsum spectaret tam obstinata pietas vxoris suae. Ea non procùl ab marito forte constiterat, arripuitq; ille vt momento saltem illo subduceret complexibus alienis. Luctando cum adultera, tempusque sicuti poterat extrahendo, spatium illud, & frustra anhelantem libidinem mulieris elusit: detraxitque annulum digito, quo postea teste vteretur ad id quod parabat. Dimisso foedo sacrificio valuisque patefactis, cùm caeteri exirent, exit ipse quoque & properus abit domum moesto cogitans animo, quàm saepe misera illa esset contrectata manibus alienis, & quàm deformis exitus impudicam maneret.)

Hinc recordatio coniugalis thori, & liberi fortasse communes angebant: hinc dedecus & ira stimulabat. Et magnum interim ex ignominia dolorem solabatur hoc ipso, quod reputaret, ignominiam eam communem sibi esse cum multis. Interdum etiam, non satis certus vltionis, haesitabat circa id, quod primo dedecoris adspectu agitauisset tacitus ipse secum, vt nimirum indi-

indignitatem foeditatemque eam detegeret publice, ac Vicecomiti ipsi principi Ciuitatis magno aliquo exemplo vindicandam exhiberet. Tam varijs vno tempore motibus animi turbatus reliquum noctis egit maritus postquam ab lupanari tedierat domum. Postero die poscebat ab vxore anulum illum quendam operis encaustici, grandiuscula pala cum adamante turbinato, pondus quoque designans, & diem notans ipsum, quo die id ab se munus accepisset. Adultera enimvero deprehensa pallefcere, neſtere moras, cauſari nonnihil, quaſi iam iamque prolatura verſare daſtyliothecam, ad extremum poſcere tempus, & dicere quod res iſtae minutae ſemper dum quaererentur, fugitarent, caedem poſtea non quaſitae comparent vltro. Sic mulier aliquandiu aeſtuauerat ad anuli mentionem atque tergiuerſata erat; cogitans ſcilicet interea quidlibet aliud quam ſua mala, & Bacchanalium imminentem finem, & raptorem anuli illa in luſta maritum fuiſſe. Nec minus ipſe fluctuabat adhuc, eligens conſilia aliqua, deinde damnans, donec egreſſus animo ſortem ſpiritumque inſtitoris, tale denique quiddam ſuſcepit. Conuiuium ſolenne parat quaſi natalitia daret, ſuo, vel vxoris nomine. Ei conuiuio adhibet propinquos & amicos, quorum vxores, aut filias in lupanari viderat, & frequentes adfuere: ſimul ipſe cum vxore diſcumbebat. Poſtquam hilare ſunt epulati, hi-

D laritaſq;

Jaritasq; etiam in lusus, & iocos excessit: quin spectamus (inquit conuiuij pater) ludum nouum quendam & iucundum, mulierumq; nostrarum capita sicuti sunt, subiecta oculis intuemur? Id modò cùm dixisset, iniecta in vxoris suae sinciput manu, direptoque velamine, coronae circulum ostendit, qualis esse presbyterorum solet. Quo spectaculo cùm obstupefacti attonitique omneis ora obuenterent sua, aliq; alios rogarent quidnam rei esset, tunc Coppa; magis esse miraturos dixit, si ludum eundem mulieribus vnusquisq; suis fecissent. Iuuat experiri, statimque, ridiculum visum, nudus in orbem capillo vertex, & muliercularum crania apparere mentita clericos. Voluerant illae quidem vnguibus, & ceruicum flexu, reluctationeque nonnulla reijcere vel declinare dextras capiti imminentes, sed corripiebantur atque inhibebantur acrius hoc ipso quod recusabant. Tunc verò Coppa ille orsus ab suspicionum suarum initijs, vt primò mulierem suam ab nocturnis egressibus coercere tentasset, vt diu ac nequicquam super ea re iurgatus, denique vestigijs insidiatus ad cellam deuenisset: ibi fanda infanda quae sibi accidissent ordine exponebat, promiscuos concubitus, incestuosa sacra, tenebris stuprisque inuolutos choros, suam quoque cum vxore luctam & temporis causa simulatos amplexus infelices & anulum ablatum qui testimonio etiam esse posset. Incendebat haec  
questu

quaestu & lacrimis : non vxores , aut filias , aut  
sorores , sed furias & propudia , & inimicas suae  
quamque domus esse illas , quas in honore &  
caritate , quas in delitijs errore miserando ha-  
buisſent . Aduersus quae , mulieres ipsae ne hi-  
ſcere quidem ausae stabant haud minus attoni-  
tae quàm viri . Videbant enim patefacta reſecta  
eſſe cuncta , ſeque deprehenſas . Inde maior  
etiam narrationi fides : ac vix temperauere  
quominus irruerent , ſuiſque ipſi manibus con-  
cerpendo ſingulas obruerent diei eius atrocita-  
te veterem coniuuij Lapytharum famam . Co-  
hibiti ſunt ab indice eodem hospiteque Coppa,  
qui rogabat , vt exemplo ſuo ſedate agerent , &  
rem tam indignam iudicij potius via perſeque-  
rentur . Poſtquam ab eo impetu , quem dolor  
& ira concitarat , collegere pauliſper animos ,  
ſententia communis omnium fuit , vt ad Mat-  
thaeum Vicecomitem res tota deferretur . Ille  
nouitate ac magnitudine flagitij , ſicuti par erat ,  
vehementiſſime commotus , deteſtatusq; verbo  
mulierum genus , indices eoſdem ad Sacrum  
Inquiſitorem ire iubet , indicioque delato para-  
tos ad imperia illius eſſe , ſimul ipſe cum eo de  
ea re colloquitur , & omnia quaecunque in id  
iudicium neceſſaria eſſe poſſint , pollicetur ; pe-  
cuniam , arma , militem , vim authoritatemque  
ſuam , totius imperij opes , imperiumque ſi ne-  
ceſſitas ita ferat , ipſum . Non tanta rerum  
mole tantoque motu opus erat . Pertractae

statim ad sacra Tribunalia mulierculae, ad singula de quibus interrogabantur, ita respondebant, vt negotij seriem, initia, progressus participesque omneis, Inquisitor teneret manibus, bacchanaliaq; ipsa, & lupanar veluti ante oculos haberet. Et quoniam in quaestione habenda impense data opera erat, vt quam minimo strepitu res ageretur, oppressi sunt affines ei sceleri omneis antequam rem agi eam suspicarentur. Callidiores promptioresq; aliqui, cum suspicati nonnihil, effugere voluissent, vel retracti sunt equite immisso, vel in ipso abeundi conatu retenti, vel vbi non comparuerant, extrusi, capti, producti ab ijs quos principis, aut Inquisitoris edicta ex amicis, & hospitibus inimicos repente proditoresque contaminatorum illorum fecere. Saramita ante omneis ipse Guilielminae maritus, & collega, & minister, post eam heres instauratorque sectae, magister libidinum, impostor, & sycophanta, helluo, leno, foediorque dictu bellua: is igitur sagacissime statim odoratus Bacchanalium cladem, & periculum suum, mutando subinde latebras aliquandiu cum fefelisset: repertus denique est apud nobilem viduam indicio vetulae, tectum inter, & laquearia, quò se se abdiderat. Ita omneis, alius alia via cum in carcerem venissent, rite interrogati, & confessi quicquid erat, damnantur flammis. Molles enim viri, & marcidae stupris adulterijsque mulierculae, & peregrinus  
fere

fere sanguis, ne ludicum quidem oculos, adeò tormentorum adspectum non tulere. Quae coluuius cùm incendio absumeretur, non fuit spectaculum, quale solet esse, dum in eiusmodi casibus, caetera adfluente multitudine, continent sese domi, longinquosue secessus quaerunt, quos ob propinquitatem aliquis ignominiae dolor attingit. Parentes & fratres & mariti praecipua nomina caritatis coniunctionisq; humanae aderant laeti spectaculo, cuius luctus aliàs nunquam finitur. Abruperat vnusquisque sanguinis & naturae leges aduersus ea corpora, quae sese ab natura domoque prius abrupissent. Saramita proprio & separato rogo est crematus. Iuxta cineres eius paulò post cremauere Gulielminae ossa cum tabulis & signis, & argento auroque omni, quae salutarium beneficiorum votiua scilicet monumenta circa tumulum pependerant. Ipsa quoque cella flagitiorum sedes, & domus impuritatis, plebe cum securibus, & dolabris accurrente momento penè vno deiecta est, & rudera caementaque omnia prius flammis vstulata iisdem in cloacas auhuntur, ne contactu ipso, terrae superficiem atque superfusum hunc aera contaminarent. In hunc modum oppressa, & deleta est secta, & officina muliebrium libidinum, quam mulier vna instituerat: non autem deleta labes, & ignominia sexus, per quem ea deformitas inuecta vrbi. Multa sane probra coniecere in feminarum genus veteres, quie



ex nostris ad contemplationem nequitiae sexus illius affuxerunt ex aliquo inter scribendum casu. Per seria, per ludicra frequentissima ea infectatio in omni litterarum genere reperietur, & seueritatis gloriam hinc quaesivere molles etiam viri. Non enim fortasse omnes oderunt adspersanturue sexum, sed lasciui quadam, & ostentatione ingenij ludunt sic in pompam, & speciem, vt ad vetera maledicta contumeliaeq; iam exoletas addant noui aliquid, & prioribus inexcogitati: fitque quotidie hoc plaudente palam quidem fama, & approbatione communi, viritim autem in arcano abpudentibus singulis. Adeo sexui illi deditus est noster plerumque sexus, hoc ipso deterior. Ego cum Gulielminae scelus, caeterarumq; Gulielminarum furiosam inexplabilem libidinem, fraudesq; libidinis causa excogitatas, & prodita conculcata matrimonia, quaesitam ante matrimonij tempus inhonestatem puellari etiam aetati, sacris praeterea rebus facta ludibria, & religioni insultatum, & penatibus illatos ex lupanari alieni sanguinis heredes translatamq; fortunam in adulterorum prolem: haec omnia cum narrando alijs, & ab ijs qui olim narrauerunt repetendo mecum ipse reputarem, veteris poetae sensum interea saepe tacitus laudavi. Nam nimium generoso spiritu tragicus dixit Euripides, fuisse optabile hominum generi, vt quaequam purior suscipiendis liberis via daretur, ne perfidum impudicumque



cumque animal procreationis causa habendum in societate vitae esset. Scilicet eius impudicitiam perfidiamque animalis respicere debuit, alter etiam pari generositate, & sapientia vates, cum videns cernensque omnia sine oculis, caneret: neminem vnum posse affirmare, cuiusnam hominis satum esset procreatus. Haec autem potius videbunt mariti, & conquerentur. Purgata, sicut dixi, vrbe, sublatoque lupanari, lata lex est de peregrinis, datumque Magistratui negotium, ut nequem ultra oediduum commorari Mediolani pateretur, nisi cuius causam ipse probasset, cognosceret instituta singulorum & vitam, conuenticula nocturnosque coetus prohiberet. Sed iam Turriani exules aderant magno, & ultimo sociarum ciuitatum conatu ad eiiciendum Vrbe Vicecomitem, cunctaque repetenda, & transferenda in Turrianorum domum, sicut ex ea domo olim Vicecomes ipse potentiam imperiumque rapuerat, quod Turriani prius ipsi raptum ex calamitate seruitioque Reip. Mediolanensis habuissent. Ciuitates autem quae ad reducendos in patriam Imperiumque Turrianos, extremo hoc conatu coniungere arma, illae scilicet fuere. Cremona, Placentia, Ticinum, Nouaria, Vercellae, Lauspompeia, Crema, & cum Demarcho Montisferrati Ricardus Langusculus, quem nouum ex hoste amicum repente Vicecomes alienauerat, data alteri Zaccharina filia, cum desponsa ei prius

prius fuisset. Nec vrbes populiue alij, qui in parte Vicecomitis habebantur, intacti nunc erant ab defectione, & fauore in partem alteram: familiaeq; potentes ab potentioribus alijs familijs inde eiectae sese ad Turrianos conferebant. Mediolani etiam in ipsa Imperij sede, vbi spes, & aduersus externa praesidium esse oporteret, plena omnia rebellium erant, & detecta ibi nobilium coniuratione, dum punitur perfidia, plures ad rebellandum irritati. Domus ipsa principis agitabatur mutuis suspicionibus, odijsque intestinis, & Petrum Vicecomitem patrem demortui Othonis, Matthaei patruum Galeacius Matthaei filius comprehensum repente, & catenis oneratum clauferat ferreo septo, ibique ceu nouum animal conficiebat tabe, & Iqualore. Nam sicuti fit cum praecipitia esse omnia ad exitum coeperunt, fessus negotijs Matthaeus atque tot pertaesus aerumnas, assumpto in solitudinum partem filio, maxima, & praecipua quaeque segniter, incuriose, remisse trans mittebat. Et iuueniliter ferox ille sine modo exercebat imperium, existimans apud tam infidos animos opus esse terrore, vt alienis exemplis alij in obsequio fideque retinerentur. Quae iuuenis acerbitas, & patris vecordia pacatis etiam rebus inutilis eò adduxerat rem, vt non iam per coniurationes occultas coetusue clandestinos, sed palam, aperte, confidenter, de Vicecomite expellendo Turrianisque in urbem admit-

admittendis consilia agitent. Anno hoc, qui millesimus trecentessimus alter salutis nostrae erat ad x. cal. Maias in Aula publici consilij, quae paulò antea compositis adulatione publica plausibus inchoanti imperium Matthaeo sedes fuerat: in eadem sede sedentes principes urbis ad populum tulere, vellent iuberent aduersus Vicecomitem iniri foedus, quod inter alias urbes initum firmatumque esset. Absque mora dubitationeque vlla illigauere se se foederi, tantaque licentia & contemptu ruentis fortunae acta ea res est, ut venirent in urbem foederatorum aliorum legati, atque vicissim hinc ad eas commearent. Exolescere inde quotidie magis, & vilius fieri Vicecomitum nomen: dilabi primò seruorum greges leuissimi semper & momento quolibet mutabiles: deinde alij, quos verecundia nonnulla tardarat: tum grauissimus etiam & intimus quisque: postremo circumspiciens ipse necessitatem solitudinemque suam vehementer cogitare defuga coepit. Bonacosa Burra erat vxor huius Vicecomitis communium aliquot ei librorum parens & per mutuam concordiam dilecta. Hanc neque trahere secum volens comitem fugae, & si domi relinqueretur, expositam fore ludibrijs inimicorum videns, intra sacrarum virginum aedes cum nobilibus aliquot ancillis abdidit. Monasterij nomen eius in nullis vsquam reperire anna-

libus potui : tantum extat apud omneis dis-  
sertè perscriptum hoc , Bonacosam Burram  
fugiente marito apud sacras Virgines lati-  
tasse . Abdita sic in tutum , vt ipse rebatur ,  
vxore , Vicecomes , cum in singula momenta , &  
ab hoste , & ab ciue , & ab domo ipsa cresceret  
metus , sublatiis , quae in illa trepidatione po-  
terant auferri , vno , vel altero comite clande-  
stinus , & ignotus vrbe excessit . Postquam ap-  
parere desierat , primo quidem nesciebatur ,  
quonam ille fugam intendisset . Mox vulga-  
tum est , Placentiam iuisse fretum amici alicuius  
subsidio , quem fidelem ibi potentemque ha-  
beret . Sed inquirebat vltra persequebaturque  
nemo : satis habebant , quod terrore ipso cape-  
re fugae consilium coegissent , quem per arma ,  
& acies deicere parati erant . Turriani fratres  
interea Cassoni filij , quorum nomina haec fue-  
re : Martinus , & Henricus , & Musca , cum  
alijs suae gentis hominibus exercituque foede-  
rato , constiterant ad Laudem Pompeiam ir-  
rupturi quouismodo in urbem , oppugnandoq.  
& obsidendo quaesituri in patrias sedes aditum ,  
nisi fuga Vicecomitis cuncta aperuisset . Ita sine  
sanguine ingressi rectà petiere dirutas suas ac-  
des , quibus hodieque id nomen manet , ibique  
raptim collocato domicilio , fortunam haud du-  
bie priorem , fauore nominis , & asseclarum  
opibus quaerebant . Sed in ciuitate , quae do-  
minari ipsa volebat , non poterat id esse in-  
cruen.

cruentum : ac duae factae protinus acies : vna propugnantium Turrianos , quos , & acciue-  
rant : altera defendentium patriae libertatem ,  
cuius repetendae tempus nunquam habituros  
esse aliud clamitabant , si nunc cessatum fuisset.  
Profectò nutantibus Turrianis , fugato , sicuti  
demonstratum est , Vicecomite , constitui hoc  
tempore status Reip. Mediolanensis potuisset ,  
Metropolisque liberari , nisi post lapsas semel  
res olim , caput potius vnum esse magno huic  
corpori , regique ab vno totum semper istud  
ignota mortalibus diuinæ prouidentiae dispen-  
satione esset decretum. Non enim aliter quàm  
decreti eius lege ac potentia fieri potuit , vt  
gens tam auida libertatis , impatiens obsequij ,  
domitrix expugnatriceque ciuitatum aliarum ,  
dominatum acciperet Turrianorum prius , dein-  
de Vicecomitem , deinde Turrianorum rursus ,  
& postea Vicecomitem iterum admitteret .  
Nisi fierent ista diuinitus , & nisi vellet excelsa  
Numinis prouidentia populum hunc assueface-  
re domino vni , arbitriumq; rerum ciuitati adi-  
mere , cui decora alia omnia contulisset , non  
defuerant animi spiritusque populo , & vires ,  
quais duas istas familias nihil iuris habentes ad  
imperium , coercere potuisset etiam pœnis ,  
quibus alij liberi populi suos homines appeten-  
tes patriae dominatum aliquando coercuerunt .  
Nostri , postquam ab exsilio Turrianos in vr-  
bem recepere , primò quidem acerrime nite-

bantur , ne reditus eorum publicae libertati obesset , deinde verò succubere violentiae inextinguibili, quae Metropolim imperio alieno addicebat : & sub fallaci ducis siue rectoris nomine , quo iam decepti toties erant , latitantem tyrannidem accipere , vt ne tyrannide quidem excussa alia liberi essent . Acceptis autem sicuti dicebam in urbem Turrianis , cum ciuile bellum esset ortum ex eo , quod pars generosissima ciuium reduces in patriam vrbique redonatos eos , sub legibus sub magistratibus volebat haberi communi cum ceteris iure : deterrimi quiq; reuocatis ita exulibus , imperium etiam vrbis dabant : fretus nouo hoc dissidio Vicecomes ausus est è latebris prodire , quas petierat , sperans , quia pertaesum Turrianorum esset , posse sui desiderium oriri . Eâ fiducia progreditur ad Pioltelum vsque , qui locus decem millia passuum ab vrbe abest . Legati Veneti qui per id tempus ad vtrumque Mediolanensium exercitum de pace venerant , impune venturum , dederant fidem . Ibi traditis depositisque insignibus abdicabat omni se se potestate , quam in populum Mediolanensem vsurpasset : nec ea modestia profuit quicquam ad id cuius causa suscepta erat . Direpta paulò post domus omni regio paratu supellectileque referta , cui pepercerant ad eam diem ob Galetium credo filium , qui arma adhuc militemq; retinebat . Tantisper , ista dum fierent , nullius imperio

imperio subiecta ciuitas , veteris Romanae  
 Reip. instar habebatur , dominatoresque suos ,  
 aut iam fugere vltro coegerat , aut persequen-  
 do armis agebat ipsa in fugam . Deinde , vi  
 vrgente illa , quae consilijs armisque omnibus  
 excelsa imminet , fato , si dicere licet quodam ,  
 ne diu compos vnquam esset sui Metropolis ;  
 ad accipiendos rursus , quos ab reditu fugaue-  
 rant Turrianos , pace inter se facta consensere  
 primores plebis , Conciliumque omne vrbis .  
 Ita reducti rursus in urbem Turriani , & ab fre-  
 quenti populo collocati in iisdem dirutarum  
 aedium vestigijs , quae tecti satis adhuc domi-  
 cilio praebebant : & studio impetuque multitu-  
 dinis noua deinde tecta ibi raptim excitaban-  
 tur . Non dubius iam hinc reducis familiae  
 gradus ad dominationem aditusque erat , haud  
 ille quidem transitu statim toto , repentinoque  
 passu , sed quotidianis per interualla progressi-  
 bus , dum , vel consensu publico , vel propen-  
 sione studijsq; singulorum , authoritas , & splen-  
 dor assidue nonnullus accedit , vel etiam ipsi  
 iam inde ab priore dominatu imbuti necessarijs  
 ad ista artibus , arripiunt quotidie aliquid , atq;  
 vsurpant , quo supra caeteros attollerentur .  
 Celebre per calamitates etiam familiae nomen ,  
 & ipsa dirutarum aedium moles , areaque illa ;  
 veteris aedificij magnitudinem testata parieti-  
 nis & ruderum aceruo : hinc vastae solitudinis  
 campus , hinc superstes palatij brachium vitata  
 iniuria



iniuria capax dominorum : hinc surgens noua  
 ab fundamentis Aula ; conclaueque supergre-  
 diens alte vicina tecta : & concursus illuc no-  
 bilium populique in parte splendoris erat , qui  
 ad principia rerum plus confert saepe quàm  
 arma , & omne virorum robur . Praeterea , fra-  
 tres ipsi egregie inter se concordēs , modestiq;  
 in alios , & inconculsi recentium certaminum  
 recordatione laceſcebant obsequia , nec habe-  
 batur indigna domus in quam transiret fortuna,  
 quae Vicecomitis fuisset . Initia certe conse-  
 rendi in eam principatus eadem fuere . Dux  
 Urbis absque mora Guidus creatur , qui postri-  
 die quàm nomen potestatemque acceperat ,  
 ducto in Comenses exercitu , profugum illuc  
 Vicecomitem , atque rebellium eorum ope re-  
 parantem bellum fudit , ac fugauit . Hoc dein-  
 de duce bellica res Mediolani administrabatur :  
 & facili confinio caetera eodem vergebant , ut  
 parum abesset , quominus respiceret vnus nu-  
 tum ciuitas , tot semper afflicta malis dum pu-  
 gnat aduersus id malum . Sed adimebat sensum  
 corruptae libertatis strepitus armorum , & com-  
 positis domi rebus irritata omnia extra urbem :  
 contempta foederis fides : & iam eadem pro  
 Vicecomite ciuitates , quae rebellionē sua fu-  
 gere ipsum coegerant . Namque Albertus Sco-  
 tus , qui Placentiam obtinebat , praecipuus  
 foederis Turrianorumque reducendorum insti-  
 gator , cū omnes ferē Insubriae populos ad-  
 uersus



uersus Vicecomitem concitasset, idem, postquam exturbatus ille erat, restituere extorrem conabatur: alienabat ab Metropoli Turrianisque quas antea conciliauerat vrbes, & leuitate incredibili sese postea rursus cum Turrianorum nomine Mediolanensibusque coniunxit. Nunc stimulis agitata eius pars maxima & validissima Insubrum circumsteterat armata urbem, ac depellere inde vi tota Turrianos volebant. Quin etiam ingressi subita irruptione moenia die quodam Nouarienses, & Cremonenses, & Placentini Scoto eodem duce atrox per omnis vias praelium edidere: iamque capto, & communito Viridario, toti vrbi minitantes, ab Portae Nouae milite, facto ex transuerso impetu depulsi sunt, & pars magna caesi. In ea tumultuaria dimicatione repentinoque conflictu, Andreas Vicecomes impacta in guttur sarissa deiicitur equo. Guidum Turrianum inuectum in medios temere hostes, intentis in ipsum vndique gladijs eripuit discrimini equus suus: eumque ferunt rediisse postea in pugnam, ec caeso Placentinorum globo intactum vulnere euasisse. Franciscus Fontana, qui Frisefio mortuo, Ecclesiam hoc tempore nostram Archiepiscopus habebat, praesederat prius Ecclesiae Messanenfi, indeque pulsus, Nolanum aliquandiu populum rexerat nihilo felice ibi ob temporum insaniam pontificatu, quam apud Siculos olim, & postea apud Insubres: pro-

propriumque viri fuit huius, in magna pastoralis virtute magnoq; animo, lacrymas tantum, & lamenta dare subiectorum malis. Remedia caetera magnitudine malorum excludebantur: nec vnquam ille virtutis explicandae locum inuenit, cùm admiratione virtutis, ab Ecclesia translatus ad Ecclesiam, ceu remedium, aliquod vnicum, & diuinum perditis ea tempestate mortalium rebus ipse admoueretur. Ab hoc Archiepiscopo Fontana Gulielmus Brusatus equestri dignitate ornatur, quod prodidere temporum eorum scriptores, neque propter actionis, vt existimo amplitudinem, neque propter hominis ipsius splendorem, sed quia familia ea Brusatorum, ob fidem erga Metropolim vnà cum familijs alijs eiecta Nouariensi agro Mediolanum venerat, eisque exulibus, tanquam in noua patria blandimenta honorum dabantur. Non interim Mediolani vlla erat ab armis quies; impetrante nimirum subinde Matthaeo ad resurgendum auxilia aliqua ab iisdem, vt dixi, qui stantem euerterant, vicissimq; Metropoli ciente suas, & fidelium suorum vires, non tam aduersus Matthaeum, quàm aduersus eos, quorum ille fiducia praesidioque adhuc nitebatur. Tunc in foederis rebelles noua inibantur foedera cum ciuitatibus earum rebellibus: & horum quotidie agmina Mediolanum in nostra castra sese conferebant. Venere inter caeteros, ab Nouaria Brusatus ille, quem ab Archiepiscopo Fontana,

Fontana, equitem fuisse factum memorauit : Si-  
mon Carobianus ab Vercellis : Aduocatus Ma-  
dius ab Como : aliunde alij acres bello, & cum  
sua quisque clientum, siue consanguineorum  
manu. Ioannes Montisferrati Demarchus qua-  
tuor millia peditum, & delectos equites duxit.  
Is cum familia sua in aedibus Ambrosianis est  
diuersatus. Exercitum Ticini reliquerat. Reip.  
nomine paratus alius exercitus fuit facile suf-  
fecturus aduersus eum motum, etiamsi nulla  
externa auxilia accessissent. Praecipua erat  
in Placentinos ira, quia ciuitas ea, non solum  
ipsa descuiisset, exuissetque foederis fidem, sed  
etiam hortatrix ad alias fuisset : princepsque  
gentis Albertus Scotus, mutando subinde so-  
cios, & amicos, leuitate sua illa quodammodo  
illusisse rebus videretur. Qua ira, Mediolanen-  
ses, ducto illuc exercitu, tantam agro Placen-  
tino vastitatem, tantumque vrbi terrorem intu-  
lere, vt Scotus, relicto principatu redigeret  
se in ordinem, vanosque suos mores, & illud  
mutabile ingenium transferret ad res priuatas,  
quas etiam repente pertaesus, voluerat resu-  
mere imperium, sed fastidiq. hominis, & Me-  
diolanensium metu ciues obstitere. Vicecomes  
collectitio suo exercitu Belinzonam, inde Va-  
risium vsq; progressus, posteaquam labi partes  
suas vidit, coeperat latitare rursus & aliquandiu  
nihil mouebat. Nec Turriani interea laeti de-  
recto nobilium consilio, qui delere internecone

F fami-

familiam, & patriam sic liberare coniurarant. Inde exilia, & proscriptiones, & peruagante magnas domos poena coniurationis, execratus passim dies ille, quo exsules eos in urbem, postea in principem urbis locum admisissent.

Cum haec Mediolani forma rerum esset, sacraeque res & profanae, & semper admista domesticis externa sic haberentur, exhibat annus humanae salutis millesimus trecentessimus octauus, quo non fere plenior alter Populo Mediolanensi tristium ambiguarumque rerum fuit.

- Perculit exitus huius anni graui clade Turrianos, extinctis intra paucos dies, Musca & Martino, viris acribus & inquietis magnae famae
- cupidine, vt cum eorum vita concidisse spes in posterum & consilia Domus viderentur. Musca confectus aliquot tabe mensium obiit Octobri
- praecipitante, Martinus ineunte Nouembri, continuatis prope funeribus, quae funera Ciuitatem in diuersum affecere, prout oderant homines, aut fauebant. Etiam Ecclesiae studia
- disparia in mortuos apparuerunt. Nam ad priores exequias, ordines vniuersi prodire cum insignibus suis, atque pagatim ex agro suburbano sacerdotes adfuere. Stratum erat fere trum versicolori pretiosa pelle: conchiliatam umbellam, quatuor viri militares totidem hastis attollebant: corpus exanime purpurea in veste Franciscanae aedi est illatum. Martino, neque Cleri, neque umbellae honos idem fuit. Sed

pompam

pompam auxere circumfusi equites obuersionem in  
 terram clypeis trahentes vexilla per vias. Huic  
 priuato luctui, publicus Ecclesiae luctus adiun-  
 gitur, detecto Dulcini cuiusdam scelere, quod  
 pertinuit ad urbem deprauandam inficiendamq;  
 religionem. Homo Mediolanensis hic fuit Dul-  
 cinus: & qui rem tradidere, Fratrem vocant.  
 Sed neque cuius ordinis fuerit, perscriptum ex-  
 tat in ullis annalibus, neque nos ignoracionem  
 hanc esse iacturam vllorum hominum arbitra-  
 mur. Secutus ab ineunte aetate sanctiorem  
 intra claustra vitam, aliquandiu steterat inter  
 aequales absque labe, non segnem idem ad li-  
 terarum studia, quae in Monasterijs celebra-  
 tur. Postea degenerauerat in perditos mores  
 & opiniones malas, & suam vrbe tota sectam  
 occultè profeminabat, expertâ nimium saepe  
 talium ingeniorum importunitate, vt socios er-  
 rorum quaerant. Sacri Quaesitores, re com-  
 perta, cum illico prehendi hominem iussissent,  
 aufugit ille arreptâ secum mulierculâ, quam stu-  
 pro simul, & disciplina sibi deuinctam habebat.  
 Secuti deinde complures, qui, vel misere cor-  
 rupti, viam illam esse salutis opinarentur, vel  
 deprehenso scelerum magistro, perculsis ob con-  
 scientiam animis, iudicij poenas timerent. Hi  
 cum duce suo, colles, qui sunt circa Nouariam  
 insedere, simplicesque montanos in suum dog-  
 ma trahebant, donec satellite immisso, capti  
 sunt ad vnum omnes, & in proxima Vercella-

rum vrbe cremati . Hoc ea tempestate triste  
spectaculum , & exemplum Vrbs nostra tulit .  
Insequente anno , Franciscus Archiepiscopus  
moritur apud Angleriam in arce : cùm ciuiles  
turbas , atq; temporum eorum mala pertaesus ,  
ibi hyemem ageret , captus etiam amoenitate  
loci . Namq; Angleria in Verbani lacus litore  
sita contra Aronam , fruitur Oppidi montium-  
que prospectu , & late fluentibus aquarum spa-  
tijs , & puro ac patente coelo , nec alibi rigor  
anni minus sentitur , vbi Sol cursum suum ad  
septemtriones inflexit . Possessa fere semper an-  
tiquitus Archiepiscopo Mediolanensi , dein ver-  
sis rebus , & dilapsa veteris potentiae mole sae-  
pe principes mutauit , donec vnà cum reliquo  
Verbani lacus dominatu perueniret ad Comites  
Borromaeos , ac rursus excideret ex ea domo  
rursusque restitueretur vt memorabo si conti-  
gerit , vt nostri aevi varietates attingam . Tunc  
Pontifici nostro manebat Angleria , simul ad-  
uersus pericula munimentum , simul ad valetu-  
dinum & curarum incommoda secessus oppor-  
tunus , quam vtramque commoditatem secutus  
hoc tempore Franciscus ferebatur . Sed mors  
etiam ibi senem inuenit . Indoluerè Mediola-  
nenses plus aliquanto quàm vt externus deces-  
sisse Pontifex videretur : nec fortasse nostratium  
aliquis post Sanctorum aetates antea pari desi-  
derio celebratus erat . Adeò ille , cùm Ciuitate  
Parmensis esset , vt pro Mediolanensi ciue ha-  
beretur

beretur effecerat comitate in omnes, nec se se partibus vllis adiungendo, quae duae res communia sunt officia peregrinorum in aliena ciuitate, & vbique propria illius, qui Pastor esse populorum velit. Non tamen defuere veteris memoriae varietates, quae factiosum exulemq; facerent, & Angleriensem arcem exilij sedem Archiepiscopo, non partem Ecclesiastici dominatus fuisse commentarentur. Corpus quod fuerat huius Archiepiscopi, cū Mediolanum sepulturae causa deportaretur, mista ciuium, & clericorum agmina duxere funus: tumulus in Templo maximo paratus erat: ibi peracta est sepultura: nec de successore dubitatum. Cassonius Turrianus ex Ordinariorum Collegio supra ceteros eminebat dignitate vitae, & ingenuarum artium disciplinis, quantum in ea temporum & rerum perturbatione excellere quisquam posset. Aderat familiae fauor, quae saeuos Reip. perpessa casus, hoc etiam poscere solatium videbatur. Et Musca pater recenti sui nominis memoria, filio commendationem addebat. Atque ipse manifestus erat, generis fiducia priuatam illam quietem detrectans, & splendidius ampliusque nonnihil appetens, quā quantum illud Canonici Ordinarij nomen haberetur. Quippe diu custoditus inter primores honor ad plebeios promiscue vulgari coeptus erat: & dum turbatur haec Patria bellis, aliqui perue-  
nerant in Collegium, quos, optimates esse sibi  
dedecoros



dedecoros putabant. Ita Cassonum, neque obscure, neque indigne petentem, Patres Archiepiscopum renuntiauere, consentientibus etiam eorum suffragijs, quos nuper in ordinem ascitos, nobilitas multum infra se despectando, penitus à se alienarat. Placabat, siue continebat offensos eorum animos, resurgens iterum in Guidone post Muscam & Martinum potentia Turrianorum: eaque Domus duplici nuper funere afflicta, dein excitata rursus, terrore sui nominis frenabat ciuium animos, veluti cum vnus dominatur. Namque Guido Francisci F. Ducis nomine Remp. obtinebat, magni animi vir, & fraterna ad eam diem, sicuti videbatur, in suos caritate: necdum venerant ea dissidia, quae postea domum funditus vniuersam euerterunt. Simul atq; sui sanguinis habere se Pontificem vidit, velut in libera ciuitate, tulit ad Populum, vellent iuberent, mitti publice legatos ad Sedis Apostolicae legatum, vt, quem

- Canonici Ordinarij suo iure Archiepiscopum Ecclesiae Mediolanensis nominauissent, ei ratus honos fieret auctoritate suprema: subiecitq; pauca de viri laudibus, & suae Domus aduersis, & vt ea tandem conquiesceret. Decreta repente legatio, quam postularat, & clarissimus quisque in eam delecti, attributo sexaginta dierum sumptu, vt singuli senos equites ducerent: cumque pecunia non suppeteret ex aerario, ab ipso Guidone mutuum sumpsere. Cortonae in

Etruria



Etruria legatus Apostolicus agebat . Ed Mediolanenses iere , & exposita nominatione Collegij , consensuq; Ciuitatis , vt rei totius auctor fieret , impetrauerunt . Sunt , qui Cassonum ipsum iuisse vnà cum legatis tradant : inde domum redeuntem , in Claræ Vallis Monasterio substitisse per aliquot dies : effusa illuc ciuitate deductum in Vrbem : quomodo veteres imperatores triumphabant , instructa fuisse omnia Guidonis astu ad populum alliciendum , cuius animi plerumque capiuntur inanibus , neque quicquam tantopere valet ibi , quam species , & ea , quae sensibus hauriuntur , Ferme sub ingressum hunc noui Pontificis in urbem , cùm principum aliqui , seq; & patriam , & libertatem serò respicientes , aduocata in Palatium concione , de mutando Duce salubre consilium exposuissent , attonitos atque trepidos ad eam rem animos inuenere multitudinis , haud alia magis gratia , quàm ob recentem , sicuti traditum est in capeffendo Pontificatu splendorem & maiestatem . Proponebant principes veterem illam , & in omni bene temperata ciuitate semper adhibitam rationem , ne magna imperia perpetua forent . Dulce libertatis nomen , instituta maiorum , pericula nimiarum opum , & quantò melius foret , eos imperare , qui vicissim esse parendum scirent , quàm vnum potiri rerum . Haec omnia primò clandestinis agitata sermonibus , etiam libere memorabantur ab illis ,

illis, qui nobilitate ingenua contemnere Tur-  
 • rianum poterant. Sed quia capta multitudo  
 erat splendore nominis, frustra fuere. Inside-  
 bat enim animis & adhuc obuersabatur ante  
 oculos illa rarò antea, postue spectata rerum  
 & hominum amplitudo, cùm Archiepiscopus  
 Cassonus & Guido Princeps, Metropolitim hanc,  
 & velut vna in domo constipatum honorum  
 florem suo capite gerentes inueherentur. Illos  
 ipsos abrogandi principatus auctores, memine-  
 • rant, quasi calones lixasq; Tutrianorum inces-  
 sisse. Strata coronis itinera, vestiti parietes  
 • auro, egesta in publicum omnia, quae priuatim  
 ad magnificentiam & ornatum expetuntur, por-  
 tae triumphales immistae caelo, celum ipsum,  
 quacunque pompa incederet, purpura siue lin-  
 teo inumbratum, & tota deniq; illo die inquis  
 ciuitas, deliberanti nunc, siue potius insanienti  
 populo caliginem offundebant, vt quos in tan-  
 to splendore conspexerant, eos supra mortale  
 fastigium, animorum suorum existimatione col-  
 locarent. Prope subibat religio statuendi &  
 committendi quod ostendere Domum eam pos-  
 • set. Atque auxit admirationem, perculitq; ve-  
 hementius animos ipse Guido, cùm effatus  
 pauca, vt positis studijs, Ducem crearent opti-  
 • mum, è concione statim abiisset. Videbatur,  
 Patriae salutem ante res omnes habuisse, de-  
 celsisse Concilio, ne praesens obstaret libertati.  
 • Tantò promptius eum, non refecere modò,  
 sed

sed perpetuum esse Ducem Reip. Mediolanensis iusserunt. Cassonus inde Archiepiscopus ab Episcopo Nouariensi, Summi Pontificis nomine, sacris initiatur, quae solennia erant consecrando populorum Pastori. Caeremonia peracta est in Templo maximo, cuius ordinem antiquissimae tabulae sic breuiter exsequuntur. Fecisse Nouariensem ad Aram cum symphonia & cantu. Prolato diplomate stolam albam indidisse Cassono: crucem tradidisse, quae praeferretur. Cum Turriani tenentes in hunc modum urbem utroque dominatu starent in summo rerum culmine, Guido est ausus insultare Vicecomiti, & afflictam illius fortunam incessere ludo, qui multarum lacrimarum ipsi praesagium tulit. Scilicet ut eo praesagio deuoueretur excidio tota Turrianorum Domus, atque suspicionibus primò, deinde iniurijs in se ipsam concitata dissiliret, & paulo antea felices illi, Cassonus Archiepiscopus, & Guido patriae pater habitus, duo inuicem exempla rerum humanarum fierent. Matthaeus Vicecomes, post opes accisas morabatur in agro Veronensi: locoque Nugarola nomen est, ubi ille, quasi veterum philosophorum vnus, casum sapienter aduersum tolerabat. Illic in Athesis ripa comite vno die quodam inambulante conuenere qui tria simul haec Guidonis nomine percontarentur. Eequid ageret? An speraret aliquando, se futurum esse Mediolani? Ac, si spem eam agita-

G ret,

- ret, quam fore sui reditus diem, quodue tempus arbitraretur? Vt ibat, manu virgam tenens, ita responsum dedit, Guidoni quod referrent. Ipsos vidisse quid ageret. Credere se venturum in Patriam: & fore compotem Urbis, tunc cum peccata Turrianorum, in altera posita diuinæ librae lance, peccatis propenderent illis, quæ ipsum expulissent. Non exulis eam, sed veluti missam è coelo fuisse vocem declarabunt ea, quæ sunt infecuta. Iam enim factum appetebat, non vanum atq; superstitiosum illud, quod plena errorum antiquitas, necessitatem & nexum esse causarum credidit, sed
- vere ineluctabile aliud ex cælesti in humanas fraudes ira, quæ lentos sæpe gradus mouet ex longinquo, & inopinato. Neque tamen Vicecomes ipse postea diu vitaturus erat idem telum, diu melior erat futurus. Turriana res ita deleta est, vti demonstrabo. Fortè acciderat, vti rem Ferrariensem, intercisa legitima & iusta Ducum successione, Romanus vindicaret, obturbantesque Venetos, bello acerrimo persequeretur. Et quia non satis proficiebant arma: Pontifici visum, vti rem gereret alteris etiam armis, quæ aqua & igni perduelles impios arcent: eiusque rei causa, sedens Mediolani Cardinalis Arnaldus edixerat cunctis per Italiam
- Episcopis, vti Bononiam conuenirent. Cassonius Archiepiscopus ad Concilium iuit ita, sicuti oporteret conspici tantæ Urbis Pontificem:

& quò spectatior iret, additi equites ab Guil.  
done, comitatus omnis ad regiae penè fortu-  
nae similitudinem instructus. Fueritne vetus  
simultas, & odium iam inde à principio inclu-  
sum animis, qualia etiam inter proximos ve-  
nera tecta saepe mutuis blandimentis nutriun-  
tur: an subita res, an sine re, mala suspicio,  
haud ego pro certo affirmauerim. Sanè post-  
quam Cassonus Archiepiscopus ex Bononiensi  
illo conuentu Mediolanum redierat, infensa &  
infida esse omnia, inter ipsum, & Guidonem  
coepere, diuisaque Domus in hunc, aut illum,  
euertere se ipsam, & conuellere à fundamentis  
properabat. Tumere animi, mutari vultus, in-  
termitti colloquia, declinari patruelium fratrum  
occursus: ex vtraque parte comparari gratia-  
rum externarum subsidia, velut ad res novas &  
magnas. Ciues reliqui, videbant quidem non  
sanas esse mentes, sed quid esset negotij, non-  
dum plane suspicabantur. Parari vim aliquam,  
aut timeri, simulari domesticas inimicitias, &  
alijs imminere malum: vel si nihil simularetur,  
armari Turrianos in mutuam perniciem appa-  
rebat. Quotidie noua hominum ora conspicie-  
bantur, & ex agris armati veniebant in urbem.  
Cum rebus & opinionibus huiusmodi suspen-  
sa ciuitas esset, erectiq; starent omnes ad id quod  
fortuna spectaculum pararet, peperit denique  
Guidonis animus ea, quae iam dudum partu-  
riebat. Ad Cal. Octobris, conuenire & adesse

- Turrianos omnes in Templum Maximum iuber: esse quae de reconciliandis animis & de maximis familiae rebus agere communiter velit. Spes niefta concordiae, summum imperium, religio quoque loci, & ad extremum, fiducia consanguinitatis, fecit vt frequentes adessent, rati posse placari si quid inter ipsos esset offensum: necdum intercessisse tantas iniurias, vt sub tutela Templi augustissimi violari deberent. Archiepiscopus ipse non recusauit interesse conuentui. Postquam omnes adfuere, ceteris intactis, Archiepiscopo fratribusque manus iniiciuntur. Ille cohibetur intra Palatium, appositum etiam ad fores milite: fratres Angleriam in artem asportati & inclusi. His nomina fuere: Paganus, Eduardus, & Moschinus. Napino, quem simul comprehendere destinatum erat, profuit illo die casus, cum fortè in agro, volatu accipitrum oblectaretur. Nuntiato tumultu, proripuit se se repente Tricium, atque ibi occupata & munita arce transitum illius tempestatis expectabat. Reliqui Turriani, cum intra Archiepiscopi domum stetisse iniuriam, seque paucorum periculo esse defunctos viderent, aliquantum ex ea solitudine, quae nuper omnes habebat, remisere. Reputabant, non esse saeuitum in alicuius vitam: laxè custodiri domi suae Pontificem: posse iustam subesse causam, & fortasse suspiciones & odia potissimum huc vergebant. At Guido, postridie quàm haec

haec erant gesta, conuocat iterum gentiles suos, & cum illi non detrectassent, orationem habuit, qua pietatis simul, & grauium irarum signa permisceret. Non dici posse quanta recusatione animi, quantisque dilationibus ad consilium necessarium accessisset, ut sacrae potestati, ut sanguini suo faceret illud, quod pridie esse factum vidissent. Beneficijs suis semper ornatam domum, gratiam hanc referre propinquo, & parenti, & principi, ut in ipsius damna se secum hoste consociaret. Atque, Cassonum Archiepiscopum illum, à quo moneri & corrigi caeteros oporteret, ultro auctorem esse consiliorum, ultro, quantum in ipso foret, iam Vicecomitem in urbem introduxisse. Nam, ne ignoretis, inquit, Matthaei neptis desponsa Moschino est, huius nostri Pontificis fratri:

„ Napino altera neptis eiusdem Matthaei datur:  
„ Paganus Giberti Corregiensis affinem in matrimonium ducit, quae connubia, instrumenta sibi  
„ in nos Archiepiscopus quaesiuit. Et nuperrime  
„ ille: cum Bononiam Concilij causa proficisceretur,  
„ iter illud à summis Ecclesiae rebus Apostolicisque  
„ mandatis, conuertit ad excidium vestrum, & meum, & Patriae totius. Quippe  
„ Parmae sunt ab eo inita consilia cum Corregiensi,  
„ ut si ego ad Casanum accessissem, in  
„ traiectu Abduae fluminis interficerer, & capite  
„ sublato, Patriam hanc inter se diriperent hostes  
„ nostri. Subiecit inde Guido, huius parati facinoris



noris & initi consilij testimonia & indicia ,  
• quae haberet ; ac nominatim, Philippo Langusco, & Antonio Laudensi notam esse rem  
• affirmavit. Erant in Concilio, praeter Turrianos, Tegnacca Palauicinus, Iacobus Moncia, Philippus Motta Principes Nobilitatis, alijq; praeterea , quos Turriani secum ob priuatas quisq; necessitudines & amicitias in eum locum adduxerant, ad casuum atq; suspicionum incerta. Hi magnopere coepere Guidonem hortari, vt, & sacrae dignitatis in Archiepiscopo, & propinquitatis in fratribus meminisset. Respiceret communes ataus, & Patriam, & seipsum, neue se se demitteret eò, vnde receptum postea non haberet. Hostes illos ipsos, cum quibus Archiepiscopi domum affinitatibus esse consociatam indignaretur, posse connubiorum pignore, & caritate reconciliari. Sin animos gererent implacabiles & malignos, non offerendam illis in sinum tantam esse fortunam, quanta maiorem optare ne ipsi quidem possent, vt rueret in se domus, ac sine vlla externa vi, domestico furore cruentaretur. Quòd instructum dolis flumen, & paratam in Abdua sibi fuisse necem dicat, valde esse videndum, ne capitalissimae sint eorum insidiae, qui tales ad metum insidias proponant. An aliquid posse dici tam incredibile, quàm hoc? Guidoni Turriano, Principi  
• Mediolanensium, quem Urbis arma circumstent, antecedant, sequantur, & tanta vndique cingat



cingat excelsae fortunae moles : huic igitur in suburbana prope aqua , fraudem & vim exterram esse collocatam ? Ac si tamen aliquid fuerit , potius oportere sanari lenibus remedijs animos , & venerari Deum , atque tutelares vrbis Diuos , quàm vlciscendo , assequi , vt aliud ex alio malum renascatur . Nam hunc semper coniurationum violenter oppressarum exitum fuisse . Guido respondit , cordi fore sibi consilium amantiſſime quod proponeretur , & habiturum esse rationem , vt ne Populo Mediolanensi tam bene de se merito vlla in re displiceret . Interea , Cassonus Archiepiscopus cingebatur indies acriore custodia , Palatij valuas , aditusque & exitus omneis obsidebant armati : conditiones variae proponebantur , quarum iniquitate , potestas augustissima redimeret illius domestici carceris ignominiam , & captiuos fratres . Conditiones autem eae quanam fuerint , minime traditum est : sed licet coniecturam capere de caeteris ex vna , qua fundos ad Saluanecium vberrimos ac late patentes in ea captiuitate dimisſe Archiepiscopum constat . Viceſimus iam erat dies à primo captiuitatis die , cùm legatus Apostolicus , quem , ob rem Ferrariensem , & Veneta arma , misſum fuisse memorauimus , re comperta , Guidoni , & filijs eius cum horrendo carmine sacris interdixit . Eius interdicti auctoritas in oppido sancti Michaelis publicis tabulis consignata

consignata est , & Episcopo Nouocomensi negotium datum , vt ille tristi munere defungere-  
tur , atque superba subeundo limina , coelestes  
• diras ad Guidonem & filios introferret . Enim-  
verò , tunc maxime si vnquam aliàs est intelle-  
ctum , quàm tremenda sit potestas illius Aposto-  
• lici fulminis , quo protinus concidunt , non af-  
flata modò corpora , sed vniuersae domus , tota  
vicinitas , ipse ciuitates eodem ictu , & fortis  
humanae commercium obmutescit . Statim vbi  
Guido cum sua prole tergemina tactus est hoc  
• fulmine , ceu deforme animal , omni paulatim  
dilabente ministerio destituebatur . Abierunt  
ex aula , primò innocentissimus quisque , deinde  
his proximi , postremò seruorum vulgus , &  
amicorum intimi , raraque per urbem adulatio  
principem agnoscebat . Paganus Turrianus erat  
• Episcopus Patauij , columen familiae propter  
seueros mores & magnam famam , nec se se an-  
tea gentis suae turbis implicarat . Is , cognito  
rerum statu , quae Mediolani agebantur , &  
quemadmodum Guido princeps Urbis , Archie-  
piscopo violato , meruisset extrema , dignam  
sua grauitate actionem suscepit placandorum  
animorum , & eius rei causa Mediolanum ve-  
nit . Simul etiam vicinae Ciuitates erga Metro-  
polim adulatione , & studio , vel quòd sua inte-  
resse arbitrarentur , destinauere pacificatores  
• legatos , quorum nomina in publicis tabulis hoc  
ordine sunt reperta . LEGATI CIVITATVM

AD

AD PACEM INTER CASSONVM  
ARCHIEP. ET GVIDONEM DVCEM  
• ET SECTATORES PARTIS VTRIVSQUE  
FACIENDAM. Philippus Languscus Legatus  
Ticini. Antonius Legatus Laudis Pompeiae.  
Gulielmus Brusatus Legatus Nouariae. Simon  
Carrubianus Legatus Vercellarum. Venturinus  
Bencionus Legatus Cremae. Vrbs Nouoco-  
mum, & Vrbs Bergomum binos legauere, quo-  
rum nomina sunt omiffa: titulus tantummodo  
Legationis manet. Harum Ciuitatum Legati  
cum Antiftite Patauino communicantes quoti-  
diē confilia, excufantes iniuriam, auctorem  
iniuriae mitigantes, omnem honestae satisfac-  
tionis viam, & in posterum ftabilimenta pacis  
exfequebantur. Facile partium animos in prae-  
fentia compofuere. Quippe Caffono Archie-  
pifcopo magnum ad omnia vinculum erat, cir-  
cūdata domus in carceris formam, inclusi  
carcere fratres, & procliuis ad vltiora transi-  
tus: illum alterum irata lux, alienata prope  
vita, & minitans quodammodo caelum, acci-  
piendae paci facilem dabant. Et tamen nescio  
quomodo non fine magno Pontificis dedecore,  
Guido fuperior in conditionibus fuit. Ad v.  
Cal. Nouembris in templo maximo facta qua-  
lifcunque pax inter Caffonum & Guidonem,  
eiusque pacis tabulae recitatae magna voce, vt  
omnes audirent. Iurauit Archiepifcopus, fe  
nulla in re aduerfarium fore Guidoni Turriano

gentili suo : rem , salutem , commodaque eius cum tota domo propugnaturum esse . Vicissim ipse Guido sua carmina , suumque iusiurandum peregit . Legati nihil iurauerunt : affirmauere tantum , se suis & Ciuitatum suarum opibus adnixuros , vt ea , quae iurata essent , sancte inuiolateq; custodirentur . Sed vana erant omnia propter paratum excidium imminentemque finem vniuerso Turrianorum dominatui , de quo Matthaeus Vicecomes olim in vatis prope modum cecinerat , cū diceret : vbi Domus illa peccatis antestaret , tunc fore , vt pulsi pelle-  
rent expulsores , ipseque in Patriam rediret .

Ea scilicet hora , idque fatum , non iam appropinquabat , sed erat in ipso prope limine , rapidum idem & occultum , & post longa curricula insidians vni iam pene momento . Fuerat inter conditiones , vt ab ea caeremonia quam retuli , protinus Archiepiscopus in extremos prouinciae fines iret , abijtque minitans Guidoni , & coquens in ipso itinere consilia rerum euer-  
tendarum . Potuit offensus animus , & in ipsa concordiae simulatione plenus irarum , alia quoque secum agitaſſe pernicioſa & funeſta , quae poſcerent occaſionum , interualla , & maturitatem ſuam . Promptiſſimum omnium fuit , accerſere externa arma in Italiam , & Henrico Lucimburgo , qui fuerat Romanorum Imperator electus , offerre ſpem alterius Imperij , diuiſam factionibus urbem , ſub tyranno male quietos animos  
ciuium ,

ciuium , atque praeter vulgata haec , occultas etiam opportunitates notas ei , qui semper in hac vrbe , pars maxima rerum fuisset . Nec deerant velamenta consilio , si sine armis dissimulanter ac tutò geri rem placeret . Namque ferreo diademate coronari in Italia Caesarem antiquus erat mos , idque diadema Modoetiae veluti magnum Imperij sacrum adseruabatur . Possè Caesarem , petendae coronae simulatione venire Mediolanum , & turbatis iam rebus , satis fore si conspiceretur . Haud sane displicet res Henrico , missaque Romam legatione per speciem obsequij , Apostolicam etiam auctoritatem inferere conatibus , ob negotij magnitudinem , & varios hominum sensus decreuit . Petijt vt sibi ad capeßenda Imperij solennia venire in Italiam liceret . Id facile impetratum . Cardinales etiam missi quatuor itineris comites . Ipse , priusquam iter ingrederetur , Constantiensem Antistitem praemisit , qui Ciuitates , & Principes Italici nominis doceret de aduentu suo , & quemadmodum ea pacata profectio , salutarisque omnibus futura esset . Ac ceterae quidem per Italiam potestates , populiq; cuncti , quacunque Constantiensis incescit , ostendere laetos animos , aut simulauere . Mediolani , Guido Turrianus , neque laetus fuit ea re , quae nuntiabatur : neque paruit notissimae regnantium arti , vt , quod intus non erat , id fronte saltem , & oculis , & aliquo sermone mentiretur .

Senferat, siue fuspicabatur, Archiepiscopi exulantis hanc esse machinationem: eum priuatas iniurias, familiae ruinis, & patriae seruitio vltum iuisse. Iam enim praeter Archiepiscopi negotiationem & fremitum, & minas, quae ab exilio penetrabant in urbem, ipsius quoq; proximi palam Henricum accersebant. Et inclusi ad Angleriam fratres, Eduardus, Paganus, & Moschinus, quamquam acerrime custodirentur; quibuscunque poterant colloquijs & litteris miscebant lacrimas & questus, probra in Guidonem, Caesaris laudes: ipsius pene Ciuitatis voce liberator Henricus expetebatur. Guido, cum partium suarum homines, in quibus spei plurimum habebat, ex vicinis ciuitatibus euocasset, atque collato cum ijs capite, consilia repellendi Caesaris agitare, triste in eo conuentu responsum accepit. Consensu namque omnes, accipiendum esse patentibus portis, & negotium fore salutare totius Italiae rebus acclamauerunt. Quo responso concidit animus Ducis, & adesse ultorem Archiepiscopi Deum sensit: iamque Caesar aderat exeunte Octobri Insubriae limitem ingressus cum Germanorum principum, & Italicae nobilitatis cohorte. Proceres Ecclesiae, ciuitatum rectores, aut legati, nostra cum exteris pompa Imperatorem deducebat, & quod propius incederet, eò plures confluebant. Ipse, comis alloquio, largus beneficijs, exhilarabat omnia: proscriptos & exules in suam

suam quemque ciuitatem obuia liberalitate reducerebat. Restituti praeter ceteros, Archiepiscopus Rauennatensis & Episcopus Tridenti: de Archiepiscopo nostro nihil esse traditum minor, cum reductiones exulum aliorum sint traditae & perscriptae nominatim. Certè indicant Acta, Cassonum Archiepiscopum ab Caesaris aduentu Mediolani reducem fuisse. Interea Matthaeus Vicecomes ille tanti nominis exul, cui quiescenti triumphus ex victore olim hoste pulcherrimus parabatur vnà cum Patriae dominatu, solerti consilio fortunam suam adiuuit, fremente, sicuti est animaduersum, Archiepiscopo Cassono. Namq; Cassonus, voluerat ille quidem persequi superbiam Guidonis, vlcisci contumelias, rerum summam aliò transferre: ceterum, non erat ea res cordi, vt summum vrbis imperium ad aemulam suae genti domum rediret. Euolui fortunae culmine Guidonem Turrianum: non autem pro Turriano dominari Vicecomitem volebat. Neque recentes affinitates, & longinqua connubia, de quibus est demonstratum, habebant eam caritatem, vt veteres atque flagrantissimas inimicitias obliterarent. Ac si sublatae forent inimicitiae, non tamen consilium erat, Patriae principatum ei tradere, qui fuisset inimicus. Vicecomitis astus in struendo sibi ad Caesarem, inde ad summam fortunam aditu, fuit huiusmodi. Franciscus Garbaniatensis erat quidam in ipso aetatis flo-

re,



- re, cùm naturae muneribus excellens, tum ornamentis etiam illis, quae ipsi sibi homines parant. Decorum corpus, dignitas oris, sermo iucundus, ingenium ad omnia simulanda vel dissimulanda promptum erat. Accesserant litterae interiores, diuq; versatus in Patauino Gymnasio, rationem Imperij, gentium instituta, vim naturae, differendi subtilitatem, elegantis iudicij iuuenis comprehenderat. Post consuetam liberalium artium curricula, ciuilibus turbis immixtus frequentarat partes maxime Gibellinas, & ob eam rem, aduersae factionis opibus, ac potentia Turrianorum expulsus, Matthaeo comes exilij, reuolutus ad studia litterarum,
- id malae fortunae solatium habebat. Sunt qui scribant, ob ingenij famam, ascitum fuisse inter eos, qui tradendis sapientiae praeceptis, vel interpretando iuri ciuili per ea tempora Patauinae Academiae principes habebantur. Hunc sibi Vicecomes, & vetustate amicitiae coniunctissimum, & studijs ijsdem, aptum putauit ad ea exsequenda, quae destinabat. Itaque cum eo collocutus de tota consilij sui ratione, rogat iuuenem, vt arma equumq; sumat, & militariter ornatus, se se immisceat in regium comitatum, quod perfacile foret, cùm alij quoq; reciperentur in eorum locum, quos longinquitas itineris, alijue casus abstulissent. Posse ipsum habilitate quadam ad Aulae consuetudinem, & opportunitatibus alijs, quae  
in



animo, quaeue extrinsecus adessent, innotescere primoribus, deinde per eos ad Regem introduci, leuem denique notitiam adducere in iura familiaris amicitiae. Id ubi successisset, exponeret Regi, quomodo se se res tota Mediolanensium haberet: oneraret merita inuidia Turrianos: nomen Vicecomitum extolleret, ac si quam de ipso nominatim haberet honestam opinionem, parem in Regis animo sensum atq; misericordiam afflictae virtutis excitare studeret. Auctoritatem & pondus fore testimonio, quod ultro daretur absenti, quodq; per fortuitos sermones, dum nihil aliud quam res simpliciter ipsae, & ea, quae fuissent gesta, memorarentur. Si quis eius commendationis & officij fructus extaret, fortunaq; melior sequeretur: eum fructum, & eam fortunam sciret Garbaniensis cum Vicecomitum Domo semper sibi fore communem. Omnia sicuti destinarat Vicecomes euenire: facilis inueni aditus in regium comitatum, mox apud Aulæ principes gratia, inde familiaris cum ipso Rege congressus, testimonio fides, exulis admiratio: tum, ea quae deinceps exponentur. Apud Hastam urbem agebat Henricus. Ed confestim euocari Matthaeum iubet tactus desiderio viri propter ea, quae de ipso Garbaniensis memorauerat. Neq; ille distulit iter. Benigne acceptus ita cum Caesare egit, vt Garbaniensis minime adaequasse verbis animum existimaretur.

• maretur. Ac tanta primo congressu fuit Hen-  
rici affabilitas erga Vicecomitem, vt, qui il-  
lic erant Archiep. familiares aut propinqui  
non temperarent, inuidia stimulante, quomi-  
• nus finito colloquio digredientem contume-  
• liosè infectarentur; idq; Caesar audiuit. Sci-  
licet, ex tanta statim comitate Regis in exu-  
lem, id quod futurum erat, augurabantur:  
ideo non continuere linguae impetum, & ani-  
morum dolorem. Mox etiam Archiepisco-  
• pus ipse superuenit, qui, siue suspicatus la-  
tentem in proximo Vicecomitis fortunam,  
siue nondum plane suspicatus, iungere cum  
eo stabilis amicitiae foedus concupiuit. Nec  
• ille abnuebat, gnarus primas dominandi spes  
• omnibus auxilijs indigere. Et fortè aderant  
ex vtraque parte, quos ei foederi sanciendo  
interesse oporteret, qui omnes iurauere fore  
sibi rata quaecunq; Cassonus Archiepiscopus  
& Matthaeus Vicecomes inter se pepigissent.  
Foedus interposita Caesaris auctoritate est  
initum, & obliuione praeteritorum indicta,  
haec conditiones in posterum placuere. Mat-  
thaeus vt in administratione Reip. nequid sibi  
peteret nomine Ducis aut Vicarij, quae ve-  
terum certaminum atq; seditionum, vocabula  
urbem afflixissent. Staret ab Archiepiscopo  
semper, domum eius, rem, Ecclesiamq; tue-  
retur. Daret operam cum factione sua quan-  
tum posset eniti, vt Populi suffragijs eligere-  
tur

tur qui summae rerum praecesset. Id Imperium  
 esset annuum. Finitimae ciuitates ne lacefferentur  
 vlllo bello donec in Archiepiscopi fide mansissent.  
 Restituerentur in vetus imperium & Ecclesiae iu-  
 risdictionem, Angleria, Vallis Affina, Varena,  
 Trauallia, Derium, Bellanum, Leucum, Castel-  
 lantia, Mercurellum, Castanum, Varisium, Le-  
 gnatum, Concorretium, & cui ab opimo feraciq;  
 agrum Beatum pingue cognomen manet. Ea  
 omnia, temporum & hominum iniurijs erepta  
 Mediolanensi Ecclesiae, promittebat Vicecomes  
 adnixurum se suis opibus, vt Archiepiscopo, sicut  
 antea, parerent. Tritium verò & Bregnanum,  
 & Vaprium, & Castelletum, fratribus Archiepis-  
 copi gentilitio iure possessa loca, si qua vis, aut  
 iniuria, potestasue tentauisset, obuiam se se itu-  
 rum idem recepit. Longa inde series conditionum  
 „ sequebatur. Archiepiscopo stipatores corporis  
 „ assignantor ex publico. Deriuationes aquarum,  
 „ ex Ticino & Abdua fluminibus ad irrigandos Ec-  
 „ clesiae fundos, immunes ac liberae permittuntor.  
 „ Archiepiscopus & Vicecomes, ad vitanda rixarum  
 „ initia, ne fundum, villam, domum, arcem, aedi-  
 „ ficanto, vel emunt, nisi duo millia passuum inter  
 „ vtramque possessionem intersint. Fundos ad Sal-  
 „ uanecium, quos Neapolio Pontificis auus cum  
 „ Celsiano Monasterio permutauit, Vicecomes ne  
 „ attingito, neue rem eam in controuerfam vocato.  
 „ Si quem Vicecomitem, aut si quem Turrianum in  
 „ exsilium mitti contigerit, eius bona, Turriani ex-  
 „ I fulis,

„ fulis , ad Cassonum , Vicecomitis ad Matthaeum  
„ transeunto . Si quae mulier , ex Vicecomitis do-  
„ mo nupserit in Archiepiscopi domum , ei mulieri  
„ dotis nomine dantor fundi , quos Matthaeus ad  
„ Bregnanum emptos habet : quod supra dotem ex  
„ agrorum pretio redundabit , Turrianus refundito .  
„ Affinitates & connubia sunt inter vtrunque do-  
„ mum : confociare sanguinem , & miscere , genus  
„ liceat . Archiepiscopi arbitrium esto , quantas dari  
„ dotes iustum sit . Aduersus ea , si quid ab alteru-  
„ tra parte commissum esset , ei qui recessisset à con-  
„ ditionibus , lis aestimata flor. nummum XXX mill.  
„ eaque multa ut toties exigeretur , quoties aliquid  
„ violatum esset , pepigere . Languscus , & Aduo-  
„ catus , & alij Guelfae factionis homines aderant ,  
„ cum Archiepiscopum inter & Vicecomitem ea  
„ transigerentur . Hos tota res minime laetos habe-  
„ bat . Sed non erat id auctoritatis , ut praesente  
„ Caesare in tali negotio turbare quicquam possent .  
„ Consilium quod poterant , vnicum iniere , tentan-  
„ di si fortè à partibus Gibellinis ad Guelfas pellici  
„ se se Caesar pateretur . Nam si eius rei facultatem  
„ aliquam haberent , posse Archiepiscopum , posse  
„ Vicecomitem euerti summis Patriae rebus , quas  
„ iam inter se diuisissent . Itaque coepere varias inji-  
„ cere moras , & struere quascunque possent artes  
„ detinendo Caesari , ut spatium haberent mouendi  
„ aliquid antequam ille Mediolanum veniret . Ver-  
„ cellis primo tentauere nonnihil , deinde cum ibi  
„ parum procederet , Ticinum uti diuerteretur , sua-  
„ debant .

debant . At Cassionus Archiepiscopus , & Mat-  
thaeus Vicecomes , artificio cognito , dissecere cun-  
ctationem , haec modò cùm dixissent : dolos inesse  
consilij , & ipsi Caesari periculum in dilatione si  
segniter urbem Mediolanum ingrederetur . Nam  
esse ibi nonnullos animo inimico , quorum ante-  
uerti conatus oportet , ne palam , aut occultè  
aliquid molirentur . Simul intulerant , ferream  
Coronam Imperij stabilimentum , frustra alijs quàm  
Gibellinae factionis opibus quaeri , hanc in ipso-  
rum esse potestate ac manu . Ita Caesar abruptis  
moras , repudiatisque cunctatoribus , ex Vercella-  
rum vrbe , Nouariam , inde Mediolanum venit .  
Vicecomes pari cum Rege gressu sublimis ad dex-  
teram equitabat . Reliqua exulum manus , ut  
quisq; praecipuo odio pulsus à Turrianis fuerat ,  
ita proximi ibant Regi : sic traditum est . Quo  
magis miror , cùm pompa illa describeretur , & in-  
cedentium ordo , praetermissum esse locum Ar-  
chiepiscopi , qui debuit inter primos esse , vel ob  
recentem gratiam , vel ob suam dignitatem , vel  
propter urbem , in quam ibatur . Neque tamen  
ambigam , quin fuerit in reliquo sacrorum proce-  
rum choro , qui Regem deducebant . Reliqui au-  
tem sacri procures fuere . Balduinus Archiepiscopus  
Treuirorum . Papinianus Palmae . Gherardus  
Basileae . Theobaldus Leodij . Legionensis praeter-  
erea , & Constantiensis & cum Romana legatione  
longus Pontificum atq; togatorum ordo . Nobilitas  
vniuersa Mediolanensis ad agri fines obuiam pro-

- cessit : obscurior turba more suo , moenia , tecta ,  
• vias impleuerat : cum Guidone tota Guelforum  
factio , Caesarem ad portam , quā ingressurus esset ,  
expectauit . Superbum id visum hospiti caeterisq;  
& auxerat offensionem ipse Guido , cū in tanta  
publica gratulatione animaduersus esset penē vnus  
obducta fronte , confusoque vultu , dextera tenens  
vexillum , in quo Turrianæ gentis insignia depicta  
cernebantur . Nihil in tali tempore fieri alienius  
potuit , adeoque irritauerat ea species animos , vt  
Germanorum aliquis arriperet id repente vexil-  
lum , & ignominiosè affligeret ad terram . Tunc  
Guido fremens & gemens descendit ex equo , pe-  
demque Caesaris appropinquantis est , fortuna-  
iam apertius minitante , deosculatus . Ferunt ,  
• Henricum se se valde comem praeuisse Turriano ,  
monuisse tantum , vt in Caesarum & Regum ad-  
• uentu submittere fasces disceret , atque addidisse  
vulgatum illud , ne aduersus stimulum calces . His  
animis & hac frequentia Caesar acceptus in urbem ,  
ferream Coronam ex Oppido Modoetia petere  
maturabat , eiq; negotio nihil esse praeuertendum  
ratus , iussit suo nomine dari litteras ad Archipres-  
byterum , & Canonicos eius Ecclesiae , quarum  
„ litterarum sententia haec fuit . Henricus Roma-  
„ norum Rex Augustus . Archipresbytero , & Cano-  
„ nicis Modoetiae , viris honestis . Sal. Quod cae-  
„ teri ante nos fecere Romanorum Reges , id nobis  
„ etiam facere in animo est , vt ferream Coronam ,  
„ quae in vestri Templi thesauris adseruatur , capiti  
nostro

„ nostro ritè imponendam curemus , cuius rei causa  
„ Italicum hoc iter est susceptum . Cumq; nobis cordi  
„ sit , vt omnia , quae ad eam rem pertinent , pro  
„ negotij dignitate administrentur : etiam colloqui  
„ vobiscum de ratione caeremoniae totius , & de  
„ Coronae ipsius antiquitate ac iure necesse habemus .  
„ Quare oportebit , Archipresbyterum vnà  
„ cum antiquissimis è Collegio venire quamprimum  
„ ad nos , & asferre litteras omnes , omnia priuilegia  
„ & monumenta , quibus ea caeremonia continetur .  
„ Id vt fiat magnopere vobis mandamus . Familiari-  
„ bus verò nostris , Alardo Robao , & Clephoni  
„ Gemulo , qui vobis has litteras reddent , fidem habebitis .  
„ Dat. Mediolani Cal. Ianuarij Regni nostri  
„ anno secundo . Canonici , litteris acceptis , Regia  
„ mandata confestim exsequuntur . Mox ille MODOETIAM  
„ iuit , vbi summo oppidanorum studio adornata erant omnia celebrandae coronationi :  
„ Templumque Baptistae , quod ibi religiosissimum antiquissimumque est ,  
„ regali instructum opulentia , Regis aduentum , & caeremoniae diem expectabat .  
„ Sed nulla prodidit historia , quo repentino casu ,  
„ quoue meditato consilio factum fuerit , vt ea profectio ,  
„ isque apparatus ad irritum caderet , atque paulò post ,  
„ conuerso retrorsum itinere Caesar Mediolani potius coronaretur .  
„ MODOETIAE quod spatium Regia commorata est , id examinandis  
„ Turriani consilijs , ineundisque rationibus aduersus  
„ illius meditata fuisse transactum : inde retro Mediolanum ,  
„ vnde venerat , tetendisse Regem .  
„ ferunt .



ferunt. Coronatus est in Basilica Ambrosiana festo Epiphaniae sollenni, & Pontifices qui affuerunt, hoc ordine perhibentur. Archiepisc. Treuirorum. Archiepiscopus Geneuensis. Episcopus Brixiae. Episcopus Vercellarum. Episcopus Nouariae. Episcopus Bergomi. Episcopus Laudis Pompeiae. Episcopus Patauij. Episcopus Veronae. Episcopus Mantuae. Episcopus Nouocomi. Episcopus Rhegij. Episcopus Mutinae. Episcopus Parmae. Episcopus Placentiae. Episcopus Derthonensis. Tridentinus. Constantiensis. Basileiensis. Haec apud Bernardinum Corium nomenclatura Pontificum est, in qua praetermissos esse nonnullos reor, quippe, qui, neque Germaniarum Antistites alios, neque Mediolanensem Cassonum videam in eo numero comparere, cum tamen, & illos profectos è patria Caesari comites itineris in Italiam venisse constet, & hunc in suam Ecclesiam hoc tempore fuisse restitutum coniecturae omnes loquantur. Quorsum enim attinuerat confirmari pacem, iniri foedus, & ex Caesaris auctoritate quasi diuidi rerum summam, Archiepiscopum inter & Vicecomitem, vt ille postea in pristina exilij calamitate, & ignominia relinqueretur? Laetissimae Caesaris res, rerum initia tantarum, artes & praecepta regnandi, reducem Archiepiscopum ostentari popularibus, & in sua collocari sede postulabant. Caeterum, ne qua Modoetienſi Templo fieret iniuria, neue municipes illi, iam inde à Longobardorum Imperio traditum ius amitterent: publicae tabulae confectae sunt



sunt & recitatae : non oportere fraudi esse Modoe-  
tensibus , quòd sumendo ferreo diademati Caesar  
Vrbem Mediolanum , & Basilicam Ambrosianam ,  
elegisset . Larga deinde dona missa Modoetiam ,  
non in Templum modò , sed ciuibus priuatim , vt  
quisque ibi ea tempestate vir clarissimus erat . Ma-  
iore in Mediolanenses liberalitate vsus , centum ,  
insuper & nonaginta nouem ornauit equestri digni-  
tate , Matthaeoque Vicecomiti principem eius Or-  
dinis locum dedit . Iàm Guido Turrianus cesserat  
vrbs imperio , redactusq; erat ad res priuatas , non  
solum ipsa Regis praesentia , quae cuncta in se tra-  
heret , sed ciuium etiam inclinatione , qui , vel stu-  
dijs erga Caesarem , vel in Turrianos odijs , vel  
sola rerum nouarum cupidine , regimen hoc ex-  
ternum amplectebantur : sui ciuis praefecturam ,  
tyrannidem vocabant . Misera ciuitas neque ibi  
halitura quietem erat . Post dominatum illum  
alienigenam , seruitij domestici necessitas instabat  
rursus , & nouae seditiones , & veteres in Archie-  
piscopum iniuriae , & semper vnus mali finis , vt  
grauius ex eo malum existat . Haec peragam in-  
genti calamitatum spectaculo , quasi narrauerim ad  
huc vrbs otium , & pacis opera . Postquam Hen-  
ricus Metropolim hanc , & cum ea reliquas Insu-  
briae Ciuitates , intestinis ipsarum certaminibus ,  
Cassonum Archiepiscopum , & Matthaeum Viceco-  
mitem , pulcherrimo Patriae munere sibi obnoxios  
habebat , accefferatque nomen Imperij , consensus  
Ecclesiae , solenne Coronationis , haud dubie  
cuncta

cuncta ipsi obediebant. Ciuitatibus dedit alijs alios Rectores: Mediolani Ioannem quendam hominem Gallum suo nomine Vicarium instituit. Is bimestri imperio nequam est repertus, Successit alter Senensis deterior etiam priore. De Caesare ad Mediolanenses, de Mediolanensibus ad Caesarem falsa referendo, suspicionibus implebat animos: etiam Ecclesiae statum & iura carpebat. Non Archiepiscopus interea, non Vicecomes, quiue aderant huic aut illi, datam nuper inter se fidem admodum colebant: & celerrimè res ad seditionem venit, qua Turriani deleti sunt aut eiekti. Galeatius & Franceschinus erant Mediolani principes iuuentutis: illae Matthaei filius, hic Guidonis: vterque ferox natalibus, & aetate, fortunaque Patus, alter quidem aduersa, alter verò secunda. Turriano iuueni stimulabat animum tantarum amissarum opum, acerba recordatio simul & adspectus: Vicecomes videre patria in domo quàm expectare summum imperium malebat. Plenae Germanorum viae, braccati circum tribunalia Magistratus, externi per omnia mores, corrupta barbarijs modis rerum & hominum vocabula turbabant assuetos domesticis imperijs & peregrinarum rerum impatientes. Parùm tangit eos quòd antiquis inimicijs Penates vtrique diffiderent, neque obstant partium inter ipsos funesta consilia & irae, quominus ipsi conspirent, vt sanguine Germanorum vrbs inundetur. Extra Portam Ticinensem, in campo, fortè an ex destinato congressi, de ea re contulere sermones,

&amp;

& postero die, signo dato Ciuitas vniuersa in armis fuit. Sed virilibus animis iuuenes puerili consilio instruxerant rem. Cum enim globos vterque suos, & ad idonea loca dispositos armatos haberent, aduersus reliquae multitudinis trepidationem atque concursum nihil prouiderant. Ita, cum participes facinoris, uti moniti erant, gladios repente distrinxissent, ignari quoque sumunt tela quod cuique promptum erat, & vno penè temporis momento maior armatorum numerus, quid petent, quòue dirigerent ictus ambigebant. Interea conscij obtorpuerant manibus animisque. Mox, temere siue astu conclamatum, rebellasse Turrianos à Caesare, violasse ius hospitij, iuisse ad arma, ut hospitum, ut dominorum sanguine macularent urbem. Vox ea conuertit impetum repente omnem in Turrianorum genus, non secus atque si intra aliena moenia vel castra deprehenso speculatores & hostes essent. Galeatius ipse dissimulata coniuratione acerrime pugnabat ut in proditores, & ipse socium prodiderat clamitans, ite mecum qui saluam esse urbem, qui viuere Caesarem vultis. Non cessabat Matthaeus Vicecomes in eo tumultu filium inhibere, monebatque identidem, ut se se eripere furentibus maturaret. Plus poterat impetus animi concitati, quam periculi metus, aut patris verecundia. Simul eò processum erat, ut aduersus pericula subsidium ipsum esse discrimen arbitraretur, nec aliter posse maiestatis atque perduellionis crimen euitari, quam si conuersis armis à Germanorum caede, genti Tur-

K

rianorum

rianorum ad internecionem instaret. Francischinus & Simon Guidonis filij faucijs equis clam exiere porta quae Diui Marci tunc dicebatur : seque ad Montorfanum in arcem aegre proripuerunt . Horum pater ipse Guido cum domi quaereretur ad necem , per aedium postica transgressus in vicinos hortos , gregali habitu per auersum aliud ostiolum est emissus . Direpta domus , & Turrianorum caesi quotquot improuisum illum casum effugere non potuerunt . Archiepiscopum ipsum , quia gentis erat illius , ob nominis contagionem & inuidiam , haud procul à periculo abfuisse creditum est , licet nulla nominatim eius in tali tempore calamitas tradita sit . Caesar , sedato tumultu , Vicecomitem inculpauit ; ob Galeacium filium , à quo seditionis initium ortum esse arguebat . Suo beneficio reductos in Patriam , cum Archiepiscopo reconciliatos , ornatos etiam muneribus , aduersus ipsum conspirasse cum illis , quos eorum causa , inimicos haberet . Vicecomes ad ea , purgare iuuenem , transferre culpam omnem in Turrianos , profiteri , quemadmodum ipse cum sua prole totaque domo semper in Caesaris potestate futurus esset , & vitam citius , quàm fidem aut obsequium amissurus . Non tamen effugit , quominus paulò post , Hastam ipse , Galeacius filius Taruisium ablegarentur , criminantibus nimias opes acmulis , & data occasione , nihil omittentibus quo iam exulceratum animum asperarent . Postea Garbaniatensis idem , quo architectante Vicecomes primos sibi gradus ad principatum

cipatum struxerat, quique, velut apposita machina  
 Caesaris animo, poterat eum flectere quocunque  
 res ferret: ille igitur breui tempore dissimulante  
 effecit, ut exul uterque reuocarentur, & finis exi-  
 lij, dominationis initium esset. Fere sub eos dies,  
 quibus ab eo paucorum mensium secessu Mediola-  
 num redierant; Matthaeus Mediolani Vicarius iu-  
 betur, quo deinde gradu, filij nepotesq; & secuta  
 posteritas in summae potentiae fastigium rediere,  
 donec irrequieto rerum ciuiliu orbe rursus ad  
 aequa deuoluerentur. Nempe sic etiam Turrianis  
 acciderat. Nescitur autem, quam recondita arte  
 fecerit Caesar, ut cum initio destinasse videretur,  
 admouere rerum summae Vicecomitem, imponeret  
 tamen alios Vicarios vrbi, quorum ut poenituit,  
 huc deniq; vertit rursus animum. Nec magis tradi-  
 tur, quae potissimum causae Matthaeum irritarint,  
 ut totam postea sui dominatus vim conuerteret ad  
 Archiepiscopum euertendum, cum quo recens foe-  
 dus erat, quem etiam sine foedere, sacrum & san-  
 ctum reuereri, ius fasque esset. Vicissim Archiepis-  
 copus ipse, cur à Matthaeo repente defecerit, &  
 abruperint uterque conditionum vincula, quibus  
 vinculis in mutuam se se defensionem, atque socie-  
 tatem implicarant, ignoratur. Nisi si forte veterum  
 inimicitiarum implacabilitas est quaedam infida post  
 pacem, nescia quietis, memor malorum, aliquando  
 latens & inclusa, rursus impetu manifesto faeua &  
 atrox. Et potuerant odijs inter se capitalibus dis-  
 fidere Turriani florentes, inquietante domum for-

tuna more suo vbi nimia coepit esse : iidem, vrgentibus aduersis, ad suae propemodum extinctae familiae misericordiam eucti, sera iam concordia, contra communem hostem coalescere debuerunt. Non utiq; alia probabilior causa repentini dissidij, quo Cassonus Archiepiscopus, extremas meruisse Vicecomitis iras, Vicecomes partam diuino beneficio potentiam inhumanis aduersus Ecclesiam foedare modis potuere, Robertus Siciliae Rex aemulus Caesari hoc tempore exortus, addiderat animos desperatae Turrianorum genti : ad eum vndique congregabantur Guelfarum partium homines Archiepiscopo concitante, si fortè illius opibus ad recuperandam fortunam, momentum efficere aliquod possent. Ac cernere tunc erat insigni exemplo, quantum ad reconciliandos animos res aduersae valeant, cum Simon & Francischinus filij Guidonis assidue stipati circa Cassonum Archiepiscopum, paternum hunc inimicum, vti patrem affectarentur, consilia contra Vicecomitem ineuntes, quae vana erant. Et emolliuerat ante omnia Pontificis animum, quò placabilius teneriusque respiceret gentiles, suos, miserabilis interitus ipsius Guidonis : atque sollicitabatur pectus eius caritate mortui, cum quo viuo certatum erat odijs, & pereundi perdendique insaniâ. Obierat Guido, cum post indecoram ex vrbe fugam, in morbum incidisset, quem nouus animi dolor aggrauarat, vbi Roberti Regis auxilia, quae spes vnica Guelfis fuerant, cum Henrici copijs infelicitè dimicauere. Itaque anxius

Archiepiscopus misericordia suorum, & quasi sepultae domus dolore, per omnia se se contorquebat meditata & vias, & artes, ut familiam paulò antea dominam Urbis, nunc profugam & extorrem, dissipatamque recolligeret. Ea res, neque caput neque pedes habebat. Namque Siculi Regis, ut dictum est, auxiliares copiae caesae apud Placentiam & fusae spem pene ultimam destituerant. Languscus & alij principes factionis capti in eo praelio, & in vincula Mediolanum rapti. Terror caeteris, & crescente in dies Vicecomite, plena omnia desperationis. Quippe ille, praeterquam quod haud dubie Mediolani rerum summam obtinebat, siue Caesaris voluntas, siue studia civium spectarentur, etiam in externa, vim & opes provehebat. Galeacium è filijs natu maximum foederatae ciuitates exercituum Imperatorem appellant. Eundem Placentia sibi Principem optarat. Marcus & Luchinus Galeacii fratres, & Garbaniatensis ille, tantarum rerum instrumentum additi Galeacio consiliorum participes adiutoresque negotiorum, quò latius omnes imperij partes occuparentur. Aduersus ea, quid consilij, quid auxilij reliquum Archiepiscopo, partibusue, quae verterant animos ad sacram potestatem cum spes caeteras amisissent? Rationem hanc iniere tamen, ut novas ab Rege Roberto suppetias, missa in id legatione postularent. Ac ne ob rem antea tam male gestam irritae preces forent, addebant ad postulata id quod, sicuti multum valuit ad impetrandum, ita in exitu



exitu detecta vanitate, cum ira contemptum in desperatos excitauit. Ostenderant namq; Regi, esse quamplurimos intra vrbis moenia, multos in agro Mediolanensi, nonnullos etiam in Vicecomitis ipsius aula, qui restitui Guelfos, atq; Turrianum resurgere nomen auerent. Cum his esse rem ita compositam, vt conspectis auxiliorum vexillis, caperent arma, concitarent plebem, fortasse etiam aliquid amplius exsequerentur. Conspici tantummodo signa & Guelfici nominis liberatores oportere. His alijsq; rationibus persuasum Regi Roberto est, vt lectissimas equitum turmas mitteret, queis vel peragi posse negotium crederet, vel si nihil efficeretur, haud ultra repugnandum necessitati esse, totamq; conuersionem hanc Insubriae rerum, non hominum temeritate, sed diuino nutu factam interpretari. Equites fuere ad octingentos, habiti terrae robur, vnde mittebantur. Dux eorum, qui iudicio Regis & virtute sua, spem fortunamq; Guelforum, & Regni magnitudinem in suo capite pulcherrime ferre vnus omnium Siculorum existimaretur. Vbi terram Insubriam attigere, Ticinensibus adiuncti (nam vrbs ea Guelforum erat) longo ambitu circumducuntur ad Legnanum, qui locus abest ab vrbe Mediolano XVI millia passuum, & pridem Archiepiscopo subiectus, hoc tempore non mutauerat fidem. Illuc exeunt contra & Vicecomitis copiae: sed praeceptum erat, ne dimicarent in praesentia, hostem tantummodo distinerent. Dimicatum tamen est, & aduersa pugna

Medio-



Mediolanenſibus fuit , iamq; victores regij , quaſi reſtituto Turriano , ſummum ſe decus ad Regem ſuum eſſe relatuſos putabant , ſi quidem haud vana reperirentur ea , in quorum ſpenſu exciti ab domo veniſſent . Hoſte diſſipato , circumſpectantes omnia momenta , vident moueri nihil , nullum fieri concurſum ex agris , non aliquem ex vrbe tumultum nuntiari , & torpere ſibi quodammodo victoriam , quae , ſi ſperata illa rerum & voluntatum inclinatione deſtitueretur in alieno ſolo , plane actum eſſe nihil intelligebant . Quò magis introſpicerent praſentem rerum formam , eò minus praeparati quicquam oſtendebatur , atq; vt omnino deſperarent , ſubito Vicecomitis conſilio eſt effectum . Habebat in cuſtodia Philippum Languſcum Ricardi patrem , cuius nutu , res , & animi Ticinenſium hoc tempore gubernabantur . Huic dici iubet , ſi ſaluus eſſe velit , ne cunctaretur admonere filium , vti Ticinenſes ab Legnano quamprimum abducant . Scripſit captiuus ſenex ad filium totidem fere verbis . Quanti patris caput aeſtimaret , tantum adniteretur , vt protinus Ticinenſes ab externo illo hoſte ſegregati domum irent : ex huius rei momento ſibi pendere vitam : plura ſcribi non poſſe , neq; attinere : periturum eſſe patrem , ni filius ſtrenue agat . Statim patria caritas accenderat iuuenem . Ita praeter caeteram ſolitudinem , Ticinenſium etiam digreſſu nudati regij frementes in Archiepiſcopum , caeteroſq; Turrianos , abiit . At Vicecomes , magno repente periculo liberatus , reputans ipſe

ipse secum, haud alijs, quàm Archiepiscopi consilijs & artibus administrari potuisse rem tantam, ac profectò nisi mature obuiam iretur, inquietum illum animum, perpetuam nascenti dominationi calamitatem fore: coepit ita hominem insectari, vt aerumnis conficere velle videretur, quoniam, si manifesta caedes patraretur, minus id sibi ad famam hominum, & rerum initia vtile futurum putaret. Ac ne iniurias quidem & omne contumeliarum genus, per se, vel per suos, directò in Archiepiscopum inferebat: sed saepius mouebat ea, quorum sensus & dolor ex longinquo ad illum perueniret: interdum etiam ipsius capiti, & vitae periculorum minas aperte intentabat. Et prompti erant ad omnia, qui tali in negotio demereri Principem gestirent, atque adeò seruili more, de suo semper adderent ad ea, quae Princeps innueret, siue imperaret. Habitabat Archiepiscopus in ea vrbis regione, quae dicitur Orientalis, conducto domicilio Philippi cuiusdam Vapriensis, quia credo tutius ibi munimentum aduersus imminetia, & quia meminerat Ecclesiasticas aedes sub Guidone antea sibi carcerem fuisse, atq; subierat animum cura, ne Vicecomes id ipsum imitaretur. Nec ideo violentiam effugit. In conductitio illo tecto Pontifex hoc tempore cùm sederet, Balatronus Matthaei filius quoddam huiusmodi facinus ausus fuit. Collecto iuuenum grege, quorum nomina suo loco deinde referentur, silentio noctis pontificias illas aedes ita cinxit armatorum corona, vt quacunq;

aliquis

aliquis exiret, à circumfidentibus exciperetur? Hac posita indagine, per scalas euadit in aedium summa cum promptissimis, & vbi diduxere leniter tegulas, in laquearia sese, inde, quà peruium fuit, in impluium furdo vestigio pari lenitate demittunt. Subeunt eò complures inuenta via, & brevis horae momento pontificia domus plena iuuenum insolentium fuit. Occupant alij ianuarum claustra, cubiculorum fores alij pulsant & effringunt, sopitamq; repentino terrore familiam, quà cuique fors obtrigit, sine certamine captiuam agunt. Archiepiscopus ipse ab ijs, qui conclauem irruperant, lectulo alligatur. Caetera deinde aguntur hostilem in modum: egestae pecuniae: direpta supellex: & quae non poterant auferri, ea per lasciuiam effusa & conculcata. Pauci qui caritate domini, ruptis vinculis, obuiam ire voluerunt, concisi vulneribus: & perijsse in ea nocturna iniuria duos Archiepiscopi familiares constat. Hactenus Pontifici insultatum. Postero die, ille minime ambigens facinoris auctorem: ipsosque ministros, & si venerant in diuersa ora & vultus assimulati barba & capillo, suspectans tamen & recognoscens, alios quidem statim, alios verò postea, consilium inijt, vt ex vrbe abiret. Funesto illo ludo denuntiari sibi necem crediderat, & trepidi suo quisque casu familiares, minime esse cunctandum suadebant. Cum trepido & exiguo comitatu Pontifex abiit, ac pene fugienti receptaculum fuit Castanenſe castellum, quod positum in Abduae

Ripa, tunc Ecclesiasticae ditionis erat, & loci illius homines praecipua in Archiepiscopum fide, dum, sui Principis vitam tegerent, infestam Vicecomitis potentiam haud magnopere respiciebant. Egresso Pontifice, irritata sunt odia, quae sedare debuerat, vel iam satiata contumelijs ira, vel voluntarius ille discessus, & veluti facta confessio, cedendum esse potentiori. Quotquot Archiepiscopi negotia procurabant in vrbe, vexati sunt, & pulsati, donec procuratione abisterent, aut occurrente alia iniuriarum materie, sicuti fit, obliuioni traderentur. Ad Archiepiscopum deinde ipsum insectandum incubuere illi, queis curae erat, non exsequi modò Vicecomitis imperia, sed voluntatem quoque tacitam, & nutus omnes interpretari. Hi cum machinis, & telis, & omni oppugnandarum arcium instrumento ad Cassanum profecti, circumfessa arce, & ponte occupato, subegere Pontificem inclusum, vt salutis suae consulens, nocturno tempore, per auersam, occultissimamque portam exiret. Ac fortasse praebebantur vltro fugiendi tempora & occasiones ab emissarijs illis, & satis habebant pepulisse loco: sanguinem & caput cum viderentur appetere, fortasse non appetebant. Ex illa Cassanensi fuga Cremonam tetendit, execrantibus quacunque incederet paganis impia consilia, sacrilegasque manus, ob quas animarum Pastori, nulla in sede conquiescere licitum esset. Execratio maior paulò post est insecta per vniuersam Insu-briam apud omnes, quicunque integros à partium contagione

contagione animos haberent. Etiam alieni & infensi, temporum dedecus, & negotij indignitatem agnoscebant. Cum enim Episcopus Sabinensis Pontificis Max. legatus iret ad Caesarem, mandassetq; Pont. Max. Archiepiscopo Cassono, ut ei legato Mediolani occurreret, atque ut inter se colloquerentur, frustra id Sedis Apostolicae mandatum fuit. Nec solum frustra fuit, sed etiam quia forte divulgatum erat, congressuros esse Mediolani Legatum Apostolicum, & urbis eius Pontificem, coepere Magistratus, & praefecti tota Vicecomitis factio, quendam huiusmodi sermonem ferre palam ac dissipare. Si veniret in urbem Archiepiscopus, non temperaturos esse manibus: omnino fore ut moretur. Ea fama & sermonibus ipsi suis, quasi iam praesentem inimicum haberent, magis adhuc exasperati, sedulo deinceps omnia conquiescere, quae nuntiata exuli, desperationem & maciem, & talem extremam afferre possent. Intercepta vectigalia, captae arces, occupati fundi, tabularia direpta, spoliatae aedes, immunitatum Ecclesiasticarum omne genus violentissime sublatum, & nuda quodammodo Ecclesia, nudum Archiepiscopi nomen abiectum ostentui. Demum, in contumeliam huius nuditatis, sacrae virgines expulsae monasterijs, & quibusdam earum admota tormenta ut nescio quid exprimeretur. Incessere postea per urbem & agros vagae ac desertae, quod etiam in horum temporum disciplina periculosum foret. Tot damna, tot iniuriae, cladesq; & super omnia,

calamitas exilij, perpulere Cassonum, vt quod ad-  
uersus ea telum habebat, id vibraret. Vicecomi-  
tem prohibuit communione sacrorum, eiq; inter-  
dicto cunctos illigauit, qui fuissent eiusmodi rerum  
adiutores & ministri. Totam Principis domum,  
percussit anathemate, quod longo carmine effatum  
extat horrido temporum illorum sermone. Sen-  
tentia fuit huiusmodi. Cassonus Archiepiscopus  
„ viris vtinam prouidis Matthaeo Vicecomiti Vica-  
„ rio, Consiliarijs, & Consulibus, & Concilio Reip.  
„ Mediol. Galeacio, Luchino, & Balatroni Marthaei  
„ filijs. QVOMODO SEDET SOLA CIVITAS  
„ PLENA POPVLO FACTA EST QVASI  
„ VIDVA O VOS OMNES QUI TRANSI-  
„ TIS PER VIAM ASPICITE ET VIDETE  
„ SI EST DOLOR SICVT DOLOR MEVS.  
„ Vrbs olim felix & inclyta, nunc iacet praeda illis,  
„ qui Rectorum nomine tyrannidem exercent: iacet  
„ veluti truncum sine capite corpus, relicta crudelius  
„ habitanda, quàm si deleta foret. Eiecto Pastore  
„ laceratur Ecclesia: Mediolani patitur ea, quae non  
„ expectaret inter barbaros: & haec ipsa vestris ma-  
„ nibus, aut impulsu: certe non prohibuistis. Tu  
„ Balatrone, patris impij pessima proles, cum nos  
„ in aedibus Philippi Vaprienſis moraremur, venisti  
„ eò dux agminis nocturni: nos, familiamq; nostram  
„ vinxisti, spoliauisti, & sunt adhuc ibi sanguinis ve-  
„ stigia, quem Vrsinus Mulinanus, & Bonauentura  
„ Mantuanus, vestro ferro confossi nostri familiares  
„ effuderunt. Participes sceleris & socij fuistis, vos  
Odoarde

» Odoarde Pirouane , Pagane Mandelle , Ingressone  
 » Sorelina , Zardine Befana , Martine Montorfane ,  
 » Balatrone Beccaria , Philippe Lomati , Zamba Pon-  
 » tirole , Corradine Comensis , Iacobole Vapri , Cop-  
 » pine & Zofrandine Prealones , Scaldamacia Meda ,  
 » Papine Taberna , Francisce Vituone , Ambrosi Der-  
 » le , Petre & Ioannes Malnepotes , Mazola Mera-  
 » tensis , Leo Graselle , Plantelli fratres , Cauallioni  
 » fratres , Pagane Scarauacie , Ardigane Rhaudensis  
 » cum filio , Vicentiole & Antoniole Marliani , Pa-  
 » gane Rhaudensis , & asleclae vestrum omnium ad  
 » trecentos . Tanta manu fuit opus , vt Episcopus  
 » inermis opprimeretur . Ipsum Episcopum oportuit  
 » tuit postero die clandestino egressu salutem petere ,  
 » ne scilicet interfectus nocentiores vos faceret .  
 » Quid deinde vobis inausum atq; intemeratum fuit ?  
 » Corradinum Camerium Vicarium nostrum , & Gal-  
 » uaneum Medicen Praepositum Sancti Donati , ex  
 » Brolliensi Xenodochio , in quo sedentes Ecclesiae  
 » negotia procurabant , exturbauistis intentato mor-  
 » tis metu . Cassanensem arcem , in quam confugera-  
 » mus , obsidione cinxistis : vt nusquam nisi in fuga  
 » praesidium esset , effecistis . Si rediremus in urbem ,  
 » manibus vestris concerpuros esse Pastorem , vna  
 » voce conclamare , non exhorruere vobis animi .  
 » Tu Mule Gropelle , arcem nostram , quae est ad  
 » Cassanum . Tu Lodrisi Vicecomes , eam , quae ad  
 » Abiatum est , occupauisti . Tu Matthae , rem vni-  
 » uersam Angleriensis , Leucensem , Bellanensem ,  
 » Vallasinensem , Castanensem , Traualliensem , Bre-  
 » biensem ,



„ biensẽm, quae arces & loca sunt antiquitus Eccle-  
 „ siastici nostri iuris, tenes. Eidẽ tibi decumae  
 „ nostrae Lisantinae, redditus nostri Varisenses, por-  
 „ toria nostra Mercuriolana, nostrae piscationes ad  
 „ Pusianum exiguntur. Tu Luchine fili domum no-  
 „ stram Coyranam foribus effractis inuasisti quomodo  
 „ barbari hostes agunt. Tu Creslone Cribelle, mon-  
 „ tes nostros, Derium, Gessanum, Mugiascam, Va-  
 „ renam: tu Faciole Pusterla Falegium nostrum po-  
 „ tiris. Adeò nihil est pensi vobis, quid futurum sit  
 „ extremo saeculorum die, quidue nunc aeternus Iu-  
 „ dex talia videns hominum scelera, vicissim paret.  
 „ Neq; in mea solùm & meos, meq; ipsum iniuriae  
 „ vestrae defaueuerunt, sed cum ipsa Ecclesia, cum  
 „ religione ipsa bellum impium atq; nefarium susce-  
 „ pistis. Ecclesiasticos homines, nullam aliam ob  
 „ causam, quàm quia nomine hoc censebantur, con-  
 „ iecistis in vincula, tributa vobis ferre coegistis,  
 „ itaut, ex vniuersa Dioecesi decem millia nummùm  
 „ aureorum aerario vestro rescicerentur. Tantidem  
 „ ordo Franciscanorum, tantidem Humiliati se se  
 „ redemerunt, & quicquid praeterea conditum in  
 „ cellis horreisue habebant, immisso milite dissipau-  
 „ istis. Litteras publicas Ecclesiae Mediolanensis, &  
 „ monumenta priuilegiorum, immunitatum, iurium,  
 „ quae monumenta & litterae adseruabantur in S.  
 „ Radegundae Monasterio, Beltramus Prandebonus,  
 „ cui mandatum erat, ingressus ea claustra, per vini  
 „ abstulit: & Monasterij Maioris virgines cum anti-  
 „ stite sua, quas vobis adspicere fas non esset, con-  
 „ treclauere



„ tractauere carnifices vestri. Matthaei Vicecomes,  
„ vosque caeteri, qui tenetis urbem. Haec omnia  
„ vestro nutu sunt administrata. Vos rei scelerum  
„ tantorum estis. Quamobrem decreui ego Cassionus  
„ Archiepiscopus Ecclesiae Mediolanensis, arborem  
„ excindere, quae fructus bonos non facit, & aucto-  
„ ritate, quae mihi concessa est, ferire anathemate.  
„ vos omnes, & arcere communione sacrorum, ea  
„ lege, ut si contumaces & inemendatos vltima dies  
„ opprefferit, intra sacros fines vestra corpora se-  
„ peliri non debeant, idque anathema nunc à me  
„ vobis infligitur. Te verò Matthaei tantò magis  
„ ferimus, quia fueras caelestibus diris addictus iam  
„ inde ab eo tempore, quo superioris Archiepiscopi  
„ Vicarium Generalem ex ciuitate praecipitem eie-  
„ cisti. Erat Matthaeo politicum ingenium, nec ex-  
„ tra suspiciones atq; coniecturas ambiguae religionis,  
„ nec sine cura, quod ad eius rei famam attineret.  
„ Rem Ecclesiasticam ita tractabat, ut superiora de-  
„ clarant: rursus videri se pium volebat & erat for-  
„ tasse: sed in eo negotio sua plerumq; principibus  
„ via, cumq; recte sentiant, regnandi saepe consilijs  
„ & artibus abducuntur ab eo quod intus alunt.  
„ Vicecomes id recti prauiq; confinium nimia licen-  
„ tia transgressus, eò denique processit, ut à Pont.  
„ max. Haereticus appellaretur. Nunc Archiepisco-  
„ pi diris implicitus, neque reuocabat exulem, neq;  
„ sarciebat Ecclesiae damna plenus artium senex,  
„ auidus potentiae, blandus alloquio semper & vul-  
„ tu: benignitas & magnificentia factorum, domina-  
„ tionis

tionis vtilitatibus regebantur . Caeterum , quò plus inuidiae parari , sibi ob Archiepiscopi calamitatem & anathematis infamiam videbat , eò magis firmare opes , proferre imperium , munire domum affinitatibus aduersus pericula & casus imminentes . Quippe senserat etiam incommodos de sua religione sermones haberi Romae , & parare Pontificem max. ea , quae in Catholicae fidei rebelles vltima sunt Apostolicae Sedi . Prima munimenta quaesivit , vt subigeret urbem Ticinum , qua subacta , Alexandrini societatem & foedus expetiuere : nec Parma cunctata est . Inde se ille pro Caesaris Vicario , principem dominumque Mediolanensium appellauit . Ad exigenda vectigalia , premendaq; oneribus urbem , obtentui erant residua certamina cum Guelfis , quos fractos iam satis atque debilitatos , penitus esse delendos memorabat . In omnibus rebus species & pompa Principatus erat . Praetoria cohors , octoginta serui , ephoebinobiles , caetera aulae : & quia septuagesimum iam annum egressus vitali calore destituebatur , fouendo seni conquirebantur lectissima puellarum corpora , eaeq; simul cubabant . Iuuenes filij , Galeacius , Marcus , Luchinus , Stephanus & Ioannes agebant pari magnificentia & luxu . Caeteris cordi paternae potentiae moles , & pars dominatus , domestica pariter & externa , & propaganda successio : Ioannes ad spem & occasionem Ecclesiasticarum opum atra in toga domi caelebs manebat . In hanc domum ita stabilitam atq; firmatam vndiq; confluebant omnia quò

quò felicior hominum morè diceretur. Et erat  
eiusmodi rerum cursus, ut vel Anathematis poe-  
nam haudquaquam meruisse Vicecomitem, vel  
fluxam & infidam esse fortunam existimarent, quae  
circa caput impium sic luderet: ac diuersus postea  
ludus expectabatur. Derthona & Alexandria pe-  
nè certatim in idem imperium concessere: simul  
potiundae Liguriae spes affulgebat. Turbata illie  
omnia ciuilibus dissidijs, petita Vicecomiti nurus  
ex Auria domo, & Marcum filium pulsi principes  
ex vrbe Genua sibi Ducem asciuerant. Haud du-  
bie Regnum Italiae quærebat. Ea tentamenta  
Pontificem maximum, pro paterna in vniuersos  
cura minime quietum habebant. Nam praeter Ec-  
clesiasticae rei lacerationem, infestanique sacrorum  
hominum vitam, & nominatim Archiepiscopi exi-  
lium indignum, etiam necesse erat suo nomine dis-  
plicere nascentem in Italia tyrannidem, vti tunc  
dicebatur. Vt enim exortus Mediolani Viceco-  
mes, alia atque alia appetendo loca, impotenter  
agebat: ita tyranni minores in alijs vrbibus, pari  
violentiâ, ciuium & Ecclesiae res in se trahebant,  
hominibus ipsis superbe abutebantur. Itaq; Pont.  
max. iussit admoneri Mattheum & caeteros: nisi  
communi cum caeteris iure viuere assuescerent,  
abstinerentque deinceps animos ab omni Ecclesia-  
stico negotio, acturum se suo iure, & Apostolica  
arma moturum in rebelles. Illi, traditos à Caesare  
dominatus obtinere se se, nec posse suas opes à  
Pont. max. labefactari, vel infringi, vana simul &

impia responderunt. Denunciata communiter haec & responsa : maiora separatim in Vicecomitem mouebantur , & maiore ipse contumacia vsurus erat . Iam enim agebatur in occulto reus atrocium culparum , ad quas facile transitur ab tali ingenio , talibusque artificijs , quale ingenium & artincia in hoc homine fuisse demonstraui . An verò innoxia mens homini , sanum de religione iudicium , & inimici ; cùm alia re laedere non possent , illud ad criminandum arripuere , quod probabile esset in tali vitae forma , quodque etiam si refelleretur , inureret tamen eam notam Vicecomitum nomini , quae cuncta deformaret . Equidem malim hoc verum esse propter magnae familiae posteros , qui , sicuti veteris fortunae reliquijs ciuitatem nostram ornant , ita maiorum religionem testantur sua . Non tamen omittam rem demonstrare sicuti gesta est . Bonifacius Farra , & Laurentius Gallina Guelfi humiles , post res suas afflictas , desperata Patria , conuigrauerant Romam ; & propter polita ingenia , bonarumque artium disciplinas nacti locum in aula , dextere ac liberaliter agendo , peruenierant illuc ; vt gratia , & fide , & auctoritate apud Pontificem maximum inter primos essent . Hi coepere criminari Vicecomitem , quòd ad tyrannica facta impios de religione sensus adiungeret , quodque vno verbo manifestis indicijs Haereticus esse conuinceretur . Haeresim illius esse de  
**RESVRRECTIONE MORTVORVM.**  
Ab eodem solere Daemonas euocari . Haec duo  
capita

capita litteris atq; testimonijs arguebant. Reliqua memorare satis erat nota omnibus crimina simul & firmamenta criminationis huius. Quid enim de altera vita, deque vno & vero Deo statutum habere posse illum, qui sua sede pellat Episcopos; quaerat ad necem in exilium agat? Hunc esse hominem, qui posteaquam prouinciam inuaserit, sit sacra omnia depraedatus, sacrorum administros omni crudelitate vexarit: adolescentulas etiam, quae perpetuo se se voto virginitatis obligassent; eiecerit extra monasteria, & earum pietatem atq; pudicitiam habuerit suae libidinis incitamentum. Ob tot infanda facinora damnatum anathemate, communione sacrorum exclusum, spernere coelestes poenas: dummodo procedat ad tyrannidem, via, pensi praeterea nihil habere. Profectò, qui sic viuat, cum, non verbis, sed quae praedicatio sit grauior, profiteri reipsa, & veluti concionari diuersum quiddam à catholico sensu fideque comuni: & suis gaudentem institutis, publicam Ecclesiae disciplinam irridere. Neque verò imbutum erroribus animum temperari saltem in eo, vt propria sit pestis ipsius, intestinumq; malum: ad prolem vniuersam, paternae insaniae manasse contagionem, in patris mores & instituta filios abiisse. Parati erant alij, qui iactarent eadem in omnibus circulis, & facile commoto ad eius negotij euram Pontifice, esse res in quaestione publicisque tabulis coepit. Patres etiam super eo negotio aliquoties conuenerant, & re considerata, statuerant; non

sanam mentem esse Vicecomiti, compererantque inquirendo, foueri opibus ipsius haereticos, turbari Quaesitorum officia, & Gulielminam infame monstrum, de cuius secta & sine demonstratum est, per diu sub eiusdem umbra, & tutela latitasse. Posteaquam testimonia & indicia, sententiaeque Patrum congruebant, & vndique manifesta teneri res videbatur, Matthaeum Vicecomitem Pontifex max. procùl ab omni sacrato limine, omniq; piorum coetu esse remouendum decreuit, ipsum, & filios eius, & quotquot impliciti consilijs, siue ministerijs talium rerum actionumque essent. Ea tremenda sententia perscripta est, & promulgata solennibus verbis, & si quae alia misceri ob rerum, atrocitatem oporteret. Sed aduersus coelestes illas minas, pontificiosque terrores, & quouis bello funestiora pericula, Vicecomiti sensum auferebat dulcedo Regni: atque obdurando paulatim processerat in eam miseriam, vt impune dissimulari talia posse arbitraretur. Et Numinis irae cunctabantur paulisper, quò grauiores incumberent tempore suo, & oblitum officij Principem, sicuti iustum esset, admonerent. Interea, res Ecclesiae Mediolanensis, nihilo meliore erant conditione ac statu, quàm sub tali domino esse oporteret. Tanquam in Mahometana, vel Caluinica vrbe, intermissa sacra, fugitiui sacerdotes, aut prohibiti fuga, Pontifex adhuc exul: & quò foedior erat forma Ciuitatis, eò magis irritabatur Principis animus, quia recidere in se omne dedecus, inuidiamq; sentiebat.

Caete-

Caeterum , quia non erat obscurum , qui motus , quacue pericula sequerentur illam Anathematis poenam , institit adhuc agere multa & parare , quò tutior foret . Caput erat , minores Italiae tyrannos , & dominos urbium conciliare sibi , tum ne victi religione , Romana arma sequerentur , tum ut secum arma & vires contra Romanum associarent . Eius rei causa , Soncinum , qui locus est in agro Cremonensi , concilio principum indicto , conuenere frequenteis , quippe in id ipsum iam antea callide & ambitiose praeparati . Nanique Vicecomes , cum semper , ut dictum est , aptus illi ciendis animis , tum hoc tempore praesertim in id ipsum intenderat artes suas , & alijs ad alios blandimentis utens , Canem Scaligerum in omni congressu dulcissimam sibi prolem appellabat , propterea quod id nomen utriusque aetati consentaneum esset . In eo Soncinate conuentu , ad firmandos in se animos alienandosque ab Ecclesia , orationem habuit huiusmodi . Necessario fuisse conueniendum in unam sedem , ut coram agerent ea , quae non fuissent committenda litteris aut legatis . Agendum autem esse de ea re , quomodo partos felicissime principatus etiam tueri feliciter possint aduersus communem hostem atque sub Religionis titulo latentem inuidiam . Pontificem Romanum nullam laceffitum ipsorum iniuria vel culpa , tantum Archiepiscopi Cassoni , reliquorumque Guelforum studio , inimicum repente exortum , vim suam Apostolicam occupasse in eo , ut Gibellini non



nis opes deleat atque euertat . Communiter vniuersis intentasse tyrannidis crimen, sibi praecipuum ex religionis crimine dedecus esse quaesitum, & eo dedecore, quantum in ipso Pontifice sit, armatas in se res omnes, imperium, amicos, vitam quoque si Deo placeret, ereptam. Haec eò pertinere, vt anathematis poena perterrefacti principes descenderent ultro caput suum, & veluti languentia membra descenderent vicissim à capite, diremptique sic omnes ab ope mutua iacerent praeda illis, qui pulsī sceleribus suis atque debellati perditae suae fortunae vindicem Romanum inuocauissent . Sed vi & concordia contra artes enitendum esse fortibus viris, cauendumque, ne, si pertimuerint, opprimantur ac pereant suo metu . Quae Romanus interminetur, neque tanti facienda, vt resistendi mentem consiliumque adinuant, neque tam parui, vt neglecta serpent latius, & insanabile postea malum fiant . Monere singulos, vt quanti suam quisque incolumitatem ducat, tam intrepido animo incumbant ad communem salutem: & gerendae rei consilia, quae habeant acerrima & fortissima cum suarum quisque virium parte conferre in medium velint . Passerinus Mantuanus erat in eo conuentu . Is pro ea auctoritate, quam omnes ei post Matthaeum haud dubie praecipuam tribuebant, dicere orsus, non modò Vicecomitis consilium probauit, sed fuit etiam infestior quàm fuerat ille : Pontificemque Romanum & Ecclesiae nomen est infectatus oratione sua, quomodo si nihil ibi supra consuetudinem hominum



hominum aliorum esset, & studia quae mortales  
alios habent, in illa quoque suprema potestate,  
versarentur. Eius Passerini orationem in hanc  
sententiam fuisse memoriae proditum est. Siquis  
principum esset avidus exitij sui, velletque fortu-  
nam eam amittere, quam diuino nutu & nascendi  
sorte esset affecutus, hunc debere non admittere  
penitus in animum ea, quae parens publicae salutis  
Matthaeus amantissime ac sapientissime proposui-  
set. Pontificem max. hominem esse factiosum,  
partium ducem, inimicum imperio, nomenque  
illud sanctissimum commodauisse Guelfis ad fa-  
ctianda odia: collusionem esse mutuam inter Roma-  
num & Turrianos, vt si factio sustulerit cornua,  
tota sit in huius potestate, vicissim iste ad tollenda  
„ cornua sit adiumento. Iam de iactatione mina-  
„ rum, inquit, & caelesti periculo, quod denun-  
„ tiatur, cum idem sentiam, quod a Matthaeo  
„ dici audistis, eadem me putate dicere quae Mat-  
„ thaeus dixit. Nihil, neque timendum censeo ma-  
„ gnopere, neque contemnendum, ne metu impe-  
„ dianur malorum remedia, contemptu malum,  
„ crescat. Hoc amplius censeo, vt Canis Scaliger  
gerendo bello dux creetur. Inclyta erat Scaligeri  
fama, nec fere militaribus factis & magnitudine  
animi clavior quisquam ea tempestate habebatur;  
oderatque idem acerbissime Turrianos, & Caslo-  
num Archiepiscopum, cuius potissimum instinctu  
ea gliscere pericula principibus Italiae viris puta-  
bat. Imperium tamen illud & administrandi belli  
summam

summam aliquandu recusauit, dictitans alios esse potiores, & magnifice disserens, quas ob causas sibi quemque praeferret. Ea oratione acuit magis principum studia quàm restrinxit, summaque voluntate rem omnes ad eum detulere. Ita Scalliger foederis aduersus Pontificem impij dux creatur magno dedecore vrbis Mediolani, unde consilia haec manabant. Sed dedecus erat maius, idemque finis audendi omnia quòd anathemate damnata iam saepius ciuitas contraxerat quasi habitum eius rei quendam & irato Deo cuncta quotidie ruebant in peius. Interèa Cassonus moritur ex Archiepiscopo Mediolanensi Aquileiae Patriarcha, vir, suis & familie rebus vtramque fortunam expertus. Natus in familia dominatrice obtinuerat honorem, qui natales etiam infimos aequare principibus posset. Principi simul & Archiepiscopo plauserat ciuitas. Dein versa protinus omnia: dissidium capitale cum proximis: captiui fratres: custoditus ipse domi: mox exsul, & dum vult iniurias persequi, genus ipse suum euertit, quodque fuit miserrimum omnium, fortunam quam suis abstulerat, inimici communes tenuere. Idem postea nouum amicum, veterem hostem dominatui suo ludibrium habuere, pulsumque rursus, in aliena terra coegere, mori tam prope ab exule quàm fuerat olim à patriae domino & regnatore. Is Cassoni finis fuit. Matthaeus deuicto in hunc modum Archiepiscopo, secundam ex Pontifice Max. palmam petebat, ut quemadmodum illum eiecisset, ita aduersus hunc immo-

immobilis ipse atque restare inuictus posset. Hu-  
 ius tantæ atq; tam impiæ rei spes vniuersa posita  
 erat in eo, si præter foederatorum auxilia satis ipse  
 suo Marte foret instructus ad repellendum hostem,  
 cuius arma primo statim motu ipsam concrepare,  
 victoriam atque triumphum viderentur. Simul, ut  
 antea demonstraui, etiam si nullum à Pontifice bel-  
 lum immineret, inuaserat animum cupido Italiæ  
 capiundæ, scilicet ut omisso Principis nomine, Rex  
 appellaretur, quemadmodum ex Vicario se ipse  
 Principem fecisset. His animis, sex millia peditum  
 cum equitatu quantum efficere maximum potuit, in  
 Ligures misit, ubi Marcus filius strenue rem gerebat.  
 Negotium autem erat illud plenum opportunita-  
 tum maximarum, siue mari bellum veniret, siue à  
 Pontifice maximo copiae terrestres in Mediolanen-  
 sem agrum immitterentur. Sed quanta cura Vice-  
 comiti Genuæ potiundæ, tanta sollicitudine Gê-  
 nuenses ipsi tuebantur urbem, & acciuerant auxilia,  
 quibus imperum facile sustinerent. Hoc tempore  
 Vicecomiti decesserat vxor, cum qua vixerat mira  
 concordia, & super id, quod nihil magnopere ad  
 Genuam procedebat, etiam domestico afflictus lu-  
 ctu, dedere paulatim religionibus animum creditus  
 politici supercilij senex, aut coepit, aut simulauit.  
 Quippe etiam Scaliger deserta foederis fide percu-  
 lerat hominem, atque varias voluenti cogitationes  
 occurfabant interdum, mortuus in exilio Archiepis-  
 copus, Apostolicæ diræ, status Ecclesiæ præsens,  
 omissa sacra, tot in Deum iniuriæ, non quidem

N

ut

ut palam excitaretur aliqua mutatione vehementi, ad quam homines eiusmodi fere non descendunt, sed tamen ut acrius introspicientibus esse commotum appareret. Bonacosa Burra ( id nomen mortuae Principis vxori ) sepulta est in Eustorgiana Aede, qualibus debuit exsequijs in Ciuitate, quae iaceret anathemate defixa, in qua gratificari rerum domino religionem suam, aut vellent sacerdotum plerique, aut cogerentur. Annus hic erat humanae salutis millesimus trecentessimus decimus nonus, quo anno, tantam fuisse frigoris vim ferunt, ut Padus (rarum illi flumini) gelu duratis aquis, tutos onustis quoque plaustreis incessus praeberet. Mendici homines, quâ quisque fortè constiterat, reperiiebantur exanimati, cum defecta insuper alimentis corpora concalescere nusquam possent. Constitit, obriguisse multos ante focolum, aut sub lodice, & quia panes ipsi statim è furno lapidescebant, inter mandendi conatum plerique efflabant animam. Magis etiam horribile spectaculum alij fuere, quos in colloquio, siue actione aliqua, vita repente destituit, ita, ut oculos, ora, manusque in quo praeriguerant habitu & motu defixas non nisi postea, deprehensa mors teneret. Implicito bellis consiliisque suis Principe, clausa Ecclesia, pastore profugo, nulla erant publica subsidia plebi, & noua haec pestilentia populum absumebat. Quasi piaculum coelestium irarum eo tempore quaesiuisse Matthaeus est visus, cum thesauros Templi Modociensis, quos Turriani ante sextum & quadagesimum

num annum oppignerauerant, sua pecunia redemisset. Id pietatis opus re ipsa liberale, magnificum etiam in speciem fuit. Namque Modoetiam eius rei causa Vicecomes ipse profectus, deposuit sua manu thesauros in Ara, & Praesidem eius Templi Diuum clara voce est precatus, ut si ei cordi fuisset, sua illa munera & suos honores in pristinam restitui sedem, cuius opera & pietate id factum esset, hunc, prolem eius, & subiectas imperio gentes benigne tueretur. Haec ita precatus, admonuit seuerè Templi sacerdotes, uti thesauros illos quamdiligentissime in posterum custodirent. Regum & Reginarum esse dona venerandae antiquitatis, quae moueri sua sede & alienari sit nefas. Talibus dictis, & multò magis liberalitate ipsa commouerat omnium animos, ut largus idem piusque praedicaretur. Namque, sex, & viginti millia florenorum in eam redemptionem insumpta fuisse constabat, quae summa ad eorum temporum aestimationem debuit longe maior esse quàm esset, postquam aucta rerum pretia & noui orbis aurifodinae metallis honorem imminuerunt. Interea Pontifex max. ad vindicandas Mediolanensis Ecclesiae contumelias delendamque Vicecomitis tyrannidem, foedus iniit cum Ruperto Apuliae Rege, quoniam ad eam diem Apostolicis denunciationibus & anathematis poena profici nihil potuisset. Etiam Rex Galliae socia arma iunxerat, isque mille equites ducibus Philippo, & Carlotto, & Bernardo Margolio propinquis suis miserat Auenionem cum eius-

nodi mandatis, vt ad omnia, quae Romanus imperaret, praesto essent. Pontifex laetus his animis coalescentium Regum ad Ecclesiae defensionem, auxiliares hasce copias cum eo exercitu, quem è suis ciuitatibus iam antea conscriptum habebat, duci in Insubres iubet. Rerum summa permissa Philippo Valesio: huic reliqui duces parere iussi: mandatum, vt domitis Ecclesiae perduellibus Metropolis Ambrosiana redigeretur in antiquum statum, & Matthaeus ille Vicecomes exsueretur ea potentia, quam per insectationem & damna rerum Ecclesiasticarum exerceret: omnino Guelfi, quae semper Apostolicae Sedi fide & addictae partes fuissent, in pristinae fortunae locum restituerentur. Addita promissa rerum ingentium, quae quisque virtutis & fidei praemia sequerentur: pecuniae praesentis attributum, quantum ad stipendium militi, quantum ducibus ad magnificentiam assignari, Romanae maiestatis erat. Circa Iunij mensis initium in terram Insubriam peruenere. Aduentus eorum, metu vel per laetitiam acceptus, vt quique Guelfi erant, aut Gibellini: sed Matthaeus ante omnes ancipiti cura distrahebatur: daret ne se se Pontifici, & qualibet conditione pacem acciperet, an potius iret contra, & fortunam experiretur. Imperij retinendi pertinacia, animus impatiens aequi, parata quoque subsidia & egregie firmata Donius huc trahebant. Propendebat in partem alteram, spretum antea, nunc terribile Pontificis nomen, quem socij Reges sequerentur, cuius arma

iam

iam Insubriam tenerent. Itaque tertiam quandam consilij viam secutus, nec sine pacis cura, nec extra belli meditata erat. Pontifex ipse, antequam ferro decerneret, misit è Cardinalium numero Pogietum inclyti nominis hominem, qui tentaret adhuc animos hortamentis & auctoritate: si abrupta omnia & desperata ostenderentur, ad regendum consilio bellum adesset. Is Valentiae confedit. Eò citati statim è Clero qui deferebantur in Matthaei gratiam & animarum suarum exitium spernere edicta, sacris impijs operari, atque inter caeteros hi vocabantur: Abbas D. Ambrosij, Abbas D. Simpliciani, Abbas D. Dionysij, Abbas D. Vincentij, potentes homines in Ecclesiae rebus, & ob callida ingenia frequentes apud Matthaeum, ciuiliū negotiorum arbitri, impliciti fallacijs & mercatibus Aulæ. Hi cum ad legatum obedienter irent, vsus Matthaeus hominum opportunitate, mandauit, vt de sua erga Sedem Apostolicam pietate prolixè testificarentur ac docerent, quemadmodum ad omnia iusta & legitima paratus esset. Ac dextere liberaliterq; agendo rem eam Abbates, pene legatum in spem adduxerant, posse auctoritate finire bellum antequam inciperetur. Id Cardinalis omni victoria, quae per acies veniret, longe fore gloriosius putabat. Sed ne astute composita, credita simpliciter reciderent ad sedis Apostolicae postea detrimentum ludibriumue legationis, Parmensem Episcopum, qui penitus consilia Vicecomitis exploraret, misit. Is cum Vicecomite congressus,



- gressus, quandiu res erat in verborum officijs, nihil plane desiderabat quod amabilius ab sene illo reuertentiusue dici posset. Vbi Parmensis attingit exsilium Archiepiscopi, remque Turrianorum vniuersam & libertatem vrbis: tunc enim uerò frons & oculi pro responso fuere. Mox & responsum, quale vultus ille denunciaret, redditur. Regnare se Caesaris beneficio: Romana postulata non satis posse mirari. Is colloquio finis. Abiisse inde rectà Parmensem tradunt, velut ab scelerata vrbe & inimica Deo, vitantem moenia & congressus: etiam in Monasterio D. Simpliciani substituisse cùm ueniret, atque Matthaeum illuc euocasse, ne ingressus urbem ipse contaminaretur. Cùm in hunc modum spes tentata pacis esset, pars vtraque violentior ad bellum exarsere. Legatus Raimondum Cardonum & Paganum Turrianum ad fines euastandos vrbesq; tentandas illico destinauit. Ab Vicecomite, prouisu periculi parata erant praesidia & munimenta, queis cuncta defenderentur: neque nros antiquus omittebatur feriundi hostem auro, quo saepe telorem antea feliciter administrasset. Corruptelis atq; prodicionibus & caedibus omnia permiscebantur.
- Et Insubria tota pessumibat, dum duo maximi
  - exercitus principum etiam maximorum pugnant
  - pro Religione ac dominatu, quacunque fors, siue imperus tulit. Coeperat statim ea rerum forma displicere Pontifici max. bellumq; nollet suscepisse. Nam super id quod nulladum operae pretia ad vniuersae rei summam fiebant: etiam ad famam
- hominum



hominum memoriamque posteritatis existimabat incommodum fore suo nomini, si tantum fieret Christiani sanguinis in suo Pontificatu, quantum, obstinatus hostis & commissarum iam aliquot pugnarum euentus, ante victoriam effundendum esse ostendebant. Ideo componendae rei, atque reconciliandae concordiae rationem rursus omnem exquirebat: ac tentata iam frustra religione Matthaei, & coelestium minarum terrore nequicquam admo-  
to, placuit, euocari duodecim primos Reip. Mediolanensis, si fortè hominum illorum aequitate conuenire aliquid posset. Id negotij datum Legato, editaque simul ei, quae Mediolanensibus viris promittere deberet Apostolicae Sedis nomine, quaeue ab illis vicissim efflagitaret. Exciti duodecim ad Valentiam haud grauante conuenere: & data fides erat, impune venturos atque abituros vti venissent. Non subtraham illustribus familijs honores suos, praetermittendo nomina duodecim illorum, quae scriptores alij suis annalibus intexuere. Fuerunt autem huiusmodi. Gulielmus Pusterula. Franciscus Vicecomes. Franciscus Garbaniatensis. Andreas Hortus. Imberaldus Mandellus. Mucius Moncia. Ricardus Pirouanus. Stephanus Vicomercatus. Gulielmus Casatus. Lucas Cribellus. Bellinus Petrasancta. Othorinus Burrus. Homines erant nobiles, diuitijs insuper & vitae famanacti auctoritatem in ciuitate, quanta cuiquam esse potest, vbi rerum vnus potitur. Turbatas Ecclesiae res iidem, eiectionem Archiepiscopum, & spreta Summi

Summi Pontificis imperia, veluti communem temporum ignominiam, & praecipuum Patriae dedecus interpretabantur. Acceptis à Pontifice prius, dein etiam à legato literis, ut cum bona Matthaei pace proficiscerentur, agitauiere: neq; abnuuit Princeps, siue, ne frustra repugnando, animos eorum magis etiam ab se alienaret, siue, quia negotiationis huius moras interea fore bello utiles speraret. Ac nunquam oblitus eius lenitatis, qua tegere suum, animum, & ad omnia, quae expedirent, confor- mare, natura vel usu instructus erat, Ambrosium Alliatensem scribam suum intimum euntibus adiunxit, quod veluti datum eorum honori ac dignitati opportunitatem insuper habebat aliam, ut explorator, utq; vinculum foret ad omnia, quae agenda essent. Marcus etiam Matthaei filius, ferocia sua, vel sicuti credidere quidam, occulto patris mandato, cum iam iamque ituri essent, haud ambigue minitabundus monuerat, ut meminissent officij, scirentq; conscium ipsum, & in tempore vindicem fore, quicquid ageretur. Haec occursum de industria quaesito, haec, ut quisq; fortè inciderat, non nemine etiam in aulam euocato iecerat atrocior vultu, quam verba erant. Caeteri, iuueniles minas transnitere virilibus animis: apud Franciscum Vicecomitem tantopere caedem valere, ut ex medio itinere retro domum rediret, deserto turpius comitatu, quam si pedem efferre domo recusauisset. Undecim viri, postquam Valentiam ad Legatum, peruenere comiter accepti, post dierum aliquot quietem,

quietem, in concilium vocantur, & cùm assedissent omnes, legatus in hanc sententiam esse locutus fertur. Optatissimam sibi rem accidisse, vt Mediolanensis Reip. capita, virosq; prudentissimos haberet in conspectu, quos docere posset de paterna voluntate summi Pontificis erga rem Mediolanensem, ac de optima saepe finiendarum calamitatum, quam in eorum prudentia & aequitate collocatam haberet. Mouisse Romanum arma, non odio cuiusquam, vel cupidine alieni imperij, sed necessaria cura tollendi pessimum exemplum ne quis aliena per vim inuaderet, vtque, sicuti verbum Evangelicum habet, quae sunt Caesaris Caesar reddantur, quae sunt Dei, Deo, Si iam iude à principio facultatem eorum praesentium habuisset Apostolica Sedes, pro bello pacem ad eam diem haud dubie futuram fuisse. Facta quae sint, infecta reddi non posse consilij hominum: posse quidem prouideri ne talia in posterum fiant. Culpani & initium omnium malorum ad Vicècomitem pertinere: sed illum quoque non potuisse facere, quae fecisset, nisi multorum ope subniteretur. Et quamquam ille cum sua domo sit anathemate damnatus, plures tamen potuisse damnari, consilij implicitos atque permixtos, adiutores rerum, instrumenta belli, quod ille aduersus Ecclesiam gerat. Neminem se vnum accusare, rogare tamen vniuersos, vt quibus consilij, quibusue ministerijs & artibus antea bellum adiuuissent, ijsdem adniterentur ad pacem sancte ac sincere faciendam, quae redacta in antiquum

decus Italia, etiam ipsis esset allatura libertatem,  
 quod vnicum ciuile bonum ab omnibus mortali-  
 „ bus tanti aestimetur. Ac, ne putetis, inquit, rem  
 „ adeo pretiosam & expetitam, nimium magno vo-  
 „ bis emendam esse: nihil aliud postulamus, quàm  
 „ hoc ipsum, vt liberi velitis esse. Desinite parere  
 „ Vicecomiti, legibus vtimini vestris: & acta res erit.  
 „ Nullos sibi fasces, nullam vmbram imperij postu-  
 „ lat sibi Romanus in vestra ciuitate: satis regnabit,  
 „ si quiete, si catholicae disciplinae conuenienter  
 „ agere voletis. Forsitan expectet aliquis vestrum,  
 „ vt Turrianis aliquid caueamus: videte, quàm vilia  
 „ sint caetera pacanti Metropolim Ambrosianam,  
 „ Pastori summo & sancto. Remouet eos homines  
 „ ultra centesimum ab vrbe vestra militare: neque  
 „ pax aliter fiet, quàm si tanto interuallo disiuncti  
 „ manere velint. Quos tamen odio Turrianorum  
 „ expulistis, hos redire in patriam aequum censet.  
 „ Vicecomitem & alios, quicumq; culpis illius affines  
 „ vnà cum eo damnati sunt & notati, absoluit aeter-  
 „ nis vinculis, & anathematis poena, dummodo ta-  
 „ men Vicecomes ipse in animum inducat Romanum  
 „ accedere supplex, ibi pacem Apostolicae sedis ex-  
 „ pscere precibus ob vetera, in posterum obsequium  
 „ profiteri. Sic erit bello finis, & inclytae olim reli-  
 „ gionis Ciuitas tranquilla pace fructur, decedetque  
 „ vobis infamia, quam adhuc meremini rebelles Ec-  
 „ clesiae Catholicae, prohibiti sacris, ab coetu com-  
 „ mercioq; piorum remoti. Alioqui nos iuste pieq;  
 „ suscepta arma, paribus animis ad finem vsque,  
 „ sicuti

„ sicuti decet in tali causa retinebimus, aderitq; illud  
 „ ipsum pro quo dimicatur Numen. Haec ubi dixit  
 legatus, institit hortari Mediolanenses illos, ut  
 ante omnia, precibus accuratissimis diuinum spiri-  
 tum inuocarent ad rem bene salutariterque consul-  
 tandam, id in omni negotio primum esse, sine quo  
 mortalium prudentia constare non possit. Erat in  
 eo numero Franciscus Garbaniatensis ille, de cuius  
 animo & fortuna, & immortalis erga Vicecomitem  
 merito **antea demonstratum est**. Is meriti sui lar-  
 gus, ut plerique, & fortasse non iniquus aestima-  
 tor, praemia quaedam ingentia sibi destinarat, quae  
 postquam obligere minora votis, ac praesertim,  
 ubi **gerendo bello Dux** alius est creatus, verterat  
 repente **animum**, insensufque Vicecomiti premebat  
 dolorem, donec aliqua nocendi opportunitas,  
 quam sedulo captabat, veniret. Ea, quae nunc  
 offerebatur, haud segniter usus, demonstrando  
 collegis pericula quae imminerent, conquerendo  
 Vicecomitis iniurias erga Mediolanensem Eccle-  
 siam, Patriae seruitium & alia perturbandis animis,  
 facile omneis suarum irarum impleuit, ut imperium  
 abrogandum esse Vicecomiti quacunque vi posset,  
 censerent. Si nihil autoritate proficeretur, ciui-  
 tatem vniuersam in tyrannum armare decreuerunt:  
 atque ubi ea sterit sententia, Garbaniatensis idem  
 „ fertur ad Collegas ita locutus esse. Viri Mediola-  
 „ nenses, & socij carissimi. Cum in tenebris, &  
 „ densa caligine demersis animis iaceremus, diuinae  
 „ bonitati placitum est, immittere suae lucis radios,

„ vt salutem ac libertatem , pacemque & vitam &  
 „ laudem amplecteremur . Vos oro quaesoque , tan-  
 „ tum hoc celeste beneficium constantia vestra firmum  
 „ ratumque efficit . Nam quod diuini muneris erat ,  
 „ vt ad ea , quae nobis vtilia & honesta essent , exci-  
 „ taremur , id iam factum est : reliqua consensum ,  
 „ operam , fidemque vestram requirunt , quae si de-  
 „ sint : ne Deus quidem ignauos & vaecordes  
 „ adiuuabit . Ante omnia , silentio est opus : interea  
 „ dum gerendae rei dies venit . Vbi dies , venerit ,  
 „ sicuti viros , sicuti Mediolanenses decet , agemus .  
 Responsum inde Legato est : fore Mediolanenses  
 in potestate summi Pontificis , & imperata facturos :  
 caetera ipse exsequeretur . Ita Mediolanum re-  
 deunt : obfirmatisque in hanc sententiam animis ,  
 id quod sibi de pace cum Pontifice facienda decre-  
 tum esset , Vicecomiti renuntiauerunt : se inuitos  
 quicquam quod minus placeret ipsi dicturos , sed  
 patriae caritate subigi , quam si necesse sit , vel suo  
 ipsorum interitu esse saluam velint . Vnam viam  
 manere salutis , vt cum sacrorum Principe redeant  
 in gratiam , id fixum sibi esse ac destinatum . Vice-  
 comes ad ea consternatus animo , confuso vultu ,  
 pauca & incerta quaedam respondit : non se pacem  
 abnuere dummodo Resp. maneret eodem statu ,  
 quo tunc esset : optare , vt qua fide ipse in alios  
 egisset , ea sibi fides ab alijs praestaretur . Persona-  
 bat interim vrbs tota crebris vocibus pacem expo-  
 scentium , & pueri feminaeque faustos in Pontifi-  
 cem & Ecclesiam tollere clamores non cessabant ,

vbi semel is rumor emanarat . . Quò magis fama increbrescit , eò plus terroris , atq; perturbationis est apud Vicecomitem : ac saepe ille profitebatur ; si quid minus religiose , siquid irreuerenter in sacra sacrorumue praefides factum esset , nullam suam culpam esse talium rerum : velle se , vti catholice ac pie vixisset , ità Catholicum piumque mori : eius rei testem Deum inuocabat . Haec publice priuatimq; contestans in omni sermone , nihil tamen afferbat ad comprimendum tumultum , qui violentior in dies excitabatur . Itaq; auersus ad fortiora remedia , exciuit ex finitimis vrbibus Gibellinis , qui postquam frequentes adfuere ; collocti cum eo aduocant ipsi duodecim viros , & grauissime conqueruntur , quòd priuato consilio de pace egerint . Non illis Ecclesiam & sacra esse potiora quàm sibi , sed turbulentos homines egisse omnia dolo malo , & fortasse futurum , vt illos poeniteret . Simul in Pontificem inuecti sunt tam aspere atq; acerbe , vt Matthaeus ipse castigaret licentiam , atq; rogaret , vt salutis suae causa , linguae parumper temperarent . Dimissis postea xii. Viris , Matthaeo suadebant , vt illos quidem in vincula coijceret , armatorum verò manus ad reliquae multitudinis terrorem in vrbe dispositas haberet , Galeaciumque filium , qui Placentiae tunc curabat , illico domum euocaret . Non placuit prehendi xii. viros , neres ea maioris in vrbe tumultus causa esset : dispositi sunt locis opportunis armati : Galeacius adfuit , licet antea suspectus , tamquam patris senecta



necta detineri dominatum aegre pateretur. In eum statim auersi omnes: & ille magnifice differebat de Gibellinae factionis potentia, patris imperio, & quemadmodum confideret fore breui, vt tumultus ille conticesceret. Ferunt, cum in Patris conspectum frequenti Gibellinorum corona deductus esset; obortas vtrinq; lacrimas, ac deprecante Galeatio veniam errori, si quid fortè contra patriam pietatem egisset, aliquandiu nihil effatum senem: postea precibus adstantium mitigato animo, dixisse, filiorum esse neminem, cui spes suae magis inniterentur. Ab eo congressu, Galeatius haud dubia patris voluntate, rerum omnium arbiter, & familiae munimentum, agit cum xii viris, comiterque simul & elate percunctatur, quidnam esset illud, quod audiret moueri per ipsos aduersus Patrem dominumq; suum, quodue cum Romano legato nuper egissent. Illi responderunt, nihil actum abs se nisi bona fide, & Patriae cura, quam rebus omnibus anteferrent. Legatum Apostolicum, virum esse grauem, amantem publicae quietis, dignum, cuius fidei cuncta permitterentur. Galeatius enimvero, pari grauitate, pergerent ait: se quoq; nec Patri, nec Patriae defuturum. Cessit inde Matthaeus omni rerum administratione, seque totum in sacra & religionem auertit. Ad omnia templa ibat, & die quodam, aduocato in templum maximum Populo Cleroq; Mediolanensi, positis humi genibus, ad radices Arae maximae, symbolum Apostolorum, elata quantum poterat voce recitauit. Tunc

alioq;

conuersus

conuersus ad multitudinem stupentem nouitate rei, summa item contentione vocis, dixit, se, vti catholice pieque vixisset, ita catholice pieque moriturum esse: calumnias, queis suam ipsius famam homines aliqui dehonestarent, iudicaturum esse Deum extremo saeculorum die: tunc, inquit, cum omnia mortalium in aperto erunt. Haec vti dicta actaq; erant, publicis tabulis consignari voluit cum hac ipsa contestatione: Matthaeum Vicecomitem non aliam profiteri religionem & fidem, quam quae verbis illis contineretur, vti palam prima postrema recitata essent. Postero die, quam hoc de se spectaculum multitudini exhibuerat Vicecomes, velut alienata mente Modoetiam se se proripuit citato equo, ibique adorato Numine incidit in morbum, ex quo paulo post moritur. Mortuus est ad Crescentiacum in aedibus Monachorum, tria millia passuum ab vrbe, cum aeger illuc ab Modoetia deportatus esset. Haud ego affirmauerim in huius hominis fine id quod etiam in medio rerum cursu, relinqui à nobis ambiguum decuit: fueritne utique in religionis negotio prauus ille & malus, an odio tantum inuidiaque contraxerit immeritam hanc labem. Non scriptores solum, sed res ipsae trahunt utroque, & paria in contrarijs partibus momenta rationum occurrunt, quae proponere lubet, vt potius alij sententiam tulerint, quam, vel litterae nostrae maculam vllam tanti viri manibus inurant, si caruit hac interiore culpa, vel dedecus eleuent, si re vera contumaces homini aduersus Ecclesiae

dogmata

dogmata sensus fuere. Primum omnium initia Principatus iuxta sanctitatem acta causam agunt, vindicantq; ipsum ab fama, quae inueterauit. Interesse ille rei diuinæ quotidie: reuerenter inferuire sacrificanti: curare sæpe mysterijs animum: & formata sicut assolet in Principis mores familia, statis horis in domestico sacello religiosissimæ preces, ipso modos ineunte; canebantur Grauiissimi scriptores, cum mentiendi causas procul haberent, hæc ipsa tradidere sicut retuli. Iam facilis alloquio & ab innocentia ærumnisque lenissimus, quotidiana etiam stipe leuabat egentes, quæ licet possint esse officia diuersæ cuiusdam virtutis, & animi nihil aliud quàm à natura rectè informati, rarum tamen est, vt eadem ab christiana, & catholica perfectione separata reperiantur. Ire frequenter ad templa supplicatum eadem oritate donis: diuinum per omnia cultum amplificare ac tueri, profectò non sunt eius, qui, vel iam finxerit sibi peruersas de superis opiniones, vel ad eas facile degenerare possit. Hactenus existimo purgari ac defendi posse Vicecomitis manes ab ea labe, quæ semel iniusta fortasse nunquam eluetur apud homines: vtinam apud Deum diuerso iudicio res agatur. Rursus animum in hoc negotio meum restringunt timore ac moestitia & suspicione, profugus Archiepiscopus huius iniuriâ, vastatio & solitudo rerum Ecclesiasticarum, Apostolicæ poenæ, contemptus earum. Quasi neque Deus vsquam, neque Dei Vicarius esset, ita sumpta contra Romanum arma, concitata

concitata factio velut in communem hostem, perseveratum ad ultimum, donec vita superfuit.

Sunt haec ipsa quoque perscripta in annalibus illis unde propter incorruptae fidei famam petuntur antiquitates urbis, neque

debuere praetermitti ab eo,

qui professus esset per-

scripturum se

omnia,

laeta siue tristia patriae huius principumque ipsorum.

Cacterum, de ea re, ut

cuicunque visum

fuerit, sta-

tuer.

## IOSEPHI RIPAMONTII

## CANONICI SCALENSIS

## CHRONISTAE VRBIS MEDIOLANI

## HISTORIARVM AB METROPOLI CONDITA

## DECADIS III

## LIBER II.



**P**OSTQVAM Matthaeus expirauit, filij sedulo celauere mortem donec prouisis, quae tempus monebat, falli diutius fama non potuit. Corpus exanime clam tumulto est illatum, quia timebatur, ne Pontifex iratus, Anatematis obtentu, cadauer projici insepultum iuberet. Nescitur, vtra in Aede situm fuerit, ad Crescentiacumne, vbi etiam obierat, an verò ad Claram Vallem, vbi pleriq; Principum tunc sibi sepulturae sedem eligebant, sicut tumuli adhuc inscriptionesque testantur.

Eius decessu creuerant coniuratis animi: manebant odia: delere tyrannidem, ac ne succedente Galeacio, Metropolim paterentur fieri Vicecomitum hereditatem, agitabant. Hi consilia sua omnia perferebant ad Cardinalem Legatum, & ipse vicissim legatus omnem gerendae rei spem in eorum consensu ac fide postam habebat. Ab altera parte, Galeacius, tradito per manus,

& iam haud dubie possessio imperio, caput rerum erat: domi ciuium motus, foris hostem, quantum omni bellica, & ciuili ratione posset assequi vnâ cum Marco fratre sustinebat: reliqua nobilium, siue plebis multitudo, partim erat coniuratorum & Legati: plures ituram in saecula potentiam, & imminensem vrbi dominatum cernebant, eamque spem, aut metum sequebantur. Etiam Ecclesiastici homines, & hic aliud agens Clerus, in Pontificem, aut in Galeacium diuisus erat, tantò magis incertus & fluctuans, quia nouus Archiepiscopus Aicardus, cùm Guelfarum partium esset, non poterat inire Pontificatum, magisque turbabat animos exsul, quàm ab eo quicquam ad regendum Ecclesiae statum afferebatur. In ea rerum colluione Canonicos Modoetienfes inceslerat metus, ne ad templi sui thesauros antea quoque sublatis inde & oppigneratos, licentia perueniret. Ob eam rem habito inter se consilio, statuerunt pretiosissima quacque sub terram esse defodienda, delectis è Collegio quatuor viris, qui defodiendi curam haberent, eoque ministerio defuncti digrederentur seorsim in longinqua loca, & circa supremam vitae horam, rem aperirent ei, quem grauissimum virum, optimumque iudicassent. Ita res commissa quatuor Canonicis est: reliqui consensere vltro vt celarentur. Ea occultatio thesauri, idq; Canonicorum inter ipsos decretum factum est anno millesimo vicesimo tertio salutis humanae, mense Ianuario, cùm paulò antea foede direpto

Oppido Mediolanenses, Basilicâ tantum absti-  
nuissent. Insequente Februario, Marcus & Lu-  
chinus Galeacij fratres commissa cum Pontificijs  
pugna, circa flumen Abduam, duos è coniuratis  
Cribellum & Garbaniatensem interfecere, clami-  
tante Marco inter ferendum: Viuat Ecclesia, &  
patriae proditores moriantur. Pontificij tamen  
eo praelio superiores fuere, captaque Modoetia,  
Garbaniatensis cadauer ibi in D. Ioannis Aede  
sepelierunt. Et armis quidem sic certabatur: cer-  
tamen aliud verborum erat, cum pars vtraque  
allicere ad se partis alterius fautores conarentur.  
Pro Vicecomite prensabant amici vel propinqui  
promissis aut minis: Pontificem & religionem,  
Ecclesiamque, & alterius vitae poenas in rebelles  
concionabundi sacerdotes inculcabant, eaque  
audita, terrore obiecto, vel pietate ingenua per-  
pulere multos. vt in sanctiora castra transirent.  
Modoetiae posita summa rerum erat, caputque  
fiebat ibi pugnantium pro Ecclesia non tamen ea  
frequentia & ardore, quem grauissimus quisque  
in tali causa desideraret. Ac reperio, Aicardum  
Archiepiscopum, quia non satis impigre res admini-  
straretur, Modoetiae concionatum esse totidem  
„ verbis. Viri Mediolanenses, & quotquot pro  
„ Catholica Ecclesia aduersus impios arma suscepi-  
„ stis. Vos quidem cupidine salutis & studio recti  
„ venistis in haec castra, sed non venisse satius erat,  
„ quàm lente sic agendo tradere victoriam hosti,  
„ prodere publicam causam, istaque lentitudine &  
prodicione



„ proditione laceffere diuinas iras , ſicuti vos facere  
„ animaduerto . Proinde , quae amplius dicam acci-  
„ pite , vocenique meam , non vt miſeri hominis  
„ vocem , ſed quaſi miſſam è coelo condite in ani-  
„ mum veſtrum , & attendite quae me vobiſcum ,  
„ agere Deus iubet . Niſi bellum hoc alijs animis  
„ geritur : victoria penes alios erit , voſque ludibri-  
„ um & praeda hoſti , exemplo eritis , pigritiam &  
„ ſegnitiem in Dei negotio plecti ſicuti caetera mor-  
„ talium ſcelera , magnumque ipſam & inexpiabile  
„ ſcelus eſſe . Vult ſane Deus Eccleſiam ſuam ma-  
„ nere incolumem : ſed nunquam per vos erit inco-  
„ lumis donec ſic agetis , & inuenta quâ Diuinæ  
„ maieltati placitum erit , diuerſa via , ne Romana  
„ ſacra polluantur , proijciemini qui miniſterij pulcher-  
„ rimi gloriam ita contemplitis . Seuerus homo &  
„ ſpectatae religionis erat Aicardus , magna in vul-  
„ gus fama , propterea quod ex minore Franciſcano  
„ factus Archiepiſcopus retinebat Ordinis inſtituta  
„ & antiquam diſciplinam . Non tamen potuit  
„ excutere fatalem torporem ex militaribus animis ,  
„ miraque ſocordia res omneis agebantur . Tunc  
„ Robertus Siciliae Rex olim iſto cum Romanis  
„ foedere , fautor antiquus Archiepiſcopi Caſſoni  
„ Turrianorumq; reliquorum , cognito rerum ſtatu ,  
„ timens id quod futurum erat , Raimundum Cardo-  
„ nam cum ſexcentis equitibus miſit , vt ea manu rem  
„ Eccleſiaſticam adiuuaret . Cardono ſtatim deditur  
„ Alexandria , eaq; Pontificis nomine communitur .  
„ Inde Modoetiam auxiliares peruenere . Lactus  
ad-

aduentus eorum fuit, spesque illa commouit parum per animos ac deinceps aliquanto plus in Pontificio exercitu, strenuitatis erat. Paulo post, Paganus Turrianus Episcopus Patauij, & cum eo, Franciscus & Simon filij Guidonis peruagati terras omnes amicorum, atque corrogatis in vltimi certaminis fortunam trecentis equitibus, eodem subiere. Horum aduentu, res ad seditionem venit: & quo die Oppidum intrauerunt, ibi in campo, qui D. Francisci campus dicitur, irritatis animis acre praelium fuit, praelioque commisso, conuersis repente signis, ad Vicecomitem transiere quicumque Turrianum nomen ob veteres inimicitias auersabantur. Caeteri iam decernere de summa rerum auebant: ac duo praesertim Gulielmi, Pusterla, & Casatus, quorum maximè consilio res nitebatur, eiusmodi sententias dicebant, vt quamprimum Vrbs Mediolanum obsidione cingeretur. Contra ea Cardonus, munita vrbs, & nimium ferae spei moras proponebat. Dum haec inter Ecclesiasticos agitantur, Vicecomes anteuertit, omni connixus ope ad hostem ex Oppido Modoetia detrahendum. Marcus, & Luchinus in expeditionem eam ière. Pugna prospera Ecclesiasticis fuit, videntesque rerum cursu ducunt ipsi ad Vrbem oppugnandam, & triduo postquam pugnarum erat, ipsis moenibus institerunt. Tunc Vicecomes in magno metu de summa rerum esse coepit, & concione aduocata, disseruit apta temporì. Non se bellum gerere cum

cum Ecclesia, sed defendere communem patriam  
velle: ac si vera loqui debeat, nihil spectare magis  
arma sua, quàm vt res Ecclesiastica Mediolanensis,  
ab æternis iniurijs tuta, & incolumis maneret.  
Esse Theutonas, esse barbaros in hostium exercitu,  
qui si urbem ingrediantur, sacros, & sacra omnia  
videat eorum furori prædam fore. Proponerent  
sibi ante oculos, tot Sanctorum Reliquias & cæ-  
lestia pignora, tantum Ecclesiastici argenti, supel-  
lectilq; religiosæ, templa ipsa, & aras, simulacra  
Diuum, vel marmore sculpta, vel expressa colo-  
ribus: cuncta, simul auaritiæ materiem, simul im-  
pietati ludibrium parari, nisi, quanta vi barbarus  
instet, tanta ipsi barbarum repellant. Neq; verò  
spem respicerent eam, quòd Romanis auspicijs ab  
ea parte geratur res, quodque religionis adesse  
vindices dicantur. In pace, speciosum & magnifi-  
cum esse Pontificum nomen, atq; ipsos tunc agere  
clementer & iuste: bellorum iras iisdem nihilo mi-  
tiores, & audas in sacrilegia militares manus,  
non posse cohiberi si quis velit. Ab eiusmodi di-  
ctis, cum moenia, & portae stationibus atque  
praesidijs firmarentur, omniq; alio repellendorum  
hostium apparatu militariter occupata Ciuitas  
egregiam Principi fidem ostentaret, Heluetij, qui  
sub Galeacio stipendia faciebant, accepta ab Ec-  
clesiasticis pecunia, capere, vel interficere ipsum  
agitauerunt. Atque non frustra id incoeptum  
fuiſſet, nisi Ioannes Galeacij frater, quamuis Ec-  
clesiastica in toga, belli necessitatibus intentus, re  
cognita

cognita, cum amicorum repente manu impetum in proditores dedisset, qui caesi, vel capti, spem obsessoribus ingentem illam ademerunt. Inde, cum trepidatione dissidium ortum inter ipsos, & sicuti lingua moribusque dissoni erant, ita seorsim inire consilia, variisque furere voluntatibus coeperunt. Gliscentem sua sponte seditionem irritabant obsidionis taedia: neque sisti res potuit, ubi Castroneus quidam (id nomen viro) Legati fratris filius, ad eruptionem ex vrbe factam acriter pugnans vnà cum primoribus ceciderat. Nocturno agmine Modoetiam eunt, idque statim Oppidum, fortuna commutata Vicecomes obsidebat. Rursus auxilijs ab legato missis, ipse retro Mediolanum compellitur. Variante suas vices bello, nihil certi, per totum eum annum apud alterutros erat: incendijs, & rapinis cuncta inuoluebantur absque discrimine vllò sacrae an profanae res essent. Tota belli moles ad Modoetiam vicinaque loca, Vicomercatum, Caratum, & Decium constiterat, & vestigia cladis eo tractu parietinae templorum adhuc manent. Insequens annus graui clade rem Ecclesiasticam afflixit, cum ad Vaprium in Abduae fluminis ripa pugnatum esset: neque scriptores aequales eorum temporum, in re tradenda, quicquam omisere quod horribile, ac memorabile visu, vel dictu accidere in praelijs possit. Semiuiua corpora sepulta mortuorum cumulis, inflatum humano sanguine flumen, & Bergomi, decem inde passuum millia clamores praelij eius auditos prodidere.

didere. Addunt etiam prodigia, quorum illud, & spectantium multitudine, & rei, quae portendebatur, euentu, certissimum fuit. Cum enim Mo-doetiae, in campo, quod Pratum appellatur, ea forte ipsa hora, qua duo exercitus ad Vaprium confligebant, iniretur equitum numerus, qui mittendi illuc subsidio Pontificijs essent, quoddam huiusmodi spectaculum obuersatum fuisse oculis fertur. Ingens vulturum multitudo per sublime volitans cum tristici clangore, primo campum innumbrauit. Dein scinduntur in duo agmina, consistuntque velut contrariae acies, hinc ad orientem solem, inde ad meridiem obiecta aduersa regione Mediolanum versus. Is minor erat numerus, & Vicecomitis copias, sicut ab euentu creditum est, repraesentabat. Postquam ita consistere aues atrae & stridulae, concurrunt inter se se rostris, veluti telis, & acerrime rem gerunt. Praeterquam quod sustulerant omneis ad id spectaculum ora, cadebant etiam ante oculos aligeri milites laniati, & cruenti, totoque campo plumae volitantes cernebantur: Adnotatum est, certaminis victoriam penes minorem aciem fuisse, moxque Franciscanae Aedis turrim, & vicinarum arborum cacumina gregatim infedere. Pars altera ita dissipata est, ut vultures terni, quaterniue non amplius, hac, illacque dispergerentur. Horae ferme spatium, ea tenuit pugna, nuntiataque postmodum Vaprien-si clade, interpretatio prodigij facilis fuit. Adeo responderunt omnia, similiq; ad Vaprium fortuna

Q                      dissipati

diffipati sunt Ecclesiastici, atque Modoetiae volu-  
crum praelio, superior multitudini paucitas, &  
hinc incolume stabileq; agmen, inde consternatio,  
& fuga spectata fuerat penitus ad humanae dimi-  
cationis formam. Sanè quaesitum est alijs ante  
me scriptoribus rerum, ecquid valeant prodigia,  
suntq; pleni libri exemplorum ex omni memoria,  
quomodo praesenserint mortales, aut viderint di-  
uinitus ea, quae post tempus aliquod euentura  
essent, quaeue diuersos apud homines, & locorum  
interuallo discretos agerentur. Mutae saepe ani-  
mantes, coelo, siue terra, vel aqua, vel igni, vel  
etiam elementa haec ipsa denuntiasse res futuras,  
ostendisse remotas existimantur. Cantu, siue vo-  
latu, tripudijs, extis, alijsque modis innumerabi-  
libus, interneciones exercituum aut triumphos  
cùm praecepissent animis Imperatores, ei prodigio  
congruit euentus, neque alibi ludificatio maior  
apud antiquitatem. Si gutta sanguinis in exanguī  
corpore conspecta esset, si manasset sudor ex mar-  
more, vel ligno, si prodijisset anguis alicunde, pro-  
digium erat, & quales negotiorum euentus ab  
eiusmodi ostentis erant in spe, vel metu, tales  
etiam interdum sequebantur. Iam auditaē voces  
ē coelo maiores & augustiores humanis, obuersa-  
ta oculis simulacra, visaeque species dimicantium,  
hominum etiam ipsorum vaticinia, clades & victo-  
riae non absone vaticinijs, constituta generis eius  
disciplina, collegia denique Sacerdotum adhibita  
procurandis eiusmodi religionibus penè arguunt  
dubitantes,

dubitantes, & quasi suo iure fidei partem petunt. ✚  
Sed priscae vanitatum alia quoque monstra  
reperientur, neque mirum fuit, inanes sibi formas,  
& consentanea formis interpretamenta figurare qui  
coeci penitus essent in summa religionis, ipsasque  
pecudes, & si quae sunt viliora, consecrata diui-  
nis honoribus colerent vt Numen. Ab eo scilicet  
fonte caetera mentium ludibria, & deliramenta  
manabant. Caeterum nihil arbitror esse absurdus,  
quam visis, atque portentis dedere animum, & si  
quid quamque rem antecesserit, arbitrari, vel hoc  
secutum esse, quia factum sit illud, vel vt poste-  
riora sequerentur, priora extitisse. Permeant om-  
nia cursus suos, neque mutatur quicquam in na-  
turae rebus, nisi regens eam Deus annuerit. An-  
nuere porro non nisi summa, & arcana ratione  
credere oportet intuentes maiestatem illam infi-  
nitam, quantum assequi humana mens potest.  
Exitere temporibus Hebraicis diuini Vates, ac  
deinceps alij, queis praesaga pectora diuinitus  
obtrigerunt, itemque praenuntia signa venturarum  
rerum missa de coelo nonnunquam, semperque  
vaticino hoc munere defungentur quibus aeterna  
prouidentia tale delegare ministerium voluerit, &  
vocalia saxa si Deus volet, fient. Vt quidem, vel  
suapte nutu, vel instinctu coelesti passim vatici-  
nentur homines, inanimaque & animata, sicuti  
captae superstitione mentes, in metu, vel gaudio  
credere amant, non dici potest, ad quantam so-  
cordiam ea credulitas accedat. Neque si vultures



† infestis concurrere rostris, minorq; numerus auium illarum, examen maius afflixit, qua hora Vicecomitis copiae, numero superiores Ecclesiasticos fugauere, ideò trahenda res in religionem fuit, & magni prodigij nomen vsurpandum, quod fecisse Scriptores eorum temporum video. Fortasse enim volucres irritatae per lasciuiam, certauere moribus: & dulcedine fingendi, caetera in miraculum aucta, vt tradita per manus vanitas, veluti contagio quaedam ad historiam vsque perueniret. Sic nimirum inferere diuina humanis amat mortalitas, & semel in prodigium accepta gliscunt postea sermonibus, neq; simplicitatum humanarum est finis. Me longius prouexit alterius etiam prodigij nouitas, quod huic vulturum ostento subiicitur ab eo Scriptore, qui rem sibi compertissimam referre ait. Henricus quidam cognomento Flandrensis fuerat in Ecclesiastico exercitu, cum ad Vaprium infelicitate dimicatum esset. Hunc acie disiecta, & caesa fugientem postridie per deuia Modoetiam venisse refert ducibus itineris duobus, qui se se repente obtulerint, stiterint incolumen ad oppidi moenia, deinde abierint ex oculis nihil vnquam effati. Ipsum ingressum in Oppidum, cum trepidi illic omnibus ob cladem acceptam affligerentur, iussisse bono animo esse vniuersos, ac sperare salua fore omnia: sic iubere Deum, & Oppidi tutelarem Baptistam. Namque se cum ab hesternae infelicis pugna per calles incertos in obscuram sylvam deuenisset, ibiq; cursu, & metu fatigatus iaceret, vidisse

vidisse repente torrida macie senem, à quo deductus in tutum, traditusque duobus illis fuerit, & de salute Oppidi curaue Praecursoris ita renunciare iussus. Ardicius Concorretius refert scribam se publicum tunc fuisse Modoetiae, hominemque vidisse illum, & audiuisse cum ea renunciaret. Si vera res fuit, profecto, multo sanguine, multaque clade stare Modoetienſi populo miraculum illud, & certa illa ad extremum ſalus debebat. Namque dum Legatus Apoſtolicus, & Galeacius Vicecomes omni inuicem ope conſtituntur ad obtinendum Oppidum, Oppidani ipſi deſtituti in medio per anni fere ſpatium pertulere omnia, quae accidere obſeſſis poſſent. Ac neſcio fuerit ne ſalus, non capi Modoetiam ab Vicecomite, cum qui retinebant eam Eccleſiaſtici ſaeuirent intra muros atrocius, quam capto Oppido ſaeuire Vicecomes potuiſſet. Deſenſa funeſte Modoetia per Eccleſiaſticos, irrito Vicecomitis circa eam conatu, grauius vtrinque damnis, pars etiam vtraque pacem expetebat, quam Vicecomes ne nimium cupiſſe videretur, tali commento eſt uſus. Raimondum Cardonum ex Pontificio exercitu Siculorum auxiliorum ducem habebat in cuſtodia, virum dexterrimae humanitatis, & ea morum parte principum negotijs aptum: nec magnum ex redemptione pretium ſperabatur. Eum per ſidiſſimos ſibi homines interrogari iubet, ſi diſmiſſus fuerit ex cuſtodia, ſoſpeſq; reſtitutus ad ſuos, velitne apud Pontificem Max. ſidus internuntius eſſe conciliandae pacis, & ecquam

ecquam in ea re nauare liberatori suo operam velit . Cùm ille diceret , facturum se omnia cum cura , & fide quae imperata forent , viam etiam aliquam inuenturum arte sua , quò facilius honestiusq; conueniret res : laxatis vltro custodijs datur captiuo fugiendi locus , instructusque secretis à Vicecomite mandatis , tamquam ruptis vinculis , eluctatusq; fuga facuas hostium manus , Placentiam ad Cardinalem legatum peruenit . Benigne acceptus exponit belli difficultates , Vicecomitis copias , fortunam , & rei militaris vsum , & parata ei ad victoriam omnia , nec posse Modoetiam vltra per Ecclesiasticos retineri . Cùm haec aliaque dicta terrore Romanum ac desperatione impleuissent , institit vnà cum eodem artifice quaerere , quae via , quodue consilium honestae pacis foret , quae ratio flectendi Pontificis ipsius animum , vt abduci inde exercitum pateretur . Paratum erat compositumq; cum Vicecomite , quod in tali sermone natum ex re ipsa videri consilium posset . Iturum se rectà Auenionem ait Cardona , si videatur : ibi rerum faciem , praesentiaq; simul & futura mala demonstrando sperare à Pontifice impetraturum , vt pacem nihil habituram indignitatis malit quàm in parte florentissima Italiae tantam hominum stragem , & incerto armorum exitu , certa detrimenta etiam Apostolicae authoritatis . Iret igitur annuente legato , proficiscitur : ac , siue mutato inter eundem consilio , siue à Vicecomite ita regere negotium iussus : ad Pontificem vbi peruenit , profert vltro

ultro conditiones , quibus finiri exitiabile bellum possit , aperitque quomodo sit ipse ab hoste pacis tentandae causa è carcere dimissus . Conditiones erant huiusmodi . Mediolanum & Cremonam haberet Vicecomes : Ecclesiae Vicarius appellaretur : Ad omnia bella , quae intra Longobardorum fines gererentur à Pontifice Max. praesto esset : quingentos cataphractos equites mitteret ad ea bella stipendijsq; suis aleret . Conditiones eae placuerant Pontifici ; quia vectigalem Ecclesiae sic fieri Galeacium apparebat . Sed cum de pace nihil ab Romano transigi posset inconsulto Siciliae Rege , qui fuerat in parte belli , isque conditionibus adderet hoc , vt Vicecomes pari secum animo foret hostis Caesari , spem pacis ea res turbauit . Sub anni finem , quo haec gesta sunt : Aichinus Vercellensis vnus è quatuor Canonicis , qui de occultando Modoetiensi thesauro , sicuti dictum est , inter se consciuerant , cum instare sibi supremum diem sentiret , rogat suos , vt Aicardum Archiepiscopum ad se adducant : esse quae de magnis Ecclesiae rebus agere cum eo velit . Aicardus , mutans in ea rerum perturbatione crebrò sedem exilij sui tunc apud Cardinalem Legatum , vbi moribundus etiam Canonicus , erat , neque recusat accedere quà lectulo humili decumbebat Sacerdos . Poscit ille vocibus intermortuis , dari sibi fidem , sanctum fore silentium eius rei , quam sibi pari fide custoditam , nunc sit morte appropinquantem , necessario officio enuntiaturus . Vbi data fides,

des, & arbitris remotis, dicere si quid haberet, est iussus, indicat locum, in quo defossi iaceant thesauri Modoetienenses, & quid ipsi vicissim Archiepiscopo circa vitae finem super ea occultatione faciendum sit, monet ex iurisiurandi formula, quo se se Canonici quatuor obligassent. Promittente Archiepiscopo religiosissime omnia custoditum iri, nec nisi urgente vltima hora arcanum se illud esse cuiquam enuntiaturum, quieto, quod ad eam rem attinebat animo, Canonicus ille obit suum diem. Nolim equidem credere factum esse dolo malo, siue per leuitatem ab Archiepiscopo Mediolanensi, vt obstrictam sacerdoti morienti fidem super tanta re praesertim, fallere atque prodere ille pro nihilo haberet. Sed quoquo modo, quauē de causa fecerit, constat non expectauisse dum Canonicus exspiraret: statim ab eo colloquio, rem totam sicuti sibi commissā creditaq; esset, Cardinali legato aperuisse. Aiebant qui postea frustrationem eam, sicuti fit, in sermonibus habuere: minime fuisse mirum, vel potius valde mirum fuisse, quod ab claustris homo reticere nihil potuisset. Legatus etiam ipse, re comperta, veluti si hereditas obuenuisset, ita mittit propere Modoetiam promptissimos ē suis, qui comprehensis Templi custodibus, & effosso thesauro cum ea praeda redeant ad se. Factum vt imperarat. Pretiosae res, quae naturae vel artis esse miracula tunc dicebantur, ac citra miraculum etiam aestimatione hominum pretiosae: tum alia cara pietati, monumenta quoq; clarorum ingeniorum,

niorum, & vno verbo, quicquid illa Baptistae Aedes per plura iam saecula pio certamine Regum, Pontificum, Caesarum adepta erat, id rerum postquam in conspectu Cardinalis stetit, nesciebat primò, quid faceret thesauris eiusmodi, & quasi effodientium ipse foret vnus, aestuabat. Demum occurrit animo tale consilium, quod ab ipsa sumptum ambitione & placendi cura, dedecus homini probrumq; & ignominiam inuenit. Mittit ad Pontificem maximum omnia illa cum litteris, in quibus erat, quomodo sibi tantarum rerum fieri compotem contigisset. Canonici Sacerdotis nomen, genus simul & patria, morbus eius, aetas, hospitium in quo fortè decubuisset aeger, vt euocatus ad eum Archiepiscopus Aicardus accessisset, quae dicta inter eos, quae petita fides & obligata, quomodo statim eadem irrita per egregium Archiepiscopum, & denique quomodo missi ab se repere rint illico thesauros in latebra quam Canonicus ostendisset: haec omnia legatus ille veluti texeret annales quosdam, ad Pontificem, addens muneri pretium accuratissime perscripsit. Orabat ad extremum, vt obuia superùm benignitate delatas opes acciperet obuio ipse etiam sinu. Sic fauere Deum eius Pontificatui, vt abditi sub terram thesauri recluderentur, nudaretq; vltro sua viscera tellus, quò ille beator foret: At Pontifex, vt res inspexit eas, accepitq; violati sacramenti seriem & ordinem, inhorruit primò perculsus atque confusus atrocitate negotij: deinde ex-

ciri confestim iubet ab oppido Modoetia Canonicos eius Templi cum Antistite suo : simul grauissime increpat legatum: rem eum, neq; prudenter, neq; pie administrasse demonstrat. Postquam adfuere Canonici Modoetjenses, omnia thesauri vasa partesq; singulatim exscriptae & exsignatae illis attribuuntur, eiusq; assignationis publicae tabulae confectae per Ioannem Castellanum cum Apostolica execratione si quis in posterum eos attingere atque violare thesauros auderet. Mandatum inde Canonicis à Pontifice est, vt quamdiu maneret bellum, depositos in Auenionensi sacrario thesauros relinquerent : bello finito referrent domum atque restituerent eos in pristinam sedem. Depositi sunt & religiosissime custoditi, paceq; postea firmata relati Modoetiam, sicuti suo loco demonstrabitur. Nunc, ob eam, quam, dixi causam impedita negotiatione Cardonae, gerebatur bellum insensius aliquanto, quàm antea, & Galeacius in magna victoriae spe, iam coeperat consultare cum suis, an Oppidum Modoetiam, excepta Baptistae Aede totum à fundamentis deleret. Cùm de ea re consilia Princeps agitare, apparuisse fertur ei per quietem Diuus ipse, atque ita esse hominem affatus. Delere tu Modoetiam nostram, & superstitem populo relinquere Aedem meditaris? At ego Oppidi simul & Aedis defensor, vt ab ista mente desistas, moneo. Si destiteris, Oppidoq; meo parcere animus tuus volet; at ego faciam, vt Modoetia sine sanguine & strage cadat in ius ditionem que tuam, victoriaq; tibi incruenta



cruenta dabitur. Sin pergis de mea Modoetia cogitare dure atq; crudeliter, victoria ista tibi nunquam obtinget. Ab hac visione caelestique per quietem alloquio Vicecomes vt euigilauit, ratus inane esse negotium, ludibriumq; somniantis animi, qualia multa, pleno vel inani stomacho reliquiae diurnarum rerum efficere solent, nihilo mitius de Modoetia ipsa cogitabat. Postea, cū insequenti nocte species eadem obuersata esset, statuit parcere Oppido, si pōtuit foret: neque parcere solum, sed illud indulgentia fouere omni, dirutaq; restituere, & tantum addere ornamentorum, quantas iniurias, & quanta damna bellum intulisset. Ita subita voluntatum, & animorum inclinatione, quae videretur non carere miraculo, deditur Oppidum Vicecomiti, qui nocturnae visionis memor, caelestiq; munus agnoscens, nec violauit ibi quicquam, & vt pristina etiam frequentia rediret, proposuit ampla praemia, si, qui aufugerant, redire illuc, vellet, praeconesque ob id ipsum in vicina loca sunt dimissi. Profecto diuinam fuisse rem diceremus, nisi Galeacius postea ipse ibidem Modoetiae traditus in vincula cum fratribus suis, calamitate hac, miraculi gratiam & fidem imminuisset. An potius miraculi pars hoc ipsum fuit, vt quoddam illius populi vaticinium tali Vicecomitem exitu comprobaretur? Cū enim Galeacius aedificaret arcem, quae semirutā manet in hunc diem, obscurissimaeque latumiae simul inaedificarentur: Oppidani cernentes ingrati operis molem, iratas huiusmodi

„ voces iaciebant . Has sibi fratribusque suis latu-  
 „ mias Galeacius ponit . Faxit Deus vt fabrica sit ip-  
 „ forum capiti, ratumq; omen fuit . Taedet me pu-  
 detq; referre vltra prodigiosi quicquam , ne fortè  
 recipiendo in historiam temere aliquid, etiam veris  
 abrogauerim fidem . Sed non debui rursus omit-  
 tere quae scriptores aequales huic aetati consensu  
 tradidere, cùm nullo modo probabile fiat, potuisse  
 sic coniurare omnes vt mentirentur , siue potuisse  
 sic decipi , vt ab alijs e mentita pro veris admitte-  
 rent . Thesauros illos Modoetienſes , de quibus  
 antea memoraui , tradunt ab homine intelligente  
 rerum earum fortè inspectos , cùm adhuc Auenio-  
 ne ſeruarentur , pepuliſſe animum habendi studio,  
 non pio illo vel erudito quia ſacra multa & antiqua  
 ineſſent, ſed ſordido & furaci, quia plurimae vendi-  
 biles gemmae, plurimumq; aurum & argentum inter-  
 niteret . Eam ſibi praedam homo ille cùm deſtinave-  
 rit, leuem primò cum Canonicis notitiam adduxiſſe in  
 familiaris amicitiae conſuetudinem, deinde clauſes  
 ſacrarij paſſe adulterinas, & capto ad rem pera-  
 gendam tempore ſuſtulſiſſe ſacra illa vaſa, & abiſſe  
 feſtinantem vt ex vrbe ſe ſe proriperet . Ad por-  
 tam, quae Rhodani dicitur, ingenti trepidatione  
 progreſſum vidiffe in pontis aditu, quo committitur  
 flumen , ſpecies hominum armatorum intermini-  
 tantium, niſi regrederetur . Eo terriculamento reie-  
 ctum ab tranſitu pontis, aliam, ac ſubinde aliam  
 adiſſe portam, donec ad omneis exitus eadem oc-  
 currente cum minis armatura ſtatuit in vrbe ven-  
 dere

dere quod efferre non poterat, redactumq; inde pretium, aut abdere postea sub terram, aut exportare aliquò, quasi vindex Numen fallere posset ea sceleris via. Vanus erat nomine Florentinus homo, qui Auenione faciebat aurificinam fortè antea notus furi, & furem ipse nouerat vicissim: nec debuit primum hoc inter eos commercium esse quod memorabo, sicuti vltimum fuit, Hunc Florentinum aurificem adit sacrilegus ille, & ait esse sibi quaedam emblemmata quasdamue vasorum crustas: & vasa nonnulla, quae vetustas dissoluerit, margaritarum praeterea nonnihil, & omnino pleraque fragmenta rerum antiquarum: ea si possit aequa conditione distrahere, siue commutare, facturum libenter, simulq; nonnihil profert experimenti causa, quod probum visum artifice, ac posse aliquid conuenire respondit. Veniret postero die, & afferret: se se praesentem pecuniam illico numeraturum aestimaturumq; tanti singula, quanti praeterea nemo. Vulgabatur interea per urbem, thesauros illos Modoetienſes, clam fuisse sublatos è sacrario, nec ad quos pertineat id facinus indicia vlla extare. Perculerat is rumor animum aurificis, & profecto descriptionem illam fragminum huc pertinere ratus, statuit non esse sibi faciendum, vt tali se se negotio implicaret: posse furti alieni poenam in suum recidere caput, & fortasse suberat metus, ne alia cum homine eodem negotia occultata feliciter ad eum diem emanarent. Refert illico rem in Aulam ad iudices, quae dicta sibi de gemmis auroq; venali,

venali, quid vicissim ipse responderit, ad quam horam, quemue hominem expectet, ordine cuncta exponit. Missi confestim satellites obsedere diuerticula, & angulos, circa indicis tabernam, & cum aulo postea fur aduenisset, exponeretque fragmenta, coorti repente varijs è locis lictores hominem comprehendunt, & abducunt iniectis vinculis: neque vilis animus tormenta expectavit. Confessus absque mora flagitium, & indicatâ latebrâ, in quam thesauros abdidisset, postquam erutae res & prolatae, damnatur vt distentus in tabula raptatusq; iumento per viam, secto demum in quatuor partes corpore sacrilegij poenas luat. Id supplicium sumptum eodem die, quo facinus deprehensum, & vt in partem vtramque nobile exemplum esset arcendis sceleribus, praemium indici decretum duceni floreni in singulos annos, & honestus in Pontificis familia locus: praeferendis Imperij fascibus alij esse adhibitum ferunt. Thesauri verò ipsi, ne semper expositi furum ingenijs manerent, in praeferrata capsâ summa testudine Templi suspensi contra aram maximam, quâ scilicet omnium oculis custodirentur, ac fuere ibi donec pace per Italiam parta, sicuti postea demonstrabimus, restituerentur in suam sedem.

Ea, quae de Modoetienâ thesauro retulimus, accidere Auenione anno salutis millesimo trecentesimo vicesimo sexto, cum ibi Sedis Apostolicae domicilium esset. At in Ecclesia Mediolanensi nihilo tranquilliora negotia statusue melior durabat, quàm ille,

ille, vnde narratio diuerterat ad thesauri miracula & casus: nostraeq; fama Urbis & Cleri, quò magis progreditur annalium ordo, vehementius ingrauescit, vel scribentium licentia, qui nominibus eum inuidiosis onerare, desertorem atq; rebellem appellando, vel rerum ipsarum natura & conditione, quae fiebant. Ludouicus Bauariae Dux, quem ideo Bauarum dixere, aemulo profligato adeptus Imperium, erat à Pontifice Ioanne Anathemate damnatus, atq; capitales cum eo inimicitias gerebat, ita vt exturbare alter alterum agitarent, vsusq; demum Apostolico iure Pontifex, imperium Caesari abrogarat. Huius arma Gaelacius cum in Insubriam aduersus Pontificem exciuisset, prodire obuiam Clerici: Pontificisque hostem, Ecclesiae perduellem, carentem communione sacrorum sub vmbella in Palatium deduxere. Atque id parum fuerat, nisi etiam petenti postea, vt more maiorum coronaretur, ambitiose id ipsum, & impie concessissent. Coronatus est in Basilica Ambrosiana: & quia nullus tunc Mediolani Archiepiscopus erat, Aicardo, sicuti dictum est, exulante, solennia sacri eius obiit. Arretinus quidam Episcopus cum trium aliorum praeterea ministerio, quos omneis oportuit etiam ipso nequiores esse, cui caeremoniam impiam, nescio, scelere, an per leuitatem gratificabantur. Sed Episcopum quoque illum Arretinum, qui caeremoniae caput fuit, inuenio fuisse iam antea à Pontifice exauthoratum, debuitque sicut arbitror, pretio, vel contumacia, huc descendisse. Nec de Pasquale

Pasquale Placentinorum Episcopo ( is quoq; enim adfuit ) fama melior extat . Caeterum ea coronatio Caesaris adulterini facta per Episcopos item adulterinos haud dubie Galeacium ipsum euertit. Namque Bauarus , exulcerato suspicionibus , & calumnijs ipforum inter se fratrum animo , Galeacium , & fratres , excepto Marco , qui accusator extiterat repente comprehensos , in Modoetiensem arcem , quae Vicecomitum excidio fatalis habita fuerat , coniecit . Ac tanta fuit ira , vt ne Ioanni quidem ipsi parceretur , quem vel praefens , vel sperata & destinata consensu omnium dignitas defendere debebat . Erat enim ex Mediolanensis Ecclesiae Canonicis amplissimo tunc honoris gradu , quem principes etiam appetebant , & Pontificatum Ambrosianum ob vitae splendorem propediem habiturus esse credebatur . Is vnà cum ceteris fratribus à Bauaro coniectus in vincula , documento potuit esse , quàm infida sit gratia quesita per scelus , atque per diuinarum legum iniuriam : & praemium hoc fuit obsequij quo Caesarem contra Pontificis auctoritatem coronarant . Quae omnia quomodo acta sint narrabo : neque fratrum odiorum tantum insigne & lugubre exemplum proponam , sed maius atque luctuosius aliud ad considerandas potentiorum artes , vbi vitae miserorum insidiantes , & innoxio nimium gaudentes sanguine nominibus honestis tegere diram sitim volunt . Erat Marcus inter Matthaei filios strenuus manu , consilio bonus , atque per superiora bella  
egregiam

egregiam & fidelem Galeacio fratri operam naua-  
rat. Sed quaecunque ille praemia acciperet, que-  
rebatur semper, non pro meritis tractari se se, quae  
humani animi superbia Regum saepe domos com-  
pleuit aeterno luctu, priuatique etiam miseriores  
effecit. Socium querelarum habebat Ludrisium  
patruelem suum, qui expeditionum item comes  
nihil feliciorem sibi virtutem fidemque suam exi-  
stimabat esse in aula, quae propter genus & san-  
guinem prolixè agere secum deberet etiam si in  
otio & desidia agerent vitam. Ita patruelles duo  
natura queruli & superbi, addente animos virtute  
& gloria, cum iactando sermonibus ista quotidianis  
vicissim accenderentur, cepere denique ab ipsa  
desperatione consilium ut ruinâ Domus opprime-  
rent misérias & angores, & ignominias, ut ipsi  
interpretabantur, suas. Siue verum erat, siue con-  
ditio temporum, & ea, quae tunc agitabantur  
negotia, fecerant simile veri, detulere ad Caesa-  
rem hoc Galeacij crimen, quod ille clam inito  
foedere cum Pontifice Ioanne pararet dedere Me-  
tropolim ei, compellere omnia sub nutum arbi-  
triumque eius. Nihil poterat accusatione tali capi-  
talius esse ad inflammandum ira animum Caesaris,  
cum prae magnitudine criminis eius, caetera ma-  
iestatis crimina, rebellionesque & proditioes aliae  
tamquam inania transmitterentur. Dummodo  
subiecti, vel populi, vel principes, seruarent in eo  
negotio fidem, ut ab imperij nomine contra Sedem  
Apostolicam starent, poterant caetera ferre agere



suo arbitrato : rursus in ea parte commissum offensumue aliquid , suspectos ad omnia , inuisos , ✓ execrabilesque faciebat . Cùm tanta esset atrocitas & inuidia criminis apud Caesaris eius aures , iamque alteras & tertias ab Ludrisio & Marco super ea re literas accepisset , temperauerat irae tamen , scripseratque ipse communiter ad Galeacium & Marcum humanissime cum adhortatione ea , vt mutuae concordiae , fideique erga se memores esse vellent : ipsum fore quamprimum in Italia , & digna omnibus praemia persoluturum . Vt autem • descendit in Italiam , & Mediolani , sicut dixi , coronatus , aliquandiu ibi postea morabatur , tunc enimvero non desistebant Ludrisius , & Marcus de-ferre , & arguere , & demonstrare ex composito cuncta , per quae praesens Caesar , non ad ipsa modo criminis cubilia deduceretur , sed crimen proditio-nemque totam , suis veluti manibus contrectaret . Interdum enim etiam , quò plus authoritatis accu- • sationi esset , laudabant fratris ad caetera fidem , id quasi miserantes vnum , quod ad suam & fami-liae perniciem consilia illa insana admitteret in-animum . Neque fallebat Galeacium , quibus in-sectationibus peteretur , dictitabatque identidem , Marcum fratrem confodere suo pugione se ipsum : & Marcus aiebat vicissim , habiturum propediem esse Galeacium eam solitudinem , quam ultro ipse quaesiuisset . Fratres haec inter se cauillabantur alte exulceratis animis , alterius quidem inuidia & • aemulatione ob maligne communicatam secum , for-

fortunam paternae hereditatis, alterius verò dolore & metu, quòd ab eiusdem sanguinis homine vniuersae domui exitium quaereretur. Nec deerant vt opinor in alterutra parte infidi amici accendendis offensionibus acres, quorum stimulis vterque augerent, ille calumniam, hic incitamenta calumniae & causas. Bauarus, enimvero condens profunde in animum, & secreta secum aestimatione pensans ea, quae dicerentur, parcus, verbis compositus vultu, iam apud se quid facto opus esset, nemine suspicante destinarat. Vinculis & venenis, quae semper instrumenta dominantibus fuere, statuit inimicam emendare domum, eaque in omneis Vicecomites disciplina nullam esse meliorem. Nam ne Marco quidem ipsi & Ludrisio accusatoribus abesse prodicionem suspicabatur hoc ipso, quod proditores sui sanguinis extitissent. Offensione nimirum aliqua irritatos detulisse communis consilij indicium: vbi placati essent animi, fidem & caritatem inter ipsos, perfidiam & odia in alienos fore. Et quamquam Galeacium vnum accusatione illa infectarentur, familiam totam esse morbo contactam eodem, qui nec fortuitus repentinusque aliquis, sed naturali per omnes illos contagione diffusus esset. Maio ineunte venerat Caesar Mediolanum. Cal. Iunij fuerat coronatus. Reliquos inde aestiuos menses cum per Insubriam ageret. Stephanum in familiam asciuit, qui Vicecomitum fratrum natu minimus erat: praeficiturq; ille ministerio intimo & periculoso tractandi po-

cula & praegustandi potiones Principis , quod tamen in aula illa non fiebat semper , sed Germanica fere simplicitate bibebatur , & otiosa plerumque praefectura illa erat . Nouus familiaris & pincerna miser , prout composita res erat , adspersitur repente crebris aulae susurris quasi principi venenum pararet , scilicet vt suspicionis eius obtentu ipse veneno mox absumeretur : praebebatq; criminationi ei materiam nota iam alia & vulgata in Galeacium accusatio . Cùm iunior Vicecomes apertis iam quoque sermonibus tanti cogitati sceleris palam reus ageretur , die quodam epulante in publico Caesare , potionem , quam ille oblaturus principi erat , medicauere furtim qui negotij sibi id sumpserant . Caesar , vbi scymphum accepit , reddidit pincernae Viceconiti , verboque est adhortatus , vt malam opinionem rumoresque maleuolorum dilueret , queis ipse diffamaretur . Rapidum inerat violentumque virus , quo iuueniliter & impigre hausto Vicecomes cum vertigine protinus oculorum animiq; agere ore spumas retrorsumque inclinari . Ad eum verò adspectum conscij ignariq; pariter inhorruere omneis stetereq; eodem vultu . Mox , in misericordiae vicem , quae tam indigne pereunti debebatur , & multorum fortasse tangebatur pectora , successere probra & contumeliae , quales , aliorum adulatio , sensus aliorum iactare poterant in eum , qui sternere super dapes exanimem Imperatorem voluisset , atrocius infestiusque quàm si ferro aggrederetur . Effertur moribundus  
iuuenis

iuuenis ex aula seruaturque in experimentum tantummodo & quaestionem, quasi verisimile fieret, potuisse quemquam inducere in animum, ut inter tot adstantium manus armatosq; custodes patraret facinus, quo protinus detecto, accessio ipse necis fieret. Cur non potius miscuisset venenator dedissetq; lentum aliquid, quo sensim irrepente, fortuitus morbus adsimularetur? aut, si tanta rabies animo, tantusque furor, ut nece sua quaereret palam Imperatori necem: & inde gloriam, quid ni irrueret gladio, remque desperate perageret, sicuti nostra etiam aetate vilis vna manus septo armatis Regi abstulit vitam. Sed Stephanus in angulum fortasse proiectus aliquem, luctatusq; acerbissime cum extremo spiritu per aliquot horas, antequam eius diei sol occideret, vite fine eripitur tormentis, quae iudices & scribae, totusque ille carnificum chorus exquisitissima iam excogitabat ad eliciendam, ut ipsi aiebant, veritatem, quo consilio, cuius instinctu, quibusue adiutoribus & conscijs veneficium instruxisset, cum, alioqui apud veneficij authorem haec ipsa iactari ipsimet scirent. Quia iuuenis appropinquata torminibus intimis morte iudicium eluserat, perijsse sibi magnam hereditatem reputabant. Quaerente enim Caesare effugia tam foedae suspicionis ac declinante inhumani facinoris inuidiam, dixerant palam atque affirmauerant, quod suscepti aduersus eum sceleris ordinem, & consilia omnia totamq; flagitio illigatam Vicecomitum gentem interrogato scelerato homine

mine exhiberent . Ac breui eo spatio quaerendis  
indicijs , adornandisq; testibus occupati cum carni-  
fice maximo satellites minores cursitarunt , luda-  
runt , non parum inflati facillimo interim ad prin-  
cipem aditu crebrisque cum eo colloctionibus ,  
vnde collecta admiratione & authoritate , regna-  
uerunt fere ipsi paucarum illarum horarum vsura,  
aulaque tota die illo ipsorum fuit . Vidit Deus,  
multique mortaliū sensere flagitia , quae per li-  
centiam negotij dieique illius admisit forense mi-  
nisterium; diesque vnus ille inuenta apud prin-  
cipem gratia , ministrorum eorum aliquibus peperit  
opes , quas nunquam alioqui adepturi erant .  
Adeo largus postea Caesar fuit in eos , qui aliquo  
modo benemeriti fuerant de trepidatione illa sua,  
tunc scilicet cū corrue[n]te inter officij sui per-  
functionem pincerna , eoque deinde agente ani-  
mam , interioribus conscientiae stimulis agigaretur,  
quasi designatus , ipse omnium oculis impostor &  
lycophanta simulque venenator & parricida fa-  
miliaris sui . Fortasse enim , sicut in eiusmodi ne-  
gotijs vsu venit , texendo & componendo secum  
ipse formam seriemq; veneficij , expeditiora cun-  
cta ad latendum fallendumq; proposuerat , animo,  
quā re deinde peractā ipsā in experiendo succe-  
debant . Et hoc ipso crescebat metus , ne fraus  
tam indigna detegeretur , quod timeri posse vide-  
batur exitium , si detecta foret , tenente urbem  
fratre iuuenis perempti , vrbeq; ipsa adspersura  
& vindicatura infamem dolum . Postquam infelici  
fato

fato Vicecomitis, & potentia sua Caesar, & arte ministrorum, communem in eo negotio famam aliqua ex parte sefellit, caetera deinde quae petita fuerant facinoris eius pretia, & emolumenta in facili fuere. Ceu participes authoresq; veneficij, Galeacius princeps vrbis, & templi maximi Canonicus Ioannes, & Azo, repente, comprehensi Modoetiam in arcem adsportantur absq; tumultu vlllo. Conticuerat namque Ciuitas obiecta fama tam atroci, tituloque captiuitatis tam iusto, quod diluisset vna domus Caesari venenum, ac numine vindice scelus in ministrum recidisset. Custodiae autem & stationes & omne militare praesidium obtorpuerant armati Caesaris praesentia & maiestate, quem circumstabat exercitus maior: cuius nutum & imperium respicere ciues coepissent. Capta sic, & afflicta Vicecomitum Domo Bauarus, principatq; deleta illo omni rem Mediolanensem in Romani Imperij ius ditionemque vindicarat, sicuti corrasa inde, & ablata Gentis eiusdem olim artificijs fuisset, nouoque constituto regimine in Etruriam abiit. Ab eius discessu Vicarius Mediolani relictus est Gulielmus Monfortius, non ille quidem sicuti Matthaeus antea, & Archiepiscopus Otho, parans cogitansue tale quiddam, vt ex fiduciaria perpetuam sibi prouinciam faceret, Imperioque ipsi per speciem eius fungendae vicis insidiaretur: sed ipsa cum Imperatore concordia fideque erga eum infestus vrbi. Nam sicuti Bauarus ille, inducto in Ecclesiam dissidio, laceratoq; Ponti.

Pontificatu, acta omnia nomenque & authoritatem Nicolai pseudopontificis obstinate tuebatur; ita Vicario huic vnicus gratiae locus apud principem, & praecipua benemerendi materies ab impietate flagitioque eodem erat. Quippe ciuitatibus etiam ipsis idem peccandi locus: neque copiosior alia seditionum materies, dum, vel spreto in gratiam Caesaris Ioanne, iussa nutumque Nicolai respiciunt: vel pro eo aduersus hunc nituntur. Urbem itaque nostram ab iusto veroque Pontificatu Vicarius ille alienabat, haud sine quotidianis, vt credere licet iniurijs, multaque violentia, tum in res sacras, tum in homines ipsos, qui curae, & administrationi sacrorum praecessent. Quodque argumento esse possit, cordi fuisse ei, vt caetere quoque vrbes alienarentur: reperio Temacoldum quendam apud Laudem Pompeiam ex pistore familiarem Vistariorum, deinde proditorem, vrbe capta illa, scripsisse illico ad Monfortium hunc, vt mitteret auxilia sibi ab Mediolano, quibus tueri Caesaris nomine urbem posset aduersus Romanum. Flexit postea Bauarus animum suum ob Castrucij Castracanis preces, vt mandaret e custodia captiuos dimitti. Lucae princeps erat Castracanis, qui super assidua postulata de captiuorum salute, defectionis etiam metu Caesarem perculerat. Eo nimirum metu sunt dimissi, haud tamen sine grandis pecuniae pactione, quae seuerè deinde exacta est & pernumerata ad teruntium: ipsique fratres in Etruriam ad Caesarem vocati. Galeacius  
egregia



egregia militari fama, & fortuitis idem ornamentis eximius, in itinere, moerore est absumptus, secuta interpretatione, extinctum fuisse iuuenem Caesaris ipsius dolo. Caeteri, cum ad Bauarum peruenissent, non procul à captiuis in aula habebantur, custodibus appositis, qui verba & suspiria & vultus incessusque singulorum dissimulanter obseruarent ceu scriptores annalium, & satellites iidem ad retrahendum expediti siquis vnus vestigia paulò longius moueret: & Galeatius cum veneni fama, recenti sui casus exemplo terrebat fratres. Aliquantò postea rei bellicae necessitates, & Castracanis eiusdem arma impulere Caesarem vt etiam Mediolanum redire Vicecomites pateretur, ibiq; Vicarium esse suum Azonem iuberet. Sexaginta millia Florenorum ei rei pretium fuere: quae pecunia dum expeditur vniuersa & affertur, Marcus Vicecomes inimicus, & accusator antea fratrum suorum, postea rebus aduersis ad misericordiam euietus, apud Caesarem obses fuit. Ac sicuti, neutra in parte modus est vllus apud regios animos, onerare miserijs, siue beneficijs extollere domum aliquam instituerunt, tam effusus nunc Caesar in Vicecomites eosdem, quàm antea saeuus, & atrox, alleuatam semel ex calamitate gentem adiuuabat modis omnibus, vt ad fortunam resurgere possent eam ex qua direpti violentia ipsius forent. Ioannes Galeacij frater erat ex templi maximi Canonis, vt memorauimus, quo non contentus ordine, maius, ampliusque illud appetiuerat olim, vt in

- Cardinalium numerum cooptaretur : id familiae, in qua natus esset, id splendori etiam suo tribui aequum censebat. Verum, quia nondum assequi recta via ordinem eum potuerat, qua posse videbatur via, statuit assequi, vsusque opportunitate, & indulgentia hac noua Caesaris erga domum suam, tenuit comendatione fauoreque eius, vt Cardinalis fieret ab Nicolao, qui Bauari opibus contra Ioannem Pont. Max. excitatus turbabat cuncta peruerso & adulterino pontificatu. Tradunt alij, Cardinalem Ioannem, emisisse quidem praesenti pecunia eam dignitatem, sed ipsi Bauaro, non autem Nicolao pretium esse persolutum. Quippe laborantem, vt dictum est, rei pecuniariae difficultate eum, dedisse necessitati suae, & precibus amicorum, vt quando restituisset in patriam honoremq; Vicecomites, nouum etiam aderet hoc decus. Ita hominem Nicolao commendasse absque repulsa cooprandum in Patres : pro eo conuenisse vt totidem millia Florenorum ab nouo Cardinale repraesentarentur, quot paulò antea millibus redditum in patriam, ipse fratresque emissent. Neq; mirari oportet suffecisse domum hisce pecuniarum erogationibus etiam in ipsa exilij calamitate, intuentes scilicet magnitudinem vrbis, in quam dominata esset haec familia, in quam dominari pararet rursus. Additur Cardinali huic Ioanni summa per Insubriam potestas, Legatusque Pontificis appellatur, quae tam sancta iustaque erant omnia, quàm etiam Pontifex ipse iustus, & sanctus, neque diuturna,

diuturna, sicuti demonstrabitur, fuere. Nunc quasi Imperium vere Pontificium illud, eaque legitima potestas esset, ita pro Apostolicae potestatis iure sacris rebus Cardinalis Ioannes aliquandiu se se immiscebat. Ac reperio, scriptas ab eo litteras esse, quibus Mediolanensem Ecclesiam affatur, ut princeps, itemque de noua sua dignitate litteras alias separatim, & quemadmodum à Domino suo Papa, (id enim verbum vsurpauit) Cardinalis Legatusque factus esset. Litterae ipsae sunt datae Pis: annus, & mensis, & dies addita: erantque inscriptae Dominis viginti quatuor viris administratoribus Reip. Mediolanensis amicis carissimis. In iisdem Litteris erat: Azonem suum nouo Caesaris munere Vicarium esse renunciatum. Nondum enim ipsi Mediolanum redierant, siue detenti per aliquot dies obsequijs, & adulatione erga Caesarem, siue ob eam morati causam, ut vno tempore Vicecomites duo, potestatem alter nomenque Caesaris ferens, alter potestati, fastigioque Regum, (si verus esset honos purpurae) aequiparatus, venirent. Venere circa Februarij mensis initium; & interea dum Mediolani pompa adornatur, ad Modoetiam subsistere per aliquot dies: dein exulta in triumphi modum vrbe aderant. Nullos tamen reperio Clericorum ordines processisse obuiam, quia scilicet factum ab falso Pontifice Cardinalem ut credere velim, abominabantur. Id utique notasse debui, quia, cum Modoetiam antea proficiscerentur, totum eum cum populo Clerum obuiam fuisse scriptores

retulerunt, nec tale quicquam in describendo ad Metropolim ingressu iidem addidere. Per hunc modum restituto Civitatis regimine, cui Mediolanenses utcumque iam assueuissent, Caesare absente, Vicecomitibus post gravem casum ad novae fortunae principia mansuetis, & modestis, si non tota quies, certe nec violentia extrema Mediolani erat: Monfortioque, etiam illo digresso ab Vrbe, violente minus agitabantur sacra falsi Pontificis studio, cuius propugnatorem acerrimum eum fuisse demonstraui. Nondum annus exierat ab reditu Vicecomitum: Vrbeque in pristinum statum redacta, cum malegerenti in Hetruria rem Bauaro, negotijque illic admodum infidis tetigerat animum terrae Insubriae memoria, & redire cupiebat huc, oblitus ut opinor, quale sui desiderium in terra eadem reliquisset. Siue memor potius erat, & quemadmodum deposuerat ipse omnem ex animo fortasse offensionem, ita placatos esse animos aliorum credebatur, quos perculerat nece proximorum, & exilij malis, & pecuniae fortunarumque damno: quos e summo detractos loco miserat in vincula: quibus dederat venenum, struxeratque simul veneni crimen: quorum denique animos terrore mortis, & excidio domus, & peremptorum fratrum exemplo torserat acrius quam si corpora ipsa peremisset, ne superstites inter regia seruitia extra patriam traherentur. Haec fortasse meminerat Bauarus illata ab se mala Vicecomitum domui, sed quia malefacta deinde beneficijs emendarar, ideo cessasse priora postremis,  
prae-

praesentisq; iucunditate fortunae veterem olliteratum esse sensum autumabat. Atqui non ea plerunq; moderatio animi humani est, qui repetens ab ipsa etiam obliuione voluensq; iras renouat ipse suos impetus tunc maxime cum, plane defecerunt. Minima saepe res, & homo, vnus praeteruolansq; fortè imago, iactumue temere verbum, ceu scintilla aliqua incendia irarum excitauit, quae restinxerat dies. oppresseratue gratia secuta offensam. Vicecomites autem isti, quoties ipsi se se numerarent, fratres abesse sibi duos iniuria Caesaris videbant. Et quantulum abfuisse, vt ipsi quoque dum carcere detinentur, dum sequuntur inimicam aulam perirent inter quotidianos cibos eodem telo? Quòd euassissent, quòd spirarent, Castrucij esse beneficium, neque gratuitum id, sed emptum auro, expressumq; amici illius armis. Purpura verò interdum etiam ipta sordebat profani Pontificis munus, idq; multarum mercium aestimatione ac pretio repensum. Ob haec, occursante animis dolore & ira, saepius iniurias quàm beneficia Caesaris reputabant: cumq; de illius consilio ac cupiditate redeundi suspicari quippiam essent, parabant se se ad prohibendum, eoque apparatu mites & blandi erga ciuitatem erant. Simul irritus Nicolai pontificatus vanaq; illius autoritas abolebatur, exolescibat: sanctior veriorq; firmabatur alter, vt nouo certamine imminente, paratae aduersus Caesarem Cleri etiam & Ecclesiae opes forent. Inde Metropoli rebusque Ambrosianis adimebantur flagitia & labes, quae

quae Vicarius antea Monfortius, & praefens cum exercitu Caesar, totaq; ea in Sedem Apostolicam coniurata factio imposuisset: Statuerat Caesar ad Modoetiam agere quod temporis moraturus in insubria erat: ac de consilio eo iam ad oppidanos illos fuerant perlatae litterae significantes, hospitem forem grauem nemini, potiusque commoda & honores additurum Reip. ipsorum, qualia vel olim munificentia & liberalitate Caesarum acceperant. Quod ubi compertum Ioanni & Azoni Vicecomitibus, mittunt ipsi Modoetiam Bonninum Mantegatium, & Paganum Mandellum; atque per eos monent hortanturq; Modoetienſes, vt si saluam esse Metropolim, si salui ipsi esse velint, ne recipiant oppido Bauarum: dolos & artes, perfidiamq; eius in amicos proponunt: se vicissim parata in id instructaq; habituros esse omnia, vt ab vrbe intercludatur. In id hac data fide & accepta, simul ad Modoetiam, simul ad urbem munimenta quaecunque nouerat illa actas Bauaro aduentanti opponerantur. Ille relicto in Etruria Episcopo Arretino: quem Mediolani antea coronationis impiae participem fuisse demonstraui, reuersus in Insubres, cum ad Padi ripas peruenisset, sensit in hostico se esse. Nauigium namq; nullum traieciendo flumini repperat, pontonesq; ad certa loca publico sumptu parati semper alias in viatorum traiectus, nunc apparere desierant. Id suspicandi principium, & pacati nihil ea res ostendebat. Traiecere tamen aegre reperiſis vadis equites: ceteri coniectis in  
vtres

vtres vestimentis, siue prompta ad id materia fabricatis alueis informibus, qui aquae vt cunque innare possent. Quò magis deinde procedebat exercitus, eò infestiora omnia reperiiebantur. Nihil pecoris, aut frumenti, reliquiae commeatus in agris; & homines ipsi commigrauerant in vrbes munitas, vt vasta desertaq; cuncta tamquam infestissimo venienti hosti relinquerent. Attonito sic agmine Caesar attonitus ipse progreditur, etiam percussus magnopere hoc ipso, quod ab Vicario suo Vicecomite nullos interea occursum, inuitationemq; nullam, honorificum aut hospitale nihil adesse videbat: profectò, rebellionem, ultionem, duellum, pericula adesse; & serò iam ipse considerare coeperat capitalissimas in animo humano recordationes iniuriarum, maleq; vllis meritis iniri gratiam homine ab illo, quem olim oblitus gratiae meritiq; omnis infectatus sis. Dubitandi finis fuit, vbi baleares funditoresq; aliquot Italici generis, quos in exercitu Caesar habebat, digressi agmine transfugere Mediolanum; & quotidie Germanorum etiam aliqui illuc ad stipendia opulentiora ibant. Obfirmauerat tamen Bauarus animum in eam sententiam, ne stringeret gladium, priusquam ab Modoetia se se exclusum videret. Igitur ab Laude Pompeia (regione enim ea tetenderat) citato profectus agmine Modoetiam, exhorruit illico, non ob clausas tantummodo portas dispositosq; in moenibus armatos, sed etiam, quia intumescere repente Lambro flumine ob immodicos imbres, & extra ripas diffuente quantum



antea nunquam, nullo modo potuit ab ea parte succedere ad arcem: idque apud eos qui tunc erant homines, Baptistae miraculum habitum est, cuius numine defensum id oppidum aliquando etiam alias fuit. Tentatis inde Caesar aliquandiu per colloquia oppidanis, postquam modesti nihil respondebatur, cernens ex eius oppidi munimentis & contumacia, qui animi, quique apparatus ad urbem essent, conditionem omnem accepturus erat, ubicumque quieturus si transigere honeste posset. Quae cognita per transfugas animi eius inclinatione, Ioannes & Azo, tributum annuum & praesentis pecuniae modicum quid obtulere ei, si quod antea concessisset Vicarij munus atque potestatem nouo firmare diplomate & abire vellet: extatque diploma magnificentum verbis, inane re ipsa, quia Sedis Apostolicae hostis, praueque coronatus & anathemate illigatus Caesar ille erat. Ceterum ea res, quod Bauarus ab urbe reiectus fuisset, Pontificem Ioannem Metropoli Vicecomitibusque placare coeperat: atque id fuit initium auferendi turpia vincula Clero Ecclesiaeque Mediolanensi, quae ad eum diem adstricta ciuitas tenebatur. Inchoata quin etiam eiusmodi reconciliatione, Cardinalis Ioannes abdicauit ea vltro dignitate falsa, riteque ac iuste nominis eiusdem honorem à vero Pontifice impetrauit, & Nouariensis insuper Episcopus ab eo est creatus. Per haec & alia fortunae incrementa Vicecomites excitati rursus: & firmata nouis opibus potentiam excoluit Azo urbem operibus, quorum magnificentia ne nostrae

nostrae quidem aetati sine admiratione fuit. Neq; <sup>†</sup>  
 profana tantum illi curae erant. In Palatio, quae  
 nunc Regia est, D. Gottardo Aedem posuit, secus  
 id nomen eamq; religionem, propterea quod  
 magnis ipse articulorum doloribus laboraret.  
 Templum autem ipsum ornauit sanctorum reli-  
 quijs, & omni sacrae supellectilis apparatu, non  
 ad vsus modò quotidianos, sed ad magnificentiam  
 quoq; & splendorem. Ac, ne qua hominum iniu-  
 ria, quantum in praesentia prouideri posset, noce-  
 ret ei sacrae supellectili, quicquamue auferret,  
 describi singula vasa, & appendi iussit: omniaq;  
 cum suo quodq; pondere & figura in publicas ta-  
 bulas ex ipsius autoritate Pontificis relata sunt.  
 Quae quidem literae repertae postea in tabulario  
 Cardinalis Ioannis, & annalium memoria custodi-  
 tae, credere cogunt, fuisse Azonem in Ecclesiae  
 rebus magna diligentia & pietate: referamque ego  
 seriem ipsarum, prout extant. Ea est huiusmodi.

„ Azo Vicecomes extructa D. Gottardi Aede po-  
 „ fuit ibi argentea vasa haec attribuitq; templi custo-  
 „ dibus coram Omnibeno Cardinalis Ioannis cubicu-  
 „ lario, & coram antistite Fratrum Minorum. Ca-  
 „ licem argenteum cum patella pondo marcarum  
 „ octo, vnciarum septem. Calicem alterum argente-  
 „ um orbiculato opere & encaustico cum insignibus  
 „ gentilitioq; stemmate Sabaudiae Ducum, Viceco-  
 „ mitumq; & Gallurae: Pendit marcas treis, vncias  
 „ sex. Calicem tertium incisa pietatis figura, marca-  
 „ rum sex, vnciarum septem. Calicem quartum  
 V opere

„ opere circinnato. Crucem paruam inauratam pen-  
 „ dente ex ea Christo Liberatore. Crucem alteram è  
 „ cryſtallo cum emblematis argenteis inauratis ſigil-  
 „ lisq; pluribus. Crucem ex electo ſimili artificio  
 „ fabrefactam. Formae maioris crucem marcarum  
 „ XXXII. vnciarum XI. totam ex argento ad collo-  
 „ canda Altaris myſteria in Tabernaculi formam.  
 „ Crucem aliam argento ſolidam inauratam collo-  
 „ candam in ara cum pedamento cymatijsq; & leun-  
 „ culis quatuor inſignia Vicecomitum feren ibus.  
 „ Sitellam argenteam in aquae luſtralis uſum. Acer-  
 „ ram argenteam ſeruando thuri, adolendae arae.  
 „ Acerram alteram è Cryſtallo. Cryſtallinos vrceo-  
 „ los duos argento caelatos. Patellas duas argen-  
 „ teas. Patellam ex iaſpide. Candelabra tria cry-  
 „ ſtallina caelata argento. Quatuor argenteos vultus  
 „ quos Azo conſtandos curauit, vt repraeſentarent  
 „ ora virginum inclytarum, quae Vrſula duce am-  
 „ plexae Chriſti fidem, barbarica tormenta contemp-  
 „ ſere. Praeter haec argentea vaſa ſupelleſtilemque  
 „ poſuit in eadem Aede Azo multam pretioſam ve-  
 „ ſtem, ad ſacra facienda: reſq; ſingulas Guſfredolus  
 „ Puſterula literis conſignauit eo fere ordine quo re-  
 „ tulimus. Hoc fere tempore, quo ſacram D. Go-  
 „ thardo aedem extruxerat ornaueratq; Azo, Car-  
 „ dinalis Ioannes Epiſcopusq; Nouariae erexerat  
 „ animum ad curam cogitationemq; hanc, vt ab No-  
 „ uarienſi Eccleſia ad Mediolanenſem tranſiret. Pul-  
 „ crum ſcilicet videbatur, in eadem vrbe regnare ſani-  
 „ liam eandem vtroque dominatu, ſi ſacra patruus,  
 „ profana

profana fratris filius administrarent. Et inuitabat occasio iamdudum exulantis Archiepiscopi Aicardi, qui propter factionum certamina nunquam in sua confidere sede potuisset. Nec ipse fortasse iam magnopere venire in urbem curabat, in qua Domus eadem auctis opibus dominaretur, cuius potentia fuisset exclusus. Agitata res per idoneos homines, communesq; amicos ita conuenit, vt Ecclesiae commutarentur, traderetq; Ioannes Aicardo Nouariensem: hic Mediolanensem Ioanni, pensione interposita mille florenorum nummum. Quae pacta conuenta cum Pont. max. rata habuisset, Aicardus Nouariâ, Ioannes Mediolanum, alter auctus honore, alter diminutus, concessere. Venienti Mediolanum Archiepiscopo Cardinaliq; Ioanni obuiam egressi Tici-nensi Porta sacri ordines certauere gratulatione, & pompa cum nobilitate populoque vniuerso, & Azonis ipsius aulâ, quae diei laetitiam eius effusissime concelebrauit. Is autem dies fuit ad XIII. Cal. Februar. anni m cccxxxiv. Quo die Aicardus etiam ab Nouariensi Clero populoque est acceptus. Extruxit Archiepiscopus Cardinalisq; Ioannes proprias sibi aedes, quae postea domicilio Canonico-rum attributae fuerunt, & via hodie interiecta ab Regia dirimuntur. Regiam ipsam Azo aedificaue-rat, qui etiam propugnacula mutulasque addidit moenibus vrbs, & pomoerium, hoc est, omne spa-tium circa muros, ab omni alio aedificio vacuum fecit. Restituit idem Marianae Aedis turrin veru-state collapsam: induxitq; aquas in urbem, quae per

Nilum & Cloacam maximam lutulentae hodie & sordibus inquinatae decurrunt . Ferme sub eos dies, quibus permutatio Ecclesiarum facta erat, veneratque Mediolanum Archiepiscopus Vicecomes, mortuo apud Auenionem in Gallia pontifice Ioanne, suffectoq; in eius locum Benedicto, Canonici Modoetienſes in ſpem venêre, poſſe ab hoc pontifice, vel propter inclytam ipſius pietatem, vel ob noui ſummiq; honoris gratulationem impetrari, vt referri Modoetiam eius Baſilicae theſauros, qui Auenione adſeruabantur, iuberet . De ea re, primum omnium retulere ad Cardinalem Archiepiſcopumq; Ioannem, cuiusq; opem implorauere . Nimum diu vetuſtiſſimae religionis Baſilicam caruiſſe ornamentis illis : ſqualere ſacros parietes : imminutam eſſe populi pietatem, templi quoq; cultum : & ſacerdotes ipſos minus alacriter iam, & minus religioſe conuenire ad canendas preces, quia ſanctiſſimi ſui tutelaris monumenta illa eſſe apud alienos ingemiſcant . Ne tutelarem quidem ipſum arbitrari perinde atque olim aſſe ſibi propitio ac praefenti Numine, quia ſpoliatam eſſe Aedem, ſinant theſauris, propter quos antea inuiſebatur . Potuiſſe, dum belli tumultibus Italia permisceretur, ferrè deſiderium, atque theſauros ibi ſinere eſſe, quò minus peruadere licentiae militaris poſſet . Nunc pacatis omnibus, & redditaper Italiam ſecuritate, aequum videri, vt reſtituatur etiam, Modoetiendi Baſilicae ſuum decus . Haec, & alia, cum expoſuiſſent Archiepiſcopo Ioanni Canonici  
Modoetien-

Modoetienſes, peterentq; vt legationi, quam ſuper ea re miſſuri eſſent, vellet authoritate ſua ipſe addere honorem. Annuit libens, ſuoq; & principis Azonis nomine ire, legatos iuſſit. Ière ex Collegio, Gratianus Arona, & Franciſcus Liprandus cum litteris ad Pontificem, vt ſciret Canonicos eſſe Modoetienſes ipſos, & petendi theſauri cauſa miſſos ab Archiepiſcopo ſimul, & ab Azone principe, & ab ſuo ipſorum collegio. Addita ſupplex obſecratio, vt beatiffimi Pontificatus initio, Chriſti Vicarius annueret piorum hominum votis, & theſauros, quibus tamdiu caruiſſet inclyti nominis Baſilica, referri illuc, vnde per iniuriam ablati eſſent, vellet. Alteras quoque litteras attulere ad principes aulae viros, quò faciliores apud Pontificem aditus inuenirent: & Ioanni praeſertim Cardinali Columnae commendabantur. Is Canonicos ad Pontificem introduxit, expoſuitq; quid petentes veniſſent. Benigne ſunt auditi: ſed reſponſum, verborum comitate magis, quàm exitu rei gratum acceperunt. Haec enim verba Pontificis fuere: velle ſe quidem, vt theſauri, quorum cauſa venerit honeſta & ſacra legatio, reſtituantur in ſuam ſedem: ſed nondum maturum eius rei tempus adueniſſe. Fore ſe in tempore memorem eorum poſtulati, litteriſque Vicecomitum benigne reſcripturum. Ea cùm dixiſſet, dari ſibi litteras iuſſit continentes publicam authoritatem & actionem, qua theſauri olim ipſi traditi, & depoſiti apud Anſiſtitem Canonicosque Templi maximi Auenionenſis fuiſſent. Cum traditae

ditae essent litterae , Canonici pro re ipsa spem incertam ferentes rediere domum . Anno sal. CIO.CCCXXXV. legatio haec ierat , redieratq; Anno, qui sequebatur , Archiepiscopus parva per Luchinum fratrem ad Parabiagum victoria , posuit in loco praelij nobile templum D. Ambrosio parenti urbis : eique templo ex Victoria ipsa cognomen fuit, & instituit , vt Decuriones urbis cum Praefecto quotannis mitterent ad id templum ampla dona , quae monumento essent, praesenti Diui eius ope seruatae urbem . Memorant , in medio pugnae eius ardore , speciem quandam obuersatam esse omnium oculis , tantquam D. ipsum Ambrosium equo infidentem flagelloque insequentem hostes viderent , eoque terrore contrariam aciem esse dissipatam . Azo postea ipse moritur in medio aetatis flore , non sine sacrorum etiam ordinum luctu propter vnicam eius viri religionem, & beneficium largumq; animum erga res Ecclesiasticas, quas pari cura cum Ioanne Archiepiscopo tutatus fuerat . Sepultus est in ipsa D. Gottardi AEde, quam sui Principatus initio ad orientale Palatij latus excitarat . Ac ducente funus Archiepiscopo patruo ; Clerus adfuit vniuersus, neque vocatus ille , vt adsolet , sed vltro effusis erga principem studijs, & pietate in eum, qua funeris etiam horas, vt fama est , anteuenerunt . Per Vicecomitis huius tempora Mediolanenses bellum gessere cum Ioanne Rege Boemie qui Tridento ab Vrbe Brixiam in Cenomanos cum descendisset, peregrini nominis fauore,



fauore, & nouarum rerum illecebra quadam apud inquietos, pleraque Insubrum adiunxerat sibi, & repentinus prope ille Longobardorum Rex aliquandiu erat. Aduersus eum Regem cum Scaligero, cum Estense, cum Gonzaga foedus initum: diuisae foederis lege cum regulis vrbes, quae Metropoli, quacue parti alteri victoriae praemium forent: Bergomum, & Cremona, & Vercellae, & Placentia, & Lauspompeia, & Brixia, & Comum, deiecto barbaro, casibusue, & pactionibus alijs in ius ditionemque Mediolanensium redactae: Nec sine clade exercitus nostri cum eo hoste dimicatum: Teutonesq; interea ipsis aliquando mœnibus vrbis institere. Quae omnia, cum auspicio consilijque Azonis administrarentur, clarum eius nomen etiam apud externos fuerat: & quando caput huic vrbi esse vnum oporteret, rerum ei summam permiserant haud illibenter. Fortuna Principi, sicut publice laeta, ita improspera priuatim fuit, ob domesticos hostes, Lûdrisum, & Marcum: quorum ille, post conceptas semel in patruelis fortunam iras, manserat implacabilis, & collectitij ductor exercitus irrumpere in urbem tentarat: hic florenti domui infestus, dein ob Caesaris iniurias adducto ad misericordiam animo, rursus, postquam laeta redierant, atrox, non tam imperio, quam vitae fratris erat insidiatus. Et vterque, rerum exitu infelices, captius alter ad Parabiagum in praelio, alter in tentati sceleris poenam ex palatii fenestra praecipitatus, lugubrem ei principi de

de suo sanguine victoriam exhibuere . Etiam fuisse aliud sui sanguinis flagitium dedecusque viderat Azo , ortum ab Marci eiusdem libidine simul & saeuitia . Namque is , Biciam Ochorini Vicecomitis patrueis sui vxorem cum ad se pellexisset , inclusamque ad Rosatum arcis subdidisse sibi partum comperisset : ipsam , & infantem , & furti ministram ancillam deiecerat è fenestra in fossam castello circumiectam : idque incestuosum , & crudele facinus principem affecerat moerore . Nam praeterquamquod erat ipse natura inimicus omnium inhonestarum rerum , etiam impositam ab Bicia illa impudica labem familiae suae videbat . Agebat octauum trigesium annum Azo tunc cum est mortuus , communi statura , crispante capillo , iucundus adspectu , facie vergente ad rotundum , si numismati fides , quod ista scribentes ante oculos habebamus . Postquam Azo nulla relicta liberum stirpe decessit , non dubitauere Decuriones & principes vrbis Mediolani , quin regimen arbitriumque rerum ad Ioannem Archiepiscopum deferrent : fratremque ipsius Luchinum imperij collegam nominauere . Sed Ioannes Luchino permittit omnia profana , statumque civilem voluit in eius esse potestate : sibi satis graue onus Ecclesiae gubernationem esse aiebat , & crebrae voces illius audiebantur . Non esse mentem vnus tantae molis capacem : male coniungi sacra cum profanis ; & fratrem Luchinum melius Reip. munia diuisis rebus executurum . Haec verba Pontificis erant :  
caeterum

caeterum non abstinuit, quominus, & consilio, quandocunque res ferret, & autoritate adiuuaret Luchinum imperiumque commune duorum fratrum fuit. In quibusdam etiam annalibus, ommissa Luchini mentione, perscriptum Ioannis principis, & Archiepiscopi nomen iuueni. Contaminauit huius initia principatus Insubriamque fere totam simile monstrum ei, cum infamis Gulielmina sanctitatis opinione alliceret mortales, stuprisque & adulterijs illigaret, idque flagitium, Archiepiscopi Ioannis prouidentia, consilioque, & autoritate discussum fuit. Corigio sorda est in Cremonensium finibus vix noti nominis pagus antea, sed malae famae post vnus feminae scelus, quod memorabo. Adolescentula ibi quaedam loco nata obscuro forma fuit eximia, totoque corporis habitu, & gratia morum ac venustate, quales corporis animique dotes in agresti illa nobiles etiam feminae cum inuidia & admiratione sermonibus ferrent. Auxerat hanc sui admirationem honestatis famâ, & famâ mox alia, tamquam pertaesa excelsio animo cupiditates & vota feminarum aliarum, nouis se se votis obligasset, atque virginale decus in magno expetentium sibi tale matrimonium ambitu, seruire intactum vellet. Adspersa muliebrem mundum, quem parentes laeti virginis indole & forma, supra fortunam etiam praebebant, coeperat uti cultu atro & exoleto, psallere domi nocturnis horis: ieiunijs macerare corpus: vno verbo, sanctimoniae exemplum perditâ adolescentula erat. Et

cū mita viueret , non forma , non decor pristinus ille elanguerat . Credidere vuulgò , non fuisse ea simulata imitamenta sanctitatis , & celesti fortasse flamma tactum illud simplex initio purumque pectus exardescere sic ad veram pietatem . Ipsa interim illigata occulto sacrilegio clerici vnus impure scelerateque agebat , & aliquandiu nihil aliud inter eos , quàm flagitiosa consuetudo stupri erat , nihil tale suspicante hominum fama . Postea , satiitate ac taedio sceleris eius , vel quia feliciter latebant , nihil iam artibus esse suis imperuium existimantes impura mulier cum Clerico impuro prodire velut vitae sanctioris auctores in publicum decreuere . Progressi audacter compositique palam ad omnem imaginem seueritatis , in arcano viuentes arbitrato suo , concionantesque passim effecere aedicularum ad decem fere millia . Hi nihil honesti priuatim agentes , in hominum conspectu verberabant sese , ac feminudi incedebant : & societas illa officina scelerum omnium erat . Late peruagati caeteras Insuorum vrbes , in Metropolim quoque penetrarant , & magnae generis eius corruptelae Mediolani iam fiebant . Disiecta sunt ea quoque bacchanalia per Archiepiscopum Ioannem , & eius monitu Cremonensem Episcopus impurae sectae aucthores in vrbe sua comprehensos damnauit igni . Principum postea virorum precibus ei poenae fuisse ereptos memorant . Eodem tempore scelus aliud Mediolani extitit insidiantium vtriusq; principis vitae , quorum exitus fuit

fuit eiusmodi , vt ingemisceret Ciuitas pertinacia eorum , & furori , cum quo addictas sempiternis ignibus animas inter supplicia corporum efflauere . Numquam enim , cum tormentis lacearentur , adduci potuere denuntiatione vlla , precibusue , & solitis hortamentis , vt salutare Christi nomen pronuntiarent , siue vt erigerent animum ad futurae vitae cogitationem , qua obstinatione meriti sunt , vt post supplicium inhumati laniamenta coruis relinquerentur . Franciscus Pusterula erat fauore Vicecomitum prouectus ad opes , quas non facile Mediolanensium vllus aequaret ; & parem opibus in aula gratiam auctoritatemque obtinebat . Hic , siue offensione accepta aliqua , siue , quia satietas , & deinde odium capit etiam aulicos homines , cum a principibus suis omnia acceperunt , non minus profectò quàm principes ipsos , postquam omnia dederunt : hic igitur , Vicecomitem tollere vtrumque agitauit , & sacram profanamq; aulam vacuam dare , si destinata prospere successissent . Fratrem habebat nomine Iulianum consilij huius participem , & pro necessitudine ac caritate fidum sibi ad omnia sicut ipse arbitrabatur . Per eum adiungit sibi Galeacium & Bernabouem , & Pallam , & Martinum Liprandos fratres : Borolum quoque Castelletum & Beltramolum Amicum , auctos item omneis Vicecomitum eorundem beneficijs , & post beneficia nihilo amabilius cogitantes . Hi simul omneis coniurauere vt principem vtrumq; interficerent , & nihil iam aliud quàm ido-

- neam tanto facinori occasionem expectabant. Interea Iulianus, incertum, leuitate animi, an erga Principem, fide, an verò etiam à fratre offensus, rem aperuit Alpinolo Casato, hic Ramengo fratri, & statim res coepta diuulgari. Quòd vbi Franciscus ipse coniurationis princeps, negotium ire per ora hominum sensit, sublati repente rebus aufugit. Postquam ille non comparebat, Alpinolus, & Ramengus, id quod antea reticuerant, detulere vltro ad Vicecomites: petita prius venia, ne sibi fraudi esset quòd deferre cunctati essent. Ita coniurati reliqui, misso protinus milite praetoriano comprehenduntur, atque coniunguntur in vincula, primoque tormentorum adspectu rem confessi, reductis in publicum bonis, fame perimuntur, quae supplicij foeditas adpersisse Ioannis Pontificatui labem est visa. Et hi quidem, Christiano tamen ritu expiatis animis, inter lentae mortis spatia non periisse morte altera crediti sunt: Franciscus Pusterula cum filijs duobus deprehensi apud Pisas, & Mediolanum raptati aeternum periêre, cum diuinarum salutariumq; rerum mentionem omnem inter supplicium adspernati essent. Alij, non Pusterularum hanc fuisse calamitatem tradunt, sed Beltramoli cognomine Amici, qui fuit vnus è coniuratis. Hic propter caeteram suam indignitatem, sordidumq; genus, à principe Luchino reseruatus in carnificinae ministerium, cum lancinasset strenue corpora nobilium virorum, praemium nauatae operae id expectarat, desponderatque sibi, vt  
saluus

saluus ipse dimitteretur. Sed principem multa +  
simul in illud vile caput asperabant: sordes homi-  
nis, male collocata in eum beneficia, pudor ob  
nutritum domi proditorem, & quod eum ab cellae.  
vinariae doliorumq; praefectura productum extu-  
lisset in aulam, ibiq; mutata veste baiulum consilijs  
ac negotijs immiscuisset: qualis insania dominan-  
tium, neque tunc coepta est spectari, neque desira.  
Tot simul indignitates, & suae deniq; sensus indi-  
gnitatis in eo extollendo homine accenderant Vi-  
cecomiti animum, ut postquam carnificem eum  
fecerat infamaueratq; spurco ministerio, carnificis  
etiam alterius manu suspensum iniectoque pede prae-  
focatum exhibere populo statuisset. Addita insu-  
per proditori baiulo ignominia, quae gratissima  
spectantibus fuit. Ad furcam, quae posita ei sepa-  
ratim extra urbem stabat, traxere illigati asini toto  
colligentem corpore coenum, & sordes, per quas  
trahebatur, incussoque, & deuoluto per saxa ca-  
pite cruentantem vias. Caeterum, ego non affir-  
mauerim supplicij ne acerbitate illa, an impia stoli-  
ditate contumaciaque hominis factum fuerit id  
quod non sine moestitia, & horrore ego referam.  
Memorant perstitisse in eo, ut ab Sanctae Crucis  
adpectu proterue rictum auerteret, ingerentesque  
sefe hortatores consputaret sub ipso carnificis  
pondere, cum ab eo calcante humeros damnata  
orco anima exprimeretur. Quod portentum abo-  
minati Magistratus vetuere tumulo inferri cadauer,  
vetuere deduci patibulo, pependitque inde, donec  
ipsa



ipsa dies , & pabulis eiusmodi volucres assuetæ absumerent quod pendebat , quodue fluebat in terram . Punita in hunc modum coniuratione , minime tamen laeti Vicecomites erant , teterq; & horrendus exitus Beltramoli Amici ceu prodigium aliquod ciuium animis haerebat . Plena vrbs timorum & suspicionum , tum apud principes , ne pars minima insidiarum detecta esset , tum apud coniuratorum propinquos , & necessarios , ne participes fuisse consiliorum existimarentur . Suspensamque , & sollicitam ita Ciuitatem insuper moeror ille aggrauabat , quòd inchoata , vt dixi , post reiectum ab Vrbe Bauarum , reconciliatione cum Pontifice maximo , nondum tamen ea res perfecta erat : nondum absoluta Ciuitas interdicti poena , quam Pontifex Ioannes ob admissas aemuli Nicolai temporibus culpas inflixisset . Vercellinus erat ex Vicecomitum genere vir pius , nec vlla sui parte indecorus Domui , quæ iam patriæ sese dominam fecisset , quamue sacra nunc , & profana omnia præsidem & moderatricem intuerentur . Moerens iste gemenisque tali rerum statu petijt ab Archiepiscopo Ioanne , vt ad Pontificem Max. Legati de absoluteione mitterentur . Missi sunt Gulielmus Calix , & Leo Dugnanus , & Massinus Sampson cum precibus huiusmodi . Ne Christi Vicarius Metropolitani Ambrosianam , & Vicecomitum Dorum temporum necessitate prolapsas , diuino nunc beneficio resurgentes ad obsequium , pro paterna sua erga omnes benignitate repudiaret . Si contumacia

macia coacti aliena deliquissent fortè aliquid , tantò promptioribus animis obediendo & obsequendo , id ipsum esse correcturos . Pontifex max. reconciliandae tantae vrbis occasionem amplexus , de ea re ad Senatum retulit . Patres relationem accepere laetis animis : factumq; decretum de pace cum Vicecomitibus incunda restituendaq; Metropoli in veterem sacrorum vsum , & piacula dicta vrbi sunt hisce  
„ verbis . Populus Clerusq; Mediolanensis , & corpo-  
„ ris vtriusque principes , propterea quod publico  
„ consilio descuerunt ab Ecclesiae Romanae autho-  
„ ritate , Bauarumq; Sedis Apostolicae rebellem , &  
„ Pseudopontificem Nicolaum propugnare aliquan-  
„ diu voluerunt ; numquam amplius talia esse factu-  
„ ros promittunt , & quicquid antea commisere , erro-  
„ re humano , & improuido casu , violentiaq; impe-  
„ ritantis esse commissum quàm sancte affirmant , &  
„ Pont. Max. annuit paterna sua clementia , & faci-  
„ litate , vt ea sicuti dicuntur , credat . Id vt manife-  
„ ste constet apud eos , qui nunc sunt homines , alijsue  
„ post saeculis erunt : iubet hosce Mediolanenses  
„ extruere publico sumptu sacella duo , quae poe-  
„ nitentiae obsequijque ipsorum erga Sedem Apo-  
„ stolicam sempiterna monumenta esse debebunt .  
„ Ea porro sacella dicabuntur D. Benedicto & ex-  
„ truentur in Diui Ambrosij Aede : annuis ad sacra  
„ faciunda vestigalibus instruentur : Sacerdotes vtrum  
„ que suos habebit : anniuersario D. Benedicti die res  
„ diuina fiet ad ea sacella solenni ritu , eiq; Sacro  
„ Praefectum vrbis aliosq; Magistratus interesse oportebit .

„tebit. Eo die duobus millibus pauperum benigne  
 „fiet Reipub. Mediolanensis nomine: singulos panes  
 „singuli accipient: vnciae duodenae tritici singulis  
 „panibus inerunt. Haec omnia si faxint Mediola-  
 „nenses: tum verò, sicuti maiores ipsorum, cari  
 „filij, & serui fideles Apostolicae Sedis erunt. Facta  
 „omnia, sicuti Romanus imperarat, Ecclesiaeque Ambrosianae pax data. Pontifex quin etiam ipse Be-  
 nediectus, biennio post, Mediolanum venit, estque  
 acceptus, non ea modò, quae Pontifici Max. de-  
 bebatur magnificentia, & gratulatione, sed etiam  
 effusiore quodam studio, quasi liberator urbis, &  
 Vicecomitum domui fundator Principatus. Nam  
 antea, fluctuantibus, & incertis Ecclesiae rebus,  
 imperium quoque esse incertum, & anceps oportebat.  
 Etiam Archiepiscopus Ioannes, licet ab Noua-  
 rienis Ecclesiae Pontificatu ad Metropolim Ambrosianam rite atque interposita summi Pontificis  
 auctoritate transisset, eaque Vicecomitis cum Aiscarde  
 exule permutatio legitima Ecclesiarum haberetur,  
 nulla tamen de ea re publica monumenta, nullumue  
 diploma proferre Apostolicum poterat, & mancus ab ea  
 parte Pontificatus erat. Datae sunt ab eodem Pontifice  
 litterae, quae commutationem eiusmodi sancirent  
 Apostolicae Sedis nomine, ratamque haberent.  
 In eo reconciliatae gratiae feruore, spes facta est  
 Archiepiscopo Ioanni etiam impetrandi rem antea  
 nequicquam agitatam, ut scilicet thesauri illi  
 Modoetienfes referri illuc possent, vnde ablati  
 olim fuerant, & varijs in aliena terra

terra casibus iactati. Vocatis igitur ad se Canonicis, Archiepiscopus, cum sua de thesauro recuperando consilia, spemq; de ea re conceptam exposuisset, iubet eos perferre ad se exemplum litterarum quae singulas thesauri partes exscriptas atq; exsignatas continebant, prout scilicet confectae eae tabulae fuerant, tunc cum thesauri ipsi ab Ioanne vigesimo altero Collegio Auenionensi custodiendi traderentur. Postquam attulere Canonici Modoetienfes earum litterarum exemplum, subsignauit Archiepiscopus id exemplum sua manu, tabulasq; publicas eiusmodi subsignationis iussit confici per Petrum Vercellensem, qui ipsi A. Actis erat. Has litteras, aliasq; commendatitias tradidit Ioanni Baldirono Modoetienfi, qui profectus Archiepiscopi Municipijque sui nomine sine mora Auenionem, facile à Pont. Max. impetrauit, vt referri Modoe-  
tiam thesauros annueret, eosq; anno millesimo trecentesimo quadagesimo quarto, die, qui Sanctae Crucis inuentioni sacer erat, traditos esse Matthaeo Veronensium Episcopo reperi in vrbis eius annalibus: ab eo transmissos esse Modoetiam in eadem  
arca, in qua conditi fuissent, cum Auenione asser-  
uarentur. Alij, non statim eos esse transmissos tra-  
dunt ab Episcopo Veronente, sicut retuli: sed Episcopum, postquam sibi traditi fuissent à Pont. Max. misisse de eae litteras ad Archiep. Ioannem, vt diceret ipse, quid fieri vellet. Archiepiscopi deinde iussu Canonicos misisse Gratianum Aronensem è suo Collegio: datas huic ab Archiepiscopo simul, &

Luchino litteras, quae legationi fidem adstruerent, missumq; cum eo Guidum Calicem principum ipsorum nomine, quod plus etiam autoritatis postulato esset: legationem hanc Mediolanum rediisse cum thesauris, & ad vitanda latrocinia profectionem expectasse legati, quem Pontifex in Apuliam ad coronandum ibi Regem mittebat. Caeterum, siue missi statim thesauri Mediolanum fuerint ab Episcopo Veronense, siue missis Auenionem legatis relati domum, illud constat: Archiepiscopum Ioannem, simul atque arcam in potestate habuerit, vna cum praecipuis à Clero processisse Modoetiam, atq; ibi singulas res in ara maxima collocasse sua manu, prout à ministris ex arca depromptae ordine in manum tradebantur, remq; testatò descripram sicuti gesta fuisset: scribas, Petrum Vercellensem, & Othorinum Niguardam fuisse. Si velim ego in historico hoc opere praetermittere quicquid Archiepiscoporum principumue posteris, minus fortasse placiturum credam, ne honesta quidem, & gloriosa fidei habebunt. Et memorari tristes ambiguoſue domorum casus oportet, vt magna earundem decora, magnisq; consilijs & virtutibus administratae res cum fide atque auctoritate accipiantur. Perculit enim hoc tempore Vicecomitum domum casus inhonestus, de quo Bernardinus Corius refert proximus memoriae temporum eorum scriptor: referantque ego, quia notabile custodiendis matrimonijs exemplum erit, & quia calamitas ea perpetuum Archiepiscopo Ioanni moerorem attulisse

vifa

vila est, ob labem quæ sibi imposita per mulierculæ vnius intemperantiam videbatur. Fulca Flisca, quam alio nomine Isabellam appellabant, erat Luchini principis vxor, nullius quidem antea flagitij comperta, sed procaciorē semper cultu, quā honestam matronam deceret: concursatrix eadem & vaga, & amica celebritatum omnium, quod ferme muliebrem malum est. Haec mulier, cum audiret celebrari sermonibus eius caeremoniae apparatus, qua Venetijs sacro Ascensionis die, darentur nuptialia dona pelago, mira cupiditate exarserat visendi spectaculi eius, facileq; ab Luchino coniuge impetrauit, vt cum seminarum, aliarum grege illuc vsq; deportaretur. Elegit ipsa quas voluit ex familia sua, caeteraque nobilitate multas adultas virgines, & matronas, quibus forma virginum duraret, eique mulierum turbae, sexus virilis nobilitas aggregauerat se se, siue erga principis vxorem obsequio, siue iuuenilibus quisque studijs erga muliebrem eum comitatum. Ad Laudem Pompeiam paratis instructisq; nauibus commiserunt sese flumini: ac ne singulos exequar muliebris agminis incessus & dedecora omnia: Cōrij verbum huiusmodi est: dormitasse cum Vgolino Isabellam vxorem Vicecomitis, ceteramq; turbam virorum, & mulierum nihilo honestius inter se egisse. Negotium fuisse tam effraene, & incautum, vt antequam peregrinabunda illa multitudo cum Duce sua rediret domum, nosceret suam vnaquaeq; domus calamitatem: ac postquam redierant, parante

Luchino venenum in adulteram suam, anteuertente ipsa maritumq; sustulerit. Creditum id publicè dictumq; est: nec caeteri perinde segnes ad vindicandam mulierum suarum impudicitiam fuere: venenique moras adspernati quidam, violenter & palam exercuere iras. Sublato igitur per adulterae uxoris dolum Luchino, imperium, & summa rerum omnium ad Ioannem Archiepiscopum venit, & statim exacto in ipsius verba Sacramento, cuncta ei obediebant. Mansere autem tunc haec subiectae Vicecomiti vrbes, Mediolanum, Crema, Hasta, Alexandria, Alba, Vercellae, Nouaria, Bobium, Bergomum, Nouocomum, Brixia, Cremona, Placentia, Parnia, Laus Pompeia. Hae tunc vrbes Archiepiscopo Ioanni sacramentum dixere: & res Ecclesiasticae iam hinc ciuilibus multò magis etiam quam antea immiscentur vnica rerum serie & contextu casuum atq; consiliorum vno, cùm Princeps Archiepiscopusq; idem cuncta moderaretur, cunctaq; ageret ad regiae propè magnitudinis formam. Translulerat is sedem in Palatium, cuius vestigia iuxta D. Georgij Aedem monstrantur in hunc diem: inde iura populis dabantur: Metropolis illuc vniuersa spectabat. Ibi tractabantur foedera, societates, arma, caeremoniae, ritusque sacrorum: potentiaque tanta finitimis etiam principibus terrori erat: nec nisi quibus amicitia foedusve cum Vicecomite intercederet, stabilem esse sibi fortunam putabant. Itaque principis Archiepiscopiq; huius aula, veluti totius Italiae forum habebatur:



ac foedus expetiuerunt cum eo, Sabaudus, & Gebennensis, quae maximae potentiae maximiq; terroris nomina inter dominantes erant. At Genuenses, antea bellare cum Vicecomitibus soliti, & per id maxime tempus irritatis ad bellum animis, exterriti iam, & attoniti tantis opibus, per legatos petiere ultro, ne rem Genuensem in suam ditionem recipere grauaretur, annuitq; ille, & Praetorem, ei vrbi dedit. Caetera pari tenore ac felicitate fluebant augendo Vicecomitum fastigio, & regiae fortunae magnitudinem ea Domus quotidie magis aequare videbatur, cum repente dedecus aliud incescit, quale sordidi quoq; penates agricolarum abominarentur, atq; contaminatum quemlibet ea labe principem infra sese despectarent. Namq; Fusca illa Flisca, de cuius mulieris impudicitia memoratum est, siue conscientiae stimulis icta, siue infamiae suauitate, cuius apud ingenia eiusmodi nouissima plerumque libido est, publice profiteri non dubitauit, Luchinum, Nouellum, & Vrsinam, non sicuti vulgò crederentur, esse Luchini principis filios, sed ex Galeacio Luchini fratris filio, incestuoso congressu prolem eam vtramq; susceptam. Id, vt ita esse, acqui & iniqui scirent publicas tabulas de ea re confici voluit: taleque magnae domus ludibrium vidit actas illa, & miserata est. Ioannes tamen Archiepiscopus excussa post aliquot dies dedecoris eius verecundia, muliebresque ineptias aequo animo ferendas esse dictitans, augere imperium pergebat, & pulsus ab Bononia Pepulis, vrbis eius potitur,

Ac

Ac deducta per eos dies Mediolanum, Beatrice Scaligera, quae Bernaboui Galeacij filio desponsa fuerat, per nuptiarum earum gratulationem, abducere conabatur suum aliorumque animum ab recordatione prioris flagitij, tamquam integra sponsae eius fama, thalami iam castiores, & spes nouae legitimae prolis, sanguinisque veri Vicecomitum inchoarentur. Extruxitque etiam interea D.<sup>i</sup> Mariae Virginis Aedem ad Garignanum, assignatis in templi cultum fundis, quos, & immunes onerum tributorumque omnium esse voluit: eique decreto, & actioni Decuriones urbis adfuere. Sed ob captam occupatamque Bononiam imminabant Romani Pontificis irae Principi simul, & ubi: veterumque etiam offensarum renouata per eam occasionem memoriâ, simul ciuitatem iusserat vniuersam carere communione sacrorum & iure, simul iubebat Vicecomitem alterutro regimine contentum, partem omittere alteram, profana, siue sacra mallet. Quae mandata ferens legatus ubi Mediolanum venit, primò quidem ille benigne ab Vicecomite Archiepiscopo accipitur, & amica erant omnia, donec ad mandata ipsa depromenda oratio coepta est accommodari. Vt verò triste verbum enuntiatum est, nihil quidem acerbe Vicecomes hostiliterue est effatus: caeterum in fensu voluens animo responsum, quod re ipsa, quàm verbis atrocius foret, die festo, qui proximus aderat, responsa daturum se ait, quae Pontifici Max. legatus referret. Eo die adesset in templo maximo:

mo: velle se ibi coram Patria, & coram Parente  
urbis Ambrosio responsa ea pronuntiare. Staturo  
die legatus templum ingreditur: ibique Vicecomes  
re diuina peracta, quam apparatissime, sacrificali,  
sicuti stabat ornatu confedit ante aram, cumq; diri-  
puisset ab latere gladium, quo succinctus erat, al-  
tera manu Crucem tenens, dixit, insignia ea suae  
esse potestatis, & donec spiritus maneret, cruce  
gladioq; partem imperij vtramq; defensurum. Iret  
legatus, & Pontifici suo renuntiaret visa simul, &  
audita. Visa res indigna Pontifici, nouaque percus-  
tus ira, iubet Vicecomitem sistere ad Tribunal Apo-  
stolicae Sedis: ni faciat, anathematis poena dam-  
nat adhuc hominem, oneratque diris, & Ecclesiae  
Catholicae hostem appellat. Enimvero Viceco-  
mes, ad ea, nihil in speciem animo turbato, dixit  
iturum se utique, & imperata facturum. Mox  
duodecim millia peditum, equitum sex iubet esse in  
protinctu, ut secum eant, maioremque porro nu-  
merum armare pergit. Simul, praemissis Auenio-  
nem hominibus suis, qui conuiectum aliaque ne-  
cessaria expedirent, terruerat eo apparatu Ponti-  
ficis animum aulamque totam: & Auenione, tam-  
quam expectatione noui hostis trepidabatur.  
Namq; curatores illi, qui praemissi erant, emendo  
frumenta, conducendoq; aedes, & congerendo in  
suas apothecas quicquid vsipiam in mortalium ali-  
menta venale prostarer, largeque per omnia pe-  
cuniam effundendo, fecerant annonae penuriam,  
& praebuerant speciem haud dubie cum exercitu  
suo

suo venientis Regis. Tunc Pontifex, vocatos ad  
 se Vicecomitis homines interrogat, quantum pecu-  
 niae ad eam diem insumpserint, illisque profiten-  
 tibus quadraginta millia florenorum, rependi ex  
 pontificio aerario summam eam, Vicecomitemque  
 ipsum admoneri iussit, ut ea profectioe superse-  
 deret, isque supersedit. Ita liberatus etiam ipse  
 non minore cura, quam quae Pontificis compres-  
 ferat iras, ad urbis, & imperij statum, & discipli-  
 nam, atque perpetuitatem domi stabiliendam inten-  
 derat animum, reque cum Decurionibus urbis com-  
 municata, Municipale ius omne Mediolanensium,  
 quod inter tantas Reip. commutationes, tantosque  
 dominantium, & subiectorum casus prope exole-  
 uerat, restituit, ac promulgauit, parata ei rei quiete  
 haud tamen in longum tempus. Nam semper po-  
 stea, corrigere, vel addere aliquid, prout tempora,  
 & res monebant instituere quibus ea prouidentia in  
 vrbe, & potestas, saepeque publici Concilij autho-  
 ritate variata res est, donec aorum nostrorum  
 memoria Ludouicus Sfortia suae domus euerfor,  
 corpus municipalium legum firmavit; alijque post  
 cum etiam principes expoliendo operi curam ani-  
 mumque aduerterunt. Sed initia iuris describendi  
 nobis ab Longobardorum temporibus manauere,  
 cum scilicet Iustiniani legibus ad eorum aduentum  
 vrbi nostrae fortasse ignotis, certe non receptis,  
 darentur ab nouo, & externo repentinoque domi-  
 natu propria quaedam iura, & leges, quae mansere  
 donec id Imperium. Eo per Carolum Magnum  
 deleta

deleto, Lotharius Imperator praescripsit instituitque; nonnulla, quae beneficiarias praecipue concessiones, & omnia generis eius iura, terminos, fines, vim, officium, auctoritatemque continerent. Inde post utriusque Berengarij vanas in Italiam impressiones, translatis in Germaniam rebus, dedit quasdam Metropoli leges idem ille qui strauit eueritque; urbem Aenobarbus. Ex ruinis verò illis, postquam assurrexere maiores nostri, constantia eadem, & sapientia, qua nouam ex barbarica strage excitare urbem potuerant, iura etiam condidere sibi, nec semel ad id Reip. constituendae munus adiecere animos, conferendo pro se quisque in medium quae saluberrima excogitauissent. Ab Aenobarbi sine, libertate usurpata, deinde inter ipsas Vicecomitum Turrianorumque factiones, decreuere multa, & sciuerunt, quae ne secutae quidem repudiauerunt aetates, & manent adhuc. Omnia, quae cadunt in hominum vitam statumque ciuilem, iudicia, lites, pretia rerum, & mercimonja, culpas, & poenas, & quicquid vsquam in communi consuetudine esse controuersiosum potest, comprahenderunt vnico municipalium legum volumine, & capitibus de vnaquaque re editis inclusaque in id volumen scena rerum cunctarum, quae inter homines aguntur, siue peccantur, contrahuntur, aut ambiguntur, damna, & iniurias, licentiamque omnem inter se mortalium coercuere. Quae coercitiones, & decreta, retenta diu, & custodita, semperque aucta, & amplificata, cum sub Matthaei denique filijs prope interciderent,

Z

Luchinusque;

Luchinusque etiam nescio quo spiritu ea sustulisset, ab Archiepiscopo Ioanne hoc tempore, sicut dixi, restituebantur. Volebat is ita restitui semel ac sanciri municipalia haec iura, vt abrogari postea tollique siue conuelli nusquam possent. Ideo Decuriones vrbis exciuit ad singula capita recognoscenda, & inspicienda secum: eadem in octingentorum Concilio proposita sunt: eadem adhibitis ex vnaquaque vrbis regione prudentibus viris agitata, & consultata. Referebant hi ad suos, nec graue principi, Decurionibusve vrbis, Concilioue octingentorum, cognoscere quid super tanta re quisque afferret ac sentiret. Fortasse etiam nobilium familiarum posterius minime aspernati erunt istud qualecunque historiae obsequium, si retulero prudentum virorum nomina, quorum opera, & consilio Princeps Archiepiscopusque idem in ea iuris descriptione est vsus. Composuerant primò digesserantque capita, Leo Dugnanus, Signorolus Amedeus, Manfredus Sarazonus, Erasmus Aliprandus, Iacobinus Bossus, Philippus Catiola, Francius Bripius, Iacobinus Vibragerius, Iacobinus Panigarola, Beltraminus Gironus, Ioannolus Paganus. Hi seriem rerum edidere primi cum praefatione tituloque hoc. Quod Deo optimo maximo gloriosum, Reip. Populoque Mediolanensi salutare esset, ipsos eam disciplinam, & ea decreta composuisse regendae ciuitati, rationemque habuisse, vt ex vetusti codicis autoritate, ordineque ac praescripto cuncta moderarentur. Iurisconsulti sunt

unt adhibiti, Laurentius Bernadigius, Aramaninus  
 Alemani, Ambrosius Septala, Franciscus Capra,  
 Astolphus Lampugnani, Franciscus Sulbi-  
 gus, Franzus Spanciota, Antoniolus Resta, Ru-  
 minus Porrus, Philippus Capellus, Carnevarius  
 Mandellus. Singularum urbis regionum homines  
 singulares fuere, Tobiolus Aliprandus, Iacobinus,  
 Petrus & Gremolus Panigarola, Rogerius Eccle-  
 sia, Franciscus Ofius, Rugerius Biffus, Erasmus  
 Aliprandus, Othorinus Burrus, Guidetus Pus-  
 tula, Maffiolus Morigia, Palea Grassus, suae  
 quisque Portae nomen, & auctoritate mei negotio  
 addentes: & alicunde bini aderant. Et statum qui-  
 dem, formamque, & iura ciuitatis constituerat hoc  
 modo Archiepiscopus, nulla re omissa, quae pro-  
 uidenda animaduertendaque esset: negotia ve-  
 ro externa, ob captam sicuti dixi Bononiam, haud  
 tam facile constituebantur. Et Pontificis Maximi  
 propter eam rem indignatio, hoc ipso accendeba-  
 tur, quod repressa fuerat tamquam metu, cum ni-  
 mirum Archiepiscopus, hostiles illos apparatus Aue-  
 nionem praemisisset, Apostolico mandato eluso hos-  
 tiliter ipse subsequitur. Quò magis ille ardesceret  
 iusta iura, Bononiâque depellere Vicecomitem,  
 destina- ret, Florentinorum insuper assiduae preces,  
 & querelae efficiebant. Nam ea ciuitas, veteri  
 Guelfarum partium aduersus Gibellinos odio, sem-  
 per infensa Vicecomitum nomini, tantam in vicino  
 urbem habere inimicam, certam Reip. suae esse  
 perniciem putans, non desistebat obsecrare Christi



Vicarium, vt communem cum hostem deicere inde maturaret. Sed in Pontificia tunc aula erat Auenione Gulielmus Grifans Abbas S. Victoris ex Gallica Vrbe Massilia, summa apud Pontificem gratia, & autoritate, qui postea fuit Urbanus Quintus. Demonstrando is magna pericula belli, & difficultates, exitumque ancipitem, tum Pontificis ipsius ad quietam consilia vertebat animum, tum Florentinorum querelas eleuabat. Eos damnis odiisque suis irritatos trahere velle secum Apostolicam sedem, non eadem decora Sedi Apostolicae, & populo vni turbulento. Quin potius via aliqua commodior iniretur: ac se se interea pacis agitando internuntium offerebat, exitu fortasse meliore, quàm quo internuntij priores redissent. Itaque Mediolanum ipse mittitur repetendae Bononiae, & agitandae pacis mandataque libera afferebat, vt salua Sedis Apostolicae dignitate transigere posset etiam re infecta, quae negotij erat caput. Fortasse alia quaedam etiam occulta pacta, sermonesque fuere occulti inter legatum cum Abbatem, & Ioannem Archiepiscopum, quibus sermonibus & pactis negotium mutuo & arcano consensu composuere impeditum illud, anceps, deteriusque semper factum dum agitur. In praesentia nihil aliud eorum colloquijs, totaque negotiatione arripere potuit hominum solertia, nihilue postea aliud vulgavit cuncta nudans dies, quàm ea ipsa quae in media luce palam agebantur. Haberet sibi Vicecomes urbem Bononiam, ipse heredesque eius, ac  
testandi

testandi causa, iuris eam esse Pontificij, dena millia florenorum quotannis Apostolicae Sedi tributum ferrent. Coleretur pie ac religiosè Vicecomes Apostolicam Sedem, & Pontifices ipsi vicissim Archiepiscopo Mediolanensi, domuique Vicecomitum fauerent paterne, ac beneuole, siquidem fide atq; obsequio merita esset. In eas condiciones pax conuenit, & Archiepiscopus Mediolanensis princeps Bononiae appellatus. Vrbs liberata Apostolico interdicto: quae poena temporibus illis toties irrogata Metropoli, toties ablata, mirari cogit, aut tam pronam fuisse Ciuitatem ad peccandum, aut tam saepe relapsos, veniae subinde locum apud Sedem Apostolicam inuenire potuisse. Dum Mediolani agirantur ista, & fiunt, struebantur in diuersa parte incrementa Mediolanensi imperio, quae Metropolim tam alte attollerent, quam euecta antea numquam fuisset. Veneta Classis in Sardoo mari, commisso cum Genuensibus praelio, nauibus eorum captis aut demersis, caesoq; Ligurum exercitu, circumfessa deinde etiam vrbe, & comitatibus interclusis, minitabatur extrema, ei populo: plena ibi omnia cladis, & luctus, desperationisque erant. Neque spes vlla relinquebatur ex Vicecomite populoque Mediolanensi, cum postea quam in ditionem se se contulerant nostram, iam vltro descuiissent, & interfecto, quem Vicecomes dederat Rectore vrbis, praetorem sibi nouum creassent arbitrato suo. Attamen, necessitate cogente implorare auxilium etiam ab iratis, siue, quia sperarent,

rent, translatam imperitantium ritu omnem esse iram ab miseris in eam partem, cuius tanta victoria esset, per intermissa custodijs loca missis ad Vicecomitem legatis, simul errori, veniam, simul tradita denuo vrbe praesidium ab eo salutemque petiere. Minime fallebat obfessos ea opinio, quam de Archiepiscopi ira erga Venetorum fortunam & victoriam conceperant animis: & cursum eum rerum in aemula sui principatus Republica non minus profecto ille oderat quàm Genuenses ipsi, quibus dies vltima, nisi per Metropolim stetisset, aderat. Itaque oblitus priora Vicecomes, vel certe, tamquam oblitus, classem quantam maximam potest aduersus Venetos mittit, magnoque praelio victor, capto etiam imperatore Veneto, Ligustici maris potens efficitur, insularumque & ciuitatum per oram eam dominus. Accessit quarta Sardiniae pars, quam tenuerat hereditario iure ob matrimonium cum Nini Gallurae filia. Ioannes Vicecomes, his editis operibus, et aucto quod acceperat imperio, prolatisque finibus, & bello clarus & pace moritur anno Sal. MDCCCXIV. ab ea quoque parte felix, quod inito aduersus ipsum foedere factaque maximorum principum coniuratione, cui resistere non potuisset, ante tanti discriminis tempus excessit. Pietatis quoque laudem scriptores ei tribuunt, quod propinquante fine, cura nulla maior fuerit tot negotijs implicito homini, quàm vt omnibus Ecclesiae mysterijs expiaretur. Et instituerat ipse solenne anniuersarium, vt statò die sacrosancta

Altaris

Altaris mysteria per urbem, Clero vniuerso pompam deducere gestarentur: quae pompa, quo primum die ducta ab ipso est, centum millia mortalium, interfuere. Cernitur in templo maximo tumulus huius Archiepiscopi, carmine addito, quo subiectae vrbes longo ordine numerantur cum infectione vanitatis humanarum rerum, quod dominum tot terrarum parua nunc arca includat, & gignente sibi supplicia corpore ab vermibus laceretur. Tanta fuit eius fama per gentes, vt nullus praeterea Regum principumue tempestate illa sermonibus celebraretur, auersis nimirum in vnus admirationem omnium animis, ob splendorem, & magnificentiam, qua nemo eum aequauit. Clemens animus erga subiectorum errores: proluxa in Christi pauperes liberalitas erat ei: ac nisi Sedi Apostolicae molestus fuisset, paucierant in Mediolanen. Archiepiscoporum numero, quos reguandi prudentia conferre cum Vicecomite hoc possemus. Eo mortuo, Robertus Vicecomes Archiepiscopus est factus isque rem Ecclesiasticam Mediolanensem tenuit: reliqua diuisa sunt inter Stephani Vicecomitis filios, prout Patruj testamento factae partes erant. Matthaeo (is stirpis maximus erat) cessere. Laus Pompeia, Placentia, Bononia, Massa, Bobium, Pontremulum, & Sancti Donnini vicus. Bernabos haec accepit: Cremonam, Cremam, Soncinum, Bergomum, Brixiam, Vallemcamonicam, Ripaltam, & Carauagium, & pleraque minora oppida, & quacunque Benacus pertingit Galeacij reliquum fuit imperium

imperium. Genuam, vt communi iure haberent, ipsi inter se fratres consciuerunt. Metropolim quoque ipsam promiscuo imperio per Praectorem regendam esse decreuerunt, Ita, mortuo quamquam Ioanne, potentia Domus pristina manebat, nisi quod ab omnibus caput & splendor ille rerum desiderabatur. Ferme sub Archiepiscopi Ioannis obitum, Carolus Imperator Mediolanum venit, estque ab Archiepiscopo Roberto in Basilica Ambrosiana rite coronatus: & vicissim ipse Vicecomites fratres, suos in Mediolanensi prouincia Vicarios appellauit. Nec multo postea, fratrum eorum maximus moritur, ex intemperantia, sicuti creditum est, libidinis, constuprator illustrium feminarum. Ea vulgatiores fama fuit, exhaustum immodico turpitudinis usu iuuenem, ignominiose obiisse: caeterum, alij prodidere, repertas in tabulario Eustorgiano tabulas testamenti, quo Valentina mater, dolos, & insidias fratrum in filij sui vitam, muliebriter infensa execraretur. Mortuus est ad Seronum, duodecimo ab vrbe lapide, cum ob amores libidinesque suas eò se se abdidisset: processitque Clerus illuc vniuersus funeris causa, & deductum in urbem cadauer, tumulo maiorum intulere. Matthaeo hoc extincto, siue sua intemperantia eum, siue fratrum dolus abstulit, reliqui duo Galeacius, & Bernabos imperium tenebant. Id per urbium nomina regionumque fines diuississe ac lacerasse non contenti, etiam diuisione inter se Portarum urbis lacerauere. Tonsa, & Orientalis, & Noua, & Romana Bernabouj

boui euenerunt : Cumanam , & Vercellenſem , & Ticinenſem , & quae Iouis dicitur , Galeacius accepit : quaſi partibus euertere vellent id quod raptum totum ex alieno occupatumque temere ab initio erat . Cum iuueniliter , & inconſulte ita ipſi inſtituiſſent rem , imminutaque diſſidio domus , amicis dolori eſſet , alijs ludibrio , nec populus ipſe interim Eccleſiae Mediolanenſis , gemino illo principatu laetari poſſet : ſtatim extrinſecus aduenere calamitates , & negotia , quae conſulere in commune fratres coegerunt . Alioqui dominatus iſte per duorum Archiepiſcoporum violentiam , interiecto alterius patre alterius fratris filio , raptus ex Caſarum incuria , temporumq; conditione , perierat ob diſcordes nepotum animos : ac redierat pene domus in antiquum eum ſtatum , cum Vbertus , & Berta , & nondum Decij Canonicus Ocho apud Maſſinum inter ſaxa & rupes onera fortasſe tantummodo nobilitatis ſentirent . Et fuit omne periculum ex auaritia , quae ſemper inimica rebus omnibus honeſtis , tum verò fit ipſa ſibi ridiculum ſimul , & capitale malum , ubi ad imperij negotia tabes iſta peruenit . Dum autem diuiſo imperio , diuiſaque etiam vrbe fratres , vterque ſibi cupidiffime tenderent , neutro ſatis per ſecuto , damna , & pericula haec appetiuere ambos . Leonardus erat quidam Archiepiſcopi Ioannis filius , nihil o melior , quam reperta ſemper fuerit eiufmodi proles , quae cum ſcelere ignominiaque parentum procreatur , ſemperque parentibus id flagitium fit poena , ſpectatis omni ſemper aetate nonnullorum exemplis .

plis, quos ob admissam in sacra toga turpitudinem  
 & quæsitos inter castimoniac vota liberos, punie-  
 re postea liberorum ipsorum scelera, miseriaeque,  
 & finis. Leonardus hic Archiepiscopi Ioannis filius  
 delitiae parentis aliquandiu spesque, & cura, deinde  
 desperatio, & luctus, & pudor, tantas in Nouariensi  
 Praetura, viuo adhuc eo, flagitiorum omnium de-  
 formitates, libidine, rapinisque explicarat, vt suae  
 miserae libidinis flagitium id abominaretur pater:  
 nec videre amplius spurium, nec audire nomen eius  
 vellet. Ea ipsa patris alienatio truce sua sponte  
 animum irritarat, libenterque nimium illius odio  
 patrueles omnes teneros adultosve deleffet, ne san-  
 guinis nominisque Vicecomitum quisquam relin-  
 queretur. Obstiterat attentus ad custodiam salutem-  
 que iuuenum, & vigil, & acer, & in nulla curarum  
 parte remissus senex. Vt ille decesserat, & rapax  
 cupidus fratrum, ipsos ab mutua diremerat ope,  
 deicere vtrumque imperio agitabat, & excito in id  
 Ioanne Demarcho Montisferrati, tanti hostili animo  
 pares conatus cum prospero etiam euentu adiecit.  
 Ticinum, Alba, Hasta, & quaecunque fere in subal-  
 pinis per Galeacium tenebantur, capta incurfu vno.  
 Simul, Genuenses, & omnis illa ora, tractusque  
 Ligurum, qua leuitate tradiderant Ioanni Archie-  
 piscopo suam Remp. eâ in constantiam versâ rebel-  
 lauerunt. Nouariam, & Vercellas, cunctaque  
 camporum Demarchus idem inuasit. Bononiam,  
 Pontifex maximus, damnata Clementis facilitate  
 repetebat: foederataque iam inde ab Genuensi casu  
 contra



contra Ioannem Archiepiscopum Veneta arma,  
 morte paulisper suspensa hostis, acrius infensusque  
 aduersus iuuentam & discordiam heredum moue-  
 bantur. Quae, sicut exitialia, Vicecomitum do-  
 minatui, ita urbem, agrumque Mediolanensem,  
 exercebant inter discordes dominos, & belli mala,  
 quorum culpam Galeacius in Bernabouem, hic in  
 illum conferebant, cum verius de utroque Metro-  
 polis conqueri posset. Profectò, magnopere ego  
 abesse velim à suspitione flagitij, tamquam, aut  
 Vicecomitum horum, aut familiarum aliarum ser-  
 uire voluisse memorijs videar, opusque Ciuitatis  
 destinatum inquinasse adulatione erga singulas do-  
 mos: quae ipsae, negotijs & curis cupiditatibusve  
 nunc occupatae alijs, nec requirunt fortasse ista,  
 nec pertinere ad se iam putant. Sed sicuti paran-  
 tem à principio me rem tantummodo hisce litteris  
 complecti publicam; idque etiam initio operis  
 professum, priuata paulatim inuoluerunt: ita  
 ciuilibus istis bellicisve nostrae urbis casibus, res,  
 & nomina casusque familiarum obrepunt, &  
 gentem nominasse toties vnam pudet. Atqui  
 non aliter constare series huius Imperij rerum,  
 poterat: non aliter explicari quomodo patria  
 per omne tempus egerit, quidve sit passa, quasue  
 pertulerit maximarum rerum difficultates, ut in-  
 eumstatum, quo nunc stat floretque, perduceretur.  
 Siue immutabili diuinae prouidentiae lege ac nutu,  
 quo cuncta mortalium reguntur, siue, per nutum  
 legemque eandem, temporum miseria, ciuitatis

+ ipsius vitio, potuerat sic supra caeteros efferre sese una domus. Ea deinde, sicuti dominantes solent, trahendo in se res omneis ciuitatis ipsius vim nomenque occuparat, nec opes tantum, & vires, sed consilia etiam aliena, & fortuna quodammodo vrbis, fiebant eius familiae felicitas, & prouidentia. Rursus, errores, & calamitates eorum in ciuitatem exonerabantur, & luebat Metropolis quicquid una domus peccabat. Ita prospera vel aduersa Vicecomitum istorum narramus, tamquam miseras gloriae vrbis, cuius periculis administrata omnia fuerunt, in quam damna cuncta recidebant. Bernabos & Galeatius, vbi cadentem hostium impetu suae domus fortunam, & intenta vndique in se arma conspexerunt, tum sponte sua, tum precibus amicorum non iam aliena exempla fraternae discordiae, sed domesticam praesentemque perniciem, instantia simul, & futura mala proponentium, positis odijs, quae infida societas imperij aluerat, quaeue etiam secuta diuisionem erant: vnā illico domum ex duabus, vnicum imperium, animumque sibi vnumfecere. Non portas iam regionesque vrbis rapiunt auditate dominandi, sed diuidunt sibi pericula, & hostem: ipsaque ciuitas, antea diuisa factionibus inter fratres, communi periculo urgente, fit exercitus aciesque vna. Tota protinus in equis & in armis fuit, iamdudum assueta bello, & militatiter intenta, parataque ad omneis motus. Exit Ticinensi porta Galeacius cum vrbani exercitus parte, populabundosque Lando quodam duce Theutonas

Theutonas, praelio ad Casoratum vno caedit aut fugat. Emiserant foederati barbaricam eam manum, + vt vastatione agrorum incendiisque villarum terrore vrbi injecto, motus aliquis ciuium aduersus Vicecomitem vtrumque excitaretur. Quae res, si ex ipsorum animi sententia cecidisset, haud postea difficilem in discordi duorum fratrum dominatu defectiorem fore vniuersam sperabant. Exitu populationis sensere, nequaquam tam dissoluta, & proiecta omnia esse Mediolani, quàm creditum initio fuerat. Exit verò simul etiam cum exercitu alio Bernabos, ijs animis, vt Mantuae principem, cui spes & arma foederatorum praecipue nitebantur, clade aliqua propria ab foederis eius societate retardaret, idque est assecutus, tum robore exercitus sui, tum Clerici vnus proditioe, quo tradente, castella aliquot capta: vnde Mantuano terror, & injecta rebus mora, quae petita erat. Maiore ea, & praesentior fuit, vbi Galeatius, in diuersa parte, tempore eodem, gesta feliciter re, fortunam suam, & fratris, ex abiecta prope, & desperata, florentem quodammodo, & auctiorem excitasse est visus. Namque, dum Mantuanum, & dolis, & armis Bernabos vrget, obsessa per alterum illum, receptaque Papia est, & quò illustrius, gloriosiusque reciperetur, hostes ipsi adiuuere. Cum enim in facienda deditioe Ticinenses, Galeatij pertinuissent iras, ob atrociam multa, quae, dum obsiderentur, ausi erant, eoque metu, missis occulte ad Bernabouem legatis tradere sese potius huic voluissent, reiecit eos ipse ad fratrem

trem, vltroque deprecator irarum fuit. Ea repente aequitas, idque liberale certamen erat inter discordes nuper, & certamine avaritiae infensos. Addidit verò etiam Galeatius recepta sic vrbe nobile facinus, quo plebis iuxta & nobilitatis eius mirifice sibi deuinxit animos coniecto in vincula Iacobo Buffolario Monacho, quem hominem, ob male partas opes & scelera publice inuisum, turbasque in ipso discrimine concitantem, cinxit indagine per fratres alios Humiliatos, & catenis iniectis, misit Vercellas in Monasterium, vnde erat: ibique ille, rata apud Patres captiuitate, claustris inclusus arctioribus est, quam quae ad eam diem fugitarat. De Fratre isto Iacobo referam, quae scriptores ante me alij citra Ordinis illius offensionem prodidere. Nam, non solum, vitia erunt donec homines, sicut ille ait, sed etiam, vbi probi sint, & honesti multi, ibi perditum fere, & nequam esse non neminem, iam inde à proditore Iuda fert sermo etiam quotidianus. In Fratre Iacobo Buffolario fuere omnia praeter pium religiosumque animum, Animus callidus, ambitiosus, quantaecunq; fortunae capax, impatiens eius in qua natus erat, quamve dare claustra, & Ordo ille vniuersus posset: artes, & litterae ei, tum celebratae inter suos, tum gratae in vulgus, tum principum sensibus accommodatae. Concionator ante omnia magnus habebatur. Sed praecipua gloria studiumque eius, consultare de Rep. de bello, de causa imperij, de omni ciuium iure, & ferme ad astus, & dolos, ad  
facua,

saeva, & tyrannica consilia inclinabat, vel hac morum suorum parte nulli fastiditus dominationi, & frequens arcanis. Hominem hunc iamdiu quaeritantem negotij aliquid effugiaque ab Monasterio, & diuerticula, Montisferrati Demarchus, captâ Papiâ, praefecerat ei vrbi gubernatoremque ibi appellarat. Saeuum ingenium irritatum longa potestatis cupidine, Monasterijque necessitatibus, & priuatae vitae miserijs, vbi materiem diu quaesitam, vbi imperium habuit, exercuit ita, quasi tyrannorum aliorum infantiam atque simplicitatem vltro increpare videretur. Et erat plane noua forma tyrannidis, vbi concionibus simul, & gladio per saeuitiam libidinemque omnem, & rursus imitatione pietatis imperitans Frater, corpora & fortunas animosque omnium in potestate habebat. Feruntque memorabile illud, & nulla fortasse vnquam antea violentia tyrannorum factum: vt scilicet, posteaquam, caedibus, & rapinis totaque potestatis vi debacchatus fuerat, concionando denique die quodam in hostem coegerit orationis vi matronas depromere vltro, & in belli vsus conferre quicquid pretiosi abditum haberent. Adeò, cœm rerum, atrocitate secundus nemini esset, superabat omnem hoc ipso verborum telo, quo vulnerans hominum pectora poterat auertere animos etiam ab malorum sensu quae interim patiebantur: nec mala ea esse, sed medicinam, & salutem probabat. Execrabantur hominem eundem ob impia facinora, & miraculo sapientiae suspiciebant, donec sera flagitiorum poena

poena irretitum contempſere denique cuncti, vin-  
claque ea nimis molle eſſe ſupplicium aiebant. Re-  
cepta Papia, punito fratre hoc Buſſolario, conterri-  
to Mantuae Principe, caeſa fugataque Theutonum  
manu, & per haec omnia, foederatorum aduerſus  
Metropolim fractis acciſiſque rebus, nihil tamen ma-  
gnopere eſſe effectum videbatur ob nouum ſuper  
vrbe Bononia certamen, quo Mediolanenſium arma  
cum grauiore nunc periculo occupabantur. Namq;  
vrbem eam, ab Ioanne, ſicuti demonſtrauiſmus, Ar-  
chiepiſcopo occupatam, ab Clemente Pontifice  
maximo vindicatam, ab eiufdem Legato traditam  
rurſus attributamque Vicecomiti, Apoſtolica  
Sedes hoc tempore, armis ſinul, & interdictis aſſe-  
rebat: eiufque Legatus Aegidius Cardinalis, Pi-  
cenum cum imperio fere vniuerſum tenens, non  
bello ſolum ad repellendum inde Vicecomitem,  
nitebatur aperto, ſed occultis etiam artibus, quae  
videri fraudes potuere, niſi conſuetudo militaris, &  
cauſae aequitas, conſilij porius & prudentiae no-  
men dediffet. Aegidij Cardinalis dolus, ſiue mili-  
tare conſilium, quo Vicecomites in eo Bononienſi  
negotio eluſit, fuit res quaedam huiusmodi:  
Vrbem Bononiam, iam inde ab eo tempore, quo di-  
ſcedens ex vita patruus Archiepiſcopus, diſcordes  
inter ſe iuuenes atque ad lacerandam diſſidio Me-  
tropolim, ſua quemque auaritiâ inſtinctos reliquit,  
permiferant Ioanni cuidam Olegianenſi regendam,  
imperio, & tuendam, experti fortaiſſe antea fidem  
hominis in minoribus rebus, & parem animum in

re illa tanta, tanque ancipiti sperantes. Ille enim-  
uerò, inutilem in tali negotio stultamque fidem  
esse existimans, praeclare occasione est usus, seque  
ex Praetore dominum eius urbis fecit. Quamdiu  
manebat discordia inter fratres, damnaque & clades  
obstrepente inuidia non sentiebantur, id sicuti ple-  
raque alia damnum in leui habitum est. Vt autem  
alio super alium exoriente metu, & ab vniuersa  
ruina periculo imminente, resipiscences positis vanis  
inter se certaminibus, aduersus externum hostem,  
& aduersus tot ingruentia arma coaluere, tunc  
amissa Bononia momentis aestimabatur suis, &  
recuperare utique eam volebant. Magnificum id  
quidem, & utile, sed adeo difficile, & impeditum,  
vt neque esse tentandum videretur. Namproditor  
Olegianensis, egregie sese munierat, tum foedera-  
torum auxilijs, tum ciuium ipsorum fide: & pro-  
cul ab domo inter hostilia omnia gerenda res Vice-  
comiti Mediolanensibusque erat. Ac nisi essent  
haec ipsa tam infesta & desperata, desperatissimum  
infestissimumque erat illud, quod, vbi depulissent  
vrbe proditorem, bellum ex ea victoria cum Pont.  
Max. restare aliud idemque viderent. Itaque im-  
pares ei negotio vi aperta, ad fraudem iêre, quae  
hoste ab alio felicior in ipsos parabatur: suntque  
inter Vicecomites, & Olegianensem, & Sedis Apo-  
stolicae legatum tentata paria conatibus iisdem,  
euentu dissimili, vt Bernabos, & Galeatius prodi-  
torem fallere suum vellent, ipsi fallerentur ab Le-



gato, fraudeque detecta, res ad Bononiam aperto Marte gereretur. Et Vicecomitum quidem dolus in Olegianensem, exitusque doli is fuit, ut paco inita cum eo, misissetque etiam aduersus Romanum legatum auxilijs, incautum deinde sic, & nil iam ab Mediolano timentem opprimere conarentur: & postquam non successerat, mouerent denique arma in fidei desertorem. Legatus verò ubi hostem, vtrumque post fraudes irritas, toto virium conatu de sua Bononia inter se dimicantes, plusque spei in parte esse Vicecomitum vidit, tamquam mutuatus artem, inito etiam ipse cum his foedere, dissoluit ficta societate res eorum secundas, deinde translato ad Olegianensem subsidio, retentam ab eo exigua in spe Bononiam ex pacto accepit. Bellum inde cum Apostolica Sede gerebant Vicecomites nostri ductoque in Bononiesem agrum exercitu Bernabos, oppidis arcibus, castelisque captis, secundo aliquid diu utebatur fortuna, quam quae armis deberi illis videretur. Non tamen iidem interea, quamquam bello occupati impio, destiterant regnantium more dare vrbi significationes pietatis: publicorumque operum magnificentia detinebant siue erigebant ciuium animos, quae semper fuit ars & cura principibus, semperque violentis & impijs rebus praeclara & speciosa multa tyranni etiam addere consueuerunt. Xenodochia, & valetudinaria Mediolani Bernabos instituit, sub D. Catharinae nomine vnum, sub D. Iacobi aliud, sub D.

Ambrosij

Ambrosij tertium, & quae Mala Statio hodie iuxta forum maximum dicitur, vt aeris alieni causâ nexi, defectique vitae alimentis, subsidio aliquo publico sustentarentur. Arcem Iouis Galeatius inchoauit, quae postea communiter ab utroque Vicecomite absoluta munimentum eadem & terror vrbis, post Philippi Mariae denique mortem, detractante id iugum populo, diruta est, & rursus instaurata per generum eius Sfortiam. Galeatij etiam opus fuit Palatium in Arena aemulum magnificentiae alterius illius, quod ab Azone cum D. Gothardi Aede prius extructum fuisse demonstraui. Iuxta D. Ioannis Aedem, quae ad Concam dicitur, palatium aliud Bernabos, perducta ad Romanam vsq; turrim xysto cum ea turri coniunxit, muroque est amplexus quicquid inde spatij per fossae ambitum ad vsque D. Stephani Basilicam excurrit, & eius vestigia muri in hunc diem cernuntur. His alijsque perfectis operibus, Galeatius, & Bernabos, rem, deinde longe pulcherrimam aggressi, Ticinens Gymnasium instituerunt, quod hodie seminarium nostri Senatus Magistratuumque vrbis, idemque nationibus exteris bonarum artium emporium, tot ab primordio sui, ad hanc aetatem edidit decorâ pacis, & litterarum fere miracula, vt scholae pene illae totam disciplinis suis excoluisse Italiam merito dici possint. Neque tamen dici illud potest, plusne nominis & famae Gymnasio ipsi attulerit, eorum claritudo, & fama, qui diuersis temporibus

in suo quisque genere principes Academiam obtinere, an eorum rursus nomen & gloria, qui ab Magistris huiusmodi prodierunt. Adeò, pares in vtraque parte palmae virorum spectantur, & sapientiae flos occurrat ex omnibus prouincijs accuratissimo semper delectu petitus conductusque huc expoliendae iuuentuti, rursusque ex ipsa iuuentute, prouentu felici sparsus in omneis terras, quacunq; litterarum, & ciuilis disciplinae aliquid sedet. Incertum & anbiguum id quoque dictu, maiora ne praemia, vel ad opes, & splendorem, vel ad sapientiae testimonium magnitudinemque nominis, attulerint sibi posterisque suis ex Ticinensi Gynasio, Doctores ipsi, an alumina Doctorum, & velut Academiae proles iuuentus elato hinc per omneis gloriae vias pede plus eiusmodi praemiorum inuenierit. Nam Magistri simul & discipuli, purpurâ, & lato clauo, quibusve alijs fulgere insignibus gloriosa mortalitas amat, & domum, & patriam vnde erant, auxere ad certamen. Statque, & his & illis gloria in aequo, nisi quod assidue subolescens atq; inexhausta iuuenum multitudo, decora omnia latius occupauit, maiorque Cardinalium, & Senatorum populus numerari parte in ista potest. Pontifices Maximi prodire ab hisce Scholis, quodque longe augustius etiam censerì oportet, prodire Sancti. Tantum porro voluminum ex eodem fonte manauit ad illustrandas artium optimarum disciplinas, vt si alibi cessatum à scriptis esset potuerit  
haec

haec sufficere bibliotheca generi humano. Quam Academiae felicitatem, & tanta per omnia aetates incrementa intuentes Caesares, & Pontifices, quiue alij facultatem indulgendi aliquid habebant, ornare eam immunitatibus, & privilegijs, quae magnitudinem, & gloriam eius testarentur simul & augerent. Et nostrae Ciuitatis clarissimi ciues, quibus opes in id animique suppeditarunt, haud ampliorem vllum de patria benemerendi locum existinauere esse, quàm si ad Ticinum in ipsa Gymnasij sede Collegia fundarent, in quibus suae gentis iuuenes studiorum causa alerentur. Hinc Mariana, & Castellconca, & Griphia, Bossiaque hospitalitas lacessit, & vocat hodie illuc familiarum earum, prolem: & generosi fundatores illecebra talis hospitij Musas atque sapientiam penetibus inducunt suis, etiam postquam ipsorum nomina audiri desiere. Sed Collegia quoque ista iam fere desiere audiri, postquam Sanctus Carolus Borromaeus, & Pius V. Pont. Max. posito ibidem vterque regalis magnificentiae Collegio, Academiam quodammodo ipsam ad suae Ciuitatis, & patriae adolescentes transferre potuerunt, vt largius ibi opulentiùsque quam in patria haberentur. Stant excelsae moles, altitudine & maiestate sua confessae Romani Pontificatus opes, & multo magis inclytas conditorum animas, quae talibus docuere monumentis, quos opum earum esse exitus oporteret. Aluntur ibi principum disciplina & ritu nobiles adolescentes, quibus

quibus nobilitas ipsa oneri erat : & ditati interim Academiae disciplinis , domos fere suas augment opibus , per quas nepotes alij subsidia , & alimenta ea repudiabunt . Bernabos , et Galeatius anno salutis millesimo tercentesimo sexagesimo , id Ticinense Gymnasium aperuere : vnde Metropoli Senatores , et Magistratus , vnde haec etiam , quae inter sacra dominatur prudentia iuris , et omne aequi ac iniqui discrimen venit . Ac principio quidem , sicuti rerum omnium initia et elementa habentur , horridum et rude quiddam Scholae illae Ticinenses fuerunt : principesque ipsi magnificum et ingens nescioquid sese asferre existimauerunt , cum Dialecticos , et Medicos , et Philosophos , et Iurisconsultos ad inchoandam Academiam praesto sibi esse profiterentur , et de ea re edicta promulgarent . Postea , res in tantam frequentiam venit , vt classes ibi profitentium habeantur , et cuius modò rei discipulus esse possit , eius sint etiam interpretes , et magistri , tum matutini , tum vespertini , tum primores , et ante signani , tum alij extra ordinem : quod factum ita institutumque credo est , praesertim , vt varietate docentium proteruiac ac satietati iuuentutis obuiam iretur . Antequam scholae istae , Vicecomitum cura institutae essent , peregrinabantur studiorum causa iuuenes nostri , coetusque et scholas procul ab domo alienas frequentabant . Reuocauere Bernabos & Galeatius edicto vniuersos : & domestica disciplina erudiri deinceps ad Ticinum iusserunt

iusserunt. Eae litterae sunt datae ad III. Cal. No-  
uembriis eius anni quo Academia ipsa fundata,  
apertaque erat. Vrbs autem Ticinum est, electa,  
ided, quia praeter amoenam, coeli temperiem &  
accessus illuc ex tota Insubria faciles, locus esse  
videbatur ciuili comitate, et suburbanâ licentiâ  
recte compositus aptusque Metropolitanae  
iuuenti. Nam aetatem egressâ adole-  
scentiae rudimenta, iuuenili  
ferocia exultantem,  
ignaram,  
obsequij comiteratque hilare  
habendam censebant  
esse inter studia  
sapientiae,  
&  
vitiis necessitates,  
quas secum ipsa  
affert.

# IOSEPHI RIPAMONTII

## CANONICI SCALENSIS

CHRONISTAE VRBIS MEDIOLANI  
HISTORIARVM AB METROPOLI CONDITA

DECADIS III

LIBER III.



ER haec pacis opera, Vicecomites, in medio belli discrimine, cum famam sibi inter ciues, & apud externos ingentem quaesiuissent, munierant etiam interea sese magnarum, domorum affinitatibus, quae apud principes vincula laxantur adstringunturve dominationis vtilitate vel damno: tantique sunt inter eos necessitudines istae connubiorum, quantum ortae in diem causae momentum fecere. Quippe, si nullis aliorum exemplis ea regionum animorum spectata saeuitia esset, poterat generis huius celebre documentum fieri ipsa Vicecomitum domus, cui grande subsidium instrumentumque rerum matrimonialia petebantur, dein extincto primae gratulationis calore, odia tantum ex affinitate & mutuae fraudes manebant. Catharinam Matthaei iunioris filiam Vgolino Gonzaghae desponderunt adhuc infantem, parique aetate filia Francisci Carrariensis est



est disponſa Marco Bernabouis filio item infanti. Priori matrimonio dotem dixere pagos, & oppida nonnulla: quid ipſi ab Carrarienſe accepiſſent, incertum fuit: dies nuptijs vtriſque eſt dicta cùm primùm infantes addoleuiſſent. Aliud etiam puerile matrimonium feſtinauere, pactâ Montisferrati Demarcho Mariâ Galeatij filia quadrienni, tamquam ad finiendas veteres cum ea domo inimicitias vnicum puella illa placamen foret. Maiorque ſponſa, & praefidium domui maius ex Gallia aderat Iſabella Regis ſoror nuptâ Ioanni Galeatio Galeatij f. praeter regij ſanguinis gloriam, dotem quoque ferens, qua Vicecomites in Galliam uſque opes protulere. Nam ſororis ſuae virum, Rex Carolus Comitem Virtutum appellabat: qui titulus, & dynaſtia ſecuta maritum eſt: caetera matrimoniorum compendia, quae petita erant, irrita fuerunt, ſiue etiam in contrarium ceciderunt, cùm ſcilicet ipſaemet quaefitae res, incitamenta irarum, & cauſae bellorum fierent. Maria Galeatij filia, quae Montis Ferrati Demarcho ad placandas inimicitias pacta erat, ſtatim mortua acrius de integro odium in ea parte excitauit, eruperuntque irae, quas interiecta pauliſper infans morata erat. Et affines reliqui, vno omneis animo conſilioque, poſthabita re vxoria, ſepoſitoque, procul ab omni bellica conſultatione muliercularum reſpectu, iunxere eum Aegidio Cardinale Romanoque legato arma, poſtquam Vicecomes vrbi Bononiae recipiendae acrius inſiſtebant: tantoque

Cc

promptius

promptius iungere, quia connubiorum tunc denique artem intelligebant. Fallaci sese necessitudine compræhensos fuisse, & illigatos, ut ad eum tantæ capiendæ urbis conatum obnoxij immobilesq; haberentur. Itaque, nuptiarum fœdera feminis relinquentes, strenue bellum in Vicecomitem vtrumque parabant: domumque eam, unde vxores, aut nurus acceperant; dederantque vicissim, parati erant delere, dum metuunt, ne nimium ipsa attolleretur. Paribus in generos focerosque animis, Bernabos, & Galeatus, cognita eorum aduersus imperium potentiamque suam inuidia, quoniam summis humanæ beneuolentiæ pignoribus eos conciliare non potuissent, coercere magna aliqua clade gestiebant, obliti puellarum, quæ ipsæ, oblita paterni tecti, tecta potius respiciebant ea, in quæ venerant iam, vel in quæ ituræ ex pacto fuissent. Metropolis verò ipsa, & urbs Mediolanum; Ambrosianaque hæc Ecclesia, cum paulò antea, lætitijs, & publica propter eas nuptias gratulatione exultasset, similisue fuisset exultanti, repentino propter mutata omnia luctu miserrime conflictabatur. Nam, & manente Sedis Apostolicæ indignatione, diræ manebant adhuc, & tamquam in damnatam execrabilemque gentem, hostium iniuriæ feliciter nimium, & absque vlla mutua ipsorum clade procedere incipiebant. Iniuria, & clades illata per hoc tempus Insubriae terris, & agro Mediolanensi grauissima fuit illa cum Anglorum copiae truces ingenijs & irritata saeuitia, quod

quòd Gallico bello stipendia nulla ab suo Rege accepissent, ostentante praedam instiganteque animos Sabaudò, irrupere. Vastata per eos, & direpta omnia tam immanibus modis, vt dubitari posset, rapiendi ne magis libidine venissent, an faeuiendi in corpora postquam nihil erat: ultra quod raperetur. Alexandrinâ viâ populabundo agmine ingressi Longobardorum fines, absque discrimine vllò, mistam virorum, & feminarum, & tenerae, grandisue aetatis stragem edidere quacunque inceserunt. Quae non poterant auferre, fracta, & comminuta conijciebant in caesorum, aceruos: & vbi ad Monasterium fortè deuenerant aliquod, si corpora erant opportuna turpitudini, foedabantur: nisi libido faeuitiâ morata erat, squalida, contemptaque ora puniebantur nece. Et constitit, trucidatas esse nonnullas postquam sub barbara inhonestate ingenuerant. Ea barbarica irruptio fulguris pene instar est peruagata Mediolanensem agrum: ac sicuti sui aduentus famam copiae illae Britannorum antecesserant, ita nostros apparatus vitauere celeritate eadem, cùm, & ex agris, & ex vrbe aduersus eum hostem armati ad signa cogerentur, adeòque terror ipsis institit moenibus vrbis, vt Gallaratum, & Seronum cincta muris loca nudarentur, ne barbari arces sibi eas occuparent. Iam enim, & Castrum nouum in Derthonensi agro, & Romagnanum in Nouariensi, & alias alibi arces occupant, in quas collata, deinde praeda omni, simul abdidere sese, subsidium non,

leue foederatis, & formidabile momentum iisdem, si gens pretio venalis, & amica plus offerenti, transiret in partem alteram, sicuti postea corrupti per Galeatium transiere. Nunc, & barbari timebantur ex vicinis Metropoli castellis, & quotidianae municipiorum, oppidorumque defectiones timorem augebant, improspere simul omni fere Mediolanensium conatu, quamcunque in partem arma Vicecomites tulissent. Defecere Vogherienses, & Casalenses, & Garlaschum, & Sala, & loca alia, non quidem suo nomine, suisque viribus vnam aestimata supra locorum humilium vilitatem: sed tanquam in aegro corpore, quicquid aggrauaret, maius quam pro re ipsa damnum periculumque habebatur. Et vulnerabat maxime animos, quod ad Montisferrati Demarchum ea loca descisissent, quae semper inimica domus auxerat vicissim odia, postquam, mortua, sicut dictum est, infante, à primis humanae benevolentiae vinculis, ad ultimas mutuarum insectationum acerbitates laxati instinctique animi erant. Guelfi Brixienfes etiam ad Demarchum eundem ceterosque foederatos urbem vertere eam conati, manifesteque rebelles, hoc ipso victoriae speciem habebant, quod poterant aliquandiu pugnare cum Metropoli. Victi sunt, non tam ab exercitu nostro, quam orta forte pestilentia quae adsidentes moribus foederatos abire inde coegit. Sed accepta mox ad Mutinam clades documento fuit, nequaquam Mediolanensium causa id malum hosti diuinitus fuisse immissum, sicuti propter

propter ipsius rei opportunitatem interpretati erant. Namque caesa ibi magna exercitus parte, Bernaboue penè oppresso ipso, captis primoribus vrbis: intelligere potuerunt, arcano fortasse alio diuinæ prouidentiae nutu tabem eam excitatam nihil ad ipsorum commoda pertinuisse. Mediolani interim congruentia omnia tam infaustis rebus erant: summaque ciuium voluptas spectandis eorum supplicijs, quorum domestico latrocinio vastata Ciuitas erat, dum foris bella haec gerit. Picardonus Vassallus, qui per nomen munusque curandi rationes principum, afflixerat multas innoxias domos, pecuniamque sibi ingentem fecerat, extra Portam Ticinensem ad Vigintinum, fractis laqueo ceruicibus è furca pependit. In alia calcitrauit furca Gherardus Brusatus: satellitesque & scribae ad quinquaginta, effossis oculis, dimissi per urbem, cœno, fustibusque obruebantur, permisâ hac licentia plebi, solatioque ob latrocinia, & fraudes quas ab illa hominum faece perpeffa erat. Dederat Bernabos ea solatia vrbi, postquam amisso ad Mutinam exercitu, percussis omnium animis, seditio fortasse nonnulla timebatur. Paulò postea, Britannorum copiae, quas foederatis aduersus Vicecomites adiunctas fuisse demonstrauius, oblata per Galeacium stipendij largioris illecebra, quàm quod inde accipiebant, alienantur, & militiam relinquere sese ingrati dictitantes, transtulere signa in partem, cui terrori ad eam diem fuerant. Hos casus alternante bello dimicabatur inter Pont.max.

&amp;

& Vicecomites : atque propter id certamen Italia fere tota in armis erat , Bononia defenditur aut oppugnatur, dumque urbem eam , in hac vel illa manere parte principes caeteri, vtile siue aequum censent . Anno octauo postquam id bellum susceptum initumque erat, pacem iniere in has leges, Traderet Bernabos castella omnia & arces, quas in Bononiensi agro captas haberet . Pontificis nomine vicissim ei persoluerentur quingenta millia florenorum nummum . Ea pecuniae summa donec persoluta decem pensionibus esset, Vrbs Bononia teneretur ab Arduino Cardinale Cluniacense, neq; Bernabos praesidia deduceret ex arcibus & castellis oppidifue, antequam pecunia pernumerata esset . Si qui captiui Mediolanenses, aut si quae Vicecomitis arces in potestate Pontificiorum essent, earum arces, ijque captiui restituerentur . Ante omnia redderetur vrbi Mediolano sacrorum vsus, omneq; interdictum tolleretur, & suo ritu legitime, ac iuste frequentaretur Ecclesia Mediolanensis, manerentq; Metropoli Ambrosianae iura omnia quaecunque antiquitus fuissent . Earum rerum causa Cardinalis ipse Arduinus Mediolanum venit, connixio suis etiam opibus Vicecomite, vt Legatus Apostolicus quam magnificentissime acciperetur . Exhibiti publice ludi, conuiuiaque & certamina equestria, in quibus, atro candidoque colore distincti equites, atque in duas turmas diuisi iucundum Legato spectaculum praebuere . Cumque per eos forte dies auctus filiola Vicecomes esset, optauit vt ea per legatum

legatum eundem sacris lymphis ablueretur : annuitque ipse, & sancto illo pignore priuatim etiam inter eos amicitia conciliata est : gloriosa & iucunda cuncta in pompam magis quàm fida, & duratura. Quippe tota etiam legatio, & mutuo consensu scriptae conditiones irritae futurae erant : neque satis constat inter scriptores, utrius partis culpa fuerit in dissoluenda pace, quae certe diu non mansit. Bernardinus Corius, simplicitate magis equidem arbitror sua, quàm adulatione in Vicecomitum genus, aut in res Ecclesiasticas maleuolentiâ, Clericorum fuisse culpam ait : eos posthabentes vtilia rectis discessisse à conditionibus, & coalitam pacem sine causa abruptisse. Sed potuit fortasse conferri iustius id ipsum in Vicecomites ipsos, quos auiti spiritus, & domestica exempla quidlibet audendi, Matthaeus & Ioannes, per dominationis insaniam culpis erga sedem Apostolicam hereditarijs istis assuefecissent. Urbem namque eam Bononiam ab Archiepiscopo patruo interceptam vsuque possessam perdidisse ipsos, culpam fore quandam scilicet inexpiabilem, sibi quæ & maioribus suis turpe flagitium existimabant. Hinc illa erga Sedem Apostolicam leuitas & contumacia, contemptusque pacis & conditionum omnium, quaecunque urbis eius imperium aliò transtulissent. Ita dominantium insaniam, Mediolanenses, post exigui temporis pacem, in bellum rursus coacti impium infelicia arma retinebant, ne modesto vnquam otio & Catholica tranquillitate frui ciuitas posset.

Domus



Domus autem ipsa Vicecomitum, quam olim coerceri Reipub. Maiestate non difficile fuisset, iam ciuium indulgentia, conditione temporum, artibus suis, supra Remp. euecta erat. Atque fastiditis nunc aequalium Regulorum affinitatibus, quae notis inter pares miserijs, aemulationeque & liuore, & vbi periculi tempus venisset, manifestâ perfidia corrumpenterentur, ad matrimonia diuersa quaedam adiecerant animos, quibus initis, neque fraudem ab maritalibus familijs, neque sub earum tutela vim ab alijs timere vllam possent. Namque cum Austriacis Archiducibus in Germania consociauerunt sanguinem, quae Domus incorruptae nobilitatis fons, Caesarum Regumque procreatrix, grauida imperijs, satura gloriae, sinceram amicitiae fidem, & vndique securitatem ipsa sui nominis magnitudine polliceri videretur. Virida Bernabouis filia data est Leupoldo Alberti filio, cuius matrimonij pignus, non ad praesentis modò fortunae statum, sed in futura quoque secula praesidium domui fuit. Inde enim ortus est Ernestus, Ernesto Federicus Imperator, Federico Maximilianus, ab cuius stirpe prodijt Imperium, quo nullum vnquam fuit maius inter homines, si orbis vtriusque subiecta ei hodie Regna numerentur. Alia Bernabouis eiusdem filia Thadea nomine nupsit Bauariae Ducis filio, vicissimque nura sibi Bernabos ex ea domo petijt, vel mortua interim, vel spreta Carrariensi puella, quae filio eius Marco desponsa prius fuerat. Violantam Galeatij filiam Lionello Angliae Regis filio

filio dederunt: eaque matrimonia, non sicuti priora, vanum sine exitu, sine mutua caritate nomen fuisse, sed fida & cum suo quodque fructu ob partis alterius, & Austriacorum praecipuè magnitudinem, qui minorem domum, postquam sibi junxerant, volebant etiam esse saluam. Et vrbs ipsa, partim laetabatur adiunctis sibi per matrimonia tanta praesidijs, partim, vt existimo, occulte anxia erat nimiam principum domui accessisse confidentiam videns. Qui laeti, quiue solliciti erant, certatim omneis plausere nuptijs eiusmodi: sponsaeque dum ad maritos deducuntur, siue accipiuntur in urbem, exhaustis ex priuatorum domibus adulatio quicquid fere quotidianae & assiduae bellorum necessitates, tributaque & hostiles incursus reliquum fecissent. Volebant enim, & urbem, & ipsos quam splendidissime apparere, siue luxuriâ, siue magnanimitate, quae propria semper populi huius fuit: prouocabantque sumptuum & opulentiae certamen Regna prouinciaeque huc alienae nuptiarum earum occasione confluentes. Rodolphus Leopoldi patruus, magno Germaniae procerum ornatissimoque comitatu cum Mediolanum ad visendam sponsam, & firmanda pacta venisset, ibi est mortuus, & in D. Ioannis Aede ad Concam illatus tumulo non sine funeris honore, quem, & hospitij conuitas erga principem externum, & Austriaci nominis magnitudo postulare. Et Sponsa quidem illa in Germaniam postea deducta est, cingentibus latera, principibus viris totaque

Dd

que prosequente nobilitate Mediolanensi, donec ad prouinciae fines egressi Austriaci puellam excepere. Ad Violantam verò Galeacij deducendam profectus Mediolanum ex Anglia Lionellus, cum Insulae Regnique fere opes in urbem transtulisse diceretur, haud tamen eius aduentus utilis Metro-  
poli fuit, volentibus scilicet nostris etiam ostentare plura, et pugnare cum barbarico illo fastu. Ad Templi maximi valuas nuptiale sacrum fuisse peractum tradunt ab Episcopo Nouariense, postquam is in Ara maxima solenni ritu perlitarat: Bernabouem patruum puellae digitum tenuisse dum ab Episcopo illo annulus ritè inderetur. Epulum in  
Arenae Aula fuit, tanto apparatu, tantaque ferinae & mansuetae carnis pompâ, vt singula fercula singulosque missus dignos historia iudicauerint qui res eius acui litteris prodidere. Nos potius indignati sumus, multumque miserati patriae vicem, cum eos luxuriae annales inspiceremus. Scilicet, solidos apros auro gemmisque distinctos, & altilium omne genus cum sua quodque caelatura, & coronamento illatos mensis, cumque ordine cuncta inferrentur, simul inducta in aulam multa deinceps venaticorum canum paria, vt noscerent conuiuiae molossos pecudum earum lanistas, quas ipsi lancinarent. His ipsis aurea subligacula gemmataeque bracchas, & torques, & collaria siue millos, pene, vt canibus fortunam in qua incedebant, conuiuium omne inuidere cogeretur, cum nihilo parcius exculci viri feminaeque essent. Ampliorem equorum  
rum

rum ornatum, qui dorso imposita fercula deuehebant in conclaue, rursusque fulgentes magis atrienſes, qui iumenta ipſa tenebant lorīs. Centum amplius equos, ut quique inducti erant, dono datos à Principe cum phaleris ephippijsque ſuis, quorum pretio iumentorum greges emi potuiſſent. Duos eximia ſpecie ſonipedes eſſe inductos, quorum alterum, ex ferocia Leonem, alterum Abbatem appellarent. Conder e annalibus hæc iuuit. Aulae quoque principes, miniſteriumque totum & diſcumbentium ordinem, caeteraque pompae & conuiuij eius tradidere. Vbi, cum Nouarienſis Episcopii nomen inter alia conuiuarum nomina perſcriptum extet, credere cogor nulum hoc tempore Mediolani Archiepiſcopum fuiſſe: niſi ſi fortè erat, & propter iratum rei Bononiensis cauſa Pontificem, dextere ſeſe ſubducebat, ne coetibus intereſſet eis, vnde labes ad ipſum aliqua perueniret. Id ut potius credere velim, adducor, quia quadriennio ante, Roberto Vicecomiti, poſt ſeptimum Pontificatus annum in Eccleſiae Mediolanenſis adminiſtratione Gulielmus Puſterula ſucceſſerat, cui nouem anni tribuuntur in Archiepiſcoporum ſaſtis, neque nomen eius inter negotia tamen vlla reperitur. Caeterum, non erant omittenda nobis ciuium nomina, quos ad matrimonia illa concilianda, Bernabos & Galeacius, internuntios adiutoresque habuerunt. Fuere autem, Manſfredus Salutiſ, & Protasius Caimus, duo Vicecomitum Conſiliarij, quos

principi vtrique ad omnia fuisse assiduos constat.  
 De Salutio ambigitur, fueritne vrbs nostrae ciuis;  
 an familiaris tantummodo principum, & alienigena  
 casu fortè aliquo tecutus hanc aulam. Caimus  
 ex Germanicae originis familia iam inde ab Con-  
 radi Imperatoris, & Archiepiscopi Antimiani ten-  
 poris profecta in vrbeni, & saepe aliàs apud prin-  
 cipem optima quaeque suadendo profuerat huic  
 patriae, & nunc subsidium aduersus externa arma  
 existimans vrbi fore opportunum, si principes sui  
 cum Austriaca domo iungerentur, magnopere  
 contenderat vt id fieret, originis etiam commen-  
 datione delectus qui super ijs rebus in Germaniam  
 legaretur. Duos hosce Salutium, & Caimum vnà  
 cum Bernaboue & Galeatio obuiam processisse  
 venienti Anglo refert scriptor, qui ipse in parte  
 pompae fuit. Caeteti deinde, quo quisque cultu  
 & ordine incessere, ab scriptore eodem recensetur,  
 Franciscus Zanchadius, Dominicus Ardizonus,  
 Iacobus Preuidus, Gaspar Vicefortes, Zanolus  
 Armenulphus, Ioannolus Biragus, Henricus  
 Comes. Capita haec Mediolani rerum, & consi-  
 lium principi vtrique intimum fuere, quas hodie  
 familias, excepta vna, vel altera, arbitror posse  
 nostris hominibus irrifui esse propter cognomina  
 inaudita appellationesque absurdas, quae sepulta  
 iampridem omni domorum gloria & stirpe, nunc  
 scilicet ad breue momentum ex diuturni silentij  
 caligine prodierunt. In haec spectacula effusa ci-  
 uitas, dum fruitur simul absumiturque nuptiarum  
 apparatu,

apparatu, non fenserat interea molem apparatusque belli, quòd Vicecomites adornabant, quodq; vicissim ab alijs in ipsos adornabatur. Namque, dum commeant super nuptialibus eis negotijs crebrae legationes, dumque principes etiam inter se ipsi cum nostris alieni congregiuntur, transacto paucis, quod ad puellam & dorem attineret, omnis arcani colloquij pars maior fuerat id bellum. Ac super mensa etiam, de suis, aut hostium viribus, de locorum opportunitate, regionum situ, principum animis, quae fida, quaeue infida, quid toto orbe validum aut aegrum differendo oblectarant scyphos produxerantque conuiuij horas. Nec segnius in parte altera consultabatur. Sedens Auenione Pontifex Urbanus conuentum ibi principum habebat, ad delendam Vicecomitum tyrannidem, urbemque Mediolanum vnà cum Italia tota liberandam. Et excito illuc inter caeteros Carolo Caesare, donis eum, atque promissis ingentibus armauerat secum. Vicecomites, re statim constituta Genuensi, initoque cum Rep. illa foedere, nequid negotij ab ea parte reliquum domi esset, Britannorum copias educunt, partemque Latij peruastant. In ea populatione, Ambrosius Bernabouis ex pellice filius, & nobiles aliquot Mediolanenses, qui cum eo barbaras manus ductabant, in cauam forte valli illati capiuntur. Hinc accensi ab vtraque parte acius animi: Pontifexque Urbanus progressus ab Auenione Viterbium, dimissis per varia Insuenum loca Cardinalibus, ad Vicecomites

+ cecomites eiiciendos tota vi incumbibat. Simul  
aderat Caesar ipse exercitumducens gloriae prae-  
daeque auidum, tantoque ferociorem, quò maior  
apud eas gentes erat fama Insubriae opum, &  
quanto pulcrius hoc ipsum esse putabant, quod  
ad liberandam Italiam ducerentur. Hae copiae,  
cùm sese Pontificijs caeteroque foederatorum exer-  
citu iunxere, Mediolanenses in agro Mantuano  
Ferrariensique bifariam diuisi erant, praecipuâ  
Vicecomitum in duas illas vrbes irâ, propterea  
quod, ab Gonzaga, & Estense Pontificem Vrbani-  
um in sua damna maxime fuisse instinctum scirent.  
Mantuam, vsque ad portas vrbis grassati ignibus  
& ferro conterritam direptionis metu habebant.  
Ferrariensium naues Pado amni subsidio Mantua-  
nis euntes exceperant instructa & deducta ad Gua-  
stallam classe, quae prope maior fuerat clades,  
quàm prior alia terrestri Marte illata cum despe-  
ratione omnium & luctu. Extructo etiam ad vi-  
cum fortem Castello, obsidebant, haud dubie  
potiebanturque flumen. Id capere castellum,  
Caesariani primum omnium conati cùm vi aperta  
nihil efficere potuissent, obrui posse munimenta  
illa sperarunt, si disiecta mole, qua non longe  
inde coercebatur annis, aquae repente omneis im-  
missae ac superfusae essent, Intumuerat enim per  
eos dies imbrium auctu Padus, & proluuies illa  
repentina vndarum, exercitu ipso violentior futu-  
ra erat. Sed nostri ad eius periculi casum attenti  
vim fluminis ingruentem vertère in adiacentes  
campos,



campos, merſaque humo ipſa Caefarianorum, caſtra turbauere. Initia belli haec neutri parti laeta eſſe poterant: quippe, cū Mediolanenſes prae- ter armatam fere totam in ſe Italiam. duo capita rerum humanarum Pontificem & Caefarem im- minentes ſibi hoſtes viderent: his dubium cruen- tumque exitum portendere viderentur principia rerum vrbs nunquam plane victa: ſubnixi princi- pes regum opibus, contumax aduerſus clades fortuna Vicecomitum. Et erant in vtroque exer- citu, ſicut armorum inſtigatores & cupidi praedae multi, ſeditioſi & egeni etiam ex principum nu- mero, ita meliores alij, neque praedam ſibi quae- rentes vllam, neque probantes illa arma, ſed offi- cio erga Pontificem & Caefarem, patriae legibus & veterum foederum neceſſitate tracti in id bellum. Cum Bernaboue Senatores ex vrbe aliquot, & ex Mediolanenſi Clero grauiffimi viri Ciuitatis, quo- rum ille conſilio utebatur: cum Caefare Bauarus & Auftriacus, qui licet ea caſtra ſequerentur, re- centi affinitate proni in Vicecomites, hortamenta ſtimuloſque pacis ex quotidianis caſibus arripien- do mitigabant ſuos, nec magno negotio, horum opera, tanti illi vtrinq̃ fremitus, & apparatus pauliſper conquievere. Induciae, tamen erant potius quàm pax ipſa, dum ſcilicet Pontifex, & Caefar controuerſa quaedam capita deciderent, quorum arbitrium & cognitio ipſis permiſſa erat, Et poſt aliquot inde meſes, quia coeperat apud Vicecomites ſuſpecta eſſe cunctatio iudicij eius, ſumptis

sumptis iterum armis , & facta in Mantuanum agrum impressione, subegere terrore arbitros , ut res eas, quae in controuersiam vocabantur propere definirent . Vt verò edita de controuersis illis capitibus sententia, Pontifex & Caesar , nihil de Bononia, quae prora, & puppis erat omnium rerum , explicauere : tunc Vicecomites , absque vlla pacis , siue induciarum verecundia, tentant rursus Romanum impudentiore arte, quàm si bello aperto aggrederentur . Cùm enim Perusiam urbem Pontifex Maximus acerrime oppugnaret, eaque urbs non posset iam vllo modo euitare Apostolicae Sedis vim , missa sunt ab Mediolano auxilia obsessis, datumque famae, tamquam Ioannes Acutus , accepta ab Perusinis pecunia, copias quibus ipse praeerat , & Britannum praecipuè militem transicione sua illuc auertisset . Huic dolo mox alius subnectitur dolus ab ijsdem animi stimulis, quòd permissis hostibus ipsis arbitrio de rerum summa, excidissent eius rei actione & iure, propter quam iniustis cuncta armis turbant . Spera-uerant enim, cùm inclinatis ad pacem animis arbitros lumerent Pontificem & Caesarem, posse per Austriacum, & Bauarum effici, ut Bononia sibi ab illis adiudicaretur : & per colloquia fortasse occulta inter eos ita conuenerat . Quae spes ubi irrita fuit , gerebant Vicecomites aliud occulte bellum, callidaque consilia & improbi astus erant velut castra scilicet aciesque contrariae , donec etiam ad ista rediretur . Posterioris autem doli

Vice-

Vicecomitum, vnde Mediolani ad arma bellumque cum Pontifice Maximo reditum est, ordo exitusque fuit huiusmodi. Lucam urbem Cardinalis Bononiae Legatus vicaria potestate tuebatur, ob ciuiles, credo, bellicasque artes, & prouidum animum electus, qui in magno rerum Italicarum discrimine ei vrbi praeesset. Multae ibi opportunitates, & apta omnia Vicecomitum consilio, quo nihil in Italia relinquere sibi intentatum volebant. Nacti ea in vrbe proditorem Aldericum Lantelminellum, ita cum ipso rem instituerunt, vt eius simulatione pacis & gratiae, quam cum Apostolica Sede reconciliatam habere viderentur, mitterent Lucam octingentos equites cum duplici peditum numero ad Legatum, tamquam subsidio aduersus Florentinos, cum quibus bellum graue & difficile Romano erat. Auxiliares illae copiae statim vbi intra mœnia acceptae diuisaeque essent, tunc verò Lantelminellus, vti gnarus locorum, opportunitatumque omnium, & acceptus homo nobilitati iuxta, & plebi, dux fieret ad urbem, Vicecomitum nomine capiendam atque occupandam. Egregie dolus hoc ordine instructus fuerat: sed proditor translata repente fide illuc vnde pretium sperauerat fortè maius, Legato dein ipsi cuncta patefecit, nudatisque ita animis discessum à fraudum spe, belloque aperto, sicut antea, dimicatum. Pontificis Urbani tamen obitus moram breuem attulit eis armis, interimque Mediolanensis exercitus quacunque ductus erat, varia fortuna

E c

rem

rem gessit. Casalem, & Valentiam, & pleraque Mirandulani tractus cepere, multiplici intra paucos dies & insigni victoria, non tam ob loca ipsa, quae capta erant, quàm quia magni & aeterni hostes, Montisferrati Demarchus, & Feltrinus Gonzaga, & cum Ferrariae Demarcho, nonnulli alij clade ea subacti esse videbantur. Sed Feltrinus ad Rhegium, ubi se vrgeri acrius vidit, accitis ab Ferrara & Bononia auxilijs, pene oppressit nostros: vrbenique eam, paulo post, idem, dum aduersus Ferrariae Demarchum defendere nequit, maluit dedere Bernaboui, vt hostem potius hunc ibi dominantem videret. Ludouicus Gonzaga Mantuae Demarchus, & Manfredinus Saxoli princeps, post Urbani mortem, & harum rerum euentus, relicta foederis societate pro Mediolanensibus stabant. Duplici eo exercitu ad nostrum adiuncto, Mutina oppugnabatur. Corregienses, iam spreto Ferrariense ad nos desciuere, praeter obscuriores alias dynastarum ad Metropolim transi-  
tiones, inter quos, Salucianus ad quotidiana certamina impar Sabaudiensi, petito hinc subsidio, quicquid virium & opum vicissim ipse habebat, detulerat ad Bernabouem. Rediere ad obsequium Nouocomenses, & Vulturenae vallis pagi, totaque illa lacustris, aut alpina regio, cùm antea consternati ad arma, rupibus sese suis, ipsoque conuallium recessu aduersus imperij maiestatem tutarentur. Per Romani quietem belli, incrementa haec Mediolanensium rebus accedebant, eoque spatio  
nouae

nouae arces excitatae, aut veteres firmatae passim, ad Tritium nempe, ad Decium, ad Senagum, ad Melinianum, ad Cusacum, & ad loca alia, vel in prouinciae finibus, vel in media prouincia, atque sub urbem ipsam, prout scilicet alicubi, vel ab hoste vicino discrimen, vel ab intestina rebellione metus, vel etiam opportunitatibus iuncta istis amoenitas ad principum oblectamina, quibus illi carere nolebant inter maiores curas. Compressum aliquandiu bellum ultra differri non poterat, delato post Urbani mortem ad Gregorium vndecimum Pontificatu, qui, quò placidior, mitiorque ingenio erat, tanto magis accendebat quiete sua Vicecomitum audaciam, & vicissim ipse stimulis increpantium quotidie eorum facta, irritabatur. Ita anno CIO CCC LXXII. Iunio ineunte, exercitus duo, Pontificius & Mediolanensis, haud procul ab Saxolo (Robera loco nomen est) oppositis castris, sicut ab Imperatore vterque suo educti instructique erant, consistere. Ab Romana parte, rerum summa penes Franciscum Folianum fuit. Regebant Metropolitanos, Ambrosius Vicecomes Bernabouis filius, & Ioannes Acutus, noti iam satis in historia homines, & alio loco producti, sicuti res tulit. Primo conflictu vicere Mediolanenses: & post eam victoriam, ductis ad Rhegium captiuis, Romanus Imperator, nescioqua Bernabouis ira suspensus è muro examinatusque est infami etiam apud gregarios milites & abominando fine. Spatio deinde mensis vnus, reparato Legatus

Apostolicus exercitu, & alienato à Vicecomitibus Ioanne Acuto, coactisque per Sabaudienſem & Ferrarienſem eis diuidere circum varia loca milites, Parmam, Rhegium, Placentiam, Vercellas, Nouariam, Ticinum, aut in poteſtate habebat, aut premebat damnis & terrore populationum. Ut verò Sabaudienſis, & Ferrarienſis, & cum Eccleſiaſtici exercitus parte, Luchinus Nouellus, traiecto Ticino, ad Modoetiam uſque cuncta peruaſtarant, deficientibus paſſim ab Vicecomite Guelfis, nemo erat fere, quin de furtiuo illo imperio, ſiue, uti tunc appellabatur, tyrannide Vicecomitum eſſe actum putaret: quo luceſſu Pontifex Gregorius aucto animo, ut maiore eſt amplexus liberandae Inſubriae gloriam, atque in eam rem, qui capere ſecum arma vellent, his omnium noxarum plenam, & Apoſtolica indulgentia ſalutarem veniam conceſſit. Vicecomites ipſi viciffim aduerſus eum terrorem armauere populum, Clerumque adeò ipſum agere excubias, & ad omnia belli munera eſſe paratum iuſſerunt. Tantus inceſſerat metus, tantaque rerum perturbatio, ut templa arces fierent, & cum ſago teloque conſpici Sacerdos nemo erubeſceret. Me ſanè pudet iam hoc ipſum narrare quòd Clericorum noſtrorum acies contra Romanos exercitus armaretur, nec ſatis eſſet, eam militiam reliquam foedari ciuitatem, niſi ſacra etiam quodammodo ipſa principum furore in aciem educerentur. Non autem interea praeliorum exitus erant alij, quàm quos eſſe

esse oporteret, vbi contra Pont. Max. pugnare cogebantur iidem, qui in acie potius illa stare deberent & vellent: sicque reddita Mediolanensibus & Vicecomiti non semel ea clades, quam primo ad Roberam praelio pontificijs ipsi intulerant. Monstratur in hunc diem nosciturque locus in Brixienſi agro trans flumen plurimo nobilitatus Mediolanensium sanguine, cum eò processissent impediendi causa, ne Ioannes Acutus, qui deserto Vicecomite transferant ad Pontificios, coniungeret sese cum Sabaudienſe, qui suum simul, & Romanum exercitum regione ea ductabat. In eo praelio, caesis aliquot Mediolanensium millibus captisque qui effugere non potuerant, Ioannes Galeatius Galeatij filius aegre effugit, quin ipse quoque caperetur. Capitur mox Ambrosius Bernabouis filius obtruncaturque ad Caprinum in Martinianae vallis faucibus, missus cum exercitu alio illuc ob rebellanteis Guelfos, qui tamen paulo post sunt ab ipso Bernaboue domiti & subacti non sine mutua clade propter montanorum animos obstinatos vincere vel mori. Angebant ista Vicecomitum animos, mallentque fortasse quiescere à principio, ne stirpe ab vna continuus tot malorum ordo sereretur. At parte in altera, quamquam laeti rerum euentus, & secunda belli fortuna, moesti tamen erant animi ob saeva & impia, & Christiano indigna nomine multa, quae quotidie fiebant, nec illo satis cohonestari poterant militaris licentiae vocabulo, quo scelera & calamitates



mitates cunctae bellorum teguntur: Adeo excesserant modum, Ecclesiaeque status & disciplina omnis interciderat. Praecipue torquebat Pontificis animum recentis petulantiae pudor, quae ad Vercellas in sacrarum virginum monasteria debauchata erat. Namque, cum vrbs ea, tenente arcem Vicecomite, capta ab Ecclesiastico exercitu fuisset, variarum gentium milites, inualido ad coercendum Imperatore, claustris effractis, corpora dicata Deo, & puritati, turpissime contaminarant: praeter seminarum aliarum adulteria, & stupra, quorum tanta coluuius tunc ea in vrbe fuit, ut historia nihil solita mirari tale, semperque accessionem hanc omnium bellorum, veluti negotium inane transmittens, immorata utique fuerit huic muliebri cladi, remque deplorarit. Talia audientem armorum eorum flagitia Pontificem Gregorium haud minor habebat moestitia ob illud Catholicae Ecclesiae dedecus quam Vicecomitum ipsorum animos timor ob res aduersas, & imperij discrimen: atq; ita pastoralis animo, & Reipub. cura ille, sollicitudinibus isti priuatis, pacem respexere rursus, cui, pactae in annum induciae pignus fuere. Per induciarum earum quietem, facuiores nonnulla Bernabos est domi ausus, quam quae bello assiduo passi ciues erant: ac tyrannidem tunc demum venenuncupari eam cogeret, si iustum antea legitimumq; imperium diceretur. Nam quae si inuideret ipse quieti, & saluti vrbs, quae repentina, & insperata aderat: & quasi, non satis miseriarum

miseriarum ad eam diem vna domus Metropoli  
vniuersae intui'sset, Marthesanae praecipue terris,  
memoriâ rebellium olim ibi Guelforum infensus,  
Gibellinos in familiarum earum perniciem excita-  
uit, author seditionum, quas reprimere potius ac  
sedare debuisset. Inde Ciuitati etiam ipsi infensus  
saeuire in eam coepit. Edixerat olim, ne quis  
occideret aprum, neue canes, & apparatus alium  
venandi causâ haberet. Eius edicti nomine, &  
obtentu, spoliare fortunis, priuare vita, delere ab  
stirpe familias, incendere domos, & effossis qui-  
dam oculis reseruabantur in vitae ludibrium, &  
poenam. Quicunque enim gustasset aprugnae  
carnis aliquid, bestiamue ipsam mortuam spec-  
tasset, siue attigisset, tenebatur lege, quae de  
apris erat, & promptissima ea tyranno materies  
feritatis in omneis, quoscunque odisset ob alias  
causas. Alebat verò ipse canum ad quinque mil-  
lia sumptu omnes alieno, diuisos nempe per vr-  
beni in hospitia, quomodo milites diuiduntur.  
Centuriones, & tribuni cohortium earum erant:  
lustrabantur venaticae cupiae singulis mensibus:  
inspectioque ea magnum principi vectigal erat.  
Nam, siue quis molossus arguerat macie sua hos-  
pitis illiberalitatem, siue largiore nutritu inutiliter  
pinguescebat, irrogabatur multa altori, & seuerè  
exigebatur. Et tributum simul aliud centum mil-  
lia florenorum nummum Vicecomiti huic miserè  
obnoxia Ciuitas in singulos annos ferebat. Cau-  
sabat ipse graues bellorum impensas, quibus  
exhaustus

exhaustus nimium attenuatusque esset. Vbi paulisper constituisset domum, depulissetque miseriae rei familiaris, & vulnera pro communi salute accepta sanasset, tunc ciuium quoque fortunis, & immunitati large ac prolixè consulturum. Lenitas, & mansuetudo verborum haec erat: interimque duos Franciscanos Minores, qui miserati patriae calamitatem, ausi fuerant ipsius auribus ad diuini iudicij terrorem insusurrare nonnihil, percitus ira damnauit, vt igni cremarentur & cremati sunt ficto crimine tamquam haeretici ipsi essent. Profectò, ego magnopere indignor, & eos qui tunc erant homines, multo magis indignatos esse existimo propter casum hunc in Rep. Mediolanensi nouum & atrocem, vt nepotes Vberti, & Bertae ab Masino pago, & Canonico, dein Archiepiscopo Othone profecti, nobilissimae, & antiquissimae Ciuitati sic insultare possent. Atque indignari tamen id ipsum magis, quàm admirari licebat. reputantes scilicet minimè diuersos alios clarissimarum rerum. Imperijque praesertim Romani casus iam inde ab aduena Tarquinio, & Seruio Tullo, qui dominari potuere in urbem, cuius inquilini, vel serui erant. Etenim celesti semper nutu, & immutabili Diuinitatis prouidentia, per inania haec, & apud mortalium animos absurda paratur in longum dignitas & salus urbibus ipsis, sicuti quidem vrbi nostrae quodammodo parata est, cum ab eiusmodi principatu fundarentur opes, quarum reliquiae diuisae postea in mille posterorum

rum domos alunt hodie nobilitatis florem , magnanimosque Vicecomites , vel pace , vel bello ornamenta Insuorum . Pactis , ut dixi , cum Apostolica Sede inducijs , Bernabos inter haec tyrannica instituta vitam imperiumque agebat : & postquam induciarum exierat annus , impijs rursum armis , quantum ex tuto poterat , ad vota impia nitebatur , auctus etiam subsidijs affinitatibusque novis , & hoc ipso violentior . Nam duarum filiarum alteram Federico Cypri Regis filio in matrimonium dederat , alteram Francisco Mantuae principi : & mortuo iam Lionello Angliae Regis filio , per secundas viduae nuptias Montisferrati Demarchum perennem illum hostem stabili foedere iunxisse secum videbatur . Ac veluti praesidia parans ultimo conatu , & conquirens vndiq; omnia , proiectior homo libidine penè , quàm crudelitate , cum plenam adulterinae prolis donum , spuriosq; & spurias tota vrbe complures in angulis haberet , Doninam Ioanni Acuto , Elisabetam Lucio Lando , Isoltam Guidono Foliano cum sua quamq; dote , & vicissim ad res firmandas vtilitate locauit . Icto deinde etiam cum Florentinis foedere , seque & Metropolim Ecclesiastico bello pertinacius quotidie illigabat . Galeatius cetera concors fratri & fidus , in eo tamen consilia separabat sua , quòd habere cum Pontifice volebat pacem , & Pontifex vicissim delectatus obsequio principis ac pietate , castella , & arces restitui iusserat ei quae superiore bello ademptae , Romano praesidio iam teneban-

tur. Moritur deinde ille, & paterni sensus vnà cum fortunae parte heres Ioannes Galeatius Apostolicam Sedem omni religione colebat. Is Piciniam Bernabouis filiam Actio filio suo iungere nuptijs cupiens, cum in ea re, consanguinitatis vinculis impediretur, posuit hoc Catholici principatus rudimentum, vt super ea re Pontifici maximo supplicaret: peteretque vt patruelles Actius & Picinina rite legibus soluerentur, quae leges inire matrimonium ipsos vetarent. Preces eiusmodi suas mandauit Antonio Saluciensi, qui post Pusterulam Mediolani Archiepiscopus erat. Atque, quò restatior esset illustriorque significatio obsequij erga Sedem Apostolicam, iussit confici tabulas auctoritate publica scriptum hoc habentes: quemadmodum rogasset ipse Archiepiscopum suum, vt suo nomine Pontifici maximo supplex esset ad matrimonij ius impetrandum. Supplicauere vnà cum Archiepiscopo, Franciscus Estensis, Bonifacius Coconatus, Andreas Pepulus, Philippus Casolus, quos praecipuae per Italiani nobilitatis viros Vicecomes idem ad Pontificem maximum legarat. Aliquanto postea Ioannes Galeatius ipse aliam patris sui filiam in matrimonium duxit, extatque ita scriptum in annalibus: Archiepiscopum Mediolanensem vnà cum Archiepiscopo Neapolitano annuisse, vt id matrimonium rite iniretur, & vincula consanguinitatis Apostolica auctoritate diremisse. Catharina nomen erat sponsae. Hanc, & Galeatium ipsius patruelem rite interrogatos Ecclesiae

clēſiae ritu, Archiepiſcopus idem in D. Ioannis  
 Aede ad Concam matrimonio coniunxit. Anno  
 altero, poſtquam id matrimonium initum erat (is  
 fuit à Chriſto nato ſupra milleſimum trecentefimum  
 octogefimus primus) vxor Bernabouis Regina  
 Scaligera nomine, concepit animo maiestatem illam  
 Templi, quod D. Mariae Virgini dicatum inſtru-  
 ctumque Sacerdotijs amplis, & honeſtiſſimo Col-  
 legio, pars hodie Regiae magnitudinis in hac vrbe  
 eſt. Turrianorum aedes dirutae cumulauerant  
 ruinas, ac deforme monumentum conſpiciebantur:  
 ruptis nunc verè domibus vulgare nomen mane-  
 bat. Ibi Scaligera templum extruxit, addiditque  
 templo cognomen, vt Scalenſis Virginis Aedes  
 diceretur. Primus lapis poſitus eſt ad VI. Idus  
 Octobris obeunte caeremoniam Archiepiſcopo:  
 impetrauitque deinde Scaligera à Pont. Max. vt ſibi  
 liceret inſtituere ibi Canoniorum Ordinem cum  
 Antiſtite ſuo, vtque ſacerdotia illa gentilia ſuae  
 domus eſſent. Per eos dies Archiepiſcopus ipſe,  
 Cleruſque Mediolanenſis cum ruſtico etiam Cle-  
 ro ad expiandos mortui Galeacij manes conſciue-  
 re, vt quas ille pecunias ex Eccleſiae bonis fructi-  
 buſque coegiſſet, eas remitterent ultro, & condo-  
 narent cum eo ſcilicet, vt Ioannes Galeaciuſ filiuſ,  
 & heres ſacellum poſitum in D. Antonij Aede  
 patris nomine extruendum curaret. Sacellum po-  
 ſitum eſt, pecuniaque attributa, quae ſexcentorum  
 aureorum nummum ſummam ad noſtrae hodie  
 pecuniae aeſtimationem efficeret in ſingulos annos

+ aliaque piacula Galeatij Manibus fuere. Anno qui  
 sequebatur, Scaligera mortua est: ilque casus Bernabouem grauissime perculisse est visus. In eo domestico luctu, per omneis Imperij sui partes literas misit, quarum sententia fuit huiusmodi. Bernabos Vicecomes Mediolani Imperialis Vicarius.  
 „ Lugubrem nostrum casum, quo nuper afflicti sumus, significamus vobis, existimantes, eadem fide,  
 „ qua prosperis nostris laetamini, etiam aduersa profecuturos. Regina Scaligera carissima nostra vxor  
 „ diem suum obiit: ita Deo placitum est, cui resistere, nec possumus, nec velle debemus. Angimur  
 „ tamen vehementissime pro eo sensu, qui nobis à natura tributus est, & ob peccata fortasse nostra  
 „ percussi tali plaga in moerore hoc iacemus. Ut  
 „ igitur appareat, luctus nostros vobis esse communes, utque magnis Reginae virtutibus honos habeatur: volumus vos atratos esse, vestemque  
 „ lugubrem ut habeatis vnusquisque vestro sumptu mandamus. Haec summa litterarum fuit, factura  
 „ utique fidem animi vere Christiani, si quilibet alius talia scripsisset. Quia Bernabouis nomen epistola praeferebat, fatis id visum cur simulacra inania pietatis & mansuetudinis irriderent. Obiit Regina Scaligera diem suum ad XVIII. Cal. sextileis anno aetatis suae quadragesimo: Sepulta est in D. Ioannis Aede, carmine adscripto, quo religionis laus inter caetera magnifice iactatur. Sed scriptores, qui temporibus vixere iisdem, quique alijs narrare quae viderant pertulerantque ipsi, superbani,  
 „ impiam.



impiam, audacem, & in explebili cupiditate mulierem hanc totidem vocibus appellare Scaligeram minimè dubitauerunt. Eius maxime stimulis praecipitem in omnia tyrannidis flagitia Bernabouem esse actum, eademque matris disciplina filios eruditos ad omne scelus nequiores etiam fuisse patre: patrem vnà cum filijs & vxore, disposita & inita habuisse consilia de Ioanne Galeatio interficiendo; vt imperium omne occuparent, iuuenique sublato, consortium illud infociabile dominationis tolleretur. Quae consilia, diu, sicuti credere licet, agitata inter senem iam tyrannum, & iuuenes turbulentos, & immistam marito prolique Scaligeram, postquam haec decessit, in capita auctorum recidère cum adhuc agitaentur. Nam iuuenis Galeatius, vbi considerando attente patruī instituta, & vitam, patruelūque mores, & male dissimulatam erga te inuidiam: nimium blanditiarum & fictae hilaritatis quoties ex destinato congrederentur tristes, & magnae rei cogitatione suspensos, quoties repente aditi deprehensique essent: suspicari primò aliquid coepit: deinde acrius vehementiusque suspicari: postremò coniecturas ipse suas conferendo cum nonnullis alijs indicijs, quae per exploratores, & amicos delata erant, eò peruenit, vt haud dubie rem totam, & orientes in caput suum insidias videret sicuti ea, quae oculis cernuntur. Non erat facile effugium remediumve periculi imminentis, tenente Metropolim imperijque arcem insidiatore patruo, paratis ad eius  
iulsa

iussa patruelibus, implacabilibus proximorum odijs vbi semel accensa sunt, multò magis implacabili violentia, vbi rabies in potentiae aemulum consortemque principatus accendit. Vnica spes etiam ipsi in fraude & dolo, vt peteret infensam domum ipsdem artibus, quibus ab ea petebatur, malletque, quoniam eò necessitatis ventum esset, capere quàm capi, & prodi potius hoc memoriae, quòd patruo ipse manus iniecisset, quàm quòd foret ab eo interfectus. Simulat primum omnium vehementissimam animi sui interturbationem, quasi tactus diuino spiritu, nihil iam ageret cum mortalium rebus attonitusque mortalitatis sine, se se quam sanctissime ad suprema comparare vellet. Nec fuerat antea ab studio imitantisue pietatis alienus. Nunc enimvero sumptâ laruâ sanctimoniae plane ipsius remittere curas imperij, colloqui de morte tantum, & Paradiso cum Minoribus Franciscanis, eorum quotidie aliquem ad mensam adhibere, mensa vti parciore, & modesta, corporis habitu, & cultu videri ipse quoque Franciscanorum vnus, nec in publico tantum oculisque populi, sed domestica, & interiore disciplina, vt falleret etiam si quos in familia appositos sibi ab hoste patruo exploratores haberet. Prodibat ad templa quotidie supplicatum, & nudis aliquando pedibus iuit, stipatus tamen semper interea cateruis armatorum, & auctis circa palatium excubijs ex fidelissimorum delectu. Ea ipsa diligentia contemptum auxerat sui,

fui, tamquam, inter alterius vitæ curas, & moriendi formidinem insaniret. Sic Bernabos interpretabatur, multaque apud eius filios in patruelem irrisio erat, ob mores, sicut ipsi existimabant, fatuos & absurdos, queis ab vita sensuque communi ille alienaretur. Ne vi quidem alia opus esse in eum, cui mens animusque sua sponte contabesceret. Peruagatus templa omnia ad Ticinum, & fatigato colloquijs solitudinibusque de altera vita suis quicquid ibi sanctiorum hominum erat, dissipat hanc repente famam, quod Deiparae Virginis Aedem, quae supra Varisum in montis vertice est, adire vellet. Armatur deinde peregrinationis eius causa exercitum, & post aliquot dies itineri se se committit. Praecedebat ipse pedester, cum nobilibus aliquot fortibusque viris haud sine priorum comitatu quos circa se assidue habebat. Equitum turmae modico interuallo subsequerentur: pars militum antecessere; pars circumfusa principi nullo ordine ibat: accipiebanturque cuncta veluti per insaniam iuuenis, qui vellet se esse beatum, & panicis terroribus agigaretur. Bernabos, Ludouicum, & Rodolphum è filijs suis iubet obuiam exire peregrinabundo illi, fruique spectaculo, & partem eius etiam ad sese postea perferre. Mox ipse quoque exit, tamquam debito honore erga fratris sui filium, & filiae maritum, reuera, ut auerteret suspiciones sermonesque hominum, & gratissimam oculis animoque suo speciem ex illius insania usurparet. Ad D. Ambrosij Xenodochium  
obuij

obuij inuicem fuere. Ibi descendere volentem ad pedes, Otho Mandellus, & Bernardonus Lonatus, quibus à Ioanne Galeatio mandatum erat, iniectis repente manibus in mulae qua vehebatur habenas tenere Bernabouem, statimque equites, & tela & multae armatae manus circumfettere ipsum & filios adeo destitutos ab omni ciuium caritate fideque familiarium, vt nemo gladium strinxerit, nemo inclamauerit ad arma. Id ita futurum esse Galeatius viderat. Captiui ducti sunt in arcem Iouis, & domus ipsa Bernabouis diripienda plebi data, vt contacti praeda il a ciues spem omnem pacis cum tyranno amitterent. Ita Ioannes Galeacius, depositâ repente simplicis animi personâ quam sumpserat, omisssaque peregrinatione, & dimissis in sua claustra religiosis hominibus, quos ad scenam eam instruendam adhibuisset, imperium hac fraude omne adeptus, omnia callidissimorum principum consilia tractabat inter callidos tantummodo & armatos: conspiciebaturque ad malitiam Bernaboue ipso nihilo deterior. Scripsit ad omnes Italiae principes de captiuitate patruï, consilioque suo necessario, & quemadmodum patienda sibi vltima fuissent, nisi fraudes hominis appetentis Italiae dominatum ipse anteuenisset. Neque verò in caput tantummodo sum paratas ab eo fuisse insidias, sed omnes, quicunque per Italiam opibus & fortuna aliqua, vel auctoritate possent obstare tyrannidi, insidijs esse similibus appetitos. Contemptorem Numinis, irrisorem omnium religionum, postquam

postquam templa spoliauisset, Ciuitatemque pene sustulisset, generum etiam fratrisque filium eundem tollere voluisse, nullis iniurijs nulloue laceffitum odio, sed tantum, quia propria quadam & insana sua ratione censeret, non posse eodem stare loco religionem simul & imperium & societatem humanam. Qui hoc animo fuisset in suos, hunc facile existimari posse, quid in alienos meditaretur. Scriptis in hanc sententiam circummissisque litteris addiderat Galeatius confessiones & indicia tremendarum rerum horribiliumque scelerum, partim, sicuti erant à Bernaboue cogitata vel admissa, partim, sicuti criminatori eidem, & domino facile erat fingere aduersus reum, qui clauso iam in tenebris ore, spirituque & animâ prope interclusâ nullam emittere vocem posset. Etiam si innocens Bernabos & calamitate indignus illa foret notum tamen est, quid domus suae principes efficere per solertiam, & obsequia ministrorum possint, ubi quempiam illigare iudicij forma necesse habuerunt, siue destinauere per iram. Tantò promptiora omnia erant aduersus eum, qui violenter, iniuste, auareque olim imperitando, plurimam nunc, & criminationi materiem, & animis alacritatem addebat ad comminiscenda in ipsum etiam, ea quae non admisisset: inspectoque quaestionis volumine, meritam poenam habere Bernabouem annuerunt iisdem illi qui audita captiuitate, exemplum magnopere improbarant. Sic Galea-

cuius inuidiam auerterat à se omnem, patruumque focerum, & patruales ex tanta detractos fortuna, carcere obscuro clausos tenebat, ipse totius prouinciae imperijque Mediolanensis potens, nec ea satis opum & terrarum amplitudine more regum contentus. Ne victoria quidem ipsa contentus, & captiuitate suorum, incruentaque possessione totius prouinciae imperij sustulit paulò post veneno patruum, eoque facinore mistam laude infamiam est assecutus, quia exemerat captiuum tam infelicitis vitae poenis, & rursus, quia noluerat saltem vitam relinquere ei postquam imperium lucemque ademisset. Datum est venenum per carceris custodes, infusumque fuit delectabili phaeolorum cibo, tantâ negligentia famae quòd ad rem eam attineret, vt super eadem mensa conuersis repente oculorum pupillis & spumanti protinus ore vociferari moribundus senex inciperet, ac paulo post efflaret animam. Spatium tamen fuisse Sacramentis alij tradunt, & multa circa alteram vitam solitudine, religiosoque conatu Bernabouem haec identidem verba pronuntiauisse **COR MEVM CONTRITVM ET HVMILIATVM DEVS MEVS NE DESPICIAS.** Vt expirauit, imponitur feretro calidum adhuc feruensque cadauer, & mandatur tumulo, qui in D. Ioannis Aede ad Concam, sicuti hodie visitur, stabat. Namque ille, siue melior intimo sensu, quàm inter imperitandi cupidines artesque videretur, siue deterior etiam, & nequior quam fama hominum ferret,

ferret, velut cogitatione supremorum extruxerat id sibi sepulcrum integra adhuc aetate, & sicuti metiuntur vitae spatia mortales, nondum iuxta curriculi calcem. Exitium autem hoc clademque Bernabouis antecessere prodigiorum monitus, quos facile ciuitas interpretata est, postquam mortuum in vinculis tyrannum, captiuos eius filios, & seruam in nouo Imperio domum videbant. Palatium fulmine ictum, & pars muri quassata erat. Rodolphus principis filius fulmine alio penè exanimatus. Insigne Gentis vipera quae iuxta D. Georgij Aedem in palatij fastigio steterat, deiecta turbine: et pleraque alia cùm acciderent, neglecta, post rerum mutationem, cuncta illuc referebantur. Sublata in hunc modum tyrannide, tyrannoque ipso, nouus princeps ante omnia operam dabat, vt & pietate in Deum, & mansuetudine in ciues moderationeque imperij diuersum sese praestaret ab eius institutis, in cuius captiuitate & nece, liberandae Iteliae titulo vsus fuerat. Simul hoc volebat assequi, vt memoriam nomenque eius diuersitate illa oneraret. Fortè per eos dies Templi maximi turris procubuerat ingenti ruina, vicinisque tectis illapsa moles, aedium hominumque stragem ediderat quàm Canonici ipsi incolebant, & aliquot eo casu obritos esse Canonicos ferunt. Ex reliqua multitudine periere ad ducentos: parque fere numerus mutilatorum, aut exigua inspe, trahentium animam fuit. Ea primùm largi piique & mitis animi materie Galeatius arrepta, mate-



rient ipse sermonibus tota vrbe gratissimam honestissimamq; dedit : quantò superum munere calamitas ea dilata fuisset in principis huius tempus : quanta calamitatis accessio , si altero illo imperitante accidisset , qui ciuium & Populi malis laetaretur . Nunc , & principis impensa benigne curabantur , quibus in eo casu deerat domi aliquid , & illius ruinosi aedificij casus , initium & origo fuit Templi Deiparae Virginis , quod vnum hodie in terris visitur dignum magnitudine & gloria Diuae , cuius nomini sacratum dicatumque est . Anno CIO CCClxxxvi. qui Galeatij imperitantis alter erat , prociderat turris . Ad xvi. Cal. Iunias anni eiusdem , magnificis verbis adhortante populum , Clerumque Galeatio , & hortamenta maiora pecunias thesaurosque suos ad inchoandum opus proficiente ac depromente , sterni ac deiici coepta est Mariana Aedes , obscurior , & humilior illa fortasse , quàm pro reliquo splendore vrbis , & Metropolitanis nominis maiestate . Annum fere totum tenere , demolitio veteris Aedis , & deformatio nouae , quae accitis vndique architectis apud Principem Galeatium , & Archiepiscopum Antonium , circino & graphide quotidie adornabatur . Insequente Maio , constituta nouae molis forma , purgataque ruderibus area , & fundamentis apertis , primus lapis est positus , isque dies fuit nonis Maij . Quem hoc loco poni & adscribi diem oportuit , vt nota essent primordia operis , cui per ducentos amplius ab eo die annos adlaboratur , & fore aliquando

quando finem homines desperant, iidemque simul admirantur, potuisse tam breui aevo continuis artificum etiam omnium laboribus, & continua pecuniarum omnium erogatione fieri id quod vident. Adeò, cum stet Aedes amplexa quicquid miraculorum ars & pecunia depromere & ostentare possunt, cumque tantae urbis populus in vasto illic & capacissimo sinu, beatarum sedium imagine contentus attonitusque fruatur: requirunt tamen, quatenam ingenia mortalium, & annorum spatia, & naturae ipsius opes suffecturae sint, ut frons fastigiumque templi absoluantur, utque ab rupe, & Verbano Lacu transfuchantur in urbem excisae iam & praeparatae in vestibulum columnae longitudine ac diametro, quantam profana antiquitas ne cogitare quidem ausa est. Hanc novae Aedis ichnographiam, ottographiamque, & scenographiam ex Germanica symmetria trigonali ratione norma peraequata confectam, & multorum dierum consultatione tractatam, inter Archiepiscopum, & Principem, & architectos, aliosve primores urbis, probauere & suscipere, nulla cura quod ad sumptus infinitos talis fabricae attineret. Nam, & ciuitas vniuersa studiis exarserat immanibus, & princeps ipse Galeatius large acervos proferebat, cum scilicet in D. Nazarijarce, quae nunc Xenodochij maximae sedes est, tantum argenti aurique, tum rudis, & infecti, tum facti, & signati reperisset, ut plaustris per aliquot dies compluribus inde eueheretur. Augebatur inde una cum opere ipso principis

principis animus ad molem attollendam, quæ nulla toto terrarum orbe conspectior foret, nec minor gloria ciuium animos attollebat, vt non quotidianis modò largitionibus, sed fundis atq; redditibus, & hereditatibus sæpe totis fabricam eiusmodi instruerent. Atque in tantum postea splendorem tantasque diuitias res venit, vt cùm opificij magnitudo quantamlibet posse pecuniam exhaurire videatur: patrimonium tamen aerariumque hoc fabricae ipsi superstes fieri necesse sit. Eritq; tempus olim, cùm supra, infra, extra, intra, absoluto opere, certatimque refulgente marmore & auro, spirantibus vndique simulacris, & altero hoc statuarum populo prouocante hominum pietatem, etiam sacra suppellectili iam destituyente impensas, cogitabunt praefecti quid pecunijs illis facere redundantibus debeant. Tanta liberalitas, & munificentia populi Mediolanensis fuit. Quòd si mihi, peractis in quae tetendi, parumper adhuc agere ista licitum fuerit, volam vtique exhilarari exponendo fabrilium harum Ecclesiae Mediolanensis opum magnitudinem, & statum, earumque oeconomiam, & administrationem ad magnae Reip. formam: scilicet, vt regantur ab Cleri ciuiumque primoribus, vt inter ordinem vtrumq; prouinciae comparentur, vt sua singulis munera, cunctis auctoritas & suffragium, corpori denuò vniuerso caput & aliquando dissidia, quae semper oportet esse ibi vbi sint magna negotia, & pares animi. Simul, domestici marmoris copiam, generaue & varie-

varietates, & proprias venas, delectum artificum,  
 ac sacro patescente campo nobiles officinas, ope-  
 rum aestimationes, constituta stipendia architectis,  
 causarum actores, litiumque patronos, & scribas,  
 & omne ministerium, partemque iurisdictionis &  
 imperij, omnia sedulo exequar cum bona recor-  
 datione & laude maiorum nostrorum, qui tantas  
 ad Deiparae cultum opes contulere. Longè verò  
 gratissima atque ad animi mei solatium aptissima  
 descriptio erit ipsius Templi, quod magnae pro-  
 uinciae instar, vagandi per singulas partes, in lon-  
 gum, in latum, sursum, ac deorsum, intra, extraq;  
 ab imis fundamentis ad summas coronides, spatia  
 ampla praebebit: & peruagatio ista iustum pro-  
 priumq; sibi volumen requiret. Nam sicuti Grae-  
 cus Pausanias, deducta per terram eam vniuersam  
 narratione, quoties stylo gradum fecit, reperit  
 res historia dignas, parique passu procedunt ibi  
 locorum nomina, & res inclytae ac memorandae:  
 sic nobis in tradenda Metropolitanae Aedis for-  
 ma, ad singulos fere lapides, aut artis eximiae,  
 aut sumptus immensi, aut mysteriorum insignium  
 contemplatio occursatura est successuraque vltro  
 sub styli acumen. Interim, demonstraſſe sic suffi-  
 ciet operis initia, quod anno eo salutis humanae  
 millesimo trecentesimo octogesimo septimo sub  
 Ioanne Galeatio Principe vrbis, & Antonio Sa-  
 lutienſe Archiepiſcopo inchoabatur. Eodem anno,  
 Angleriam, Tainum, Guarnisium, quae loca fue-  
 rant Archiepiſcopo ſubiecto Pont. Max. Catha-  
 rinae

rinae Ioannis Galeacij coniugi concessit, imposita;  
 vestigali marca, testandi causa iuris ea loca esse  
 Ecclesiastici: & sublati aut omitti veterum cer-  
 taminum causis fida tranquillaque erant omnia Vi-  
 cecomiti cum Apostolica Sede. Ceterum, cum  
 laeti nouo imperio Mediolanenses datum sibi di-  
 uino beneficio Galeacium, & perpetuam sub eo  
 pacem inter sese gratularentur: Bellum Veronense  
 aderat, haud quidem eius hostis viribus & nomine  
 magnopere timendum, sed ob adiunctas Scaligero  
 gentes principesque alios, non minus graue ac  
 terribile Metropoli, quam alia, quae ad eam diem  
 bellata erant. Antonius Scaliger erat hoc tempore  
 Veronae princeps sub Vicarij Imperialis titulo  
 etiam ipse tyrannidem exercens haud vnquam  
 amicus homo Vicecomitum genti, semperque mo-  
 litus aliquid palam siue secreto, quo dominatus  
 iste elideretur. Praecipue autem obstare voluerat,  
 ne Germanica matrimonia, quae dixi, inirentur;  
 & serendo maledicta in Vicecomitum genus foe-  
 dera ea penè disiecerat. Insuper, afflictis & dubijs  
 ad Brixiam rebus accedendo ipse, & fouendo ibi  
 hostem, aut instigando, difficiliora omnia Medio-  
 lanensibus effecerat. Spes quoque & consilia pacis  
 ineundae cum Patauino, maligne turbata per eun-  
 dem: & quoniam haec ipsa fortè innotuerant,  
 damna alia grauiora, vel iam intulisse occulta, vel  
 in posterum illaturus esse credebatur. Cum tali  
 homine bellum apertum quam pacem infidam ha-  
 bere Ioannes Galeacius malebat: ac veterem,  
 populi

populi Romani morem vsurpans ; repetito , quicquid hostiliter ac maleuole in se ille tentasset, siue admississet, ob talem animum, & talia facta publice amicitiam ei renuntiavit , bellumque indixit. Percussus ea denuntiatione Scaliger, cum reputaret inparem se vi aperta tanto hosti, fraude, qua caetera egerat, vtendo, purgabat infime obiecta, Galeatiumque ipsum compositis metu, & adulatione vocibus, & Patrem, & Dominum fallacissime appellabat. Extant enim vtriusq; litterae, alterius quidem, scriptae seuerè ac dolenter in perfidum amicum, implacabilem hostem, ob eamque perfidiam & acerbitem, rem ad arma deducentes, alterius verò, tam humiliter, & abiecte deprecantes iram, vt ea ipsa deprecatio & abiectio indicium esse posset animi captantis aptiora sibi tempora, & credulitati alienae insidiantis. Postquam inuicem ea scripsere, Galeatius haud minor talium artifex, vt qui vitam imperiumque cum domesticorum hostium pernicie fingendo etiam ipse adeptus esset, intellecto astu & contempto, nihil vltra verborum super ijs rebus effatus exequi bello parat, datis tantummodo ad Florentinos litteris vt iustum id necessariumque esse bellum scirent. Euentus belli minus cruenta fecit omnia quàm publica expectatio & vrbis metus fuerat. Quippe inducto in Veronensem agrum exercitu Mediolanensi, vicissimque Scaligero, suis & amicorum copijs ad vim arcendam impigre coorto, cum res ab vtraque parte in magno discrimine esset, capta momento penè per dolum vrbs Verona

Hh

Scaligerum

Scaligerum ipsum, & foederatos fregit: cunctaque ei hosti subiecta loca Metropoli accessere. Dolus autem, per quem capta sine sanguine Verona est, res quaedam huiusmodi fuit. Eiecerat Scaliger patria Gulielmum Beuilaquam, vel potius, iste fugiens vltro reguli illius violentiam, contulerat sese Mediolanum, in opulenta hinc aula magnaue vrbe, tutam & honoratam reliquam sibi fore vitam credens. Quae spes, cum eum minimè fefellisset, inter caetera commoda & ornamenta, quae in altera hac patria est assecutus, bello etiam hoc Veronensi Mediolanensis exercitus Imperator rem vniuersam militarem in potestate habebat. Benaci oram cum villarum incendijs, & agrorum vastatione perpopulatus, multas munitas arces, & pleraque opportuna loca ceperat, non procul à spe capiendae vrbis, quae iam acerrime oppugnabatur. Sed, vt dixi res magni discriminis erat: validaque munimenta, & pertinacia defensorum foedam in aditu dimicationem ostendebant. Tunc ille, clandestino colloquio corruptis nonnullis, quos ibi in vetere patria fidos adhuc amicos habebat, rationem cum illis hanc iniit vt facta eruptione, captiuos secum in urbem traherent fortissimum quemque Mediolanensem, qui praeparati in id ipsum, absque periculo vel certamine vlllo, in manus, & vincla ipsis traderentur. Ferme sub auroram, obscura adhuc luce cum erupissent, redissentque proditores ouantes captiuorum agmine quos ducebant, dato familiari signo recepti in urbem, aliquantum à porta, qua exierant redie-



redierantque progressi, demunt raptim ficta illa  
vincla Mediolanenſibus, & conuerſo ad portam  
eandem gradu vigilēs obtruncant. Ita patuit exerci-  
tui aditus in urbem, Scaligerque ad primum tumultu  
conſcenſo equo, vocans ad arma, nomenque  
ſuum inculcans, ubi reſides ſtare vniuerſos vidit,  
elapſus ſcapha per Atheſim fluuium Venetias ſuae  
ipſae cladis nuntius cum infana trepidatione appu-  
lit. Cuncta, quae ille poſſederat, & vrbs Vicetia  
praefertim, antea multum expetita Vicecomitibus,  
ad Galeatium Metropolimque peruenere: arma inde  
Mediolanenſium in Patauinum Carrarienſem incu-  
buere, tum fortuna, tum ingenio ſimilem hoſtem ei  
qui fractus nuper ſubactusque erat. Paruum iſ quo-  
que imperium vaſto tenens animo, violentia in  
ſubiectos, in ſuperiores inuidia, malignitate in om-  
neis, vt regulus ac dynaſta, nimium potens, vt  
Regum quiſpiam nimis inops, ſeque & alios aſſi-  
due inquietabat cum neque intra fines conſiſtere illos  
poſſet, & in aliena tranſcendere volentem deſtitue-  
rent vires, fortuna ſemper aduerſa retineret.  
Praecipue, cum iſta Vicecomitum domo agebat  
aemulatum, in eo ipſo Scaligeri olim aemulus, &  
ſicut ille, per fraudes fere occultas, quia bello aper-  
to impar. Vonicam etiam hanc tolli longe venien-  
tem oportere Ioannes Galeatius exiſtimans, vt im-  
perij ſecuritatem, & vitae quietem haberet eam cum  
qua reliquos ſuos dies agere deſtinabat, miſſo in  
Patauinos exercitu, aſſumptis in expeditionem au-  
xilijs, leui negotio, propter alienatos illic ab tyrann-

no omnium animos , tyrannum subegit ipsum , ut  
populi impetum timens , se suaque omnia , liberos  
uxorem , urbem , arcem dederet , ne ciuium suorum  
manibus , id quod prospiciebat fore , laceraretur .  
Haec victoria Vicecomitem extulit ingenti gaudio :  
& sicuti cuncta prospera ad Deum Virginemque  
Deiparam , referre solitus erat , edixit , ut per omnia  
imperij sui loca supplicationes per triduum haberen-  
tur . Edicti forma haec fuit . Benignitate Numinis  
aeterni , semperque alio super aliud erga res Me-  
diolanensium diuinae indulgentiae munere esse fac-  
tum , ut Patavinus imperium omne quod tenebat ,  
desperata eius defensione permetteret in suam , &  
populi Mediolanensis potestatem . Id sibi accidisse  
gratissimum , quia domitis vndique hostibus , & par-  
ta per terras omnes pace , facultatem iam denique  
optatissimam illam habiturus sit agendi tranquille  
& quiete cum subiectis suis id vitae quod superes-  
set . Pro tanto celesti beneficio , licet inter huiusce  
mortalitatis misérias nihil vicissim erga Deum Opt.  
Max. fieri pie satis ac reuerenter possit , censere se  
tamen honorem diuinae maiestati vtcunque esse  
habendum . Proinde , supplicantes populi ad sua  
quique templa procederent , Christumque Saluato-  
rem vnà cum sanctissima eius Matre venerarentur ob  
id munus . Datae sunt litterae Abiati , quo se se  
princeps ob pestilentiae metum contulerat : dies  
que & annus in ijs litteris adscriptus xxvi. Cal. Dec.  
cio ccc lxxxviii. Eo anno centeni quinquageni vi-  
ri nobiles e singulis vrbis regionibus , quod publi-

cum concilium erat, per suas quique paroecias de more congregati, dedere Othorino Marliano, Ioanni Casato, Ioanni Pufferulae, Odoardo Conrado, Ioanni Carnago, Francisco Mairolae, Georgio Moresino: his omnibus dedere mandatum, ut Reip: Mediolanensis nomine in verba Ioannis Galeatii Vicecomitis iurarent. Iurauere, subiectam & obnoxiam fidamque principi ciuitatem fore, ratumque testamentum habituros esse, quodcumque ille recte, & ordine fecisset. Idem dixere sacramentum Ioanni Mariae filio infanti qui anno eodem ad Abiatum natus Principi ex Catharina vxore erat: dixerantque parentes id puero nomen ex voto, quod nuncuparant, dicantes Sanctissimae Virgini Mariae prolem, quae ex eo matrimonio nasceretur. Non deinde Clerus populusque Mediolanensis fruebantur ea pace, & felicitate, quam sub tali principe expectabant, quamue princeps ipse iactando atque ostentando sermonibus, & spe vana semper, nondum re ipsa patriae exhibere potuerat. Quinimò deducta res in eum statum est, ut onerati tributis immodicis sacerdotes, tempora illa desiderarent, quae sub Bernaboue detestati erant. Causa, non tam ex principe ipso, quam ex communi imperitantium conditione, ut diu alijs molesti, postquam vellent ipsi quiescere non possint. Nam vbi ad pristinum Mediolanense Imperium adiuncta Veronensi, & Patauina re, tanta potentia Vicecomitis erat: inuidia metu, dolore protinus excitati, quos irrita aliquacupiditas, vel imminenti pericula, vel accepta,  
damna

damna stimulabant, coniunctis inter se viribus Florentini & Veneti Scaligerum & Carrariensem profugos ad se & supplices tamquam misericordia & fauore amplexi ob suam pars vtraque vtilitatem restituere pulso Vicecomite conabantur in sedem, vnde per eum detracti pulsiq[ue] erant. Hinc bella & calamitates principi vrbibusq[ue] subiectis, & maiorum omnium summa redibat in urbem nostram. Iubilaeum hoc tempore Romae fuerat, exactoque iam saeculari anno, Vicecomes aegre ferens quod homines sui propter continua bella, peregrinationis & Indulgentiae fructu carruissent, impetrauit à Pontifice Bonifacio, vt Iubilaeum idem ex Romana formula Mediolani esse vellet ac iuberet. Placebat Pontifici occasio expiandi tot secessionum flagitijs antea temeratos Insubres, plenissimaeq[ue] Indulgentiae munus hac formula concessit. Omnes, qui sunt in Vicecomitis imperio, viri, seu feminae, ciuilibis ordo sacerq[ue] qui peccata sua rite confessi dolenterq[ue] detestati erunt, Indulgentiae huius munere ac virtute liberantur noxis omnibus atq[ue] absoluuntur. Peregrini, qui consequendae Indulgentiae causa ierint in eam urbem, per decem dies Mediolani commorabuntur, ibuntq[ue] ad templa supplicatum. Templa autem haec erunt, ad quae supplicabitur D. Mariae Virginis Aedes, D. Nazarij, D. Ambrosij, D. Laurentij, D. Celsi. Ad templa ista qui poterunt ac volent eleemosinae nomine donum dabunt, augendo illic cultui diuino, templisq[ue] ipsis ornandis atq[ue] excolendis. Conuenere Indulgentiae

gentiae causa magna Mediolanum multitudo: cumque statuta & finita exiret dies, prorogauit eam diem Pont. Max. adiecitque treis adhuc menses, intra quod spatium aditus ad celeste id munus pateret. Versa tota in religionem Ciuitas, eademque pietatis nunc etiam alienae domicilium, minime tamen interea sicut dixi quiescebat à bello, quod praeter primas in Vicecomitem Metropolimque expeditiones, facta omnium fere Italiae principum coniuratione, vi tota motum repente erat. Nam Veneti, & Florentini, verecundiâ foederis, quod ictum cum Vicecomite habebant, gesserant velut ex occulto bellum, magisque induerant arma exsulibus illis Carrariensi & Scaligero, quàm armati palam ipsi prodierant in vllam aciem. Nunc palam omnes Italiae dominatus armabantur principesque etiam externos traxerant secum: & fama fuit, Pontificem ipsum Bonifacium, quamquam, ad animarum salutem, Iubilaeum pastoralis animo mitis indulgensque concessisset, tamen huic infensum fuisse potentiae, damnosamque & periculofam eam Ecclesiae rebus existimantem, caeteros ad coniurandum incitasse. Certe, cum id principum Italorum foedus, & pacta inter ipsos armorum societas Mantuae promulgaretur, titulum ei foederis ac societati praetulere hunc: autoribus Pontifice & Caesare, coniuncta esse arma remque susceptam. Armeniaci Comes Caroli Galliae Regis gener erat, magna virtute & fama, quam diuturna per Gallias Hispaniasque militia & prosperis in vtraque parte expeditionibus nobilitarat.

Hunc

Hunc aduersus Vicecomitem in Italiam exciuiere  
foederati, praemissa ad eum grandi pecuniae summa  
vt ea pignus esset ingentium aliarum rerum, quas  
longe supra pecuniam etiam aestimatas, quò promp-  
tius expeditionem iterque capesseret, ostentarent.  
Pollicebantur enim eius militiae pretium, Castella  
& arces, & Vicecomite pulso stabilem in Italia se-  
dem, & quamcunque aliam victoriae partem ipse  
exoptasset. Dictum tamen secretò inter nonnullos,  
creditumque fuit, non tam mercede illa promissisq;  
foederatorum, quàm foci regis dolo Comitem,  
eum Armeniacensem in Italiam esse adductum, reni-  
que verecunde occultatam ob recens cum Valentina  
matrimonium, quae Galeatij ipsius filia Ludouico  
Regis fratri nupta erat. Gallum Regem irrito sem-  
perque miserabili ad exitum conatu iam inde ab eo  
tempore imminentem huic Metropoli, stimulatse  
generum hunc suum, vt per occasionem inuitan-  
tium foederatorum in Italiam profectus, simul mo-  
liretur in re ista Mediolanensi aliquid, simul Ponti-  
ficij Bonifacio, cui Pseudopontificem Auenionensem  
ipse opponebat, infesta omnia efficeret, atque etiam  
data opportunitate palam eum opugnaret. Profec-  
tò, hominibus Gallis cauendum semper erit, ne,  
vel cupiditate sua, vel consilijs alienis inducantur,  
vt res tentare Italas velint & exempla haec in omni  
illic regio colloquio & Senatu pro documentis esse  
debeant, quoties de transitu alpium deliberatio  
inciderit. Nam, nisi ipsae ab natura interiectae alpes  
atque tot luctuosi casus exercituum, ducumque &  
regum,

regum, qui transgredi voluere, constituissent disciplinam refugiendi procul ab hoc sepulcro Gallorum Italiâ, poterat vel ipse Comitum Armeniacensis casus ante ducentimum hunc fere annum, execrabile & horrendum Italiae nomen in perpetuum facere Gallorum genti. Ducebat Armeniacensis armatorum ad decem millia veterani militis, & sub victore semper duce vincere assueti: neque clariores alios bello viros bellicosissima natio celebrabat. His ad alpium ipsarum radices coniungere sese copiae aliae, quas foederati regione illa praeparauerant, ut transgresso in Italiam Gallo, praesto essent atque associarentur, quod terribilior ad Metropolim inuadendam exercitus vniuersa statim mole duceretur. Florentina legatio cum praefectis & curatoribus bat Armeniacensi comes, ne quid exercitui deesset, utque per compendia viarum expedito agmine Galli irent. Per Salinas, inde per Taurinos progressi Alexandriam versus, dum pleno gradu Mediolanum, & feroces & laeti vicinitate tam expetitae urbis recta contendunt, triste praesagium vicinae cladis, & in eodem fere loco tristiore cladem habuere, quae Mediolani causa gaudiorum ingentium, solenniumque supplicationum fuit, quamuis, ut dixi, ob novas illas in media pacis expectatione misérias aerumnasque bellorum moesti omneis, & tributis onerati immodicis iacerent. Vnum ignobile castellum seruauit in tali tempore Metropolim, perdiditque Gallos, & memorabile in omnia saecula militarium flagitiorum exemplum edidit. Nam nisi loci eius op-



pugnationē retineri sese passus eſſet Gallus imperator, foretque strenuē proſecutus iter ſuum, ita ut venire & adeſſe Gallos fama eadem ferret: fortasſe inter attonita & ſuperioribus ſeſſa bellis omnia ſine certamine victor, & cuncta camporum tenens ad moenia vrbis acceſſiſſet: ac caetera deinde Mars anceps & vrbis fortuna decretura erat. Tunc ignobilibus adſidendo muris exitum ſtatim habuit cum infelicem. Caſtellatium nomen eſt loco quem ex itinere occupare Galli concupiuerunt, ridiculo conſilio, niſi ſi potius Deus ipſe, vel ira in gentem eam noſtri vel curā vecordiam duci militibuſq; tantam iniecit. Admotis machinis & omni oppugnandarum vrbiū apparatu, cū hinc quaterent ſtrenuē muros hinc circumiecta popularentur, die quodam oppidani meridiano tempore (& erant ſextili forte menſe calores magni) ſpeculati incuſtodita omnia, dum hoſtes aut ſedent dormitantq; humi, aut per caſas, & tentoria ludibundi terunt tempus, pars vagi, & palantes, pars ſub vexillis & agmine praedas agunt: eruptione facta eſcas ignis circumdedere tecto quō trecenti amplius equi abditi erant, & parem fere hominum numerum ſtrauerat ibi iuxta equos ex vino & aeſtu grauans corpora ſomnus. Arſere ibi cuncta momento penē vno, nec prius ſenſere Galli incendium, quā tunc cū fumo & vapore flammisq; inuoluti, neque oculis, neque animo competeabant ad vllum in tali diſcrimine neceſſarium & ſalutare opus. Accurritur vndique ad id ſpectaculum, & Armeniacenſis ipſe trepido nuntio excitatus, cū ambuſta

ambusta cremataque omnia, & informes equorum hominumque figuras inspexisset, ne casu quidem eo admonitus erroris sui, quo tamquam alter Annibal circa partes minimas infelicissime districtus expedire sese, caputque petere ipsum nesciret, omissa adhuc vrbe Mediolano, cuius potissimum causa traiecerat alpes, pergit stimulante insuper ira castellum oppugnare illud. Simul ad vicinae vrbis moenia cum exercitus parte progressus, minitabatur ei vrbi excidium, & viles inde exire Lombardos iubebat. Eius verò vocis contumelia & indignitate permotus Iacobus Vernius, qui collocatus ibi ab Ioanne Galeatio cum Metropolitani exercitus parte erat, exit ad pugnam cohortatus antea milites suos, vt insultantem barbarum cogerent vocem mutare, quam stolidè iecisset: docerent, non viles, sed generosos esse Lombardos. Qua porta cum duce suo exierant Metropolitani, contra eam multitudo conglobata Gallorum confiterat. Inter contumeliosè insultantes, & contumelia irritatos districti confestim gladij, & quicquid telorum, in hac, vel in illa parte erat. Dimicatur confestim, & passim, tumultuariè magis, quàm ordine vllò, pugnandique ordinem suus cuique impetus, sua praebebat ira. Vir virum saepe amplexus detrahit equo, fodiunt oculos, ora mucronibus quaerunt: & aliquandiu veluti luctu quaedam ex equis erat, irruente in mortuum Metropolitanum semiuivo Gallo, vel expirante super exanimem Gallum Metropolitano milite, dum,

cuneus , & turbo ille pugnantium glomeratur : Sed pellendo inuicem sese, ac trudendo, paulatim in vineas nexu traducum impeditas deuenere. Ibi Gallus Imperator , Armeniacensisque Comes , multis antea victorijs clarus , bello hoc missus ad oppugnandum Pontificatum , capiendamque Metropolim Italiae arcem, acto fortè in traduces eas & palos, & vitilia equo, dum bellua irretita iactat ferociter ungulas tantoque magis implicatur: euolutus ipse, siue sponte desiliens, ab ijs, qui casum viderant, facto repente concursu comprehenditur, & velut immanis fera oneratur vinclis, atque pertrahitur in arcem. Quòd vbi captum abductumq; videre Galli suum Ducem ita concidère animis, vt nullo negotio caperentur ipsi quoque, aut caederentur. Namque, praeter eum terrorem, & caliginem offusam ab tali spectaculo repente animis, etiam mollia corpora, nec ferentia aestus vltro fatiscebant. Qui validiores fuere, fugam arrepta, tenebrarum beneficio (nox enim interuenerat) aliquot millia passuum praecepere continuo cursu, donec insecutis nostris oppressi retraherentur. Miraculo penè fuit, quod mille Mediolanenses decem millia Gallorum vicissent: nam tantum in vtraque parte fuisse numerum constat. Florentini curatores, & legati, qui deduxerant infausto itinere exercitum, etiam in vincla comites iêre. Nunciata ea Mediolanum, tantò laetiora fuere populo Principique, quantò tristior vulgatioque erat in vrbe fama

fama veterum irruptionum Gallicarum , cū  
scilicet onustam rerum nostrarum praeda gentem  
trucidassent sub oneribus ipsis , haud sine mutua  
clade maiores nostri passi res insuper ab iisdem  
alias , quarum deformitatem fuso per vias vniuer-  
so praedonum sanguine eluere coacti essent .  
Nunc , quia tam abominatae memoriae hostem  
prouinciae iam ingressum limina , ducis error , &  
praesens Numen , virtusque militum ad fines in-  
statione locatorum oppresserat : res digna visa est ;  
quae pietate , & gratulatione publica celebraretur :  
& Principis iussu , nocturni tota vrbe fulsere ignes  
supplicationesque de more habitae per triduum .  
Captiui , paucis post diebus ademptis armis , & equis ,  
dimissi omnes , praeter paucos , qui monstrabantur  
à caeteris ob diuitias , & splendorem . His enim  
edita pecuniae summa , quam ab domo accirent :  
& donec pretia redemptionis adfuere , in vinculis  
retenti . Armeniacensem ipsum primo captiuitatis ,  
die mortuum esse ferunt , siue agitatione tanti ca-  
lus & moerore animi , siue hausto clam veneno ,  
quod regio barbarico more ad dubia fortasse  
abditum gerebat . Hunc exitum habuit Gallica in  
Mediolanenses expeditio . Nec felicior alia , qua  
foederati Ioannem Acutum patriae desertorem  
eodem tempore miserant ad urbem inuadendam ;  
certa prope victoriae spe , si , hinc ab externo exer-  
citu , hinc ab transfuga , & proditore circumfede-  
remur . Is ab Patauio cum sex millibus armatorum  
per Veronensis agri fines expedito agmine pro-  
gressus

gressus in Cenomanos traiecto Ollio amni, consti-  
 terat iam in Abduae ripa transiturus, nisi audita  
 Gallorum clades, & conspectae trans flumen  
 Mediolanensium copiae auertissent. Simul, parte  
 ab altera ex transuerso aderant nostri, quos Vice-  
 comes ad primum nuntium eius aduenientis hostis,  
 ponte, qui erat ad Tritium pagum, propere  
 transgressos inimiserat. Itaque, duplici terrore  
 obiecto Acutus, & ad ea arma, quae sibi immi-  
 nere videbat, accedente Gallici casus fama, fugere  
 maturauit, euasitque non paruo dedecore milicum  
 nostrorum, de quibus proditum ita scriptumque  
 est. Ne lanceam quidem tunc vnā ipsos infre-  
 gisse. Et foederati quidem haec aduersus Viceco-  
 mitem Metropolimque tentarant. Vicecomes  
 autem & Metropolitanī, odio vicissim & ira in  
 eos, haud multum dissimili fortuna quacunque op-  
 portunitas aliqua inuitarat, promotō bello hostilia  
 cuncta moliebantur: Florentinosque praesertim;  
 prohibitis terra marique conuiuiis, vrgebant  
 fame, ne ipsi quidem tam procul ab domo expe-  
 res eius calamitatis, maloque illo postea redire  
 domum coacti. Soluendae tamen obsidionis initia  
 primasque causas alij referunt ad Pontificis Boni-  
 facij consilium, & dignam summo Pastore actio-  
 nem; qui conflagrare bello res Italas videns, seque  
 sermonibus, & opinione hominum inter concito-  
 res eius esse belli, ad demendam tantam sibi laborem  
 animosque placandos, curas auctoritatemque conuer-  
 terit. Reperio venisse ab Roma de pace legatos  
 ad

ad Vicecomitem, principemque Legationis Ricardum Carraciolum antistitem Ordinis Hierosolymitani fuisse. Eo arbitro conditiones pacis agitatae depositaque arma: pacem ideo minore per Italiam laetitia acceptam, quia fuerit in conditionibus, ut ex eo anno, per quinquaginta annos dena millia florenorum nummum Carrariensis Mediolanensi tributum annuum ferret. Ea res invidia & dolore sollicitabat adhuc animos: & infida cernens omnia Vicecomes infidus ipse vicissim, renouauit cum Galliae Rege foedus, petens inde praesidium aduersus hostes alios, & adulatione ea hostem hunc ipsum fallens: ac tunc primum Gallica lilia stemmati Vicecomitum accessere, dum imperij causam cuncta seruiliter ad gratiam obsequiumque exquiruntur. Nondum exierat alter ab inquieta illa, & sollicita, inuicemque suspecta pace, annus, cum manentibus iisdem animorum stimulis invidia & liuore aduersus alienas opes, rursusque ira & metu in parte cui inuidebatur, ad noua foedera, nouasque coniurationes intenti erant. Ad Vincislaum Caesarem vtrinque missi in Germaniam Legati, pro caeteris exposcebant illius arma, vimque & auctoritatem ad vindicandam Metropolim, Vicecomitemque deiiciendum: pro Vicecomite precabantur, ut rem potius ipsam, quam inimicorum calumnias spectando, tueri vellet antiqua Caesarum beneficia erga domum gentemque eam, neue opes Imperij commodaret hominibus, qui clarissimae domus ruina subsidium

dium fidele adimere imperio conarentur. Miserrat.  
 Vicecomes inter legatos oratoresque suos Petrum  
 Philargum Cretensem Episcopum Nouariae, qui  
 postea Cardinalis, & Mediolani Archiepiscopus  
 fuit, deinde delato Concilij Pisani suffragijs ad  
 eum Pontificatu, Alexander est nouo nomine ap-  
 pellatus: eiusque viri decora, & si quid inter ma-  
 gnas virtutes habuit etiam humanae labis, postea  
 exponemus. Nunc, & in ea legatione caput rerum  
 ipse erat, & praeter communia cum socijs man-  
 data, ferebat illud seorsim, vt postquam ea confu-  
 rasset, quae foederatorum legati criminarentur;  
 offerret quantamcunque pecuniae summam Cae-  
 sari, si Ioannem Galeatium creare, & appellare  
 Mediolani Ducem vellet. Ac tanta fuit, siue viro  
 prudentia & dexteritas ingenij, siue pecuniae quam  
 ostendebat illecebra, Caesar vt spretis quae aduer-  
 sus Vicecomitem afferebantur, iuberet esse Medio-  
 lani Ducem, diplomataque & literas & quicquid  
 aliud rei confirmandae adesse oportebat, admodum  
 prolixè concederet, minime occultâ interim con-  
 trariae legationis querimoniâ, crebrisque susur-  
 ris, quodd, aut fides non habita sibi esset, aut recti  
 prauique discrimen omne confunderetur. Legati  
 Mediolanenses, re feliciter gesta, & impetrato,  
 quicquid princeps optare suus potuerat, laureatas  
 praemittere ad ipsum literas de faustissimo nego-  
 tiorum omnium exitu, quibus litteris allatis, con-  
 festim Aquilae insignia imperij, Principis iussu  
 Mediolani locis omnibus attolluntur: & adulatio



in Caesarem per cuncta oppida subiecta Metro-  
poli eadem erat. Paulò post, legati ipsi adfuere,  
Ciuitate erecta noui nominis admiratione, cuius  
honorem ex Germania afferebant. Nam vetera  
illa, Vicarius, & Rector, Dominusque, & Princeps,  
aut ministerij seruilis, alienarumque rerum titu-  
lum praeferebant, aut ambitiosè & callidè vsurpa-  
ta, veluti furta quaedam agnoscebantur. Etiani,  
cùm populi Duces dicerentur, leuis quaedam, &  
permissa in tempus, obsequijque magis quàm im-  
perij appellatio ea erat, quia nimirum poterat po-  
pulus idem Magistratum auferre qui dedisset.  
Nunc Caesar, vnà cum Ducis nomine, populos  
iplos, sceptraque, & diademata dabat, iturâ ad  
filios, & nepotes possessione imperij, tamquam  
parentes auique ipsorum in eadem fortuna nati  
fuisent. Adiunxerat Caesar redeuntibus domum  
legatis suum ipse quoque ad Mediolanenses lega-  
tum Benefium nomine, qui in publico Ciuitatis  
Concilio iudicium ac decretum id de Vicecomite  
suum exponeret, ipsumque coronaret. Is Bene-  
fius petito Senatu ( Senatus tunc erat octingento-  
rum Concilium ) dixit de Vicecomitum gente,  
Galeatijque meritis falsa et vera quae voluit, &  
quomodo Caesaris maiestas, principatum vrbs in  
ea fundare domo statuisset ciuium praesertim ipso-  
rum causa, ne vrbs & Metropolis tanta ob incer-  
tum ambiguumque regimen, exposita foret sedi-  
tionibus suis, cupiditati alienae, belloque semper  
infestaretur, siue appeterent eam externi, siue fa-

miliae intus potentes, fluctuans & vacuum aliquando Regnum occupare vellent. Nota Senatui necessitas erat, in quam prima quaeque patiendo & admittendo, deducta sibi publica res foret, nec responderi quicquam attinebat, praeter pauca illa solitae & meditatae adulationis: ut felix, ut laeta ciuitas esset prouidentia Caesaris & cura: ut ipsius de Vicecomite iudicium, atque consilium nihil ab ciuium singulorum existimatione & voluntate discreparet. In campo, qui Ambrosianae Basilicae circumiectus est, coronandi caeremonia Ducis peragenda erat. Ibi ad valuas, quae spectant in solis occasum, pegma amplissimum, & geminum ne pegmate tribunal adstructis ad ascensum gradibus, auro purpuraque contexta moles summa artificum contentione, principis iussu erigebatur. Eo perfecto opere, die quodam festo, qui dies fuit iv. nonas Septembris, procedit ab Iouis arce Princeps cum principum aliorum comitatu, hostiumque etiam ipsorum legatis. Namque cognita Caesaris inclinatione animi, omnes, ut praecipiam ab ea parte spem viderunt, aduersus praesentis necessitatis telum, quacumque per simulationem gratiam aderant duro ore, & nullam flagitij huius verecundiam, quod rupta nuper paceminitati & moliti, rursusque meditantes & molientes Galeatio & Mediolanensibus bellum, in pompa nunc agmineque adulationum conspicerentur. Incessere autem una cum Duce coronando, praeter caeteros, Theodorus Montisferrati Demarchus, Franciscus, & Iacobus Carra-

Carrarienses, Vgo Salucienſis, Antonius Vrbinas: re  
 perennium hoſtium nomina, qui, cum rerum facie ce  
 mutando identidem ſuam, animos ſemper eoſdem +  
 retinebant. Nihilo amicioribus incedeabant animis, ce  
 legati Veneti, legati Florentini, Peruſini, Piſani, ce  
 Siculi: Bononienses, Senenſes, Lucenſes, & vr- ce  
 bium populorumque aliorum, quibus laeta erat ce  
 res, ſiue fingere expediebat. Proceres vrbiſ, tum ce  
 ſimulatione laetitiae, tum ſuo equorumque cultu ce  
 externis illis aemuli, moeſtitia maiore ob patriae ce  
 ſeruitium, quod extrema illa caeremonia ſancieba- ce  
 tur. Circumſteterant tribunal delecti equites, totoq; ce  
 campi ambitu diſpoſita armatura varij generis fuit. ce  
 Ipſo in tribunali Caſaris legatus Principem huma- ci  
 niſſime exceperit: caeteri poſt eum ordine ſubibant, ce  
 & in ſua quiſque ſede collocabantur. Ocho Man- ce  
 dellus vexillum tenebat, ſectò in decuſſim ſtem- ce  
 mate, Gallica lilia, Vicecomitum anguem, Germa- ce  
 nicaſque Aquilas attollens, ſicuti per faſtum, & adu- ce  
 lationem inſignia illa contexta erant, Res diuina ce  
 facta eſt per Philargum eundem, qui miſſus antea ce  
 in Germaniam impetrauerat à Caſare iſta, eme- ce  
 ratque Principi ceremoniam hanc titulumque Ducis. ce  
 Sacrificio peracto Caſaris Legatus nouum ce  
 „ Ducem ita alloquitur. Maiorum tuorum facta, ce  
 „ & magnae tuae virtutes induxere Caſaris ani- ce  
 „ mum, vt Metropolim hanc prouinciāque Me- ce  
 „ diolanum, & ſubiectas vrbes, Ducis nomine poſſi- ce  
 „ dendas tibi, & poſteris tuis decerneret authoritate ce  
 „ & iure, quo haec omnia ad Sacri imperij maiesta- ce

„ tem spectant. Atque munus hoc familiae vestrae  
 „ meritis & fidei debitum, sicuti ad populorum,  
 „ etiam pertinere salutem censet maiestas eadem,  
 „ ita populos ipsos ob tanti beneficij memoriam &  
 „ fructum, fore nominis sui cum maiore beneuolen-  
 „ tia memores, principesque alios ad benemeren-  
 „ dum de Romano imperio talibus exemplis acius  
 „ incitari posse confidit. Nec hortari, nec monere  
 „ plura loci temporisque huius est, & impletum est  
 „ omne munus, hoc ipso quod te Caesar meus ele-  
 „ git. Nam & Diuina prouidentia Numenque illud,  
 „ cuius nutu singula, & cuncta reguntur, prius ele-  
 „ gerat, iam inde ab Auo & Atauo procreatum ex  
 „ super domina trice, tot hostium victorem, tanti  
 „ Populi suffragijs iudicioque approbatum. Beneficius  
 „ Caesaris legatus haec ita perorarat, eamque ora-  
 „ tionem excipiens Philargus Episcopus Nouariae  
 „ pari breuitate respondit, tanquam sui Principis no-  
 „ mine beneficium liberalitatemque Caesaris adora-  
 „ ret, & consentaneam ei verborum adorationi fore  
 „ rerum fidem erga nomen Imperij pollicebatur.  
 „ Prolata hinc diplomata recitantur, quae per fori  
 „ apices, & vocabula Aulæ, res vniuersa Mediola-  
 „ nensis, & singulae partes huius imperij, quae assur-  
 „ gunt in colles, quaeue expatiantur in campos,  
 „ prata, siluae, pascua, piscationes, venationes, ius  
 „ omne beneficiarium, ius omne bellicum, mos &  
 „ consuetudo ciuium, praemia & poenae, vitae ne-  
 „ cisque potestas cum Ducis titulo tradebantur sub  
 „ nutum arbitriumque Vicecomitis, pari erga poste-

ros eius munere, si qua legitima proles in domo esset, consuetudine & ritu, quo negotium illud aestimare potest hominum fama. Quibus recitatis, iuratum in Caesaris verba Vicecomitem ornant diademate, & baltheo, & peplo, equoque insidentem sub vmbellâ in Arenâ aulam inducunt. Diademati pretium perhibuere scriptores cc. M. florenorum nummum, & admiratione vanitatis in tantam chronographi nonnulli vanitatem euecti sunt, vt alia Principis gestamina, totosque eius diei apparatus ad calculum reuocando, summas annalibus ingentes cogerent, quasi calamitates & onera ciuium, raptaeque illae ex priuatorum laboribus pecuniae, aut publica aliqua felicitas, aut gloria aliqua Principis essent. Caeterum, eodem anno, quo peracta ceremonia erat, apparuit, quàm vilia essent ista apud infensos, et longe aliud agentes animis, quàm quòd legationum officio & simulatione vultus praetulerant: vel potius apparuit, quàm inuidiosum & graue spectaculum tanti splendoris, tantarumque diuitiarum fuisset apud eos, qui ne antea quidem perferre famam et auditionem opum earum potuissent. Nam Florentini statim incurrauere Pisanos, quibus oppugnandis, haud dubie Mediolanensium arma mouebantur; & Galliae Regem aggressi legationibus ac promissis, tamdiu fatigauere, donec relicto quod prius icerat foedere, nouum secum aduersus Mediolanenses iniret foedus, hostisque ex amico Vicecomitis fieret. Mox Gallus vi subita morbi deictus

Etus è potestate mentis , foedera omnia , regnumque ipsum , ac deinde vitam reliquit . Florentini tamen hostilibus perseverabant animis , & suo Marte rem Pisanam infestando , mitti nostros illuc exercitus coegerunt alienissimo tempore propter exortum aliud cum Mantuano bellum , quod etiam venientibus inde auxilijs grauius & difficilius quotidie efficiebatur . Ita coronato Duce , Metropolim , eadem quae prius vrgebant calamitates , & impensae bellorum : foederatique paulatim priores , ab alio alius , sollicitudine omneis & metu excitabantur , ne Vicecomes , firmato iam Caesaris auctoritate Imperio , nomenque Ducis adeptus , appeteret etiam Italiae Regnum , vnde finis dominationi , vel libertati suae . Pro se quisque mittebant auxilia Mantuano & Florentinis , vt si alterutra in parte Mediolanensem exercitum afflississent , successissetque aliquid , ad Metropolim deinde inuadendam strenue vniuersi impetum darent . Metropolitano autem in Hetruria copias , Florentinumque bellum regebant Ioannes & Albericus Balbiani fratres , egregia ante id tempus militari fama , & pari erga Vicecomitem fide , quam vtramque laudem eo bello corruerunt . Nam neque memorabile quicquam gessere , dispersi & vagi quacunque populationum & praedae vocauerat spes : & ingemiscente nequicquam ac reclanante Alberico fratre , Balbianus alter ad Bononienses defecit . Meliore aliquandiu fama , non tamen exitu meliore Iacobus Vernus Mantuano bello

datus

datus ab Vicecomite imperator agebat. Is enim quadraginta. nauibus longis Pado anni Mantua: nam classem aggressus, incenso ponte, quem Gonzaga ipse tuebatur, magnaue hostilium, triemium parte, vel capta, vel acta in fugam, tri-duo post, exposito milite in vltiore fluminis ripa cum castra posuisset in Mantuano septo, repente ob loca vlginosa, lutulenta, celique intemperiem, affectum morbo tabeque exercitum pene omnem habebat, ipse etiam aeger. Quam nacti occasio-nem foederati, cum subita illâ Mediolanensium victoria in metum adducti, Bononiae de rerum, summa consultaissent, copiasque suas ad opem, Mantuanq ferendam in vnum contulissent, citato agmine accurrunt, ac leui certamine caesis aut fu-gatis nostris, castra opulenta copia omnium rerum cepere. Vermus euasit ignominiae trepidationisq; + plenus, & vnâ cum eo reliquiae cladis ad Gua-stallam consistere. Clades inde alia vrbi Medio-lano erat exactio tributorum, quae tanto accepto detrimento Vicecomes ad reparandum bellum, ciuibz Cleroque immodica & intoleranda impo-nere coge-batur. Centena millia florenorum num-mum in singulos menses fisco Ducis exigebantur ante eum casum. Noua haec tributa octingento-rum millium summam expleuere, eaque tabes multas illustres familias absumpsit. Omnis publi-ca priuataque pecunia cesserat. hoc tempore in domum principis, & ciuium alimenta nouus belli apparatus occupabat. Reuocatur ex Etruria Al-bericus



bericus Balbianus cum eo exercitu, quem circa Pisas habebat: isque modico relicto ibi praesidio properus adfuit, stimulante praeter. Ducis mandatum etiam cura et dolore fraternae defectionis ut quod ille deliquerat, ipse emendaret. Praeterea, Facinus Canis, & Paulus Sabellicus, ille Casalenfis, hic Romanus, clarus uterque bello & formidatus, proposita ab Vicecomite spe rerum, ingentium, & amplissimis in praesentia stipendijs asciti copiarum duces, quae per urbem & per agros conscriptae subitario delectu, ad omneis hostium conatus opponebantur. His ducibus, & Iacobo eodem Vermo exercituum imperatore, Mediolanenses, ad Florentiam, ad Mantuam ad oppida alia, ita perculerant foederatos, ut Veneti, cum ancipites ad id seruassent animos, mitterent de pace legatos ad Vicecomitem, & omni sua auctoritate contenderent ne ultra dimicaretur. Ea res, & conciliandae pacis actio difficilior aliquantò impeditiorque erat ob irritatos superiore clade Mediolanensium animos, ob speratam nunc victoriam & ob conditiones, quae ab utraque parte proponebantur. Veneto tamen adnitente Senatu pactae sunt induciae decem annorum, fuitque hoc ita positum in conditionibus, Mantuanus ut Mediolanensi beneficiario iure subiectus esset, & testandi causa, Imperium se ab Vicecomite habere illud, vestigialis Metropoli fieret ipse posterique eius: quam conditionem accipiente Gonzaga, publicis tabulis consignata res est, testatoque perscripta.

Detegitur

Detegitur postea quamquam serò, domestica principis calamitas intestinusque proditor, qui diu consilia & arcana omnia aperiendo foederatis corrumperat saepe victoriam & tardarat, caulaque etiam fuerat cladis: neque vllae hostium conspirationes coniunctive exercitus tantum damni attulerant, quantum huius perfidia, & scelus. Pasquius Cappellus fuerat Cremonensis, qui sordido etiam, non solum humili loco natus, nullis honestis artibus imbuerat animum: sed ars ei scribere Principum, nomine epistolas, elusque seruilis ministerij occasione nouerat herilia cuncta, mentem & sensus animi intimos: quantum pecuniae domi, quid virium in exercitu, fida & infida omnia, quid in quamque diem pararetur, quid sponte sua quisque dies afferre posset. Haec omnia iam inde ab Galeario II. patre Ducis, diuturno vsu comperta proditor habebat, emptusque ipse prodigis ad talia solertijs hostium venditabat, hac ipsa merce opes principatus despectans infra suas. Prodidit eum Carolus Malatesta, statim vbi, pactis vt dixi, decennialibus inducijs, & sperata post inducias pace coeperat apud emptorem praecipue eum vilis contemptusque esse. Pecuniae eius apud nummularios repertae, & in fiscum redactae, subsidium opportunum exhausto tot bellorum sumptibus Principi fuisse dicebantur quasi per iocum: sed reuera etiam fuere. Ipse ad Ticinum intra confutatas densasque trabes (Caucae Ticinensi manet adhuc orribile nomen) coniectus claususque contabuit.

Luchinus Nouellus etiam hoc tempore mortuus est, ille, qui effusa matris impudicitia subditus Luchino principi partus, postquam ipsa ultro professæ est adulterium, aufugerat, prima iuuenta principis filius habitus, reliqua deinde vita extorris. Venetias, se se contulerat exul: ibique obiit factò testamento, cuius singula capita pietatem eius viri declarauere. Iussit cadauer suum deportari Mediolanum, atque in D. Francisci Aede sepeliri, quæ sacellum Innocentum nomini ipse olim extruxisset. Duodecim millia florenorum nummum apud numularios deponi iussit, vt eius pecunie fructus annui Carthusiensibus Monacis cederent. Ingentem aliam pecunie summam, quam Florentiæ habebat, legauit in eum usum, vt duodenæ quotannis adolescentulæ, quarum ob paupertatem pudicitia periclitaretur, dotem inde acciperent, nuberentque. Multos porrò fundos, quos possidebat in agro Mediolanensi, legauit Carthusiæ, quam ad Garignanum Ioannes Archiepiscopus instituerat, adiecitque onus, vt ex fundorum eorum fructibus Monasterij aedes olim inchoatæ exstruerentur: absoluta aedificatione, fundi ipsi Monacis alimenta præberent atque adderentur in reliquum Monasterij patrimonium. Corneredi, & Meferi arua Monacis eisdem reliquit ea conditione, vt ex bonorum eorum fructibus, pauperibus benigne fieret, darenturque dotes nubilibus puellis, quibus id subsidij dandum esse patres censerent. Luchinus Nouellus Venetij moriens hæc legarat

legarat institueratque anno CIOCCCXCIX. vnde publica in exulem misericordia, & renouata in feminam indignatio, quae dignum hunc honestiore matre partum professione illa sui dedecoris infamasset. Eo anno versa penitus est Insubria in religionem, quae non multum à superstitione abesset, idque ab re ipsa Misericordiae tempus appellatum. Initia religionis eius profecta, e Subalpinis: & non magni primò coetus, paulatim assumendo subinde alios, in eam multitudinem peruenere, vt agmina complura fierent, ideo, quia non idem locus alere simul vniuersos posset. Admisti mulieribus viri, grandioribus minores, sacri quoque profanis ad quindecim ferè millia mortalium incessere nudis pedibus, inuoluti linteis, itaut pars exigua, quæ cernerent, aperta relinqueretur. Trina quotidie templa obibant canendo sanctissimas preces, quarum formam Discipulis suis Christus ipse praescripsit. Id initium erat: dein Angelica salutatio subdebatur: deinde nomenclatura Sanctorum, aliudue quippiam ex ijs, quae D. Bernardus pio carmine est modulatus. Vt ad quemque locum pagumue accesserant, concionabundi Sacerdotes, conabantur suadere quamplurimis, vt sese in agmen conferre suum vellent. Digredientes inde, carmen illud concinebant: STABAT MATER DOLOROSA IUXTA CRUCEM LACRIMOSA: tum caeterae quas dixi preces ordine sequebantur. Et quacunque duae sese viae interfecarent, strati humi, pleno sonitu

ferientes aethera, diuinam misericordiam implorabant: inde Misericordiae tempus appellatum. Pauci primò fuerant, deinde paucis aggregando sese alij, numerum & populum eum, quem dixi, effecere. Tradunt temporum eorum scriptores, multas implacabiles inimicitias per homines illos esse sublatas, multos à flagitiosa vita perditisque moribus traductos ad perfectionem & salutem. Addunt etiam miracula more suo: visas in sublimi concurrentes inter se acies, solemque puro ac sereno celo languidum ac prope emortuum iubar per dies aliquot praetulisse: Rursus quasi scintillantem esse conspectum, ac deinde, fornacis modo globos igneos cum fumo ac vapore euomentem, in citreum, & luteum, ac denique in atrum colorem concessisse: speciemque eam Antonius Mirabellus se ait vidisse cum Laudae vicarius esset. Veluti prodigia imminentium Vrbi calamitatum haec accipiebantur, sed ea quae deinde insecta sunt, fecere, vt certissimum & vnicum princeps ipse prodigium fuisse diceretur. Iam ille supergressus omnium fere principum imperia & opes, domitis hostibus, data pace quibus voluerat alijs illigatis induciarum vinculo, capta Vmbria, missis in Etruriae ciuitates praetoribus, Bononia etiam recepta, illa tantarum dimicationum vrbe inibi erat, vt Italiae rex coronaretur. Treis adulti filij: subnixa domus consanguinitate omni, quae, vel ad praesidium, vel ad splendorem expetenda esset: ipse quinquagesimum quintum annum ingrediebatur

grediebatur in tanta gloria nondum senex . Et cum ita constituta fundataque cuncta ei essent , prope aderat , cum deficere ab Metropoli nomineque Vicecomitum singulas paulatim imperij partes , & imperium denique totum extincta omni stirpis huius virili sobole , per superstitem vnam feminam in peregrinam aliam transferri domum oporteret . Sed Princeps ignarus , tum appropinquantis sibi mortis , tum rerum earum , quae post mortem futurae essent , maiestate animoque regio cuncta agebat : dimicantibus inter se Regum alijs arma interponebat sua , cum alijs ipse gerebat bellum . Constantinopolitano Imperatori suppetias aduersus Turcarum principem Amuratum misit , cum petendi auxilij causa Mediolanum occultus ille venisset . Robertum Bauarum , nouum deiecto Vincislao Caesarem inuadendae Metropoli iam transgressum alpes , commisso in Cenomanis praelio retro compulit Tridentum . Pontificatus quoque Maximi curam atque defensionem amplexus , consilia Regum externorum de creando suae nationis Pontifice , dissimulato negotij eius intellectu , discussit arte , quam ipsa temporum conditio suppeditabat . Cum enim Rex Hispaniae , Rex Gallus , atque his interiecti transalpini alij principes , missa in Italiam legatione , verbis quidem & specioso ad omneis titulo peterent Ecclesiae Catholicae pacem , finemque dissidij , quo Pontificatus eo tempore distrahebatur , re autem ipsa molirentur id quod dixi , & Concilium

lium Italiae principum dari sibi postularent : Vicecomes, quem praecipue legatio ea fatigabat, huiusmodi responso expediuit rem. Totam esse pestilentia contactam Italiam: non posse Principes absque manifesto exitio congregari: vbi calamitas ea decessisset, Reip. consulturos. Ita periculosa res, quae sub salubri titulo tentabatur, Vicecomitis huius prouidentia & astu discussa est. Florentino etiam bello, expugnatione eius vrbis finem impositurus erat, cum ipse moritur. Mortuus est ad Melinianum decimo ab vrbe lapide, quo sese contulerat in pestilentiae metu: formaeque mortis comparatus est omnibus, qui vnquam sancte decessissent. Tanta ei sollicitudo vitae alterius, & ab eadem magnitudine animi, qua gesserat imperium, cura tanta extremi actus fuit. Cadaver in Monasterio Viboldoni collocatum est interea dum exequiae regali pompa adornarentur. Exequiarum autem apparatus, & pompa fuit huiusmodi. Familia Praetoris, & familia Praefecti vrbis atrata praeibat: sacri ordines cum sua quique Cruce sequebantur. Post sacros ordines ibant, qui suo quemque loco continerent, euagationesque prohiberent. Ad templi maximi valuas constitere milites, vt quietus ac sine tumultu ingressus praestaretur: alij toto templo ad Aram vsque dispositi curam eandem agebant. Equus Principis cum galea & crista gentilitijsque insignibus, & armatura, qua ille vti solitus fuit, ad valuas vsque perductus, ab ijs qui tenebant, traditur alijs, ac  
deinde



deinde per manus alijs, eodemque ordine, varia  
arma, & vexilla portantes equi circa templi val-  
uas traditi subducebantur. Cohors deinde alia  
nobilium virorum sequebatur conferuandi ordinis  
causa: post cohortem eam Gabriel Maria Princip-  
pis filius ibat cum longo legatorum ordine, quos  
Ciuitatum, & Rerum. Principes miserant. In eo  
agmine fuere Pontifices & Abbates, & pleraque  
alia sacrarum dignitatum nomina, prout quemque  
suus animus erga defunctum, vel suae spes apud  
heredem, vel aliena mandata exciuerant ad lugu-  
bre id munus. Post eos procedebant legati ciui-  
tatum regionumue subiectarum Metropoli, &  
ex regionibus ciuitatibusque ijsdem Collegia Mo-  
nachorum. Clerusque vniuersus. Miserant eae-  
dem ciuitates equitum agmina splendidissima,  
quantum in atro illo & funesto colore esse po-  
terant. Hi Cleri sui vestigijs insistentes, bini  
quaternique vehabantur. Proximi erant octo  
regia ferentes vexilla, post quos, duo millia  
hominum vadebant cum facibus accensis, &  
oblonga pullaque veste, quae pectoris medio  
insignia Vicecomitum gentis aurata praeferebat.  
Archiepiscopus deinde Mediolanensis cum purpu-  
ratorum manu totoque Templi Maximi Clero  
feretrum anteibat. Feretro succollabant principes  
viri succedentes inuicem integri fessis, & supra id  
auream vmbellam alij procerum attollebant. Cir-  
cumfusa feretro erat alia turba ferentium cly-  
peos, insigniaque & vexilla: & agmen extremum  
claude-

claudebant duo millia hominum cum ardentibus  
 taedis. Ad templi valuas legati principum, &  
 ciuitatum nominatim citabantur, acceptisque fu-  
 nalibus ad Aram vsque procedebant: inde flecten-  
 tes ad sinistram proximo diuerticulo in aulam  
 tetendere. Ibi funebri oratio habita est à Petro  
 Castelletto Dominicano diserto temporibus illis  
 homine, & propter vitae etiam dignitatem claro.  
 Testamentum apertum heredes habuit Ioannem  
 Mariam Anglum, Philippum Mariam Anglum,  
 & Gabrielem Mariam Anglum: aliaque inerant  
 nihil ad Remp. attinentia: sed adnexa religionis  
 „ & patriae rebus haec fuere. Ticini Monasterium  
 „ heredes mei extruunto Carthusiensi Ordini, idque  
 „ Monasterium descriptis ex ordinis eius disciplina  
 „ cellis, quatuor & viginti Monachorum ample  
 „ capax fiet. In Monachorum alimenta florenos bis  
 „ mille quingentos heredes mei quotannis erogan-  
 „ to. Monasterium illud uti quamprimum aedifice-  
 „ tur, decem millia florenorum annua e Sancti  
 „ Columbani praedijs assignamus. Aedificatione  
 „ absoluta, volumus bonorum eorum fructus in-  
 „ sumi dissoluendo aeri alieno, si quid alicui debe-  
 „ mus. Dissoluto aere, quod reliquum erit ex fru-  
 „ ctibus bonorum eorum in pauperes diuidetur.  
 „ In eo Carthusiensi templo post Aram maximam  
 „ extruetur marmoreum monumentum appositis  
 „ gradibus, effigiesque nostra item ex marmore  
 „ solio insidens fiet. Galeatio patri marmoreum  
 „ monumentum fiet Mediolani in Templo Maximo,

„ in eumque tumulum ipsius ossa transferentur .  
„ Collocandis D. Augustini reliquijs arca inchoata  
„ sumptu nostro perficietur . Sancti Spiritus Aedes  
„ decem Canonicos habebit cum antistite suo , eaq;  
„ aedes Ticini à nobis inchoata absoluetur , & ali-  
„ menta idonea Canonicis heredes nostri praebe-  
„ bunt . Ad eandem urbem , trans Ticinum , quā  
„ ponte iungitur flumen D. Antonio aedes ponetur  
„ sumptu nostro : ea Sacerdotem cum Clerico habe-  
„ bit . Romae D. Mariae Virgini Templum aliud  
„ aedificari volumus , eique templo Sacerdotes no-  
„ uem praeesse , quos alent atque sustentabunt hae-  
„ redes nostri . Veronae tria sacella extruentur ,  
„ Evangelistae Lucae vnum , aliud Martyri Geor-  
„ gio , tertium sanctissimae Trinitati , eaque  
„ sacella singulos cum suo Clerico  
„ Sacerdotes sumptu nostro  
„ habebunt .

# IOSEPHI RIPAMONTII CANONICI SCALENSIS

CHRONISTAE VRBIS MEDIOLANI  
HISTORIARVM AB METROPOLI CONDITA

DECADIS III

LIBER IIII.



**I**OANNE Galeatio mortuo, duodecim viri, quos ille filiorum adolescentiae rectores instituerat; exigunt publice sacramentum in verba Ioannis Mariae, nouumque Ducem eum, deplorata in perpetuum libertate Mediolanenses acceperunt. Initia noui principatus infausta, & turbulenta calamitates infecuturas haud obscure portendebant, cum, & ipsae per se ciuitates ad rebellionem spectarent, & apud veteres Vicecomitum inimicos consilia euertendae Domus acerrime infensissimeque agitantur. Principes autem authoresque talium consiliorum, Florentini erant adducto in sententiam mentemque eandem Pontifice Maximo propter antiquas culpas huius domus, & contumaces semper animos, quoties inter se discrepant Apostolicae sedis auctoritas, & cupidines augendae dominationis. Recens insuper ira Romanum stimulabat in Bononiae urbiumque aliarum raptores, nec leue incitamen-

tum origo ipsa domus imperijque huius erat . Itaque, dolore & indignatione ardens contulit in Vicecomitum perniciem arma cum Florentinis , & urbem Ferrariam , misso in id Cardinale legato Estensi firmavit ea conditione, vt gerendo aduersus Vicecomites bello imperator ille adefset . Iacobus Rubeus Veronae Episcopus cum Petro fratre ad Parmam inuadendam cuncta moliebantur . Alberici Balbiani, & Vani Gozadini defectio his adijcitur , qui maximis ab Ioanne Galeatio beneficijs aucti, non eo solum aggrauabant inclinatas res, quia partas hic opes auferebant secum, sed multò magis quia desperasse de Metropoli imperioque hoc videbantur , & notitiam arcanaque multarum rerum ad hostes transfulerant . Videntes ista duodecim viri rectores adolescentiae Vicecomitum, consilio inter se habito , placandum in primis esse Pontificem statuerunt , ac rogauere Mediolanensem Archiepiscopum , vt Principis , & Reip. nomine super ea re legatus ire Romam vellet . Eo suscepto munere ille cum iuisset , Romanas reperit iras grauiores multo quàm antea vnquam fuissent . Toties rebellis vna domus , & vna toties damnata Ciuitas angebat ibi indignitate animos, quòd simulatque veniam impetrassent, ad pristina relaberentur . Non modò auditam parum benigne legationem , sed ipsum quoque legatum in manifesto discrimine esse versatum ferunt . Post Archiepiscopi reditum, calamitas inuasit urbem, quae , & fuit ipsa malum atrox , & mala deinde alia conciuir ;

ac de eo casu quam breuissime absoluam sicuti proditum est ab ijsdem illis, qui in parte tantae calamitatis fuere. Franciscus Barbauaria erat vnus de duodecim, quos moriens Ioannes Galeatius rectores filijs, vt dixi, instituerat. Hunc iusserat caput esse rerum consiliorumque omnium, eique vt aula tota pareret, sanxerat extrema sua voluntate, quam rescindi violatque nefas esset. Is homo, siue intemperanter abutendo potestate summa, siue communi eorum conditione, qui supra caeteros euecti intensius aequalium olim oculis adspicuntur, facta per nonnullos coniuratione destinatur ad necem. Coniurauere in eum Antronius Vicecomes. Ioannes & Gauatius Aliprandi fratres cum parente suo Galeatio, Porri fratres Antonius & Galeatius, alijque complures, prout horum, quisque, propinquitate vel amicitia fidos sibi assumpsit. Statuerant impetu in aulam facto trucidare ibi Barbauariam, parauerantque idoneam manum in id ipsum, quae aduersus praetorianas etiam stare cohortes posset. Haec agitari consilia, cum sensissent, Catharina mortui Ducis vxor, & Barbauaria Principem iam in vrbe locumtenens misere Ioannolum Casatum ad Vicecomitem, quem caput esse coniurationis compererant, vt ex eo sciscitaretur, quae causa ipsi turbandarum rerum, quidue dolens, atrox in Barbauariam consilium suscepisset. Vicecomes, conspecto Casato protinus expedit ferrum, hominemque obtruncat. Tumultus inde peruadit urbem, & dum

dum ciues ad eum casum pro se quisque arman-  
tur, Clerici quoque sumpserant tela : direptio sa-  
crarum aedium fiebat, & in Archiepiscopi aulam  
peruenerat terror. Catharina principum mater  
apopletico stupore semimortua imposita raptim in  
currum, vehitur per urbem, sedatoque parumper  
tumultu cum liberis recepit se se in arcem Iouis,  
& pax reddita esse rebus videbatur. Postero die,  
concitante populum Antonio Porro, sumpserunt  
iterum arma promiscua ciuium, & Clericorum mul-  
titude, rursusq; prodeunte Catharina sedatur tu-  
multus. Eaedem tumultuandi, & quiescendi vices  
per dies aliquot repetitae, donec Barbauaria ipse  
causa & initium irarum aufugit. Non tamen ea  
fuga lenierat animos : quotquot ex Barbauariae  
factione Mediolani residui erant, occidebantur in  
illius contumeliam, satiabantq; innoxiorum etiam  
caede iras. Sed & focij impotentiae ministriq; iniu-  
riarum dominante antea illo multi merito nunc plec-  
tebantur, haud satis regente capita inuisa honore  
religioneue vlla etiam si Magistratibus sacerdotijsq;  
amplis praeessent. Ambrosiani Abbatis caedes,  
ob loci eius dignitatem magis quam publico vllo  
luctu insignis fuit. Praefectura illa Monasterij  
Ambrosiani magnas opes authoritatemque parem  
opibus adiunctam sibi per ea tempora habebat.  
Fortè Monachorum suffragijs mandata fuerat ho-  
mini, qui litteris quidem, & innocentia vitae me-  
reri debuerat eum gradum : caeterum debuit idem,  
sicuti res monstrauit, esse lento ingenio & segni :  
ad



ad repellendas iniurias; siue ne violentia quidem  
vlla ipsius valuerit aduersus armatos, & dominan-  
tes. Hunc Barbauaria loco cum deiecisset, impo-  
fuerat Monasterio quem voluerat ipse Abbatem è  
familiaribus suis temerarium hominem, & absur-  
dum immemoremque fortunae prioris, qualia fer-  
me sunt hominum ingenia, qui ab humili loco ad  
commoda aliqua processere. Praeterquamquod  
erat e factione Barbauariae, offendeat etiam ipse  
moribus suis animos, & legitimi Abbatis solitudo  
squalorque non paruum incitamentum erat, quò  
magis adulterinum hunc auersarentur. Interfectus  
auidissime est, nec alia tam grata in publicum cae-  
des fuit, Abbasque prior cum magna bonorum  
gratulatione restitutus in suum locum. Sed prius,  
facto in Monasterium inpetu, diripuerant illic  
omnia, crudeliterque debacchati fuerant, laceran-  
do & perfringendo quae noluerant aut non po-  
tuerant auferre. In reliqua multitudine furor par-  
tium tantò atrocius defaueijt, quantò copiosior  
promptiorque ibi furori materies erat. Neque capita  
tantummodo petebantur ad necem: infantes ipsi  
ad parietes allidebantur, vt quamque diuersae  
factionis domum ingressi factionis alterius homines  
erant. Ac tanta fuere odia, vt vulnera & caedes  
in leui haberentur, nisi etiam de honestamenta do-  
mibus inuicem addidissent. Reperi in annalibus id  
quod inuitus referam, nollemque tetigisse: sed  
historiae fides cogebat. Mediolanensem Archiepi-  
scopum tradunt in parte tam atrocium inimicitia-  
rum

rum fuisse, quemque in tam turbidis atque funestis rebus haud aliter quam conciliatorem animorum nominari oportebat, hunc inter initia causarumque malorum prodidere Archiepiscopus erat Petrus Cretenfis ille de quo antea memorauimus, primò Minorum Franciscanorum Antistes, dein Vicetiae, tum Nouariae, nunc Mediolani pastor animarum, ac paullo postea Cardinalis futurus, vt ab hoc denique gradu ad Pontificatum Maximum suo tempore extolleretur. Et erat ille fortasse quietus ac probus, sed conditione temporum effugere non potuerat quin sese turbis immisceret. Is, vnà eum Antonio Porro decemque Consiliarijs, quos Catharina sibi assumpserat, coepit ipsam adeo infestis modis obsidere Catharinam, vt ea captiuæ prope instar haberetur. Appositis custodibus domi clausam tenebant, irritumque erat quicquid ipsa inconsulto Archiepiscopo consiliarijsque caeteris in re etiam domestica decernere voluisset. Si forte illa sese commouerat, volueratque prodire, populus ad arma concitabatur, ipseque Archiepiscopus inter populi concitores erat. Sex in vrbe praefectos constituerant, ad quorum nutum arma caperentur. Hi simul atque inclamassent, tota in armis erat ciuitas, & more belli cuncta agebantur. Itaque tantae clades & miseriae vrbs, animos fecere prouincialibus ad tentandam ab Metropoli defectionem, quam in cupiditate animisque omnium iamdiu inclusam reuerentia & metus imperij comprimere ad eam diem ac retardare potuerat. Spreue-

re primò , & abiecere maiestatem Cremonenses  
semper laeta ciuitas contumaciae fama , & pernicie  
saepe sua gloriam eam quaerens . Tum Brixia  
Coenomanorum haud absimilibus ingenijs exem-  
plum secuta est , exemploque ipsa suo alias ad re-  
bellandum ciuitates incitauit . Rebellauere deinde  
agmine vno, Bergomum, & Crema, & Laus Pom-  
peia, & Placentia, & vrbes aliae certamine factio-  
num prolapsae etiam ipsae ad rabiem ciuiliaque  
arma velut aemulatione in Metropolim à qua  
deficiebant. Bononiam & Asisium, & Perusiam,  
tutores & consiliarij Vicecomitum Pontifici tradi-  
dere vltro ob metum, quia non aliter quàm placato  
Romano sisti posse impetus ille praecipitantis  
imperij videbatur . Interim Catharina principum  
mater, quam Archiepiscopi decemque consiliario-  
rum saeuicia captivae instar habitam fuisse diceba-  
mus, die quodam eluctata custodias, discessit ex au-  
la, & sese rursus in arcem abdidit, quo casu atro-  
cius quàm antea in vrbe tumultuatum est. Namq;  
vti populus vniuersus erat Archiepiscopi, decem-  
que consiliariorum, ad eum motum consurrexere  
omnes, iamque manifesta defectio ab nomine, &  
domo Vicecomitum fiebat. Strata passim humi ca-  
dauera nobilium virorum reperiiebantur, & capita  
partium demersi in cloacas iacuerunt. Praecipue  
commouerat animos atque perturbabat dira illa  
species, cum Antonius, & Galeatius Porrus, &  
Galeatius Aliprandus principes partium in foro  
reperi essent capitibus abscissis, & ad latera collo-  
catis

catis cum tanta insuper vulnerum foeditate, ut eorum ora non agnoscerentur, donec nusquam viui reperti, cadauerum denique coniectura innouere. Iacebant insepulti, nisi Augustiniani fratres ob necessitudinem fortasse aliquam, facto repente agmine sustulissent corpora, & in D. Marci Aede tumulassent. Cum ea deformitas rerum omnium Mediolani esset, conuentus ciuium habitus est tentandae pacis, si fortè respicere cum aliquo honesto sésu laceratam indigne patriam possent ijdem illi, quorum acerbitate lacerabatur. In eo octingentorum conuentu Christophorus Castellionaeus rudi facundia concionem habuit, cuius initium homines fortasse illi admirati sunt, aetas nostra irrideret. Cum enim ei propositum esset hoc suadere populo, ut Barbauaria reuocaretur, ita est exorsus. OMNIA PER IPSVM FACTA SVNT ET SINE IPSO FACTVM EST NIHIL. Quae verba, praeterquamquod absurde potentiam exfulis extollebant, etiam irreligiose translata ex diuinarum literarum oraculis ad quotidiani sermonis consuetudinem erant. Barbauaria tamen est in patriam reuocatus summo Ciuitatis vniuersae studio, cum interfectis, qui capitalissime hominem oderant, horum etiam assecclae mutassent animos, & tota illa coniuratio dissoluta esset. Prodiere venienti obuiam principes vrbs, atque ipse inter caeteros Archiepiscopus vnà cum Francisco Gonzaga Mantuae Principe prodijt effusa in exulem adulatione tamquam,

Nn                      amores

amores & delitiae spesque & salus vrbis in capite  
iam illo essent. Sed restituto in hunc modum Bar-  
bauaria, cùm profectum esse aliquid ad Reip. tran-  
quillitatem videretur, casus repente infestus desi-  
derabiles fecit atrocitate sua priores turbas potius  
quàm vt ex breui & infelici pace, sanguine rursus  
ciuili cuncta inundarentur. Ab latrunculi supplicio  
vnus orta est causa irritandi Guellicos Gibellinosq;  
furores, armandae ciuitatis aduersus principem prin-  
cipi ciuibusque sensum & mentem adimendi, dum  
ille Maiestatem inperij facto fortè vno violatam,  
hi priuatum dolorem atque alienas iras vlciscun-  
tur. Moncinus erat quidem trucis audaciae gla-  
diator, & latro pessimus, minister & assecla Casa-  
torum, cuius manu nonnullae palam, plures ex  
occulto patratae caedes fuerant, nulla ipsius irâ  
nullius inimitijs, sed ad nutus tantummodo he-  
riles ne excideret mensa, & stipe qua alebatur.  
Et rumor erat, familiaritate salarioque eo minime  
contentum exire saepe noctu per diuerticula vrbis  
telo socioque succinctum ac spoliare si quem,  
solum inermemque nactus esset: saepius circa su-  
burbanam viam inselsâ latebrâ dare ex tuto im-  
petum in viatores, & spolia in latebras alias refer-  
re. Venditabat quoque sese, & venditabatur ad  
facinora, & artes hominum interficiendorum quem  
quisque ob metum siue per iram occulte sublatum  
vellet. Hunc Moncinum, post clandestina multa  
flagitia compertum vnus denique flagitij, & ab eo  
indicio, totius anteaetæ vitae manifestum danna-  
uerant

uerant iudices; vt laqueo publice exanimaretur. Statuto igitur die, cùm ad supplicium ducendus esset, tota illa familia Casatenſium, conſiſſitis vndique amicis haud contemnendo agmine Praetorium irrumpunt, & eripere carnifici ſatellitibusque Moncinum conantur. Fit ob eam rem tumultus ingens, ac diſtrictis vtrunque gladijs, pro latrone pugnant, qui ſaluum, quiue ſupplicio affectum, volunt: neque, aut iuſtitiae cura iſtis, aut illis amor tam indigni capitis: ſed ſatellites, eandem ſibi furcam, ſi ereptus foret, Caſatenſes infamiam, niſi ereptus timebant. Perlato in aulam nuntio, mouetur ſtatim ferocia iuuenis principis, vt eat ipſe, & quid inſolentiae ſit illud coram ſpectet. Vbi princeps, & cum eo tela praetorianorum in conſpectu tumultuantibus fuere, creſcunt animi ſatellitibus, Caſatenſes ab fuga ſubſidium petunt, & in P. N. regionem trepidi conglobantur. Concaluerat Principi pectus, non iam ſolum ab audaciam eorum, qui tantum facinus in conſpectu penè ſuo tentaffent, ſed etiam ob trepidationem eorundem & fugam. Veſtigia fugientium cum praetoriano milite raptim inſecutus, ad uſque D. Petri Aedem adequitat, quae corrupto cognomine Cornareda Aedes dicitur ob depictum olim ibi cum piſcatorio rete Apoſtolum. Portae Nouae proceres conſpecto circa meridiem principe, ſtrepituque abeuntium, & perſequentium audito, tempus in ſuſpicionem, cauſam in crimen, arripuere: ratique ſaeuire mero & petulantia ſua

iuuenem, tela e fenestris in eum coniiciunt. Et ille quidem ad eum casum attonitus anhelusque metu sese in aulam recepit, stetitque eo die tumultus intra Moncini tantummodo caedem, quem carnifices praetorio in ipso ex eminula quadam trabe suspensum strangulauere iniecto tantò violentius ac saepius pede, quasi ob iram discrimenque principis, etiam ipsos irasci oporteret. Casatenfes verò cum affeclis suis, hoc ipso desperata venia & salute, quòd Principem in id periculum adduxissent, ad extrema & abrupta omnia conuersi Franciscum Capitaneum: & Othonum Rusconum rebelleis hostesque Vicecomitis eosdem, & rebellium exulumque aliorum duces, ad spem capiendae vrbis excitos adiungere sibi, validam & magnis rebus aptam manum hominum, qui ipsi ad rem gerendam nihil aliud quàm auxilia aliqua circumspiciebant. Postquam desperati isti nouos sic inuenere desperatos, duo agmina sibi, duos incessus parant. Agmine vno fauces aditumque Portae nouae occupant, altero persultant vrbis vias, & viuere Guelfos, trucidari Gibellinos iubent. Quae vbi nuntiata principi, confestim ille, misso per urbem praeconio edicit, vt quicumque saluum esse Vicecomitem genus velint, in Arena aulam eant armati: qui non adfuerint, se eos pro hostibus esse habiturum. Ciues, ad eam vocem idque edictum, haerebant attoniti haud minus quàm ipso rebellium incessu & clamore. Nam neque pro principe armati inireque aulam volebant.



bant , ne motu eo impedirent , si quid fortè boni ad res nouandas vrbemque liberandam tumultus ille afferret , neque restando , & manendo audebant animos nudare in manifestam vltimamque perniciem , si expectatione illa destituerentur . Inter manendi metum & eundi recusationem arreptis quae cuique ad manum fuerant armis , congregabantur inter sese Guelfi & ad loca subinde aliqua subsistebant quasi iam iamque ituri , ceterum inuito consilio expectantes , quorsum res ipsa eua-  
fura esset . Nec minus apud rebelles tumultuatoresq; ipsos trepidabatur . Videbant ciuitatem vniuersam torpere metu , & sese iam ed progressos ; vnde receptum habere nullum possent . Cursitando , & inclamando , ad Pontem veterem deuenere , inde in Cusani angiportum flectunt , hinc vsque ad Malum angulum agmine infausto progrediuntur : & alleuauerant paulisper animos conspecto Gauatio Reina suae factionis homine , & duce Portae Vercellensis . qui conscenso equo , per omneis vias ibat vociferans , vt omneis se se domi continerent : sic iubere principem . Ad malum angulum aedes fuere vnius insignis Guelfi , quem Cautum Concurrentem appellabant . In eas sese aedes abdidere ad quadringentos , & sumptâ albae crucis notâ , quod insigne Guelforum erat , coniurant , quandoquidem in eam necessitatem ventum sit , aut mori cum gloria , aut ferro salutem sibi , patriae libertatem inuenire . At Vicecomes , in eo discrimine familias ciet , de quarum fide minime ambigebat

ambigebat, armarique singulos iubet. Confestim  
 armantur Pufferulae, Cribelli, Lampugnani, Cai-  
 mi, Landriani, Corij, Bosij, Badagij, Risij, Mai-  
 ni, Marliani, Mirabiliae, Stampae, Arluni, Galla-  
 rati, Mandelli, Vicomercati, Burri, Mantegatiae,  
 Ferrarij, Orombelli, Dugnani, Salae, Tuscani,  
 Gambaloitae, Plati, Garbaniatenses, Oprini, Stra-  
 tae, Moroni, Seluatici, Galerani, Petrasanctae,  
 Arconati, Craffi, Meltij, Basgaperij, Crotti, Saxij:  
 quae familiarum nomina sic retuli, ne suus vn-  
 quam nobilitati honos in vlla nostri operis parte  
 substractus fuerit. Urbano huic exercitui, Iacobus  
 + Cruceius, & Barptolomeus Amiconus duces fuere:  
 simul Vicecomes ipse cinctus latera fidissimis  
 ad omnia quae in tali casu essent agenda, & dis-  
 ponenda, obibat. Cumque fortissimorum viro-  
 rum ista acies obequitaret aedibus, quas Guelfi  
 rebelleis ceu arcem infederant, erumpere ausi illi  
 quasi phanatica acie euasere per cateruas arcu ei-  
 circumfusas, nec fere multò plus acceperere damni  
 quàm intulerunt. Pugna deinde cooritur acrior:  
 tantò, quò magis, eruptio illa, hinc audacia, hinc  
 pudore animos accendit. Cadunt vtrinque multi,  
 sed plures in rebellium parte, quia pars altera, &  
 numero, & animis crescebat, aggregantibus in  
 singula momenta sese nonnullis, vbi dimicantem  
 in eadem acie principem, & spem, quae primò  
 suspensos tenuerat, esse irritam vident. Inclina-  
 ri deinde paulatim, & dissipari fugâ rebellium  
 agmen, insequente ferociter & vrgente agmine  
 altero

altero donec ad D. Anastasiae Aedem, qui fugiebant, quique sequebantur, pars utraque pleni vulnerum, & caedis peruenere. Ibi, non iam earum, quas retuli, familiarum homines, quique sese postea adiunxerant, sed tota illa regio in perditos profligatosque Guelfos pugnabat, nisi si caedes erat ea potius quam pugna. Et late spatietur ibi via in campi fere modum, quò laxius liberiusque caederentur, nulla sicut inter angustias declinatione & impedimento, sed obseptis omnibus effugijs, & diuisa utrinque acie, conspectis hostium amicorumque capitibus. Euasere pernicitate equorum, & solertia sua nonnulli, paucos iniectis vinculis abduci princeps in custodiam iussit, & in furcam laqueumque referuari ne tam honeste perirent. Per octo amplius horas pugnatum est, eiusque tumultus dies fuit x. Cal. Iun. anno 1404. cruento scilicet illo, & tantis publicis calamitatibus insigni. Postridie eius diei, quo victoria haec parta de rebellibus erat, supplicia de captiuis sumebantur conspectiora eò, quia nobiles viri poenam eandem subibant, quae latrunculo vni irrogata tam funestas in vrbe turbas excitarat. Praecipua inuidia faeuitiae principis fuit ob Casatensium necem, qui passim pependere furcis, haud tamen sine multo apud maleuolos irrisu, quòd Moncini illius antea liberatores, ignominia nunc, & dedecore mortis Moncinum ipsum referrent. Qui ex gente domoque ea opulentiores erant, praesenti pecunia tenuere, ut datis potius ceruicibus ob-

trunca-

truncarentur . Per aliquot inde menses , rarus absque insigni aliquo supplicio dies erat, & postquam carnificina haec exhauserat omneis captiuos , tamquam in acie rursus occidebantur familiarum earum homines , quae cum Casatensibus necessitudine aliqua coniunctae essent . Biliorum maxime familiam extinguere omnem , princeps volebat , infestus huic nomini , propterea quod , sicuti adiutores ad rebellandum Casatensibus fuisse occultos constabat , ita supplicio cladeque istorum irritati , tantoque magis infidi habebantur . Eadem causa spoliationis & excidij nobilibus alijs familijs fuit : Abbasque D. Ambrosij , de quo pulso , dein restituto demonstrauius , ob nonnullam earum rerum suspicionem occiditur . Latrunculi Moncini furca , & familiae vnus temeritas haec mala attulit vrbi ; cum ab alijs paulisper respirari malis coeptum esset . Caeterum , minimè dubitatum est , quin furca temeritasque eadem , etiam liberatura urbem fuerit , si Ioanninus Vignatus cum Ruscono Casatensibusque , sicuti constitutum inter eos fuerat , sese coniungere maturauisset , atque cum sua manu praesto fuisset ad ea loca quae per eum occupari debuere . Serò postea ille ad fossam vallumque succedebat cum iam caesi rebelles , aut capti essent , cuius rei terrore , pressio velut angue refugus abiit . Post cladem hanc ciuilemque tumultum Metropolitana res , & prouinciae negotia quo coeperant motu prolabeantur , haud equidem crediderim

vicio

vitio magis vlllo, quàm turbatarum tantopere rerum in ipsa imperij sede, & arce. Neque manebant tantùm in rebellione vrbes eae quas antea descuiisse ab Metropoli demonstrauius, aliaeque subinde aliarum stimulis & exemplo deficiebant, sed etiam intra Dioecesim agrumque Mediolanensem arma ab ipsis inferebantur. Agrestes itaque nostri deserto aruorum cultu quotidie migrabant in urbem cum pecore suo, & iumentis, ne alerent hostem, neue ipsi praedâ abactâ ab populatoribus iisdem interficerentur: quae rebellium ira & licentia contemptioque in Metropolim, ad extremos fines grassata erat. Ea verò agrestis turba conferta sub tecta, statim infecta morborum tabe est, qui per urbem deinde vulgabatur tanta contagione, vt sexcenti quotidie, atque interdum plures perirent. Accedebat ex incultis agris socium aliud pestilentiae bellicae malum fames, quibus super alia ingruentibus malis, vrbs ipsa solitudinis pene instar fiebat. Ac miserabile sane dictu, in deserta penè, & vasta, & quotidianis funeribus exhausta vrbe conquiescere partium insania non poterat: Gibellinique, & Guelfi, dum patria perit, inter cadauera ciuium, & Reip. desperationes, de fastu & gloria sui nominis adhuc pugnabant. Principem ipsum ducemque Ioannem Mariam indignum nomine imperioque hoc, ferunt laetum interea exitio ciuitatis, non modò instigatorem fuisse factionum, sed insita saeuitia adeo esse debacchatum, vt non pestem, magis non famem, non ciuilia bella

Mediolanenses abominarentur. Veterum tyrannorum crudelitates cum huius immanitate comparatae, de infamia sua multum atrocitateque perdiderint, sicuti monstrabunt ea, quae ordo iste rerum & temporum institutus referre me inuitum cogit. Cum enim, super ea quae dixi, famis & pestilentiae mala, quotidianae caedes fierent inter Gueffos, & Gibellinos, cunctaque principum furore permiscerentur, consilium hoc cepere multi miseri, & desperati senes, ut facto agmine per omnia compita incederent lugubri voce pacem exposcentes. Ita flecti ad lenitatem infensos illos mutuis inimicitijs animos posse arbitrabantur. Traxerant secum aliud puerorum agmen, quos eadem clamitare docuerant: simplexque illa multitudo irrisu potius digna quam supplicio per urbem incedebat. Obuius huic fortè phanatico agmini Vicecomes fuit, atrocemque ludum fecit aerati, cui parcendum fuerat etiam si in aliquo humano errore deprehensa esset. Nihil aliud quam pacem clamitantes, tamquam ob infandum scelus, immissa militum manu, ceu pecorum greges mactauit. Adèd detestabatur oderatque pacis nomen, ut ea patrata innoxiorum caede, legem tulerit, nequis in imperio suo Sacerdos, cum rem diuinam faceret, vteretur pacis verbo, subderentque potius tranquillitatis nomen quoties vox ea occurrisset. Tantra saeui principi licentia etiam in res Ecclesiasticas fuit. Inhumanum hinc aliud eiusdem Vicecomitis facinus traditur, à quo bestiae ipsae refuge-

refugerunt, & miraculi instar habita est ea bestiarum recusatio, scriptoresque proprio nomine miraculum appellauere. Ioannes Pusterula erat inter eos, qui opibus & multitudine asseclarum stare contra Principem possent, & communis fama inimicum hunc Ducis agnoscebat. Filium is habebat natum annos duodecim, quem cum fortè Vicecomes in potestate haberet, patris odio puerulum infontem lacerandum canibus exponere statuit. Postquam ea rabies accenderat animum, Squarciae Giramio canum magistro negotium dat, vt assuetos tali ministerio, & iam inescatos humana carne molossos audissimosque cibi eius in puerum immittat. Puer, audito mandato, positis humi genibus in principem obuersus, orare coepit, vt sibi ignosceretur: nunquam se postea commissurum esse aliquid, & posse nunc puerili verberare coerceri, si quid admisisset. Ea simplicissima deprecatio potuerat flectere quamuis immitem animum, vel hoc ipso, quod ne paternas quidem inimicitias intelligere miser ille videbatur, expertusque erat omnis, non modò culpae, sed sensus etiam quo agnosceret culpam posset. Enimvero tyrannus fero animo pueriles eas preces adspernatus ciebat nomina canum, quos immittere Squarcia magister deberet. Guercius primò est immissus immanis hominum vorator, & celebratae feritatis molossus, qui laxato nodo, quo adstrictus tenebatur, eripuit sese custodi, & vnico saltu, quà supplex puer iacebat sese eiaculatur ad monstratam praedam. Credide-



rat circumfusa aulicorum corona conditum in bel-  
 luae ventrem illico corpusculum illud fore, visce-  
 rumque laniatu spectaculum. atrox praeceperant  
 oculis animisque, quod secus euenit. Namque be-  
 stia admoto rostro odorata puerum abstinuit den-  
 tes, & consedit humi, saepiusque irritata quiesce-  
 bat. Mox canem vnam inclamat princeps, cui Si-  
 billinae nomen fecerant, atrox animal, & carum  
 tyranno, quia non aliud infestius humanae figurae  
 auidiusque talis cibi monstrum in toto grege habe-  
 bat. Ea quoque bellua soluta & immissa pepercit  
 infanti: Credebaturq; inuiolabilis, donec Squarcia  
 ille canum Magister, principis iussu districto gladio  
 secuit puero ventrem: nec ideo fusa humi viscera  
 sanguinemque canes iidem attingere potuerunt.  
 Caeterum, quotidiana Vicecomiti huic erat voluptas  
 gratissimumque studium obijcere subinde canibus  
 aliquem, atque sic explere odia, vel vbi odium  
 deesset, inter ludicra id sumebat, prodibatque no-  
 cturnus cum canum grege, & obuij quique lacera-  
 bantur. Et funesta pleraque memorantur alia,  
 inter quae. vnum, sicuti dirum, & immanae, ita vti-  
 le, & salutare exemplum fuit. Plebeius homo  
 paupertatis extrenae, cum mortuus esset, deerat  
 funeri sumptus, neque vlllo modo poterat super-  
 stes vxor, pauculos expedire nummos, quos desi-  
 gnator, & vespillo, & medius inter eos praecipua  
 facuitia Parochus implacabiliter exigebant. Aliter,  
 relicturos esse domi cadauer interminitabantur.  
 Mulier exclamare multum obtestarique flebiliter,

vt auferrent : polliceri sese postea perfoluturam :  
interdum rogare, vti tollerent lodicem, vel pecu-  
niae loco, si quid aliud in vacua illa domo place-  
ret, dummodo maritus humaretur. Spurca, &  
ignominiola turba obdurauerant animos, viduam-  
que habere sibi domi foetorem iuebant : nunquam,  
nisi praesentem viderent pecuniam, nisi certi pon-  
deris funalia comparerent, cadauer illud esse ela-  
turos. Cum interea dies vnus, alterque & tertius  
exissent, essetque flagrantissimum tempus aestatis,  
audiebatur tora vicinitate mulieris eiulatus, non-  
iam maritum lugentis, sed calamitatem hanc no-  
uam. Fortè illac praeteribat princeps, auditoque  
mulieris vlulatu, qui facile in viam vsque resona-  
ret, ire è familiaribus suis vnum iubet, & cogno-  
scere quid infortunij, quidue desperationis in illa  
domo esset. Relatum est de cadaueris incommo-  
ditate, saeuitiaque vespillonum sicuti res erat.   
Tunc princeps, imperato, vt daretur argenti,  
quantum funeri ducendo esset satis, mandat simul  
ne mora vlla sepeliendi corporis fiat, ipseque dum  
exsequiae celebrantur, interesse voluit, & attonitis  
rei nouitate cunctis incedit in parte pompae, &  
cum reliqua multitudine tacitus ad templum vsque  
progredditur. Postquam cum feretro omnes intra-  
uere, peraguntur funebria, laetusque Sacerdos  
copiosa stipe quam acceperat, mortuale carmen  
modulatur altiore tono, cunctaq; peragit impigre  
ministeria omnibus praeter principem ignaris, quid  
futurum deinde esset. Extra templum, in campo,  
qui

qui tribulium illorū sepulturae dicatus erat, effoderant scrobem quibus ea cura, & iam direptum feretro cadauer inferre illuc parabant. Princeps arripi Sacerdotem, & inferri protendique prius in fossam iubet, deinde superimposito cadauere congeri humum: ea spurco homini vltima merces fuit. Qui res eorum temporum prodidere, factum id reliquis saeuitiae exemplis annumerant, atque adeò, super caetera principis huius atrociam remeam infectantur. Ego durum id quidem, & seuerum videri posse cuipiam existimaui, sed indignitatem, quoque Clerici nihilo mitiore supplicio fuisse dignam existimabam. Et Archiepiscopum ipsum, quamuis atrocitate rei commotum, reperio tamen tranquille id placateque pertulisse propterea quod etiam ipse fortasse foedam sui hominis avaritiam, quae contaminaret Ecclesiae nomen sic fuisse prectendam existimabat. Anxium tamen eum Ecclesiae suae miserijs & principatu tali tyrannideque Vicecomitis, fortuna maior exemit Mediolanensium turbis, estque in summo rerum humanarum culmine collocatus. Cum enim Gregorius XII. Pisenum Concilium obire recusauisset, patres eum deiecere Pontificatu, & principem sacrorum hunc fecere, atque Alexandrum V. mutato, vt assolet, nomine appellauerunt. Sed nec honos ei stabilis fuit, orta inter Patres dissensione, quae ipsum euerit. De eo Archiepiscopo prius Mediolanensi, dein Pontifice Max. fama haec ab maleuolis & impijs dissipata manauit: hominem fuisse litteratum, sed

sed superbum eundem, & immoderate deditum abdomini. Quippe quadringentos aulicos habentem, cum adhuc Mediolani Archiepiscopus esset, certasse magnificentia & splendore domus cum principe ipso, & quoties, in mensa, cibi alicuius cupiditas palatum tetigisset, si is non esset ad manum, tamdiu solitum expectare dum coqueretur id quod fortè appetiuerat. Ea sordida patientia, totos interdum accubuisse dies, & cenae horas in antelucana tempora productas esse nonnunquam, quae taedia plebeios etiam helluones fatigare potuissent. Anno altero postquam Archiepiscopus Philargus ad Pontificatum Maximum hinc vocatus euectusque erat, Ioannes Maria Vicecomes primo triduana-  
rum supplicationum die cum in D. Gotthardi Aedem rei diuinæ causa prodiret, interficitur, illatumque templo maximo cadaver, mulier vna, quae corpore quaestum faciebat, operuit rosis, ob quod meritum à Philippo Maria fratre mortui Principis est honeste maritata. Dies idem alia caede fuit insignis non minus grata in vulgus, vel etiam gratiore, quia minister atrox saevitiae principis, serâ quidem, sed tamen meritâ nece sublatus erat: & publica ferme odia in tales homines incumbunt. Giramus erat ille canum custos, idemque arbiter, & instrumentum ubi carnificinae aliquis destinaretur: crediderantque multi, nequaquam horrenda illa facinora patraturum fuisse Vicecomitem, nisi magistrum, & artificem hunc habuisset. Populi concursu est intersectus, abominandumque

nandumque cadauer affixum ianuae paternarum, ipsius aedium, vt dedecori etiam monumentoque esset. Ordinem verò coniurationis in Ioannem Mariam, & eius consilij participes, ac ministros agenda rei, & ea, quae post tyranni necem secuta sunt, statumque Urbis omnem, & quomodo principes urbis, hoc interfecto Vicecomite conflictati sint inter vindicandae libertatis conatus, & imminentem alte perpetui seruitij necessitatem: haec omnia Bernardinus Corius refert ex Antonij Vicomercati commentarijs, quem eotempore Causidicum fuisse, & ea occasione frequentem in aula, scribendis quae videbat, curam aduertisse ait. Me sane etiam simplicitas ista delectat causidici narratoris, eiusque testimonio ac fide funestarum rerum scena peragetur. Franciscus Maynus, & Andreas Bagius fuere primi, quos magnae cogitationis manifestos notauerit scriptor ille Vicomercatus arripiens initia suspicandi ex eorum colloquijs, conuersationeque, & vultu. Eos ait venturantes in aulam, multumque secretò colloquentes cum Ioanne Carnago consiliario Ducis, abeuntes postea inde, & redeuntes, & cum leui susurro discordes inter se, mox annuentes toto capite, & rursus ambigentes, admirationi fuisse sibi, & pepulisse animum, vt cogitaret etiam ipse quid rei, quidue negotij esse posset illud. Die, quo princeps est interfectus, ab arcano illo, & tantopere sollicito colloquio propere digressos, descendisse per scalarum gradus, & dato velut signo tota dispersos

perfos aula nobiles alios viros aduolasse, & vestigia eorum esse infecutos. Ad quem motum, tantò magis excitatâ sibi cura videndi quid fieret, exisse dissimulanter e conclau, & prodeunte paulò post ad rem diuinam principe vidisse eadem eius. Vulnera fuisse duo: vnum in capite, alterum in dextro crure, statimque tibia incisa, & ad mediam vsque frontem patescente hiatu tyrannum expirauisse. Interfectores non sunt ab eo scriptore proprijs nominibus distincti & notati, sed coniurati promiscue omneis, qui facinori perpetrando adfuere, hoc ordine recensentur. Andreas, & Paulus Bagij fratres. Ioannes Pusterula Venegonenfis. Otho Vicecomes, Franciscus, Luchinus, & Farina Maini: Ambrosius, Gabriel, Ricardus, & Franciscus Triultij, Andreas, & Bertonus Mantegatij. Parisius Concorretius, & Iacobus Aliprandus, & alij praeterea nonnulli, speculantes rei exitum ex omnibus aulae diuerticulis, & si quid facto opus esset, prodituri: Fuerant omneis in summis aulae ministerijs, atque ex intima Ducis amicitia, & quod quisque munus eius beneficio obtinebat, eo sunt vsi ad coniurationem in ipsius caput opportunitate omni instruendam. Cum enim Facino Cane per eos dies agente animam, tumultus in vrbe post eius mortem expectaretur aliquis, eoque metu princeps in arcem conferre sese statuisset, primum, omnium suadendo multa, & demonstrando effecere, vt longe tutissimam in aula sedem fore sibi ille opinaretur.

Pp

Deinde,

Deinde, aditu hoc ad insidias inuento, munien-  
dam igitur esse aulam, firmandaque praesidijs  
opportuna loca ostenderunt. Eius quoque consi-  
lij fallacissima species cum repudiari non posset,  
ipsi sibi insidiatores custodiam portarum, maiore  
adhuc fraude deposcebant. Ita Bertonus Mante-  
gatus e coniuratis vnus, fatali Principis ipsius  
vaecordia excubare cum armato milite ad valuas  
iubetur, ne qua post Facini illius mortem irruptio  
plebis in aulam fiat. Sic nimirum etiam aduersus  
Praetorianos munierant se se coniurati, ne, vel  
peragenda, vel peractae rei obstarent eorum tela,  
quominus cuncta ipsi exsequerentur, vti destina-  
rant. Ne gladius quidem contra districtus est  
vnus hastaue obiecta vna, cum sua in sede tyran-  
nus interficeretur: cumque interfectores, eo iacen-  
te exanimi, per aulam urbemque caetera delendi  
principatus, & vsurpandae libertatis agitarent,  
communita statim aula, & infessa praesidijs vrbe,  
arcem oppugnare ipsam aggrediuntur, quae vna  
libertati obstabat, & magni facinoris opus id erat  
reliquum. Principis interficiendi tyrannidisque  
delendae consilia & apparatus satis felicem adhuc  
exitum hunc habuerant, nisi ea, quae sunt inseguta,  
patratam caedem, emolumentumque caedis  
cum pernicie insuper illustrium virorum liberato-  
rum urbis irrita & vana fecissent. Facinus erat  
Canis, ex copiarum ductore & amico Vicecomi-  
tum, iam in tantum auctis opibus, vt Vicecomites  
ipsos fortunae magnitudinae, imperijque finibus  
facile



facile aequaret. Nouaria, & Derthona, & Ticinum, & Nouocomum ei obediebant: tum in agro ipso Mediolanensi Briantiae tractus vniuersus, Vallisfaxina, Varisium, Romanengum, Canturium, & Rosatum, & quacunq[ue] Verbanus dices late populos ad Vagoniam vsque alluit, latiusq[ue] porro prolaturus imperium ille erat, nisi capto etiam prope Bergamo Coenomanis imminentem mors abstulisset. Ac duxerat istius potentia initium ab liberalitate prius aliqua Vicecomitum, dum ob nauatam strenue operam, spectatamq[ue] fidem, Blandratum, & loca alia ignobilia forti viro & amico homini assignant, quò fortior etiam in posterum amiciorq[ue] foret. Deinde crescentibus quotidie meritis, aucta simul admiratione viri apud exercitum populumq[ue], apud principem verò necessitate vetera beneficia muneribus tuendi nouis, noui additi fines, & fortuna rursus haec amplificata, quò magis eam ipse comitate, ac splendore omni decorabat, grato semper erga priora animo laceffens quicquid optare vel capere poterat. Postremo, ditatus ita & excultus, adeò placuerat, vt necessitudine etiam nonnulla iunctum sibi Vicecomites propinquum suum fratremq[ue] appellarent. Et fraterno scilicet ille ritu plane egerat, gerensq[ue] pro fortuna animos, maluit diuisum cum Vicecomitum domo imperium habere, quàm singularum partium munera quotidie aucupari. Dum rebellant pleraeq[ue], sicut demonstraui, vrbes, dum etiam Vicecomites ipsi rebellandi causas praebeant, laba-

scitque fortuna domus, interposuerat se se vindicem ceu & ultorem: mox translata in se ipsum, victoria, eum quem dixi principatum sibi effecerat: quodque maius videri possit, erat interea assecutus, ut species amicitiae cum Vicecomitibus iisdem maneret. Facinus hic igitur, cum in Ticinenſi arce moriturus, nondum tamen alienata mente, nuntium de Ioannis Mariae nece accepisset, vocatis ad se in extrema illa hora fidiſſimis amicis, dextrasque singulorum amplexus rogare institit, ut si retinerent eum erga se animum quem semper habuissent, Vicecomitis necem ne sine rent inultam, quae morienti sibi nuntiata, turbaret alacritatem, cum qua res humanas alioqui relicturus fuisset. Ne proſequerentur defunctum ignauo questu, sed quae voluisset meminissent, quae mandasset exequerentur. Talia dicentem spiritus defecit: diesque idem triduanarum supplicationum, ut dixi, primus Facini Canis obitum, & Ioannis Mariae Vicecomitis necem coniunxit. Mediolani, Duce interfecto, neque princeps iam erat, neque libertas, deferentibus nonnullis imperium ad Hectorem quendam ex eadem Vicecomitum domo, clamantibus adnitentibusque alijs, ut veteris Reip. forma restitueretur. Sed pro Hectore seditioſissime concitabat plebem Bertus Cacia Placentinorum Episcopus, quem coniurati adiutorem ad multa, participemque habuerant: ac re gesta feliciter, seorsum tendens, Hectori, principatum parabat. Eius negotij causa Mediolani neſtebat moras: ac die quodam in templo

plo maximo tanta vi concionatus est ad populum de Hectoris mansuetudine illius, futuraque per eum felicitate noui principatus, vt clauēs portarum vr̄bis, vexillumque Reipub. & sceptrum, & diadema ad eum deferrent, Ducemque appellerent. Mox Philippus Maria, simul fraternae necis, simul paterni imperij vindex adfuit, non solum, exercitu omni, qui sub Facino Cane militauerat; sed veteranorum etiam copia ducum metuendus, quorum fidei moriens Canis ultionem mandarat in Ioannis Mariae interfectores. Terrorque cum vindice aderat alius, ingens pecuniae summa, & imperium omne Facini eiusdem, quod ducta ita matrimonium vidua ipsius Beatrice adeptus erat. Tunc verò, & ab Hectore intra muros, & extra per Philippum Mariam Ciuitas ab duplici domino, duplici hoste vexabatur. Hector, ob nouae fortunae bellicae necessitates tributa immodica viri-  
tim & ostiatim in singulos dies imponebat: detrectantes coercebat vinculis: & in arce quae est ad Portam Romanam arido pane detinebantur nobiles viri, donec, aut alimento eo, non secus ac fame, perirent, aut inuenta pecunia missoque ad exactores tributo, accipere sese imperium faterentur. Philippus Maria, disposito circum moenia exercitu prohibebat comportari quicquam in vr̄bem & vrebatur satā populator agri, quem à populationibus defendere debuisset, cum in ipsius potestate mox omnia futura essent. Vr̄bem habebat Hector: in arce quod praesidium fuerat, ante tyranni

ranni prioris necem, pro Philippo Maria constantissime eam tuebatur. Aliquandiu neutro inclinata re dubitabant Mediolanenses, utrius magis partis gratiam sequerentur, cum par utrinque metus, damna eadem, nec odium dissimile esset in duos, quorum uterque per caedes iniuriasque civium, inferre patriae tyrannidem vellet. At ubi praesidij praefectus vocato per tubicines populo in subiectum arci campum alta pronuntiari iussit voce, Philippum Mariam, adesse paterni vindicem imperij fraternaeque necis ultorem: innoxiorum sanguinis minime eum indigere, si fratris sui interfectores dedantur: pacato agmine urbem intraturum: tunc enimvero, Hectori, & coniuratis infestiora omnia quotidie magis esse coeperunt: & post irritos aliquot in ultima desperatione conatus, relinquentibus infausta signa cunctis, prope soli relictis, victoris deinde iram explevere. Fuerant in coniuratione, praeter eos, quorum nomina ex Vico mercato spectatore Corius in Annales suos contulit, nosque testimonium & auctoritatem secuti utriusque recensuimus, etiam alij, quos, vel ab scriptoribus ijs, taedio numerandi tantam multitudinem, esse praetermissos apparet, vel ab ducibus eis authoribusque consilij participes adhibitos fuisse constat. Numerus utique tantus, ut etiam postquam deserti desolatique fuisse dicuntur, ausi sint obijcere sese victori exercitui, eaque non una acies fuerit. Sed, & ab maiore passim acie caedebantur, & urbana multitudo novum conspicata Ducem, profligatisque

fligatisque rebellibus imperium adesse pristinum:  
videns, vertit arma in eosdem, ad quorum nutum  
ipsa quoque rebellarat, & feminae ipsae conij-  
ciebant saxae fenestris in Hectorianos, dum fugiunt  
illi aut resistunt: eaque lapidatione iuxta D. Donni-  
ni templum ex Ioannis Stradae aedibus, Ioannem  
Carolum Hectoris fratrem pene oppressum ferunt,  
cùm Bernabouem Medicinam, & Antonium Al-  
ciatum insequeretur. Ipsi Medicina, & Alciatus,  
per Parochi aedes in alteram viam euasere: Paro-  
chumque ipsum Stephanum Cribellum notaine,  
regione discurrens ea quaesuit Hector ad necem,  
quia duobus illis effugium dedisset. Repertus, &  
productus imminente gladio clamitabat, nullam  
suam in ea re culpam fuisse: aperto fortè ostiolo  
illos irrupisse, simul, & exisse per ostiolum aliud,  
cùm ne domi quidem eo tempore ipse esset. Ita  
exitium vitauit. Philipus Maria interim in arcem,  
ingressus, & paulò post vectus humanissime per  
urbem, haud dubie tenebat imperium, laetis, ut in  
tali necessitate omnibus praeter eos, quos ex  
conscientia metus angebat. Hector, & Ioannes  
Carolus, perditis rebus aufugère Modoetiam, &  
intra arcem inclusi tutum ibi receptaculum aliquan-  
diu habuere, donec composito omni rerum urba-  
narum statu Princeps eò curas vertit. Coniurati  
reliqui, aut euasere, quàm quemque casus tulit,  
aut euadendi segnitiam capite luerunt. Neque du-  
bitatum est, quin ipsius dissimulatione & arte Du-  
cis fuerint elapsi nonnulli, quibus aliorum suppli-  
tia

tia tulerint salutem, dum inuidia tam cruenti ingressus timetur. Inter eos, Crescentiaci antistes, quem dignitatis vocabulo Praepositum appellabant, abestque id Monasterium quatuor millia passuum ab vrbe, parabat fugam eadem animi praesentia ad vitandum periculum, qua coniurationem ipsam consilio ministerioque omni instruxisse conuincebatur. Sed potentia, & ira, ministrique Ducis plus valere. Retractus e fuga sistitur in eius conspectum, magnoque conuitio increpitus carnifici deditur sine mora & obtruncatur. Francisci Maini, quem Praepositus ad omnia consocium participemque habuerat, par in fugiendo conatus, idem exitus fuit. Paulo Bagio, & ignobilioribus alijs addita ignominia, vt antequam supplicium de eis sumeretur, iacerent per aliquot dies in collaria porrectis alte capitibus expositi ad iniurias, & ludibria omnia quois incessere eos plebs infima miserabili erga nouum principem adulatione cogeatur. Apud animum quisque suum moerebat, vt opinor, tali fortium virorum clade, qui cum voluissent liberare patriam, praemium egregij facinoris hoc referrent. Hic Philippo Mariae finis vlciscenda fratris nece, quae tamen nulli laetior fuerat, licet, haec simulacra & imitamenta doloris, vt famae existimationiq; hominum satisfaceret, ab eo adhiberentur. Nam & imperium adeptus erat, & quae cariora imperio, libertatem, & vitam, regnante illo captiuus sub Facino Cane ad Ticinum proximusque exitio, quo fere captiuitas  
inter

inter principum suspiciones finitur. Caeterum, sicuti ex fraterno sensu dolorem, puniendis, ut demonstraui intersectoribus simulauerat, ita simulans in ipso dolore clementiam atque satiatum, supplicijs animum, ultioni statuit finem, exactoque sacramento, ad curas imperij, quae multae, & magnae simul vndique eum circumstabant, animum conuertit. Anno CIO CCCCXII. ad x. Calen. Quint. iurauere Cives in Philippi Mariae verba, cum prius ille consensu militari Dux princepsque appellatus esset: fuitque iste, Vicecomitum Ducum, ut omni regia virtute secundus nemini, ita successionis ordine postremus. Ad principatus initia huius regebat Mediolanensem Ecclesiam, Ioannes Vicecomes Vercellini filius, quem Carolus Malatesta sub Ioanne Maria exercituum imperator, contracta cum Archiepiscopo Philargo olim amicitia, postquam is ad summam peruenerat, commendauerat ei, ut honorem, quem vacuum ipse reliquisset, huic demandaret: neque ille abnuerat. Verum Archiepiscopus iste: triennio post, in Constantiensiconuentu, tamquam vitio creatus (incertum qua de causa) mouetur loco, decedereque iubetur honoris gradu, quem nec recte, nec ordine obtineret. Postea ille, defendendo sese, & purgando, ut in pristinam Sedem noui Pontificis decreto restitueretur obtinuit, fuitque sub Eugenio legitimus Archiepiscopus sicut in loco demonstrabitur. Nunc ei Barptolemaeus Capra Mediolanensis sufficitur, qui Constantiensi Concilio inter-



fuerat , & ob rerum Ecclesiasticarum vsum , vnâ cum Iordane Vrsino , praesederat ex Patrum auctoritate conuentui curator & magister , vt omnia cum dignitate administrarentur . Is vbi Mediolanum Archiepiscopus venit , magnopere vexabatur ab priore Archiepiscopo , qui & fauore ciuium , & principis gratia validior concoquere non poterat hoc ipsum , quod loco deiectus esset . Ac die quodam , cùm per Abbatem Sancti Ambrosij ad aram maximam proferretur diploma recitandum , quo diplomate Capram Archiepiscopum Martinus Columna Pontifex maximus renuntiabat , corripitur repente Abbas ab Sacerdote quodam ex ipsius Arae ministerio , isque Sacerdos extortas Abbati de manibus Apostolicas litteras fodere gladio super aram instituit . Et aderant armati milites pro Vicecomite exule iubentes audere presbyterum eum , atque minitantes , si quis violare sacrilegum auderet . Capra percussus atrocitate facti , coniectansq; inde , ad quales ipse animos , & in quàm aperta veniret pericula , subduxit sese discrimini , & occultissime porta Iouis egressus Romam aufugit , redijtque Mediolanum , & iterum deinde exul fuit . Vsq; in Francisci Sfortiae tempora vexatam Pontificatus dissidio Mediolanensem Ecclesiam tradunt : Sfortia demum regnante restitutum Vicecomitem , cùm aliquandiu sedisset , post breue deinde tempus vacuam eidem aemulo Metropolim reliquisse . Verùm postèriora haec , quomodo gesta fuerint , demonstrandi locus erit . Ab Constantiensi Con-  
uentu ,

uentu, cui Capra Archiepiscopus affuerat, Pontifex Martinus Romam proficiscens ex itinere Mediolanum venit, eaque publica laetitia turbidis ac moestissimis rebus interijcitur. Prodiere venienti obuiam vnà cum Clero vniuerso, Dux ipse Philippus Maria, Senatusque Mediolanensis, nobilitas tota tanto apparatu, quanta maiestas & fama hospitatis erat. Iurisconsulti, & medici in purpura & pelle, sicuti tunc Collegium vtrumque distinguebatur, vmbellam attollebant. Ea mille florenorum nummûm aestimatione fuit. Tubicines antecedeabant pontificale agmen: in agmine ipso minores pontifices erant principesque alij sacri, vel profani, vt quique spem officiumve suum sequebantur. Proxima hinc veniebat cohors honorariorum, ephoeborum cum reliquo Ducis famulatu in pretiosis equis: equi Pontificis octo purpura instrati ducebantur, post eos, ducenti viri nobiles obacrata Principi manus ibant. Ante Pontificis vmbellam ducebatur mula pyxidem vehens, in qua sanctissimum Christi corpus collocatum erat, sicuti praeferuntur ea mysteria Pontifici maximo cum iter facit. Sexaginta Sacerdotes linteati cum funalibus id ferculum religiose deducebant, eamque sacram cohortem, & ceremoniam Episcopus vnus regebat. Cardinales duodecim Pontificem sequebantur. Cremaniolae Comes & Guidus Torellus magna apud Vicecomitem gratia tenebant frenum iumentum, cui Pontifex insidiebat. Galeotus Beuilaqua ferebat Ecclesiae vexillum. Fabricius Co-

lumina vexillum alterum, in quo suae gentis insignia depicta cernebantur. Spatio deinde modico interiecto, triplicis Regni argumentum infula ex gemmis contexta portabatur. Et altero tanto spatio Vicecomes distabat medius inter armatorum agmen, & caeteram vrbis nobilitarem splendidissime excultam. Sic procedente pompa peruenit Pontifex in templum maximum, flexoque ante aram poplite breuiter precatus, ac deinde pari breuitate concionatus ad populum, octo annorum indulgentiam concessit omnibus, qui, cum salutare culparum suarum detestatione piaculum id amplecterentur. In aulam deinde Vicecomitis Pontifex est deductus, atque ibi umbella direpta & laterata est inter multos, qui sibi reliquias eas appetebant. Urgebatur interea multitudine operarum structura arae maximae, populique concursus ad necessaria ministeria fiebant, cum ea spe ac voto ut à Pont. Max. ara dedicaretur. Trium dierum spatio demoliti pristinum opus, nouam molem excitauere: Pontifexque Martinus absoluto nouo opere dedicauit aram, & in ea rem diuinam fecit. Centum amplius millia mortalium interfuisse. scribuntur ei. ceremoniae, obtritofque & elisos fuisse complures, tenet fama, quae magnis celebritatibus cladem eiusmodi aliquam semper adiungere amat. Pontifex maximus peracta dedicatione pronuntiavit centum dierum indulgentiam omnibus, qui anniuersario Dedicationis die Aram eam religiose adirent: & post aliquot inde dies ipse abibat.

Re-

Recreauerant paulisper ista urbem : atque occupato postea bellis externis principe, quies ab ciuilibus malis erat consentanea quieti & prudentiae regnantis . Nam huius mores ab aui atauisque natura & institutis longe diuersissimi , patrem potius referebant, itaut homines, quibus otium fuit, committere inter se Vicecomitum istorum ingenia, atque alium ex alio, sicuti fit, assimilando referre, ad genus & originem quemque suam, verbum vsurpauerint istud : Philippum Mariam videri quidem ab Ioanne Galeatio ortum : sed neque ceteram huius prolem, simile quicquam habuisse patris, neque patrem ipsum ad maiores suos vlla similitudinis nota pertinuisse . Adeò, & habuit Philippus Maria, e filijs vnus virtutes Ioannis Galeatij omnibus, & huic nulla auorum vitia adfuere, praeter artes, quae regna continentur, quaeue commune regnantibus omnibus vitium sunt . Iam primum omnium, in religionis negotio, quae res ab ipsis Vicecomitum initijs ad Ioannem vsque Galeatium, scribenti ista mihi, toties excusanda, toties declinanda, vel circumeunda, ne qui offenderentur, fuit, expedita, & integra fama Philippum hunc Mariam habet . Nulla anathemata regnante eo, nullae Pontificum irae, aut ipsum, aut subiectos ei populos, & hanc aliena culpa semper temporibus illis defixam interdicto aliquo Metropolim, appetiuere . Colebat Apostolicam vnice Sedem dicto obediens, & effusus in obsequia si quid mandati inde accepisset . Cùmque in magno totius Ecclesiae

clesiae diffidio, constituendi Pontificatus causa, Constantiense Concilium haberetur, singulari sua ob insitam pietatem cura eius rei & solitudine fecit, vt legatos illuc mitteret, suo & ciuitatis nomine pollicentes omnia Patribus, quae ad negotium illud strenue sancteque administrandum peri hinc possent. Legati sunt missi, Episcopus Alexandriae, Abbas S. Ambrosij, Gaspar Vicecomes, Otho Mandellus, & Galeottus Casalis: legationique ei splendor additus, qui praeferret erga res Romanas animum sensumque eius à quo mittebatur. Sanè, quòd vexari Archiepiscopum Capram ab Ioanne Vicecomite Concilij iam autoritate damnato passus postea fuerit, offendere id aliquo modo posse animos videtur, aduersarique patriae religionis hereditati & famae, quam ei assignamus. Verùm, id quoque, sicuti etiam animaduersio in coniuratos interfectoresque fratris, cùm cetera tam pia fuerint, condonatum esto necessitati dominationis, quae coecat saepe animos, & peccare inuitos cogit. Nam quemadmodum saeuendum, Principi fuit, ne Ducum impune interficiendorum exemplum proderetur, ita sui sanguinis hominem ab homine alieno in Metropolitani Pontificatus certamine deuictum, fore quodammodo detrimentum imperij, labemque existimabat. Reliqua deinceps fuere eiusmodi, vt principem, religione, prudentia, imperio, atque per totam Italiam, autoritate maximum Mediolanenses admodum laeti intuerentur. Scilicet, etiam inter ipsa tristia,

tristia, sicuti demonstrauius, atque cruenta initia principatus, dum nobilium virorum nece parentaret interfecto fratri, dumque maiestati domus per damna Archiepiscopi Caprae inferuaret, dederat quaedam eiusmodi signa, ut mitem ipsius animum, rebusque sacris valde addictum agnoscere omnes possent. Esse in vrbe coniuratorum posteros, esse in domo, & patrias obtinere fortunas excelsio passus animo, declarauerat sic, eratque testatus, quod suae conscientiae aequitatis nihil insidiarum ipse suspicaretur. Petrum verò Garzelinum ex Humiliatorum ordine vnum è coniuratis cum in custodia haberet, Praepositi Crescentiacensis exemplo trepidum, & in pari culpa supplicio addictum eidem, non modò viuere ac dimitti iussit, sed Cauenaghi Praepositum etiam in posterum esse iure ac potestate qua ante coniurationem inter suos fuisset. Vnius sacri capitis poena contentus fuerat in exemplum: contaminari ultra religioso sanguine per iram, nefas atque impium duxerat. Eustorgiani Fratres item acceptis ab Hectore praedijs muneribusque multis, cum & suspecti esse possent, & inuicem ipsi suspectarent Ducis iras: omnia eis quaecunque tenuissent, intacta conseruauit. Hoc itaque Principe contenti ciues laudabant ex prioris tyranni comparatione fortunam Urbis, tertiumque iam hunc Mediolani Ducem, & praecipitatum in familiae vnius sceptrum Rempublicam, vel iam assueti seruitio, vel deliniti mansuetudine imperitantis, nequaquam, ut mala loquebantur.

Tributa

Tributa tolerabant absque tumultu villo : strenue ad bella prodibant : vbi prodierant , quasi pro communi patria , non quasi pro domino gerebant rem. Ita Mediolanensis exercitus paucorum dierum spatio Alexandriam , Bergomum , Brixiam , Laudem Pompeiam , Placentiam , Cremonam , & aliquot praeterea magni momenti arces recepit , captis , aut caesis qui per vim eas prodicionemue occuparant . Vrbs Nouocomum ab Eleuthero tyranno dedita est tot victoriarum metu . Tritium , & Vogheria , & Crema , re magis quam nomine militariter celebrata loca , aliquandiu oppugnationem tolerauere . Cremaniola copiarum ductor , ob res eas prospere gestas , ab Philippo Maria Castri noui Comes creatur , idque munus in templo maximo , flexo ante aram poplite accepit . Rebelles , & latrunculi , qui ex contemptis metuendi , concitis in arma ciuitatibus , negotium Metropoli exhibuerant , alius alio ritu , pro sua quisque , vel contumacia , vel fortuna , poenas dedere . Gabrino Fondulo Cremonensem turbatori caput Mediolani abscissum . Arceli duo , per quos prodita Placentia , in furcam acti tamquam fures . Malatestam Bergomi & Brixiae inuasorem , vtraque amissa vrbe fugientem , cum intercipere possent , neglexere . Diuersi & foedi aliorum exitus fuerunt . Hunc rerum cursum , & tenore fluentes vno Metropolitanorum exercituum victorias vrbs Genua , cum aliquandiu morata esset , humilitate deditonis gloriam auxerat , nisi princeps ipse Philippus Maria tantae rei occa-



occasionem errore quodam suo corrupisset. Namque principes eius Ciuitatis, postquam terra marique vrbe circumuenta sua, & magna ex parte capta, desponderant animos, abiecta gloria speque defensionis, permittunt sese victori exercitui, praesidiumque Mediolanense admittunt. Inde, vt maiorem deditiōni gratiam facerent, decernunt legatos, qui cum clauibus portarum adeant Ducem, ac petant vt rem Ligusticam placatus lubensque in ditionem accipiat. Verū ille, siue iratus ei vrbi, quia morata victoriam esset, siue ob res prosperas superbia inuadente animum, siue re vera, pietate erga Sedem Apostolicam ne admissis quidem in conspectum suum legatis, renuntiari iubet: Pontificis maximi legatum adirent, & cum eo super deditiōne colloquerentur. Legatus Apostolicus Mediolani Cardinalis Insulanus erat: isque in Ambrosiana Aede, precibus Genuensium auditis, clauēs portarum Ducis nomine accepit. Superbum id visum Liguri: venientem cum tantae rei munere legationem spretam haud dubie & elusam: reiectos aliō: non dignos esse habitos, quos sua omnia dedentes Dux Mediolani audiret. Itaque, quamquam auditi postea sunt, & ab Duce eodem culti etiam donis honorificeque dimissi, sera tamen & inutilia omnia fuere, quia repulsae contumeliaeque prioris dolor alte animos occuparat. Reuersi domum ita renuntiauerunt legationem, vt Senatus, fronte quidem, & simulatione praesenti necessitati succumberet, acciperentque missum ab Mediolano

Rr

praeto-

praetorem, intimis verò consilijs, & arcano fremitu rebellionem pararent, quae non multo postea erupit. Interea Mediolanense nomen celebrari quotidie magis admiratione vel invidia populorum aliorum, & redacta paulatim in veterem statum Metropoli patrioque recuperato imperio Philippus Maria, arbiter fere Italiae rerum habebatur. Ortum deinde est ex tantae potentiae metu bellum atrox, coniuratis aduersus Metropolim regulis liberisque populis, dum pro se quisque metuunt, ne tam prosperae Mediolanensium res sibi exitio forent, ac domitis vndique perduellibus, & frenato vel sublato quicquid domi esse molestum posset, ad toties repetita semperque irrita vota maiorum suorum attolleret Philippus Maria animos, vt scilicet Italiae Rex superbo nimium, & apud caeteros quoque Reges inuidioso, ac formidabili nomine diceretur. Ad eius rei suspicionem Florentini primum sunt excitati solertia & calliditate sua, & veteribus odijs. Hi postea Venetos admonuere. Genuenses, vsurpata olim, dein amissa libertas, ingenia gentis, spretae legationis ira, occasio, precesque potentissimarum Rerumpublicarum ad tentandam hoc tempore fortunam, incitabant. Tum Rex Alphonsus, & permotus legatione Florentinorum, & suo dolore ardens, quoddam rem Neapolitanam adoptionis iure vindicanti sibi Mediolanensium arma obstitissent, haud aegre suas vicissim opes exercituumque partem in hostium horum damna pollicebatur. Sabaudiae  
Dux

Dux Amedeus, & Demarchi treis, Estensis & Monferratenfis, & Mantuanus, fiducia validiorum, sumulis quisque suis, & in commune omneis, detestatione atque odio regni imminentis armati in Mediolanenses, dum à maioribus coniuratis erumpendi signum daretur, expectabant. Mediolanensibus, & Philippo Mariae in tantarum discrimine, rerum maxime aduersarium erat, quòd Cremaniola ille, per quem superiora bella administrata fuerant, quo duce subegerant rebelles, transierat nuperrime ad Venetos, eaque transitio, nonnihil quidem etiam, ob viri famam, & in re militari vsum, sed multo magis ob prodita per eum arcana hosti, sollicitam ciuitatem habebat, veluti si aliquem ex intima familiaritate seruum in domum recipi inimicam quamuis praepotens herus videret. Discesserat autem transfugeratue ille, partim quidem, ab causis ijsdem, ob quas discesiones, & transfugia seruorum fiunt, partim verò, ob causas alias proprias ipsius, atque singulares. Nota & communia incitamenta abeundi huic fuere Cremaniolae: quòd pro magnis suis meritis, parce auareque se ad eam diem esse tractatum quotidiana seruientium calamitate reputabat: quòd ea quae secum praemia quotidie coarctarentur, large in scurras, aut in rerum leuissimarum ministros effundi à principe conquerebatur: quòd demum aemuli ipsius & inimici praecipuum gratiae in aula locum tenerent. Illa verò ab gloria virtutibusque viri, secreto, & occulte proficiscebantur: quòd princeps

ipse certamine miserando coeperat cum eo Cremaniola velut agere aemulatum, eiusque obterere famam studebat, adeo vt praefectos alios suos in ipsum irritaret sereretque inimicitias, & Guidi Torelli praecipue odia in ipsum vltro aleret. Torellum quin etiam ipsum, demoto eo praefecerat classi apud Neapolim, & contumeliae huic addita mox grauiore contumelia, Genuensem quoque praefecturam, quae velut ad prioris iniuriae solatium data erat, adimit ei, & Cardinalem ipsum Insulanum illuc mittit. Haecigitur dolens Cremaniola simul & indignans abierat ab Philippo Maria, iusseratque valere Mediolanenses, quos, ipsos, & Principem fera iam inutilisque poenitentia angebat ob alienatum, & fugere coactum hominem, cuius egregia militaria facta, olim inuisa, nunc periculo imminente celebrabantur. Spes omnis in Francisco Sfortia erat, quem viginti trium annorum iuuenem aetas illa Scipioni aequabat corporis animique indole, magnitudine gestarum rerum, atque tam immaturae virtutis pene miraculo: de cuius origine iuuenis, & quemadmodum, ex patris contubernio, post reius casum, ad alienorum exercituum imperia, peruenerit, ac imperium denique sibi proprium hoc fecerit, demonstrabo, cum perducta in ipsius principatum historia, nouos urbis nostrae casus ab rebus eiusdem pertexere incipiam. Nunc aduersus eos, quos dixi foederatos ascitus Vitecomiti Mediolanensibusque copiarum ductor,

&amp;

& administrator belli gerendi, statim conflictabatur inuidia, & aemulatione multorum, qui fremebant atque indignabantur, homini mandatum esse peregrino id munus, in patria, quae gentibus ipsa alijs suppeditare è sua sobole Imperatores posset. Namque procures vrbs, Mediolani, quibus animis, & ipsorum inter se certaminibus effecerant, ut ad summam imperij militaris alienigena potius conduceretur, ipsden alienigenam hunc ducem infectari postea non desistebant, tum apud Principem varie criminando, tum apud exercitus corruppendo & detrectando ipsius imperia, donec fessus ille tam iniqua rerum conditione postulauit ultro à Vicecomite, ut Imperatorem bello alium darèt, cui parere Mediolanenses mallent, & se ipsum ad petendam obsequij, fideique gloriam primum fore pollicebatur, quoniam parum felix in imperando fuisset. Carolus Malatesta Pisauriensis inde Metropolitanos exercitus regebat, cui homini expeditius fuerat imperium eiusmodi tradere ac relinquere si iam teneret, quàm adipisci nouum, & succedere Francisci Sfortiae artibus, quae magno cuilibet etiam egregioque duci comparisonis discriminè terribile efficere possent. Erat Malatesta aptior paci, quàm bello. ingensque hostibus accessit fiducia postquam in hunc modum mutato duce, vim simul imminutam esse Mediolanensium sensere. Ducem verò ipsi Cremaniolam habebant; praeterquamquod Sfortiae quoque metuendum si duo isti maximi duces in bello hoc maximo congregentur,

tur, etiam ab ira & metu, tamquam in ultimo discrimine sollicitum, vt & male de se meritos vlcersceretur, nec sese transfugam vlciscendi locum, eisdem daret. Armatorum millia foederati effecerant ad triginta duo: Metropolitanus exercitus ex viginti millibus constabat. Principia belli circa Brixiam urbem consistere: quae ciuitas, cum aegre semper antea Mediolanense imperium tulisset, ad foederis famam sustulerat animos, & instigante Cremaniola ad Venetos defecerat. Duae tamen illic arces, vetus, & noua Vicecomitis nomine tenebantur, & munitissima alia castella Coenoniorum Oldratus Lampugnani missus illuc ab Mediolano Praetor auxerat praesidijs, ex quo labare gentis fidem, & defectionem parari suspicatus fuerat. Has arces, & castella, quamdiu Lampugnani, aduersus acerrime oppugnantem hostem retinebat, irrita defectio habebatur, & vrbs ea posita in medio, pari utrinque ad obtinendam eam, conatu, neque Mediolanensium erat, neque Venetorum. Vt verò Lampugnani excessit arce, quae in summo colle posita vrbi imminet, vrbs ipsa amissa est, non parui quidem per ea tempora nominis, sed maiorem, quam pro nomine praebitura materiem malis, quae postea Insubriam vniuersam, & Insubriae Metropolim hanc afflixere. Capta sic Brixia, foederati Venetas naues Pado flumine ad spem capiendae etiam Cremonae inmitunt, cum quibus male, dein prospere pugnatum, & Veneta classis ab victrici nostra classe profligata,

fligata, nonnihil est solata urbem admodum moestam defectione Brixienſium: ſpolijsque, & roſtris nauium Mediolanum relatis, nauale decus omnium ordinum gratulatione celebratum eſt. Sed antequam ſecunda pugna in flumine committeretur, terreſtri ad Pompilianum Marte cladem acceperant Mediolanenſes, ob quam ne poſterioris quidem huius victoriae gaudium apud occupatos luctu animos pro rei magnitudine ſentiretur. Malateſta in eo praelio captus, pars minima cladis eius fuit: captiuitaſque potius illa apud inſenſos ciuium animos pro ſolatio habita eſt. Adeo execrabantur Mediolani publice omnes iſtum ob imperia improvida, quæ exercitum perdidiffet, cum, aut conſeruare potuiſſet, aut etiam victorem reducere, ſi ei, aut in ſuis, aut in alienis conſilijs conſtantia tamen aliqua adfuiffet. Nam ubi ſtatuerat forte recte aliquid, protinus id per metum trepidationemque mutabat: gnarique hoſtes moris, & conſuetudinis huius, captabant inſcitiam hominis, & arbitratu fere ſuo pauidum animum quotidie agitabant. Vbi nullus erat timendi locus, ipſo corrumpebat timore pulcherrimarum rerum occaſiones, & faciebat commodiora cuncta hoſti: ad fraudes idem hoſtium, à quibus vix vilo vnquam momento ceſſabatur, ſecurus incautusque agebat. Infauſto die, quo clades accepta eſt, cum ſubduxiffet exercitum in colles, id quod paucitati aduerſus multitudinem admodum ſalutare fuerat, laceſſente, & omnibus modis idipſum quaerente Cremaniola deſcendit in æquum,



aequum, & quàm extentissimo potuit campo cōpias locauit, quāsi de industria, vt ab maiore hostium numero circumfunderentur. Ibi nata est occasio inermes etiam nudosque fere trucidandi. Nardus erat Torquatus in Mediolanensi exercitu, qui stipendia pedibus faciebat, & Sfortianarum, fuisse cohortiumpeditem hunc ferunt. Siue per lasciuiam ille, siue offensione interpolita aliqua, siue ferox animo, & ostentandae virtutis cupidus, manipularem ex foederatorum exercitu alium prouocarat ad singulare certamen, vt in exercitus vtriusque conspectu decernerent vter melior manu esset. Nouerat vtrumque fama militaris ob multa fortia facta, & ob procera corpora magnosque artus, queis longe supra caeteros eminebant: atque ab certamine gloriae irritatis praecipue animis in eam descendere aleam vtrique concupiuerunt. Perfertur ea res ad ducem etiam vtrumque & veluti per ludum accepta gregalium horum prouocatione statuitur dies, quo die, medio inter exercitum vtrumque campo veluti per tacitas inducias militum oculis id ludicrum exhiberetur. Statuta spectaculo dies fuit xi. Id. Octobris, quam atram populo Mediolanensi lucem notasse volui, vt notaretur simul posterior altera laeta & serena nobis, tenebricosa, & funesta hosti. Nam sicuti illa prior multas populo Mediolanensi lacrymas tulit, ita Iuniae Idus anno insequente, partam eam ex nostro luctu lauream Venetorum nomini deformare maiore luctu. Procedunt igitur eo die manipularis

pularis vterque concertator ex antecondicto in campum quatientes arma quibus pugnaturi erant, verbisque mutuo insultantes. Simul duo contrarij exercitus procedunt ordine ad spectaculum velut in eandem scenam, sed neque animorum habitus, neque vadentium forma eadem erat. Hostes ab duce suo iussi sumere arma tamquam in aciem ibant, & praeceperant haud dubie pugnam animis hoc ipso, quod, seque & praefectos suos nihilo segnius armatos videbant, quàm cum in praelia iretur. Nostri, sine galea, sine telo, pars magna emittebantur ab discincto item inermique duce, multum reclamantibus Francisco Sfortia, & Guido Torello, qui, si nullum alium in usum, disciplinae saltem militaris ergò, & decoris ornatuque causa cum insignibus armisque suis exercitum etiam inter ludicra esse habendum monebant: interimque ipsi priuato consilio armabant suos, & horum exemplo recurrebant ad capienda tela etiam alij, quibus minime imperatum erat. Pars tamen ut dixi maior inermium fuit: & postquam assedere, hinc semermis ista multitudo, hinc probe armata multitudo major incipiunt concertatores duo inter se dirigere ictus, quos vterque inferebant, declinabantque arte eadem, quae ipsa augebatur tot inspectantium verrecundia: neque huic aut illi periculum suum, sed vtrique partis suae gloria proposita est. Dum isti sic pugnant, nostri quidem simpliciter intenti occupatique spectaculo, nunc clamoribus adiuuant militem suum, nunc eo periclitante conticescunt:

Sf

hostes

hostes verò pugnam animis voluentes ipsi aliam, non ad peditum duorum inane certamen, sed ad nutum intenti ducis, accepto repente signo exsurgunt, expediunt tela, dant impetum in nostros, & tota momento vno scena fit acies qualis fortasse antea nunquam spectata erat. Septuaginta millia mortalium (tantum enim fuisse exercitus vtriusque numerum constat) in vnum conuoluti globum, pugnant armati cum seminudis, queis indignatio rabiesque ipsa loco armorum fuit, & percussi iam vulneratique multi in mortem, aut telo arrepto aliquo, vulnerauere proditores, aut per tela ipsa furibundi ad fauces affluxere eorum, ibique vnguibus & dente gerebant rem, atque conatui suo inmoriebantur. Constitit, ab moribundo inermi non neminem esse praefocatum, cui prostrato ac deiecto ille superincubuerat, bucculaque reuulsa iniecerat manum. Quodque foedius dictu videri possit, in ipsa postea nostrorum strage reperti quidam sunt compressis tenentes dentibus membra aliqua hostium, quae spiritu extremo asperante animos, impetumque addente abstulerant. Norfu: & sicut inter caesorum acervos, madida ac fluentia cruore hostili Mediolanensium ora cernebantur, ita in loco praelij fusae passim auriculae repertae sunt: ac in ipsa deinde talis victoriae gratulatione proditores irrisui fuere, cum auribus mutilati, vel truncis inhonesto vulnere naribus, virtutem fateri Metropolitanorum cogerentur, qui per ducis inscitiam fraudemque ipsorum deprehensi sine armis praelia

praelia tamen illa naturae telis edidissent. Caeterum, Sfortia, & Torellus, alijque, qui vel horum iussu, vel sponte sua armati ad spectaculum exierant, ferro etiam, quantum pauci aduersus plurimos poterant, sustinuerunt hostem, ibique Cremaniola pene irritum suum dolum erat detestatus, cum paucorum arma defenderent etiam nudos, negotijque tantum exhiberent. Sed neque iusta haec armatorum acies, neque noua alia, cui dolor & ira feruorque spiritus vltimi reppererat in dentibus, & vnguibus tela, quae dux improvidus admissit, contra superfundentem sese multitudinem, atque succedentes integros fessis, & contra tot manus circumferentes vndique ferrum valere: fuitque summum virtutis opus effugisse ex eo praelio, dum hostes, aut tot inermium strage, aut contra paucos armatos, defensione sui occupantur. Effugere Sfortia, & Torellus, & alij, quos sua virtus, & duo illi duces adiuuerunt. Reliquus Mediolanensium exercitus caesus aut captus vna cum Imperatore ipso Malatesta, qui causa tantae cladis fuerat: vulgoque, ceu noua clades habita hominis salus, quem sepultum atque obrutum, cumulis caesorum ipsius culpa tot fortissimorum militum, potius quam captiuum atque superstitem debuisse esse aiebant. Calamitas igitur ad Pompeilianum accepta haec, & amissus tam indigne exercitus, manente apud singulos eorum desiderio quos quisque amicitia vel propinquitate attingebant; naualis victoriae laetitiam deflorabat quae

secuto anno de Venetis parta, cladem hanc ipsam  
ut dixi solabatur. Naualis autem victoria Medio-  
lanensium, apud temporum eorum chronographos  
hoc ordine tradita perscriptaque est. Cum Pompi-  
lianensi illo casu elati Veneti, actum esse de Vice-  
comite ac Mediolanensibus sperarent, insuperque  
sinistro ipsi alio cum nostris ad Soncinum praelio  
irritati, prosperis simul & aduersis in Metro polim  
accenderentur, classem instruunt nauium diuersi  
generis fere centum eo consilio, ut Pado amni  
Cremonam aggrediantur: si vrbe potiti forent ea,  
consilijs deinde rebusque maioribus imminentes.  
Praetecerant classi Nicolaum Trevisanum ex prima  
illic nobilitate, sed multis etiam maritinis expe-  
ditionibus omnique bellica laude nobiliorem.  
Classis nostra quinquaginta nauium fuit. Nauar-  
chi, & praefecti, quamquam haud perinde assueti  
fluctibus, tamen, & indignatione ob recentem  
fraudem acuate animos, & exercitatione iam vsu-  
que nonnullo praeparati ad discrimen, cuius ma-  
gnitudine prope iam Oceani fama concesserat in  
Padum, nec de eo tamquam flumine homines lo-  
quebantur. Summa imperij totius ad Pacinum,  
Eustachium, & Franciscum Sforziam, & Nicolaum  
Picininum spectabat, quorum fidei ac virtuti ut  
omnia crederentur, temeritas Malatestae infelix  
effecerat. Ut primum infestis concurrere rostris  
naues, & aduersa vtrinque fronte pugna inita est,  
quinque Mediolanensium triremes, caesis propu-  
gnatoribus, obtruncato remigio capiuntur: qua  
clade

clade duces in magnum metum adducti sunt, ne terrestri simul, & nauali certamine, bello aperto pariter & fraudibus victa Metropolitana res defendi ultra non posset. Ac tanto magis id ipsum timebant, quia ad classiariorum ingentem numerum, quos Trevisanus dispositos egregieque armatos in nauibus habebat, nouae copiae accessurae dicebantur ex Cremaniolae exercitu, qui Mediolanensium nomini infestissimus haud procul ab Pado castra habebat. In eo periculo, Sfortia vsus hostium arte, dolum etiam ipse nonnullum subsidio assumit, atque ad distinendum proprio metu Cremaniolam, mittit ad eum duos, qui transfugarum specie ostendant, re desperata nauali Mediolanenses, paratos esse descendere in terram, & nocturno impetu castra aggredi. Fraus ea saluti rebus fuit, & aduersus insidiatorem insidiae valuerunt. Detinente namque Cremaniola militem in castris, vt aduersus inuasuros parati intentique essent, & Trevisano expectante subsidium, vt impressione vna debellaret: nostri, simul auersos in spem auxiliorum, simul ab re iam bene gesta incautos aggressi Venetos, turbauere primò, deinde expugnauere classem, quae postea terrori victoribus fuit etiam postquam capta dissipataque erat. Adeò, & tormentorum numero, & omnis generis armatura, & nauium magnitudine, ac firmitate inexpugnabilis videbatur, nisi praeter eam quam dixi ducis artem, casus etiam repentinus, & annis quodammodo ipse, expugnasset. Cum enim certamine accenso,

accenso, par metus, & spes in parte vtraque aliquandiu eadem esset, ac nostros iam fere poeniteret eius spei, cum qua pugnae discrimen laceffuissent: accidit forte hoc, vt Praetoria veneta triremesque aliae, quae propter magnitudinem suam, multa aqua liberoque spatio indigebant, illatae in angustias quasdam, fixis ibi inter vada carinis, explicare se se non possent. Tunc verò Treuisanus cernens exitium suum, eiecit se se saltu in ripam, atque inter vepres, & alia queis inculta vestiuntur, est elapsus. Idem fecere duces, & praefecti alij, quibus, simul Imperatoris exemplum, simul metus cuique suus haud inhonestam in tali casu fugam suadebat. Qui manserant, attoniti triremium impeditarum casu, Imperatoris reliquorumque fuga, & expeditis vndique Mediolanensium nauigijs, haud multo plus momenti efficiebant, quam si ipsi quoque effugissent. Ita, modis omnibus inclinata ad iniqua re, Veneti partem tot antea maritimis victorijs gloriam perdidere fluminis iniuria, sicuti tunc sermo hominum fuit. Cremaniola postea infortunium luit capite suspectus proditoris, quia nullam in tempore openi tulisset. Mediolani ad victoriae gratulationem huius, laetitia accessit alia ex Sigismondi Caesaris aduentu, qui ad petendam hinc de more coronam aderat, ne dilata diutius ea res ad legitimam imperij possessionem impedimento sibi esset. In Ambrosiana Aede coronatus est ab Archiepiscopo Capra, quem hoc tempore reperio nihil obturbante aemulo, sua



in sede fungentem omni pastorali munere etiam,  
Principi acceptum fuisse. Coronati ceremonia,  
Caesaris in temporum eorum tabulis ita perscrip-  
ta est. Archiepiscopus Capra procumbentem ad  
Ambrosianam aram in genua Sigismundum solenni  
carmine precibusque visitatis expiauit. Annulo di-  
gitum eius annularem, ferreo diademate caput  
cinxit. Nudum gladium & sceptrum, & globum  
insignia Imperij in manum dedit. Haec omnia  
sicuti acta essent, Balthasar Capra Archiepiscopi  
iussu consignauit litteris, & publica documenta rei  
ceremoniaeque eius confecit. Ex Cottarum fami-  
lia, cuius gentis homines vetusto iure ad ceremo-  
niam adhiberi hanc oportebat, nemo vnus ad-  
fuit. Totidem verbis antiquae tabulae ceremo-  
niam tradunt, qua Sigismundus Caesar Mediolani  
est coronatus, tempore eodem, quo partam de  
Venetis victoriam, & post magnae cladis luctum,  
ingens nauale decus, in triumphi modum excul-  
ta Metropolis. iusto gaudio concelebrabat. Ac  
veluti cumulante in eos dies fortuna res omnes  
secundas, & magnas, triumphus alius vrbi exhibi-  
tus est: duo captiui reges vno tempore, Nauarrus  
& Aragonius, quos inter Neapolitani regni tumultus  
acerrime obsidenteis Caietam, Genuensium,  
classis (erant adhuc Genuentes in potestate Medio-  
lanensium) obsessis missa subsidio, cepit, ductique  
Mediolanum aliquandiu exempla rerum humana-  
rum fuere, trepidi scilicet, quid de ipsorum capite  
Dux Mediolani statueret. Seruati benignitate ip-  
sius

✓ sius clementiae gloriam tulere ei, quae victoriae  
famam auxit. Fertur Aragonius, cum ab Philippo  
Maria intra Iouis arcem, salua inter captiuitatis  
miserias regiae maiestatis reuerentia, humanissime  
compellaretur, proponendo pari affabilitate, &  
modestia fidem suam, gratumque animum ad om-  
nia, quae tanto discretus spatio, imperij huius  
causa facere posset, ac rursus ostendendo Gallo-  
rum impotentiam, & pericula, vel damna, quae  
Mediolanenses appetere, si Neapolitana res illuc  
transiret, flexisse Ducis animum, ut saluum, & in-  
columnem regem utrumque dimitteret, habito insu-  
per honore, & hospitalitate omni, quae mutuis  
obligaret pignoribus animos, ob salutem, hinc  
datam, hinc acceptam, & ob beneficia quae salu-  
tem etiam honestarent. Per aliquot inde dies,  
Aragonius, & Nauarrus fuere Mediolani, ample-  
ctente ac venerante Metropoli regiam magnitudi-  
nem in eisdem, quos paulo antea adspexerat ut  
hostes, & miserata erat, ut captiuos. Opulentissimi  
ciuium certauere munificentia & comitate omni  
erga eos, ac data sunt munera, quorum admira-  
tione, reges externi fortunas urbis supra regnum  
✓ vterque suum extollerent palam. Apud Vitallia-  
num Borromaeum praecipue fuere in hospitio, qui  
splendore domus, & pecuniae magnitudine proxi-  
mus fastigio Principis habebatur. Refert Bossius,  
festos eos dies omnes fuisse populo Mediolanensi,  
supplicatum ad praecipua templa Urbis, campa-  
narumque sonitu vocata cuncta ad hilaritatem:  
Reges

Reges ipsos in templum maximum ventitaste aliquoties, atque ibi, tum partium singularum, tum vniuersae molis attentissima contemplatione mirifice esse delectatos : in patriam deinde rediisse tam beneuole erga Mediolanensium nomen affectos, vt captiuitatis deinde illius etiam iucundissime meminissent. Caeterum, sicuti laeta haec in speciem atque magnifica fuere in pompam, ita grauissimae rei damnum attulere, nimiumque magno triumphus ille stetit. Namque Genuenses, etiam irritati, sicuti demonstratum est, spretae suae legationis ignominia, postquam dolor hic insuper nouus accessit, vt partem sua classe victoriam, captiuosque reges, & defensi Neapolitani regni decus, omnia in famam; & potentiam concessisse Mediolanensium viderent, defectionem, quae dilata adhuc fuerat, haud vltra distulere, spectaculique & triumphi inuidiâ illius amissa est vrbs, quae maritimas opportunitates Metropoli addebat, sine quibus nullum imperium satis validum esse potest. Simul, eiusdem Neapolitanae victoriae regiaeque captiuitatis inuidia apud aemulos huius imperij Venetos Florentinosque renouauerat antiquam curam, ne vrbs vno tempore victrix, & hospita liberatrixque Regum, ad ipsum Italici Regni, per haec, & alia quotidie facta violentior, nulla deinde ope posset inhiberi nisi noua quamprimum remedia ei malo pararentur. Igitur, ad pristinas eius rei sollicitudines nouo hoc addito metu, coniurationem etiam ipsi suam instaurant, foederaque noua ineunt de

coercenda Metropoli continendoque intra fines  
insubrum Vicecomite, vel etiam exturbando inde,  
quod si euenisset, in caetera postea consilium ex  
euentu ipso capturi erant. Ea coniuratio trahe-  
bat Eugenium Pont. Max. haud sine grauissimarum  
deinde rerum consecutione & nexu scilicet, vt  
Vicecomiti Metropolitique cum sacrorum principe  
bellandum esset, & Christi Vicarius, Principum,  
aliorum certaminibus edijisque implicaretur: quo  
negotio, Apostolica Sedes ad extrema pene dedu-  
cta est, capta vrbe Roma, profugo Pontifice, dein-  
de exaugurato: & initia causaeque tantarum cala-  
mitatum, haud aliunde quàm ab nimia Viceco-  
mitis potentia fluxere, nec aliò etiam referebantur.  
Cum enim ex Veneta nobilitate esset Pontifex  
Eugenius, spirituque idem, vt exempla docuere,  
politico magis quàm Apostolico, patriae suae me-  
mor, cuncta ad Reip. illius amplitudinem referret,  
ideoque suspectus Vicecomiti ab origine studiisque  
suis etiam ante id quod dixi foedus fuisset, tum  
verò inito foedere, insensus atque inuisus magis,  
aduersus Imperium hoc agebat omnia hostiliter, &  
vicissim hinc ad euertendum eum cuncta ab Vice-  
comite exquirebantur. Nec Eugenio placebat vi-  
uere dominarique eum, vnde periculum Venetae  
libertati semper intactae immineret, & metus in-  
dignatioque Vicecomiti erat ingens, si Ecclesiae  
arma, & Apostolicae Sedis opes, imperiumque  
sacrorum, & suprema illa authoritas fierent subsi-  
dia illis, quos, odium, & inuidia, & dolor alienae  
paciſ

pacis inquietaret. Cùmque adeò accensi vtrunque animi essent, Philippus Maria hostem persequendo hunc, eò prouectus est, vt, & Concilij Basileensis authoritate, Pontificatu deijciendum eum curarit, & postquam id tenuerat, confectis etiam eiusdem Concilij nomine litteris, populoque Romano concitato, Picenum ipse inuaserit, fraude certamineque hoc impia Vicecomitum omnium facta haud dubie supergressus. Verùm ista dum fierent, desciiuit ab ipso Franciscus Sfortia ille per quem fiebant, causaeque defectionis magnae & arcanae quaedam ferebantur. Notissima illa, & celeberrima sermonibus hominum fuit: quòd Nicolaum Picinimum Sfortiae inimicum, Philippus Maria nimium extulisset: atque occultiore susurro mussitabatur simul illud, quòd Vicecomes, & Sfortia, iam pater, & filius, gener, & socer, adoptionis & sponsalium iure nuncupati, vincula ea caritatis incitamenta irarum sibi inuicem fecissent. Cùm enim Philippus Maria Franciscum admiratione virtutis (nisi si fortasse metu) in nomen familiamque Vicecomitum adoptasset, eique Blancam filiam despondisset: grauium atque quotidianarum offensionum vtraque ea necessitudo materiem praebebat, indignante Sfortia, quòd, gener, & successor heresque destinatus, procul ab domo, procul ab aulae limine haberetur; nec tempus matrimonij veniret vnquam, & potiores interim alij essent haud alia scilicet commendatione quàm odio ipsius & aemulatu. Philippus Maria vicissim suas habebat causas expostulandi

grauissime & conquerendi, siue culpa in filio erat aliqua, siue cum nulla esset, fingeatur suspicione Patris, aemulorum arte, vel etiam, innoxius, ut plerique credidere, iuuenis, peccare nonnihil, & peccando, laedere se ipsum cogeatur ob ea ipsa, quæ laedi sese exposulabat. Non enim gratia tantummodo gratiam parit, sicuti verbum habet vetus, sed vberiore foetu, iniuriæ nascuntur ex iniurijs, & dum vlcisci priora homines volunt, damnis fere nouis implicantur. Sic offensionibus alienati mutuis Vicecomes, & Sfortia, quotidie magis alienabantur, exibatque sermo, quod neque alter adoptasse vellet ac despondisse, & alter, sine lare adoptionem, sine sponsa thalamos adspernando, patris & foceri simul nomen inane adsperneretur. Haec inter Vicecomitem, & Sfortiam iacta semina odiorum dissidijque aliquandiù cum fuissent: cuncta speculati Veneti arripuere occasionem, & illectum ad se Sfortiam exercitibus imposuere suis, eoque deinceps imperatore gerebant bellum aduersus Mediolanenses, donec post multas mutuas clades facta ingenti rerum animorumque mutatione, reconciliatus ipse focero patrique cuncta cum eo reconciliaret, atque pax magna sed non duratura iniretur. Neque verò arbitror, ex omni memoria aetatum aut populorum, homines vnquam fuisse vltros, aut tam faciles ad bella, aut in pace tam inconstanteis: & inter omneis eorum temporum casus nihil tam admirabile occurrit, quàm potuisse ipsos inter se populos, & principes fidem  
habere

habere vllam, cùm data semper fides illico vana fieret. In fensi bonis vicissim alienis, ob minimam quamque rem, occasionemque natam ad arma ibant: vbi poenituerat armorum, quaerebant eadem leuitate pacem: haec statim impetrata displicebat, & rursus violata reconciliabatur: atque cùm saepius ita egissent, nondum tamen credendi inuicem stomachus caedumve subibat. Ne vincula quidem ipsa humanae societatis, quae apud gentes omneis, maxima, & sanctissima habentur, in ea principum inconstantia valere, quominus Sfortia insidiantem sibi Vicecomitem deijcere Regno simul & vita conaretur etiam ex quo deducta tandem Blanca, sexus vtriusque prolem ediderat, vxorque iam, & maritus, & horum filij, Vicecomitis nepotes, auus verò iste, & socer, & rursus filia illa, generque, plena caritatis nomina, molleis ac teneros in parte vtraque facere animos possent. Et postquam inter pignora ista saeuitum tantopere erat, coaluere tamen iidem animi rerumque praeteritarum obliuione indicta, aduersus hostes alios iniere foedus, quod ne rursus abrumperetur, morte, credo, Vicecomitis effectum est. Nam ea paulo post, sicuti memorabo est insecuta, tunc cùm flagrante bello Italia, tumescentibusque animis ira, & metu, & mole suspicionum, monstrum adhuc expectari aliquod posset simile priorum, quae focerum, & generum spectacula vtriusque hostibus antea fecerant. Caeterum, huic tantae saeuitiae animorum, & leuitati, quae quidem, non  
tam



tam hominum ipsorum, quàm dominationis videri  
 vitium potuit, rerum etiam, quae interim accide-  
 re, varietatem, & saeuitiam rectè aliquis compa-  
 rauerit. Bergomum, & Brixia, & Vicetia, & Ve-  
 rona, Mediolanenſes inter, & Venetos obſeſſae  
 ſaepeius, captae direptae, die aliquando vno, aut  
 dominos habuere eoſdem, qui hoſtes fuerant, aut  
 ab dominis paulo antea ſuis hoſtilia cuncta pertu-  
 lere. Veneti facto ad Caſſanum ponte, flumen  
 tranſgreſſi Abduam, colleſque depopulati Brian-  
 taecos, capta ad Bripium Leucumque arce, ca-  
 ſtellis circa flumen inſeſſis communitiſve alijs, ſpe  
 maxime inteſtinarum ſeditionum ad ipſa moenia  
 vrbiſ Mediolani acceſſere tamquam deiecturi Vi-  
 cecomitem, Imperijque ſui ſedem facturi Metro-  
 polim. Ijdem ab Orientali Porta ( regione namque  
 venerant ea ) pulſi & reiecti vix tutum in ſua ca-  
 ſtella receptum habuere. Vrbe in ipſa, Euſebius  
 Caimus particeps omnium conſiliorum Principis,  
 idemque ad principes alios ſaepe legatus interfici-  
 tur in templo maximo cùm ad D. Iuliae aram ef-  
 fuſus in preces poſitis humi genibus iaceret: & cau-  
 ſa tam violentae necis fuit ſuſpicio, quòd Franciſ-  
 co Sfortiae Venetiſque arcana imperij prodidiſſet.  
 Cuius hominiſ neci continuatur Nicolai Picinini  
 poſt grauem morbum obitus haud ſine multo ho-  
 minum ſermone, quòd inter tot acies, atque tot  
 inter tela verſatus ille non potius occubuiſſet ferro.  
 Mortuus eſt ad Corſicum qui locus nauigabili al-  
 ueo alluitur quinto ab vrbe lapide, indeque de-  
 uectum

uectum cadauer in templo maximo sepelitur exequijs, quae decerent exercituum Imperatorem flagrantissima apud principem gratia, quo amisso, simulacra luctus in aula tamquam ob res perditas fuere. Tumulus eius ingredienti Templum ad dexteram est iuxta valuas Sacrarij Maioris cum marmorea tabula, quae parieti inaedificata subiectaque Deiparae Virginis imagini, carmen incisum huiusmodi habet. Nicolaum Picininum sub Philippo Maria, exercituum imperatorem, cui, ex corporis breuitate cognomen id fuerit, situm esse ibi, & petere ab omnibus, qui eò accesserint, ut breui apud Dei Matrem prece adiuuetur. Haec duorum hominum funera, curas sermonesque ciuium à publicis malis bellicae cladibus aliquandiu auerterant cum eorum alter, falsa principis suspicionem interfectus fuisse diceretur, alter magnum principi luctum, & vnà cum luctu solitudinem reliquisset, queminam eo amisso perinde fidum strenuumque assumere sibi ducem posset. Ante funera haec tumultus in vrbe fuerat periculo, quàm re maior à Brando Castelleoneo Cardinale ortus, qui magna erat etiam inter collegas auctoritate & fama, aderantque opes, & animus feruidus, reiue semper alicuius molitor. Inter caetera Sacerdotia quae multa & ampla obtinebat, D. Ambrosij Monasterium fuit ea conditione, & iure, ut pars vectigalium cederet Monachorum alimentis reliqua Commendatarius teneret. Monachi erant Cistercienses, qui ordo, iam inde ab initio funda-

tus ibi, & constitutus pari cum Canonicis iure Basilicam eam tuetur. Hos ille Monachos dimiserat è Monasterio omneis, induxeratque Cartusienfes in eam sedem haud parua Mediolanensium, offensione & ira. Fit vrbe tota propter eam rem consternatio, & tumultus, qualis esse solet, cum publica iura violata animos irritauere. Postquam aliquandiu turbatum est, publico denique consilio opis implorandae causa ad Principem itur. Is abire ex templo Cartusienfes iubet, vacuamque relinquere Ambrosianis sedem. Ni abeant, igni se & ferro deiecturum eos minitatur, statimque illi abiere.

At Cardinalis, vbi Ducis interminatione Monachos cessisse loco videt, ad consilium aliud adiecit animum, vt Ambrosiani officij ritus deleteret, ac proco Romanam formulam in Mediolanensis Ecclesiae consuetudinem inducere conaretur. Id non posse fieri arbitrabatur, nisi codicem ipsum intercepisset, in quo formulam Ambrosiani ritus D. Ambrosij manu descriptam ferebant. Asseruabat Codicem Praepositus D. Teclae venalis homo, sicuti res docuit, an potius absque scelere villo, leuis, & parum acer ad custodiam rerum, quae fidei ipsius concreditae essent. Hunc auro corruptum, siue promissis, vel qua alia deceptum arte Castellaeoneus in eam mentem adducit, vt sacrosanctum, codicem prodere sibi non recuset. Accepto Codice Cardinalis idem facile deinde exsequitur caetera, & primum omnium agendo cum Canonicis, impetrat hoc, vt die festo res diuina Romano ritu fiat

fiat ad aram maximam: & data opera dies est electus Epiphaniae, quò maiore concursu, ac celebritate noua ceremonia spectaretur. Confuderat ea res admiratione ac nouitate ciuium animos, atque inter sese frementeis, causam, siue authorem immutandi patrij ritus quaerebant. Postquam, cognitum est, rem esse artificio & machinatione constatam eius Castellaconei Cardinalis, ad ipsius repente aedes aduolauere cum facibus, & obsessa domo minitabantur excidium, ni sibi Codex Ambrosianus ille traderetur. Cardinalis enimvero perusus horrore periculi proiecit è fenestra librum, ac timens in reliquum deinde tempus populi Mediolanensis iras, Placentiam, vnde oriundus erat, aufugit. Philippus deinde ipse moritur iactatus febricula per aliquot dies exhaustusque ventris profluuium quem vtrumque per se lethalem in affecto corpore morbum aduersus remedia omnia contumacem efficiebant curae circumstantes, cum Venetorum arma, semperque suspectus gener, & Imperij amittendi metus obturbarent necessariae quietis horas, indeq; stomachus alienatus coqueret praue, atque venenaret quicquid prodesse poterat. Etiam praeter honestas eas sollicitudines, decorasque molestias Imperij nomine, miserabilis cum ignominia angor exercuerat virum ob Beatricis vxoris impudicitiam, quae deprehensa cum adultero, clementer tamen punita est, dato moriendi spatio intra Binaschi arcem, quasi flagitium aliud, & non extremum illud muliebre puniretur. Reliqua fortunâ moribusque

Vicecomes fuit iste, tum felix hoc ipso, quod  
amissum fratris importunitate fere Imperium om-  
ne receperat, tum absque vlla fratris similitudine  
paternarum omnium virtutum famam nactus, siab  
Romano demum abstinuisset arma, ac nisi orta,  
illa, Capram inter, & Ioannem Vicecomitem con-  
tentione de Pontificatu Ambrosiano,  
fauendo potius huic, offendisset  
suspicionem animos, quasi Sedis  
Apostolicae decreta,  
& authorita-  
tem,  
nollet ob stare sibi ad  
ea quae moli-  
retur.

IOSEPHI RIPAMONTII  
CANONICI SCALENSIS

CHRONISTAE VRBIS MEDIOLANI  
HISTORIARVM AB METROPOLI CONDITA

DECADIS III

LIBER V.



ETROPOLIM PROVIN-  
CIAMQUE Mediolanum, &  
principem hunc Insubriae populum,  
ab ea libertate, quam post lapsas  
Imperij Romani opes, ad eiusdem  
Romanae Reip. similitudinem inua-  
ferat tenueratque per aliquot secula incorruptam,  
Turriani primum sub tribunitiae potestatis titulo in  
seruitutem petiere. Deinde Vicecomites Turrianis  
electis pari fallacia principatum sibi vsurpauere  
eundem, Archiepiscopusque Otho, vi simul, &  
gratia, commendationeque Pontificatus illato in  
familiam suam, Tribunorum nomine, decepta pa-  
tria, Caesaribus elusis, viam ad Imperium inclytum  
sua per gentes omneis posteris suis aditu hoc in-  
uenit, vt ad ludibrium denique tantarum rerum,  
Philippus Maria, nepotum vltimus filiam vnica, &  
cum filia regnum alieno homini relinqueret, inimi-  
ci generi focer inuisus, cui in moriendi dolore  
tristius morte hoc ipsum fuit. Philippus Maria

Vv 2

Viceco-

Vicecomitum Ducum vltimus decessit anno  
CIC CCCCLVII. tempusque id esse depellendae  
seruitutis rati Mediolanenses, fortius omnino quàm  
felicius ad eam rem incubuere, ianque sese pro  
liberis haud dubie gerebant. Inter quae non du-  
raturae libertatis exordia Archiepiscopum Medio-  
lani fuisse nullum, tradidere quidam, quibus ego  
vtique assentirer, nisi potiores apud me authores  
alij superstitem Pontifici Caprae Ioannem Viceco-  
mitem de quo dixi, alterum facerent. Cum enim  
ad Philippi Mariae fere finem Capra vitam Pon-  
tificatumque perduxerit, contraria ei sententiae, &  
certissima coniectura dari hinc videtur. Neque  
verò dici potest, superstitem Caprae Ioannem,  
illum fortasse fuisse quidem, sed nihil iuris aut po-  
testatis ad Ecclesiae gubernacula habuisse, cùm vi-  
tio creatus, ideoque deiectus Pontificatu antea  
esset. Apparet namque fuisse etiam restitutum  
idq; conuincitur Apostolici diplomatis testimonio,  
quo diplomate piam ipsius mentem de sacerdotijs  
quibusdam nouis instituendis laudat Pontifex Eu-  
genius, annuitque, vt ea sacerdotia ex Apostoli-  
cae Sedis autoritate instituat, quò auctior, &  
florentior in Ecclesia Mediolanensi diuinus cultus  
esse possit, & quò pluribus simul ipse munimentis ad  
aeternam salutem insistat. Ibi verò, & Archiepis-  
copum Ecclesiae Mediolanensis Apostolicae litte-  
rae nuncupant Ioannem hunc Vercellini Viceco-  
mitis filium, & omni alia affabilitate honoreque  
verborum prosequuntur: quarum sane literarum  
huc



huc transferre summam iuuat ; vt melius clariufque nofcatur origo facerdotiorum , quae ab Archiepifcopo illo Ioanne fundata gentilitia hodie pofteris eius manent . Summa igitur ea litterarum haec fuit . Reuerendiffimum in Chrifto Patrem & Dominum Ioannem Archiepifcopum Vercellini Vicecomitis filium volentem amplificare Mediolanenfis Ecclefiae cultum , pioque animo , pro fluxis & caducis mortalium rebus , fupera , & aeterna cogitantem supplicaffe Apoftolicae Sedi , vt ex eius authoritate licitum fibi effet , ad caetera loca Canoniconum templi maximi , locum addere vnum , quem obtinens Canonicus , dignitatis vocabulo Praepofitus appellaretur . Supplicaffe item , vt in D. Nazarij Aede ad Aram , quae Florana dicitur , & in Templo maximo ad aram alteram , quamcunque ipfe elegiffet , ius facultatemque haberet facerdotia instituendi ad rem diuinam in vtraque ara perpetuo faciendam . Quae facerdotia , & cum Praepofiti titulo Canonicatum , Archiepifcopus idem , ficuti fuo aere fundaturus inftitutusque effet , ita supplicaffe ; vt fibi heredibusque fuis , poftquam ipfe deceffiffet , ius foret eligendi ac nominandi homines idoneos , quibus ea demandarentur . Ea confilia & poftulata , quia pia & iufta effent , continerentque diuini cultus amplificationem , etiam authoritate Apoftolica debuiffe comprobari , ideoque annuiffe Pontificem Eugenium , vt Archiepifcopo Ioanni cuncta ea ficuti effent expofita & petita gratificaretur . Inerat deinde diplo-

diplomati mandatum aliud Apostolicum, ad Iosephum Bripium Canonicum eiusdem Ecclesiae Mediolanensis, vt ille, inspecta & cognita donatione bonorum, que sacerdotijs instituendis ab Archiepiscopo Ioanne assignarentur, si rem esse idoneam videret, exsequeretur, atque praeesset ei actioni. Assignauit Archiepiscopus, Canonico quidem & Praeposito florenos nummos centum: rei verò diuinae ad Aram vtramque faciendae, nonaginta. Minime igitur ego dubito, quin, & Archiepiscopus iste Vicecomes, & legitimus Archiepiscopus Mediolani fuerit, tunc cum Philippo Maria extincto, Vicecomitum nomen ab superbia fastigioque principatus ad priuatae fortunae iura necessitatesque redierat. Sed mortuo Principe, tanti rerum motus aderant, bellique tanta moles, vt sicuti haec Archiepiscopi illius actio fefellerat vulgatos vrbis annales, planeque exciderat ex omni litterarum memoria, nisi repertae fortè apud Archiepiscopi heredes Apostolicae litterae traditaeque nobis rem silentio obliuioniq; exemissent: ita actiones alias eiusdem aliorumque Pontificum inciderisse mirum haud videri debeat. Nunc consilia Reip. Mediolanensis in vsurpanda tuendaque libertate, spes atq; cupiditates Italiae principum interiectas, varios ancipitesque casus, & veluti dubitantem in eo discrimine fortunam, & qui denuum exitus negotio fuerit, narrare pergemus. Mortuo Principe, Mediolanenses erectis ad liberandam urbem animis, haud sine execratione maiorum suorum, qui ab familia

familia vna, per Archiepiscopi fraudem, seruitium patriae imponi illud passi essent, conspirauere, ne quemquam Mediolani regnare paterentur. In id, prouisis, quae prouidenda erant, multumque inter se se collocuti principes vrbis etiam ante diuulgatam Ducis mortem, postquam ab intimis ea celari desita est, disponunt passim armatos ad omnia suspecta loca, vias ipsas transversis fossis, & catenarum obijce, ne sit vsquam ad interiora aditus, claudunt. Dein, tamquam haud dubie iam usurpata libertate, principatuque deleto, Reip. formam, quam maxime aequabilem, repetitis ex vetere Rep. exemplis tumultarie instituerunt: publicum vrbis concilium Senatusque octingentorum, qui summae rerum praessent, renouatur. Caeteri Magistratus in singulas portas descripti bini, hique facti bimestres, vt eunte per capita honore, pax animis, antiorque status eius maneret: caetera omnia salubria, & apta libero populo quae possent esse conquirebantur: & quod magis placebant initia libertatis, eò inuidiosius execrabiliusque Vicecomitum & regni nomen fiebat. Haud tamen prohibuere, quominus Philippus Maria principum ritu sepeliretur, estque sepultus pensili tumulo post Aram maximam, quale Ioannis Archiepiscopi monumentum manet. Alij, sepultum quidem rite principem, sed die funeris, tantum fuisse turbarum in vrbe tradunt, vt interpellata exsequiarum ceremonia ordineque confuso, pompa ipsa dissiparetur, & ab deducendo cadauere auersi Clerici simul;

&amp;

& procères, & familia tota, & populus ipse spectator abirent, quàm quemque vel periculi metus, vel cura aliqua suarum rerum, vel studium etiam inane videndi quid fieret, auocarant. Erant publici consilij capita repetendaeque libertatis authores, Antonius Triuultius, Theodorus Bossius, Georgius Lampugnani, & Innocentius Cotta. Hos, & principes fere alij sequebantur, & plebs ipsa, ceu parentes patriae suspiciebat, intentaque erat ad imperia eorum, & nutus. Sed multa simul obturbabant terrebantque: prope victor in vicino Venetus hostis, mota Italiae totius arma ob relictam hanc sine imperio urbem, vrbe in ipsa factiones detectae trahentium rem ad eundem Alphonsum, qui paulo antea captiuus Mediolani fuerat. Et erat Mediolani Regis eius exercitus, missus quidem ab Rege subsidio aduersus Venetos, cum hoste imminente illo Philippus Maria periclitaretur, sed nunc mortuo Vicecomite, eadem copiae Aragonio Regnum, & sibi sedem in hac prouincia meditabantur, versaque in terrorem etiam auxilia erant. Praefectus eorum auxiliorum Raimondus Boilus, occupata Iouis arce factus ex auxiliari hostis, vexilla Regis sui populo ostentans concitabat turbatos nimium sua sponte animos, ut specie illa noui, & externi dominatus obiecta alienarentur interdum ab ijs, quos liberandae patriae auctores nominaui. At viri fortes, quibus, neque perseverantis animi vigor deerat, neque ad consilium, quamuis inter ancipitia expediendum,

+

dum, subtilitas ingenij & acumen, & rerum vsus, eodem tempore, & malum tollere hoc quod domi natum erat, parant, & aduersus imminentes alios vndique hostes, praesidia opportuna moliantur. Raimondum eum Aragonensem, corruptis auro qui circa ipsum in arce erant, deiecere inde, arceque recepta ipsa, inimicissimum illud liberati opus immissa cum ferramentis plebe demoliti sunt. Familiam verò Raimondi, quae in Monasterij Ambrosiani aedibus erat, diripuerunt, vniuersam, & multiplici in omneis partes terrore ostentato, duces alios peregrini exercitus adiungere sibi: quae omnia, nec prouidentius, nec felicius administrari potuere, quàm gesta, & administrata erant. Paulatim inde agendo multa, & prouidendo labuntur ad consilium, fronte quidem ipsa, & specie consentaneum prudentiae & felicitati eidem, atque liberantibus patriam in tali tempore prope necessarium, sed exitu ad id quod quaerebatur miserabili, & calamitoso. Franciscum Sfortiam, generum suum, Philippus Maria, saepe alienatum, saepe reconciliatum rursus, & semper, vt demonstraui, suspectum, paulo antequàm moreretur, victus ingruentibus vndique periculis, rogauerat, vt ad se cum exercitu suo veniret, & in itinere ipso, dum properat ille, dum accingitur ad soceri mandata, nouae exortae suspiciones tardauerant venientem, & moratae erant, donec absumpto senectute, ac finitis eo tandem exitu suspicionibus, agitare serio demum ipse imperia, & res magnas co-

pit. Hunc, accepto nuntio de foceri morte, pro-  
perantem ab Cotoniola, iamque progressum in  
Parmensium fines, & ibi castra habentem, re agi-  
tata in Senatu, per Scaramutiam Balbum rogant,  
vt in easdem gerendi belli conditiones, in quas  
fuerat à Philippo Maria euocatus, venire pergat.  
Quod consilium, vt dixi, sicut exitio rebus fuit,  
ita salutare in frontem, & prope videri necessarium  
poterat ob indlytam eius hominis in re militari  
famam, ob veterani robur exercitus quem ducta-  
bat: & quia nisi socius amicusque assumeretur,  
acerrimum fore hostem apparebat, vel suis ipsius  
auspicjs, vel translata ad Venetos omni virium  
suarum mole. Erat Franciscus Sfortia Sfortiae  
Attenduli filius, cui Attendulo, sua virtus, & for-  
tia facta apud reges gratiam, opesque, & inde  
partem imperij, propriosque exercitus & ipsum  
Sfortiae nomen inuenere. Antea, Iacobus, siue  
Mutiolus fuerat: parentesque eius, Ioannes, &  
Elisia intra Cotoniolae fines honesti, praefagium  
accepisse ferebantur, fore, vt deposito, quod  
ipsi imposuerant nomine, proles ea nomen assu-  
meret aliud quod fieret familiae cognomentum, &  
late noscicaretur. Hoc igitur parente Franciscus  
ortus, postquam is in Aterni fluminis traiectu  
summerfus absque duce vllò Sfortianum exercitum  
reliquerat, consensu militari salutatus imperator,  
ac deinde, quacunque bellum aliquod gereretur,  
expetitus, & Philippo Mariae praesertim ascitus,  
fortunaque sub ipso vsus ea, quae demonstrata  
est,

est nunc accepta à Mediolanensibus gerendi belli potestate, reique militaris administratione, statim diuisas curas habebat, tuendi Mediolanensium, ipsorum Imperij, & simul rapiendi vsurpandique inde quantumcunque posset salua in speciem fide: donec gerendae demum alienae personae finis, belloque aperto inuadendi quos tuebatur, tempus veniret. Appellatis in itinere Parmensibus, acceptaque ab ijs fide, ne ab Mediolanensium amicitia & autoritate discederent, Cremonam cum exercitu progreditur, quam ei urbem Philippus Maria dederat cum Blancam filiam in matrimonium daret. Ibi condiciones, in quas fuerat ab socero conductus, cum Aluísio Bossio, & Petro Cotta Reip. Mediolanensis oratoribus firmat, vno hoc addito, vt si Brixiam ipse cepisset, urbem eam haberet, liberam: si postea Verona etiam esset capta, hanc quidem haberet, Brixiam verò dimitteret. Rebelles inde Ticinenses, qui Mediolanensium odio parati imperium quodlibet accipere aliud, aduersus Metropolim caput sibi aliquod quaerebant, assumit sibi, Comesq; Papiæ appellatur praeclara interim apud Mediolanenses ipsos excusatione hac vsus, quòd nisi maturasset ipse urbem recipere eam, ventura fuisset in hostium potestatem, quodque magnus bellicus apparatus, & Pado amni armandae naues ibi haberentur: spes praecipua belli, quod ipse administrandum suscepisset. Proinde, ne offenderentur, subsidiaque imperij sui scirent esse quicquid Franciscus Sfortia possideret.



Mala initia negotij etiam ad exitum infausti, pessimeque Reip. consultum optimus quisque autumabat tunc cum summa rei militaris ad hominem eum delata esset. Ac talibus quidem initijs offenso Senatu, multumque suspecta noui Imperatoris fide, consilium occulte initum est Mediolani, vt peterent potius ab Venetis pacem, quàm vt bellum gererent eo duce, qui rapiendo sibi, & intercipiendo quas ad Metropolim adiunxisse debuerat vrbes, rudimenta ea infidi animi in ipso rerum aditu posuisset: missoque confestim in castra Venetorum Petro Cotta pacem & foedus petiere. Sed cum Veneti, aliàs etiam, vt ferebant, elusi spe pacis, legationem eam spreuissent, necessaria visa dissimulatio aduersus Sfortiam, quem ceu priorum obliti, attentiore in posterum cura, per litteras monuere, vt meminisset, tuendi Mediolanensium Imperij causa ipsum esse ascitum: nihil erraturum, si omissis in praesentia curis cupiditatibusque alijs, rem eam ageret: Senatum populumque Mediolanensem, inter alia instituta, quibus delectetur, grati animi famam erga benemeritos non parui aestimare, & posse praemia tribuere ei ob fidem, maiora, quàm quae anrecapere ipse festinaret. Talia quaedam ad Sfortiam in castra perscribi Senatus iusserat: vsique deinde dissimulatione ac lenitate eadem, speculatores apposuerunt ei; per quos, in singula fere momenta, quid ageret, quodue moueretur, scirent. Et ille, nondum, scilicet, maturum esse tempus existimans depromendi id quod penitus  
animo

animo inclusum habebat: simul, & Senatus litteris,  
 & conscientia admonente, videns, ob interceptam  
 Papiam, tentataque in conditionibus alia, suspe-  
 ctum se esse Mediolani, sedulo agitabat, molieba-  
 turque omnia, ut suspicione ea se eximeret, face-  
 retque fidem animi, nihil aliud, quàm benè gestae  
 Reipub. laudem quaerentis. Opportune autem  
 ad placandos Mediolanensium animos, proban-  
 damque Senatui fidem, ei contigit, ut Derthonen-  
 ses Ticinensium animo semper auersati Metropo-  
 lim, urbis suae imperium ad ipsum deferre vellent,  
 multumque rogarent, ne accipere grauarietur: quod  
 abnuit ille, & Praetorem tantummodo dedit.  
 Caetera deinde nauiter ac prospere administrando,  
 consulendo de rebus omnibus Senatum, & Sena-  
 tusconsulta diligentissimè exsequendo, ea aliquan-  
 diu erat integritatis fideique existimatione, ut, cum  
 alia super aliam victoria nuntiaretur, obiurgarent  
 amici eius alios, quòd ipsum eiusmodi suspicioni-  
 bus violassent. Cum enim praeter Veneti belli  
 molem, Galli etiam, & Genuenses, & Sabaudien-  
 sis, & Estensis, ad occupanda Mediolanensis im-  
 perij varia loca, prout quique partem aliquam,  
 vicinitatis illecebra, seu iure nonnullo petebant,  
 vno tempore coorti essent: tantis afflictam difficul-  
 tatibus Remp. fide illius ac virtute quotidie fieri  
 meliorem apparebat. Et referebat, ut dixi, ille  
 cuncta ad arbitrium auctoritatemque Senatus, ut  
 ne gloriae quidem fructum, adeò non iam imperij  
 partem quaerere sibi vllam videretur. Foedus  
 quin

quin etiam inire cum Galliae Rege, ne ea res apud Mediolanenſes detrimento ſibi eſſet, reſuſauit, cum clandestina in id legatio in caſtra ad ipſum veniſſet. Maioreque & illuſtiori merito, Rainaldum ab Rege eodem cum exercitu miſſum ad tenendas Italiae res, iamque concitatis ad rebellandum Alexandrinis, finitima inuadentem, reſpreſſit precibus & authoritate memorans in colloquio vetera patris ſui merita erga Regem Gallum. Placentiam inde, quae praefidio Venetorum tenebatur, oppugnare aggreſſus, quadraginta dierum labore expugnat, urbemque eam inter exercitus vtriuſque iniurias vaſtatam peſſime ac direptam conſtituit Reip. Mediolanenſis nomine: ſolatia, & iura, & magiſtratus dedit. In cuius quidem oppugnatione urbis, nihil à ſcriptoribus praetermiſſum eſſe video, quò maior fieri poſſet gloria, vel ducis ipſius, qui rem geſſit, vel Populi Senatusque Mediolanenſis, cuius nomine geſta eſt, vel etiam hoſtium ipſorum, qui, ne urbis eius poſſeſſione deſicerentur, pertulere ac tentauere quicquid ex patientia, ingenijſue mortalium, inter magnas dimicationes, hiſtoria vnquam admirata eſt. Sagunti profecto, ſive Syracuſarum, aut Tyri conſtantiam & aerumnas, & hinc oppugnantium, hinc obſeſſorum artes, & in vtraque parte multiplicem ſtragem Placentina ea res aequauit: neque ego repetendo deſcripta iam ſedulò ab alijs, certamen inane ſumam, otioſe abutar, cum vix ad ea ſufficiam, quae nunc primum ex diuturno ſilentio in lucem hanc

hanc aliquam extrahuntur. Agentem ista Sfortiam laudabant quidem Mediolanenses, decesseratque suspicio multorum animis capitalissima illa, quam ipse sibi, primis, ut demonstraui diebus, concieuerat: sed quò maiora erant ea, quae gessisset, rursus nimia gloria viri suspiciones aliquando hominum easdem irritabat. Nam, praeter secundas quotidie magis ad Placentiam res, & iam prope depulsos ea regione Venetos, foedusque cum Galliae Rege repudiatum: celebrabatur omnium sermone singulare illius ingenij acumen, quo consilia omnia Venetorum excepisset, atque elusisset, simulque robur animi, quo leuiter laceffitus vocasset ipsos ad vniuersae rei dimicationem, & illi pugnam detrectasse ferebantur. Nimium id esse gloriae videbatur, quae, ne sese altius efferret, frenandam eam, atque comprimendam, secretò in concilijs aiebant. Itaque, dum ille Placentiam in propinqua iam spe victoriae quateret maxime, & oppugnaret, misso alio in Alexandrinum agrum ab vrbe exercitu Mediolanenses, postquam infestum rursus ei agro Galum ita domuere, ut super vetera exempla, terribile atque funestissimum id infelices reliquiae referrent domum, gloria etiam ipsi elati, victorem exercitum duci Derthonam iubent, eique vrbi, quòd Metropolitano spreto imperio principem sibi Sfortiam habere voluisset, pro ea temeritate malum, exitiumque ferri. Ne magna aliqua vrbis eius calamitate sanciretur vrbum etiam aliarum fides, idque exemplum in Sfortiae ipsius contumeliam statueretur,

tueretur, ea res obstitit, quòd ciues illi, eiectò  
protinus quem Sfortia dederat Praetore, permise-  
re sese Mediolanensium potestati, & in quaecun-  
que pacta adigi ipsos visum fuit, iurauere. Mini-  
me fallebat Sfortiam, telum in sui nominis famam  
directum fuisse illud, nec Derthonensi populo, sed  
sibi vni terrorem eum esse ostentatum, admonito-  
que sic esse omneis, quantum opis & praesidij in  
tutela fideque ipsius collocatum habere possent.  
Sed multò magis angebat eum, quòd parce, &  
lente cuncta ex vrbe ad exercitum mittebantur,  
siue pecuniam ad persoluenda stipendia militi, siue  
supplementum postulasset. Iam enim, praeter  
excitatos magnitudine rerum animos: ad minuend-  
dam illius famam, ne periculosa aliquando liberta-  
tifolet, etiam noua spes erat exorta. Senatui po-  
puloque, posse cum Venetis pacem fidam hone-  
stamque componi, quoniam pars vtraque satis  
gloriae, satis etiam cladum, & pericula in posterum  
eadem haberet, qui bellorum omnium honestissi-  
mus est finis. Consilij huius auctores in Senatu  
praecipui erant Picinini duo, Nicolai filij, de cuius  
exitu demonstratum est, qui paternarum inimici-  
tiarum heredes remouere ab exercitu Sfortiam co-  
nabantur. Atque hortantibus assidue eis, & sua  
sponte ad pacem inclinante Senatu, quae libertati  
non obstaret, missis vltro citroque legatis, res ita  
agitabatur, vt Senatui Populoque Mediolanensi  
cum Senatu Populoque Veneto pax esset: de  
praesenti statu & conditione partium nihil muta-

retur.

retur. Haec ita pepigerant legati. Sed quia rata esse non poterant, nisi prius in Concilio octingentorum relata, comprobataque essent, admonitus Sfortia per homines sibi fidos, quos Mediolani habebat, id spatij habuit ad plebem concitandam, ut coaspernata pacem, seditioso clamore bellum potius iuberet. Iactabant eius fautores, pacem fore ignominiosam, infidam, quouis bello tristiores, & alia, quae per litteras, aut nuntios identidem ipse inculcabat tamquam Reip. cura: suberat dolus, ut exercitum ipse haberet, & pars utraque bello fatigaretur, donec ad rem suo nomine gerendam matura omnia essent. Nam ubi Venetorum exercitum agro Mediolanensi submouisset, statuerat, vel occasione arrepta aliqua, vel si nulla daretur, ipso adoptionis & matrimonij iure conuertere ad recuperandum soceri imperium eadem arma, quae ad defendendam Reip. nostrae libertatem accepisset. Neque me fugit, eos, qui Sfortiae huius gesta litteris mandauere, & propria cura res eius amplexi sunt, eleuare ista verbis, culpamque conferre omnem in Mediolanenses ipsos, qui, tum dissidijs inter se aeternis, tum implacabili erga Sfortiam inuidia, perpetuaque insectatione gloriae eius, coegerint ipsum consulere suae salutis, & sibi filiisque suis debitam imperij huius hereditatem vindicare. Sed commune quidem hoc est omnium, qui res alicuius, siue Principis, siue populi, gratia rogatuque aliquo sumpserunt excolendas, ut cuncta, quae minuant laudem, aut artificiose declinent, aut in-

contrarium vertant. Alioqui, sine fructu laborem, & fortasse damnum habebunt. Mihi, non excolere, sed narrare vetera haec sanctè aggresso, procul abest ea cura, semperque vera speciosis antefereamus. Magnus utique bellator Franciscus Sfortia, & omni reliqua laude par antiquis non caruit eo certe vitio mutabilis animi, quocunque spes aliqua fortunae augendae, & dominandi cupiditas vocaret. Etiam sub socero Philippo Maria, tum antequam gener esset, tum post deductam maxime Blancam, nunc ab ipso ad Venetos, & Florentinos, nunc à Florentinis & Venetis ad ipsum descuerat haud alia inconstantia & leuitate, quam sine qua ipsam constantiae virtutem, nudam atque inutilem venatrix suorum commodorum regia prudentia appellat. Iam inde à Sfortia patre didicerat has artes, atque mobilitatem transferendae fidei prudentiaeque in partem eam, vbi maiora momenta vtilitatum starent. Nam etiam ille Neapolitanis antea bellis, nunc ab Ludouico Andegauensi contra Reginam, nunc ab Regina contra Alfonso steterat: & variatis tamen ita vicibus blandissimi scriptores officij nomen imponere potuerunt. Quae porro iura successionis, quamue adoptionem, quodue matrimonium aduersus Mediolanensem libertatem iactare poterat gener & filius soceri, & patris, cuius maiores haud alio, quam communi nobiscum iure nati in hac patria erant? Nimirum etiam ipse sibi conscius, quam tenui filio sua haec iura attinerentur, premebat

alto



alto silentio rem totam, neque verbum adhuc ei excidebat vllum, vnde suspicandi minima ansa praeberetur, nisi multa, quae occulte agebat, intimos animi sensus, ipso non suspicante prodidissent apud eos, qui nunquam desierant ad consilia illius speculanda intenti esse. Postea, maturis iam negotijs, res simul & verba, & repentina armorum conuersio, translatique exercitus, & assumpti ad Metropolim inuadendam hostes iidem, in quos pro Metropoli pugnat, omnia vno tempore, sicuti demonstrabitur, & comprobauere quas dixi suspiciones, & nimium serò coarguere alios, qui vanum esse timorem volebant. Nunc Sfortia, postquam arte conatuque omni peruicerat, ut spreta, quae iam conuenerat pace, Senatus bellum decerneret, simulatione quidem, & cunctarum apparatu rerum intentus erat in quamcumque partem, siue Senatus censuisset, siue laceffissent hostes: animi verò sui curis & occultissimo sensu spectabat urbem Brixiam, de qua vrbe in conditionibus erat, ut si eam ipse cepisset, potiretur, haberetque propriam & suam. Nondum id quidem suspicione vlla attigerant Patres sed paulo post mirifice attigere: ac nihil aliud in praesentia cogitantes, quàm ut decreto bello, nulli rei deessent quae ad profligandos vndique Venetos, imperiumque constituendum, pertineret, de Sfortiae ipsius fide animoque erga Remp. ita iudicaturi erant, sicuti ille deinceps egisset. Is nunc castra ad Cremonam habebat, acceptoque Senatusconsulto,

quo bellum ei sicut antea decernebatur, ad Cassanum cum exercitu proficiscitur, quam arcem, quodque municipium Sacri iuris olim, postea ab dominatu altero sicuti pleraque alia possessum, Veneti hoc tempore habebant. Eam recuperari arcem permagni ad rerum summam intererat, obtinente Veneto Laudem quoque Pompeiam, & Meltium, & Treuilium, & pleraque agri Cremonensis itaut neque supportari commeatus in maiora castra, neque nuntij sine discrimine commeare possent. Mittitur illuc ab Senatu etiam Astor Fauentinus cum ijs copijs, quibus ipse praeerat. Huic mandatum, vt pontem in Abdua faceret, quâ Cremonensem agrum alluit flumen. Facto ponte coniunctisque exercitibus, decem dierum oppugnatione recuperare arcem. Eo terrore, qui Meltium obtinebant, aufugerunt. Pandinum inde & Ripalta, & quae trans Abduam castella praefidij Venetorum tenebantur, capta, & direpta, vel si expedierat, munita & infessa. Veneti ad defendenda ista segniores, Cremonam vi tota aggressuri erant: iamque inducta in id classe Padus inhorruerat. Tunc scilicet Sfortiae cura rerum, suarum pugnare cum authoritate Senatus: & non solum tuendae Cremonae studium, quam urbem ei Philippus Maria assignarat, sed etiam Brixiae adipiscendae cupiditas, quam sibi pepigerat in conditionibus, certamen cum publico consensu ducumque aliorum sententiâ ad rerum summam, inutile iniecerunt. Volebat Sfortia, imposito pro-

tinus

tinus in naues milite, totis aggredi viribus Venetorum classem, crebrisque super ea re concilijs, gerendi belli rationem hanc proponebat, ut defensâ prius Cremona, ad Brixiam ducerent oppugnandam: ita fore, ut Veneti transgressu Olijaminis prohiberentur, & bellum in suis finibus haberent. Patres censebant, Laudem Pompeiam, primum omnium esse recuperandam: & cognita per legatos Sfortiae sententia, misere in castra, Oldratum Lampugnanum, & Ioannem Casatum, qui voluntatem Senatus exponerent, atque hortarentur magnopere Sfortiam, ne ei rei quicquam praeuertisse vellet. Ille tamen in sententia sua perstabat, & quamquam consensu ducum praefectorumque aliorum victus, castra in Laudensem agrum mouisset, Cremonam tamen & Brixiam, nisi collocatas intuto haberet, nihil praeterea satis quieto animo aggressurus esse videbatur. Opportuna consilij cupiditatisque eius fuit repentina Venetorum impressio, qui duce Micheletto quodam transgressi Ollium, castella, quae nostri capta habebant, inuasere. Casum scilicet periculumque iactando illud Sfortia denique peruicit, ut potestas sibi ab Senatu permitteretur agendi quicquid è Rep. esse duxisset: eiusque potestatis & arbitrij tempus ita definiere: donec Patres aliud censuissent. Addidere collegam ei Gulielmum Montisferrati Demarchum, qui, cum in Venetorum castris diu militasset, hoc tempore stipendia ea reliquerat, & in parte nunc altera quaerere bona fide

fide virtuti locum videbatur. Huic Gulielmo partem exercitus eam attribuerunt, quae Barptolemaeo Bergomenſi attributa prius fuerat, & honoris militiaeque gradum dedere eundem, quem ille tenuiſſet. Namque Barptolemaeus ille notus adhuc, & per ſeria, per iocos ob militarem gloriam ſimul & cognomenti ludum frequens in ore famae, cum ſub Philippo Maria ordines duxiſſet, dein ab eo, Modoetienſi arcis, crimine, ſive ſuſpicionem interpoſita traditus in cuſtodiam, ſuſpenſo è pinnis fune delapſus ad ima aufugiſſet, mortuo principe, ab Senatu reſtitutus honori priſtino, nunc refugerat ad Venetos abieratque nocturnus è caſtris. In huius locum Patres ſuffecere quem dixi Gulielmum, ac praeter eum additi ſpeculatores ſimul adiutoresque Sfortiae clari bello viri praefectique ſingularum turmarum, Carolus Gonzaga, Chriſtophorus Torellus, & Antonius Intimilienſis, quorum vltimus ad Meltium in praefidio fuerat, & arce illic amiſſa profugus ad Mediolanenſes, tantò magis fidus ſperabatur aduerſus eos vnde abiſſet. Accepta igitur in hunc modum poteſtate, & arbitrio gerendarum rerum, & copijs ducibuſque auctus hiſce, ſimul poteſtatis & arbitrij vincula cuſtodeſque fidei circa ſe plures habens Sfortia, quàm fortaſſe vellet, ad Cremonam pergit ire tuendam ab Venetae claiſis incurſu, ſcilicet, vt ab ea parte firmatis opibus ſuis, opes deinde, Brixiâ etiam receptâ, maiores, iſſdem Reipub. armis tentaret, imperiumque ita trium magnarum urbium, iam  
inde

inde à principio captâ sibi Papia, habiturus erat. Veneta classis septuaginta nauium Andrea Quirino duce constiterat iuxta Casalensem arcem in eodem Padi amnis brachio, quod Metropolim afflixerat ingenti clade sub Philippo Maria, nomenque inde acceperat. Terrestrem alium exercitum sub Micheleto ad septimum inde miliare Veneti habebant. Sfortia, faucibus brachij obsessis, oppositoque ibi Ticinensium nauium praesidio, nequid effugij in medio discrimine hostibus pateret, ab altera parte bombardas in hostilem classem praecipuae magnitudinis dirigi quatuor iubet, ictibusque continuis & ferrea procella Venetas naues euerberari. Quod cum absque vlla intermissione fieret, adfuit etiam rebus ita dispositis ea quae belli fortuna dicitur. Nam eodem tempore, & contortae è bombardis pilae ingentes cum foeda hominum laceratione, nauium latera compagesque perfringebant, & collocatae in faucibus triremes, concitato repente cursu, Venetorum ex transuerso superuenere nauigijs, vnde crebra in nostros tela accidebant, prosperaque pugna sagittarios inhibuere, & nullum interea subsidium ab Micheleto aderat: quae res haud dubie victoriam siue multo sanguine nostris dedit, despondente animos Quirino, cum nondum plane victus esset. Is enim, vbi iniqua simul omnia classi, & ex terrestribus castris auxilij spem elusam vidit, subductâ raptim in vicinam arcem turbâ, quae superfuerat, nauibus injici flammâs iubet, ne integrae in manus hostium peruerirent.

rent. Et Sfortia, cùm à præda continere militem  
 nequiret, veritus, ne superueniente Micheletto,  
 manus impeditae corrumpèrent victoriam, quae  
 iam parta erat, latius porro spargi flammās easdem  
 iubet, totamque classem incendio inuoluit, quam  
 Veneti, haud sine gemitu, suo simul & hostili  
 igne flagrantem ex arce conspexere. Nuntiata ea  
 victoria Mediolanum, perinde ac debebat, laeta  
 Patribus populoque fuit, honosque etiam ob rem  
 bene gestam Deo immortalī habitus est, & Sanctis-  
 sima Virgo deipara praefes custosque vrbis adora-  
 ta pretiosissimis donis, quorum nonnulla adhuc  
 manent in Templo maximo & sub eius titulo vi-  
 ctoriae ab aedituis indicantur. Caeterum, debi-  
 litatis ea nauali clade hostium viribus, magnoque  
 periculo liberata Metropoli, censuere Patres mo-  
 dum imponendum esse potestati, quam Sfortiae  
 summam liberamque permisissent, ac de ea re Se-  
 natusconsultum factum est in haec verba. Quod  
 Senatus Populusque Mediolanensis Francisco Sfor-  
 tiae, rei bellicae arbitrium dedit, vt is ageret quic-  
 quid è Rep. esse censuisset, eique arbitrio tempus  
 quodcunque visum esset, finiuit; nunc idem Sena-  
 tus Populusque de ea re ita censet, vti Franciscus  
 Sfortia, de rebus omnibus quas hoc bello acturus  
 erit ad Senatum referat, sententiamque Patrum,  
 & populi iussa expectet. Adiecere Senatusconsul-  
 to, vt primo quoque tempore traiceret cum exer-  
 citu flumen Abduam recuperandi Carauagij causa:  
 Carauagio recepto, duceret ad Laudem Pompe-  
 iam,

iam, & ei quoque vrbi recuperandae infisteret. Haec Senatus autoritas perscripta & missa protinus in castra ad Sfortiam, animum eius metu simul & indignatione confudit. Irascebatur, quia coarctati sibi potestatem, imperiumque inhibitu[m], videbat eo maxime tempore, quo potius ad rei gestae praemium laxari amplificarique omnia par esset: timebat, ne detecta iam & nudata omni sua mente consilioque Brixiam eundi, Patres ad rem eam impediendam atque disturbendam cuncta semper excogitaturi essent, eoque nunc inhibuissent imperium. Iam enim ipse statuerat ad Brixiam ire oppugnandam, & consilio super ea re habito, facile omnibus in eandem sententiam adductis, castra illuc mouebantur, cum redditae sunt ei litterae Senatus, quae, circumscripta, sicut dixi potestate, ad Carauagium ducem agmenque auertebant. Sfortia enim uero, dissimulans adhuc alte animi sui destinata & dolorem, ad Carauagium, sicuti imperatum erat, iter conuertit, nihil aliud, ut fertur effectus, quam obediendum esse illis, quorum periculo res gereretur. Quinto die quam ex Cremonensi agro mouerat, disposito locis idoneis exercitu id oppugnare castellum aggressus, ipse, & ceteri Mediolanensium duces, quibus iam aequatum fere imperium erat, in omnia incidere pericula & difficultates, quae in magnae cuiuslibet oppugnatione urbis perferendae essent. Nam, & natura locus erat ad mille fere passus ob fossas & aquarum diuortia prope inuius equiti, & olim addita munimenta



menta manu, nouis auxerant artibus hostes: hique pridie, quàm noster exercitus eò duceretur, magnis agminibus antecesserant, & maiore etiam postea numero superuenere. Itaq; per mensis fere spatium, quotidiana praelia inter exercitum vtrumque mittebantur, & auersa omni ab arce moenibusque contentione, per agros & finitima loca dimicabatur, dum, aut qui iam praeuenerant, prohibent accessu nostros, aut nostri reliqua succedentia agmina hostium arcere volunt. Ac sicuti eadem in vtraque parte virtus, idemque fere numerus, & potiundi loci cura eadem erat, ita etiam neutri vquam ex acie laeti abibant. Quinto demum & trigesimo die, postquam eò ventum fuerat, cùm Mediolanenses circumuallatum aegerrime oppidum haberent, ac promouendo ad moenia gradum, singulas prope glebas multo suo & hostium sanguine infecissent, atque tunc etiam exercitus vterque pari defixus metu haereret, verentibus nostris, ne oppugnationi intentos Veneti à tergo aggrederentur, Veneto summae rei discrimen vitante: principium vincendi nostris inde est datum, vnde sub victoriae specie clades magna parabatur, nisi casus alius, ut pleraque in bello solent inania, & fortuita, ex manifesto periculo salutem gloriamque dedisset.

Præerat arcj Matthaeus Capuanus eo animo vir, ut neque constantiae ac fidei anteferreret quicquam, neque inanem eius gloriae titulum, suo aliorumq; exitio quaesitum vellet. Is, vbi circumfusum oppido Mediolanensem exercitum, & necessitatem

adefse vltimam vidit, existimans, dedita quàm capta arce, meliorem fore suam, & praesidij conditionem, siue fortasse etiam nihil adhuc tale agitans, sed moram imminenti irruptioni nonnullam quaerens, misso ad Sfortiam caduceatore, institit cum eo agere de conditionibus tradendae arcis, iamque ea res, & in principum conuentu, & totis castris magnopere agitabatur. Interea, Venetorum duces qui festum pugnando exercitum habebant & ita collem castra contulerant, habito concilio de summa rerum, dictisque sententijs, quid quisque optimum factu censeret, sententias eas, ad Senatum suum ordine perscribunt: indicant praesentem belli statum, exhaustas iam in vnius castelli defensione pugnas, & factam prope deditiorem; abscedi inde agique alia, an subsidium ferri inclusis, & in rei non magnae discrimine periclitari vniuersos velint, ceu parati in vtrumque consulunt. Senatores Veneti, pensatis, quae referebantur, breui consultatione, retinendum esse Carauagium statuunt, idque propere ad exercitum perfertur. Vna erat via, per quam penetrari ad castra Mediolanensium posset, obscuro per siluas tramite, quem Tibertus Brandolinus ducum illorum vnus sumpto lixae habitu speculatum egressus notarat. Caetera, regionis situ, fossisque & munimentis obiectis, intercisa, abrupta, impedita, multiplex certamen antequam peruentum foret ad castra denuntiabant. Igitur accepto sui Senatus mandato hostes hora diei ferme nona, cum nostri maxime

intenti in spem recipiendae per deditionem artis  
caetera remissius iam languidiusque agerent, di-  
gressi colle abdunt sese in siluas, & citato agmine  
properant ad opem obsessis quantocunque suo  
periculo ferendam. Et periculum statim perniciem-  
que inuenere, latam fossam, quam per vetera bel-  
la excauatam atque perductam toto quantum spa-  
tio in latum silua porrigebatur, Sfortia collocatis  
per interualla militibus communierat, passimue  
stramento materiâque iniectâ aliâ occaecarat, &  
stipites alicubi transuersosque cancellos defixerat,  
vt si hostis transire illac conaretur, praecipitatus,  
implicitusque aut reiectus irritum id siue etiam,  
funestum inceptum haberet. Neque speculator  
Brandolinus ea munimenta viderat, suspicione for-  
tasse aliqua & metu, siue reperti tramitis laetitia  
propere ad suos regressus. Tumultuosi nuntij de  
hostium aduentu in nostra castra perferuntur, ra-  
pitque illuc Sfortia subito agmen: vbi, tum op-  
portunitate fossae, tum virtute militum deprehen-  
sos ad iniqua Venetos fudêre Mediolanenses ac  
caecidere, partâ victoriâ, quae plena exemplorum  
etiam in hoste miserabilium fuit. Nam laqueis  
irretiti illis, captique & vincti trucidabantur etiam  
honeste moriendi facultate adempta, cùm inter  
cippos, & angustias, non dirigere ictus, non  
ad pugnam assurgere vllam possent. Et no-  
stri impune sese per adstructos sua manu ponticu-  
los, ac per vada nota insinuabant. Haec prima  
procella pugnae fuit, quam caedis potius nomine  
appella-

appellauere scriptores nec amicissimi Mediolanenſium rebus , & inter pericula conſiliaque eadem verſati . Caedes inde alia facta fugientium eſt , ex qua qui euafere , armis equiſque relictis , alius alió dilapſi , quacunque peruenerant , minime dubium fecere , quin res Veneta perdita eo die , & in perpetuum afflicta eſſet . Captis etiam direptiſque caſtris , & oppido recepto , opima ſpolia & nobiles captiui , Aluiſio Boſſio & Petro Cortae ducendi Mediolanum traduntur . Legati hi populi Mediolanenſis in exercitu erant , nec ſine eorum authoritate quicquam fiebat . Urbem iniere triumphantes albetibus veſti equis , purpura auroque conſpicui . Parentem urbis Ambroſium , quomodo effigies ea pontificali habitu è ſerico auroque , gemmis internitentibus publico ſumptu contexta , & per tot annos reſecta ſemper manet , inſidentes equis publici ſerui pari inceſſu hinc inde ſuſtentanteis rite ac decore praeferebant . Captiuorum longus ordo antecedebat : Dandulus & Rangonus , capita nuper exercitus Veneti , nunc legatorum noſtrorum fere calones , hic Cortae , ille Boſſio iuxta pedes ducebantur . Ea magnae fortunae ludibria fert bellum . Sed , & vexilla Diui Marci , neſcio an honoris cauſa pompae huic immiſcebantur . Ciuitas tota , non praefenti modo plauſu , quibusue alijs laetitia declaratur victoriam triumphumque excepit : verum etiam ſecutis diebus adorabant gregatim ad omnia templa Numen ob eius victoriae beneficium  
idque

idque more humano prope remunerantes, templâ ipsâ magnifice excolebant, & semper famelicam inter belli mala plebem, remittendo publice tributa, priuatim nutriendo miserrimum quemque co-gebant agnoscere ac venerari Celestem potentiam, quae, conseruata Rep. imperioque Metropolitano infimis etiam benigne faceret eorum manu, qui Remp. imperiumque tenerent. Verum, haec denique victoria noui belli principium fuit, cuius exitu Resp. Mediolanensium erat sub iugum reditura idem, quod Vicecomitum sine excussum putabant: atque extracta in hanc diem dissimulatione magni voti Franciscus Sfortia, diuque cum multarum rerum necessitate luctatus, tandem pertinaciâ suâ, & iniurijs, vt ferunt, alienis, ad id venit, vt hostium nostrorum aperte amicus, & insensibilissimus ipse nobis hostis fieret, donec, & victor & princeps, sublatâ odiorum causâ, paternae etiam in nos curae gloriam quaereret postea beneficijs, & miti iustoque imperio etiam assequeretur. Offensiones autem, & iniuriae, vel causae, quae titulum aliquem praebuere honestum volenti iam Sfortiae deficere ad hostes, & bello persequi aperto imperium cuius tuendi causa exercitum armaque acceperat, partim ex conditione rerum ortae, partim in historiam inductae à nonnullis, qui Sfortiarum nomini, postquam ea domus urbem tenebat, fauerunt, hae quidem feruntur. Recepto Caruagio, defensâ Cremonâ, rebusque alijs prospere gestis, rem atque consilium de Brixîâ inuadenda

denda nunquam omiffum, faepe dilatum illud ex-  
sequi Sfortia tandem hoc tempore volebat. Si  
publico confilio, & femper ad id molefta fibi Se-  
natus autoritate impediretur, ftatuerat vi fua, &  
eo quem habebat exercitu rem vtrunque agredi. †  
Quia ftudia militum, & populi fauorem nominis  
gloria conciliatum, & multiplici clade conterritos  
Venetos haberet, nunquam tam opportunum fore  
tempus agendi aliquid, fortunamque tentandi  
fufpicabatur. Stimulabat etiam affidue animum,  
& precibus, & querelis paternae fortunae deſide-  
rio multum anxia & importuna vxor. Non fe ei  
traditam, vt laboris femper, & exilij ftipendios-  
rumque alienorum comes foret. Alios etiam fuiſſe,  
ſplendidos & opulentos, è quibus Pater aſciſcere  
ſibi generum poſſet: praetuliffe caeteris vnum, de cu-  
ius virtute atque animo ſpem haberet, poſſe ab  
eo imperium retineri poſtquam ipſe deceſſiſſet.  
Proinde accingeretur ad opus, quod, & fama  
communis ab eo, & mortui ſoceri manes, & nati-  
iam, poſtue ſuſcipiendi liberi poſtularent, ne ſcili-  
cet, imperium, quod maternus auus ipſis maximum  
ampliſſimumque relinquere voluiſſet, Patris incu-  
ria ereptum ſibi cum dolore & ignominia viſuri  
eſſent, dedecusque & damnum illud ad nepotes  
ipſi ſuos pudenda ſucceſſione tranſmiſſuri. Talia  
repetentem animo Sfortiam, cum nondum ab Ca-  
rauagio caſtra mouiſſet, legati Mediolanenſium,  
Theodorus Boſſius, & Franciſchinus Caſtillioneus  
adeunt: laudant verbis ampliſſimis virtutem fidem-  
que

que hominis, eiſque Senatus nomine gratias agunt, quod rem adhuc ita geſſerit, vt ipſius opera Remp. breui fore conſtitutam, quieturos hoſtes, aut bellum domi habituros ſperare debeant. Petenti deinde, vt ad Brixianae expeditionis facultatem libera ſibi cuncta permitterentur, in praefentia quidem annuerunt, poſtea vero delata re ad Senatum, cenſuere, non eſſe à Rep. Sfortiam vrbis eius potiri: atque ad eam rem impediendam ſedulò compa-  
randa eſſe omnia decreuerunt. Id cum ſua ſponte patres fecerant prouidentia & metu, ne nimium Sfortia inualeſceret, tum vero Picininus vterque, aemulatione in ipſum, & iam inueſeratâ apud Senatum gratiâ, iactando ſaepius eadem, adduxerant omneis in eam ſententiam, vt crederent, ne quicquam pro Rep. & libertate fore dimicatum, ſi vrbibus, vt coepiſſet, occupandis, tantopere creſcere Sfortiam paterentur. Peſtiſerum eum in ſinu anguem nutrire ſibi Mediolanenſes, nec ſenſuros antequam bellua facta inexsuperabilis foret. Ita, & prouiſu ſuo, & conſilijs inſtincti alienis, ab Veneto Brixiam teneri, quàm ſuccedere ibi Sfortiae quicquam malebant. Monebatur etiam ipſe literis amicorum, miſſas ab Senatu Mediolanenſi fuiſſe literas ad principes eius vrbis, quibus eos hortarentur, vt in fide Venetorum manerent: cum Senatu Republicaque ea breui pacata omnia Mediolanenſibus fore. Et literas eodem tempore alias repererat Eraſmi Triuultij ad Vitalianum Borromaeum ſcriptas in hanc ſententiam: dandam eſſe operam, vt co-

piarum



piarum duces qui in exercitu praestantissimi essent, cum suo quisque milite in varia loca dimitterentur, ne Sfortia Brixiam obsidere posset. Mox Antonius Porrus missus ab Senatu in castra, quae iam moenibus vrbis Brixiae subijciebantur, mandata haec ferebat. Diuidi exercitum oportere, ut pars in Veronenses duceretur, pars ad Laudem Pompeiam tenderet. Urbium earum alteram infensam esse Venetorum imperio, nostrorumque armorum adspectu facile illinc defecturam: altera nisi quamprimum recepta vindicataque esset, perniciosi nimium exempli ignominiam eam fore, cum adeo vicina Metropoli ciuitas ab hoste teneretur. Haec ab Senatu mandata Porrus exponebat, & Sfortia eodem tempore iam penitus alienato à Mediolanensibus animo speque adipiscendi imperij vehementius rapta, ob id ipsum agitandae cum Venetis paci intentus erat adiutoribus atque internuntijs Pasquale Malipiero Veneto, & Angelo Simoneta Mediolanensi. Per horum vtrumque sermones commeabant, summaque conditionum erat, ut quae castella & arces & vrbes Philippus Maria mortis suae tempore tenuisset, ea omnia vnà cum Metropoli, finito bello, Sfortiae hujc cederent: Bergomum & Brixiam & Abduanae glareae castella praeter Pandinum obtinerent Veneti: per eos, quatuor millia equitum, bis mille pedites, quatuordecim millia florenorum nummum in menses singulos gerendo bello suppeditarentur. Quae, per eos, quos dixi interpretes cum pacta iam &

secreto constituta essent, credibile est, haud magnopere commotum fuisse Sfortiam eiusmodi mandatis, licet alioqui nihil magis alienum inimicumue rationibus ipsius obijci potuisset. Itaque, ne verbis quidem magnopere cum legato Metropolitano iurgatus, postquam is è castris abiit, apta ad id quod moliebatur oratione pertentatis militum animis, qui apud eum reliqui erant, ubi ex faustis clamoribus alacres, & sibi ad omnia paratos sensit, postridie concionis eius, ex Brixienti per Soncinatem agrum transire in Laudenses parabat. Ciuitas interim ista dediderat sese Mediolanensibus, & vehementer ea res initio noui belli Sfortiae animum turbauit. Nam ab ea parte statuerat irrumpere in Mediolanensem agrum & aucto mox Venetorum auxilijs exercitu succedere vi tota ad moenia vrbis. Hanc Sfortiae defectionem Mediolanum nuntiauerunt primi, Petrus Cotta & Aluissius Bossius, qui Reip. legati exercitum assidue sequebantur. Hi, concioni, quam ad milites ille habuisset interfuerant: & ubi aduersus obfirmatum eius animum aliquandiu frustra tetendere, conscensis propere equis ad Senatum rem eam atrocem detulere. Non tamen ab Senatu quicquam temere tumultuoseue actum. Sed missis ad Sfortiam Barptolemeo Morono, & Iacobo Cusano dici haec iubent. Valde miratos esse ipsos, quòd tantis Reip. beneficijs ornatus, arma in ipsam conuvertere sustinuisset, si nonnullorum facta displicuissent, essetque aliqua re fortasse offensus, debuisse potius

tius ostendere Senatui quid doleret : & Senatum, pro sua aequitate, atque etiam pro ea opinione quam de ipsius virtute habuerit, cognita causa fuisse satisfactorum. Nunc quoque si velit exponere alienati sui animi causas, aequitatem Senatui manere eandem, & daturos esse operam, ut sicuti ad nullum belli discrimen esse segnes velint, ita ad communis vitae officia mites & iusti gratique reperiantur. Sin ille hostili erga Rempub. animo perseverare mallit, aequum esse saltem, ut militares copiae Mediolanensium, quas secum trahat, earumque duces Senatui restituantur: neque enim arma illis in patriam data esse. Sfortia respondit, nimium fuisse graua & intoleranda, quae per totum illud belli administrandi tempus ab Senatu simul & populo Mediolanensi pertulisset, tempusque adesse ultionis, quemadmodum etiam videre ipsos arbitraretur. Sed velle se quidem iniuriarum spontè obliuisci omnium, neque quicquam acturum impotenti animo quamquam & praesenti occasione, & dolore praeteritorum stimuletur: imperium verò quod Philippi Mariae Vicecomitis fuerit, velle sibi vindicare, ne ingratus erga socerum, impius in liberos uxoremque suam, & matrimonio proleque indignus habitus ea cum damno dedecus ignominiamque ferat. Quod ad militares copias earumque ductores attineat, neminem se morari, quominus abierint è vestigio omneis quicunque Mediolanensium adsint: nec plura in eo colloquio dicta. Bellum, quod cum Francisco

Sfortia pro sua libertate infelicitè gessere Mediolanenses initia hæc habuit, ex quo bello victori imperium, victæ ciuitati fortuna eadem parabatur qua sese per Philippi Mariæ mortem esse liberatam sperarat. Quis autem postea crederet, Sfortiam ipsum, fundato per victoriam hanc principatu, si post mortis tempora posset suorum interesse casibus, longe præoptaturum huic esse principatui res priuatas, & eum utique statum, vnde spes moliri tantas coepisset? Neque enim ad sextum heredem peruentura res erat: & quinque successiones, per quas id imperium iuit, totidem tragica exempla dominantium fuere. Interfectus ob scelera & mores impudicos Galeatius coniuratione nobilium inspectante populo, ante aram, inter sacra: mox vrbs infecta coniuratorum caedibus: facit Ludouici in filios & patruj dolo datum Ioanni Galeatio venenum: ipse captus à Gallis & intra carcerem moerore absumptus: filiorum huius alter similitudine patèrni exitus, alter orbâ senectâ domum imperiumque perdidere. Tanti fuerat capi urbem Mediolanum, & totam à Francisco patre inter dolos, arma, eadesque vitam agi. Cum Sfortia bellum aperte Mediolanensibus, & verbis, & re ipsa, denuntiauisset, idque Mediolanenses, ut demonstraui acceperant, neutri parti satis esse virium videbatur aduersus imminens discrimen, quod alteris seruitutem, alteri exitum vltimum, & sempiternam ex temeritate labem minitabatur, si clades accepta esset. Perterruerant enim etiam partem

partem vtramque statim factae fortissimorum viro-  
rum transitiones & ab Senatu ad Sfortiam, & ab  
Sfortia ad Senatum, prout quosque ad tanti dis-  
criminis initia obiecta spes metusue animo, siue,  
prout affectus olim animus tenuerat nunc aut alie-  
narat. Carolus Gonzaga cum mille ducentis equi-  
tibus, peditibus quingentis, deserto Sfortia se  
se ad causam Senatus adiungendo fecerat alijs  
etiam exemplum castra ea relinquendi. Marchio  
Gulielmus & Aluisius Vermus, & Sanseuerinates  
treis Remp. Senatumque deseruerunt. Ex vrbi-  
bus etiam ipsis aliquae nutabant ancipiti in hanc  
illamue partem fide: Placentinique nihil cunctati  
erant, quominus dederent sese Sfortiae, & sequi  
fortunam illius mallent. Ob haec, aucta cura par-  
tibus, maiorque effecta sollicitudo, quam quanta  
fortasse praesentem statum, & suas per se vires  
aestinantibus initio fuisset. Sfortia, praeter exer-  
citum, quem habebat, quemue ab Veneris ex  
foedere expectabat, Florentinorum etiam, Ge-  
nuensiumque & principum aliorum, quos Reip.  
Mediolanensium esse infensos sciret, tentauit quae-  
siuitque auxilia, quae principes gentesue eae ultro  
etiam mittere paratae erant. Mediolanenses, non  
iam Sfortiae, sed auxiliorum, quae ad eum vndi-  
que mittebantur, vim famamque metuentes,  
auxilia etiam ipsi externa quaesiuere missis legatis  
ad Federicum Caesarem, ad Regem Galliae Ca-  
rolum, & Neapolim ad Alphonsum Regem.  
Aluisius quoque Sabaudiensis & Burgundiae Dux  
Philippus

Philippus rogati, ne vrbi antiquissimae aduersus finitimorum conspirationem, & aduersus vnus noui hominis conflatam ex alieno potentiam deesse vellent. Dum aguntur, tentanturque ista, visum est Patribus, vt Sfortiae rursus animum tentarent, si fortè ad conditionem aliquam honestam adduci ille posset, qua conditione, salua Reip. positis armis, tanto superfederetur bello, quantum initia illa minitabantur. Facto hoc Senatusconsulto, decretaque legatione, proficiscuntur ad Sfortiam in castra, Iacobus Cusanus, Georgius Lampugnani, Thomas Moronus, & Petrus Corta iam assueti homines eiusmodi colloquijs, & quibus cum libenter congredi Sfortiam animaduersum erat. Benigne in colloquium admissi dixerunt eadem, quae prior etiam legatio attulerat, de optima voluntate Senatus erga eum, publicoque studio corrigendi si quid paucorum offendisset iniuria: & quemadmodum magnopere mirati patres essent, quod ex amico ac defensore Reip. hostis repente extitisset: si maneret in sententia redderet saltem milites. Responsum tulere simile priori, nisi quod rei acerbitas, sono magis quam sensu verborum, & flexo nonnihil ad placabilitatem ore mitigabatur. Hi legati cum domum redirent excepti à militum globo & spoliati sunt, quo latrocinio protinus ad Sfortiam delato, profectus ipse è castris, affines ei flagitio omneis comprehendi & suspendi iussit: suspendebanturque etiam innoxij suspitione tantummodo obiecta aliqua, donec legati ipsi impetrauere

petrauere ab Sfortia, vt finis fieret. Misit deinde suam etiam ipse legationem, cuius princeps Benedictus quidam Reguardatus fuit. Is, dato Senatu, cum accurata oratione persuadere conaretur, vt dederent Sfortiae urbem, eumque in Philippi Mariae locum acciperent, non deteriorem locero generum: adoptionis iure filium: patrem legitimae prolis sanguinisque veri Vicecomitum: si successio- nis ordo spectaretur, vnà cum vxore heredem: si vellent eligere, ob merita non indignum, & impere assuetum, & obedire, neque amplius sibi quicquam in libera vrbe vindicaturum, quàm vt Reip. caput esset: haec & alia cum diceret vir disertus, multorum haud dubie commouerat animos, quibus finiendarum patriae calamitatum exitus ille probabatur. Sed statim vbi legatus ille perorat, Georgius Lampugnanius suggestu consensu eodem, omnia, quae pro libertate aduersus dominantes dici possunt, tanta vi & ardore vultus animique dixit, vt commutatis repente omnium animis multa grauissima probra in Sfortiam iacerentur, atque praescriberetur etiam brevis hora legato, intra quam Mediolanensium exisse finibus deberet. Bellum inde summa vi, non parabatur vtrinque solum, sed etiam gerebatur. Patres, vocatis in Curiam Francisco Picinino, & Carolo Gonzaga, quorum ille, ob veteres inimicitias spem suae salutis in Sfortiae exitio collocabat: hic periculorum initio statim cum deseruerat aufugeratque Mediolanum: alterum creant exercituum imperatorem,



torem: alteri tribunatum plebis per suffragia populi conciliant: extollunt vtrumque laudibus ob nauatam ad eam diem Reip. operam, & magnopere hortantur, vt aduersus communem hostem, pergant tueri urbem, quam sibi per mutua beneficia patriam fecissent. Conscripto deinde passim milite, & habito per urbem ipsam delectu firman- tur arces & oppida omnia praesidijs: Modoeria & Nouaria & Nouocomum Comiti cuidam Intimiliensi tuenda attribuuntur. Maiorem exercitum validioremque Sfortia: confluentibus ad eum vndique auxilijs & manentibus in ea parte veteranis habebat. Diuiso multifariam eo exercitu, velut excursione capit vna Derthonam, Nouariam, Vigleuanum, Briantaeos omnes & finitimos huius genti Larij lacus accolae, castellaque complura, Olegium, Trecatum, Gaiatum, Romagnanum, partim vi, partim tradentibus qui in praesidio erant. Et Comitibus illius Intimiliensis perfidiam siue segnitiam fuisse aiunt, quae tam felicem inoffenso prope gradu cursum primis illis Sfortiae victorijs dedisset. Nam, quae curabant alij, certamen anceps & egregia constantia defendentium fuit, donec vires, & munimenta suppeditauere: vnumque ignobile castellum, Abiatum nomine dum aggressus Sfortia ipse oppugnat, prope momento vno bellum omne ibi finitum est, directa per fistulatore Mediolanensem in ipsius caput plumbea glade, quae in proximi armigeri pedem aberrauit. Cuius sui periculi memoria infensus loco voluerat postea victor, cuncta

tuncta illic diripienda dare militi, nisi ab vxore Blanca exoratus fuisset. ob exactam ibi primam aetatem vnà cum Agnete matre. Derthonenses publico antea consensu & vna omneis mente prouisi in Sfortiam, nunc diuisi factionibus, magis etiam morati cursum sunt, donec introducto per Gibelinos equitatu ciuitas etiam ea caperetur. Parma, casu prius quodam, deinde ciuium fide retenta est; cum interceptae Rubei litterae paratam proditionem aperuissent, eaque repressâ Picininus populo ipso inuitante praesidium illuc duxisset. Caeterum, & impetus ardorque animi, quo bellum Sfortia aggressus erat, & successus etiam animo pares, fecerant Mediolani motus eos, qui solent esse vbi suarum quisque rerum exitum spectat periclitante publica: curasque eas ancipites, atque nutantem vrbis statum Carolus Gonzaga conspiciatus, sibi quoque enimuero ad spem augendae fortunae tentandum aliquid inter pericula illa aliena existimauit. Fuerat Gonzaga iste, quemadmodum demonstrauius, in exercitu ductor auxiliorum tunc cum Sfortia palam à Senatu & Rep. alienatus hostem sese profiteretur: ac damnata spe nouae militiae eius, antehabiraque Rep. hoc ipso gratissimus apud Patres plebemque erat. Ea gratia fauorque publicus audendi initium fuit, scilicet vt imperium vrbis Mediolani ipse occuparet, populi clamoribus princeps dominusue salutareretur. Largitione & epulis & comitate omni deterrimos quosque ad id occulte praeparabat, neque

primores urbis fefellit . Obuiam iere, Theodorus Bosſius , & Georgius Lampughanus, alijque rem ſuſpicati ſicut erat: Hi pro ſe quiſque plebem, horrabantur, ne pabulo obiecto trahi ſeſe ſub externi hominis iugum ſinceret . Si generum vltimi principis Sfortiam ſtudio libertatis adſpernarentur, cur non alieni huius pernicioſa blandimenta repudiarent? Gonzaga viciffim ad populum accuſando criminatores ſuos, alebat, bellum alere eos, non vt Sfortiam depellerent, ſed vt ipſi dominarentur . Ita corpus illud vnum defendentium libertatem in duas partes diuiditur . Hinc Gonzaga Tribunus plebis cum tota factione Guelforum, hinc principes nobilitatis ſubnixi Gibellini nominis potentia ſua conſilia ſeparatim inibant . Tribunus, quia obſepta ſibi ad regnum via per Gibellinos erat, concitare quotidie Guelfam ſuam plebem, vt dominatum urbis ipſa inuaderet . Gibellina nobilitas duplici metu anxia, & ab hoſte pariter, & ab ciue, domeſtico periculo magis penè, quàm bello externo angebatur . Quippe aduerſus diffuſam illam totà vrbe multitudinem, quae contemnitur ſemper, & terrere poteſt, in cuius manu artes & ſubſidia vitae communis, nihil valituram imperij maiestatem, vbi ſemel ipſa contemnere imperitantes coepiſſet . Et iam haud dubie contemnebat . Neque conſilium & prouidentia regimenque temeritatis aberat vulgo, cum Gonzaga ſtimulator idem duxque, cuncta regnantium dolis & aſtu moderaretur . Imperium vtique plebis aderat, cuius

cuius atrocia exempla , ne repetenda ex veterememoria essent , ipsa sibi vrbs poterat esse exemplum. In magno illo discrimine , maiore metu , coniurauere Theodorus Bossius, & Georgius Lampugnans , alijque vt dederent Sfortiae urbem, qui coniuratorum eorum accitu statim castra ad Landrianum decem millia passuum ab vrbe habebat. Picininus , cui res erat bellica mandata , cum certa iam ei constarent indicia coniurationis , hostemque propinquantem videret , excitabatur veteribus odijs , & priuata aemulatione erga ipsum, vt ad Remp. tuendam fidus attentusque esset. Nam si Sfortia urbem imperiumque haberet, cap-  
tum se fore vnà prospiciebat : vsusque est dolo, quo nihil callidius , aut astutia Poenorum, aut quae Romanis honestiore vocabulo prudentia dicta est, struere inuicem potuit , dum fraude, siue armis vicisse decus idem putant . Simulans namque sese desperata Rep. necessitati imminenti succumbentem, transijt vltro ad Sfortiam quasi gesturus vnà bellum aduersus iam prope victos Mediolanenses : reuera , vt victoriae obstaret, atq; inclinatis vtcunq; hostium rebus , & cognito ibi quicquid parti alteri futurum vtile esset, Mediolanum postea reuerteretur . Benigne ab Sfortia acceptus, Iacobum quoque fratrem ei fraude eadem conciliat. Huic Drusiana Sfortiae filia despondetur : dona ampladantur vtrique : nec inter tanta pignora fidei securus incautusque Sfortia agebat . Post vtriusque Picinini trasfugium tantò magis coniurati ignari

Bbb 2

qua

quā mente illi quoue consilio transfugissent, pro-  
perabant dedere urbem, vt sui muneris ac bene-  
ficij facerent id quod propediem Sfortia suo Mar-  
te habiturus esse videbatur. Sed per litteras, &  
nuntios, quos super ea re occultissime in castra  
mittebant, conditiones ferebant eas, vt decernere  
bello, cū honestius sibi, tum verò etiam tutius  
ille existimaret, atque ita etiam responderet. In-  
terim epistola vna è castris in urbem ad Bossios de  
rebus eis missa intercipitur atque perfertur ad sum-  
mum Magistratum urbis, qui Guelfarum partium  
erat, valida iam plebe, & projecta vilique autho-  
ritate Senatus, tum instinctu Gonzaghae, tum  
credita defectione Picininorum, & semper ineksu-  
perabili multitudinis impetu, vbi suas vires ipsa  
circumspexit. Erat epistola scripta notis occultis  
& celantibus sensum, vt vana foret interpretatio  
praeterquam ei qui tesseram apud se haberet. Ea  
ipsa res auxerat plebeio Magistratui suspicionem,  
atrocis alicuius doli, quòd litterae non intellige-  
bantur: ac propositis large praemijs exquirebant,  
qui nodos explicare eos posset. Repertus est ho-  
mo mirifice callens eius artificij, versutus quidam  
& profunde solers, qui principum omnium limina  
contriuerat, scribendoque talia & interpretando  
diu operam venditarat. Is admirabilium earum  
notarum aliquas cognitās sibi & familiares primo  
statim adspectu excepit: deinde harum indicio de-  
prehendit alias: & rursus hasce admouit alijs, quae  
latebant adhuc: simul interualla significantia nihil,

& numeros expungendo inanes, ad liquidum certumque paulatim cuncta adducebat. Demum edperuenit, ut sententiam omnem fallacium litterarum extricatam, & apertam exhiberet Magistratus legendam, quomodo scripta etiam quotidiana leguntur. Inerant colloquia Sfortiae ipsius cum fratribus Bossijs Aluisio & Theodoro: & ex ijs, quae scripta erant, caetera etiam intelligebantur. Nomina coniuratorum in promptu: condiciones recusatae vel acceptae: quomodo res conuenire aequabilius posset: quomodo etiam populus ipse eludi: & praecipue cognoscebatur, agitatum esse illud, uti per Portam Nouam Sfortia in urbem induceretur. Namque regio erat ea plena Gibellinorum, minimeque tunc opifices, & sellularij parte in illa habitabant, ut absque vlllo plebeio tumultu, nobilium humeris Sfortia portari in urbem posset. Detecta in hunc modum coniuratione, nihil dilata est poena, capitaque procerum in rostris collocata sunt ad terrorem nobilitatis, tamquam eo spectaculo popolare imperium firmaretur. Neque id plebeiae saecutiae rudimentum caruit vlla arte, quam vel calidissimorum Regum aliquis ad principia rerum adhibere potuisset. Cum enim incapiendis coniuratis tenuissent grauiorem aliquem in vrbe motum, si clarissimi viri palam in vincula ducerentur, alium alia via quam occultissime circumuenere, Georgiusque & Theodorus dimissi specie legationis in Germaniam ad Caesarem, & progressi Nouoconum vsque capti sunt ibi & obtruncati

truncati postquam inter tormenta conscios edidere. Consciorum deinde addita caedes vbi sublati authoribus inhorruerant conciderantque omnium animi. Dissimulata aliorum effugia, quibus parere voluerant: alij relegati vltro, & proscripti, quos, nec manere in ciuitate placebat, nec absentes timebant. Bona omnium publicata, subsidioque deinde eo militare aerarium stetit. Ciuitas inde per Ioannem Ossonam institorem vilissimae mercis, & Ioannem Appianum etiam viliori conditione scribam siue Notarium regebatur. His aderant, praeter Carolum Gonzagam ex ipsa nobilitate nonnulli, qui deserto & eiurato Gibellinorum nomine, fecerant se se Guelfos, & hoc ipso quia descriuerant à suis, non minus fidi habebantur, quàm ipsa sibi erat plebes. At Sfortia, ob conditiones, primò, sicut ipsi videbantur, iniquas, deinde ob deprehensam disturbatamque coniurationem, amissa spe capiendae per dolum vrbis penitus ad vim oblidionemque conuerso iam animo, promotis ab Landriano in suburbia castris ad ipsa moenia saepe excurrerat. Si arcta vlla vnquam & praecipitandis in desperationem animis apta obsidio fuit, haec certe, & cingebat vndique Mediolanenses, & spem omnem subsidij abscindebat, itaut, vel frangi quamuis obstinata pectora necesse esset, vel necessitate vltima erumpere vltro inclusos, & dare cuncta in vnius horae discrimen. Pars militum ad Viboldoni Monasterium, pars ad Melinianum, steteret. Alij Piscariam, quarto ab vrbe lapide munitissimam



nitissimam per ea tempora arcem infederunt: alij circa Bagienſe Monasterium poſuerant caſtra, caſtrisque praeerant iſdem illi, quibus ob transfugia, Picininis exceptis, haud minus quàm Sfortiae ipſi cordi erat capi ſubigique urbem, quam ipſi prodidiſſent. Sfortia cum veteranis ſuis medius inter copias fere omneis haud procul à Binaſco elegerat locum. Ad Monasterium Creſciacenſe Ioannem quendam Hiſpanum, cum validiſſima perditatus parte collocarat. Ita ſex portae urbis obſeſſae, & praecluſae erant, ut aditus exituſque omneis in poteſtate hoſtium eſſent. Urbe in ipſa, dominante plebe, apta, & opportuna cuncta hoſti Appianus & Oſſona: mercator hic, ille Notarius, in ſummo Magiſtratu, moribus uterque ſuae ſortis adminiſtrabant rem. Et quoniam offenſis eorum indignitate animis, inſtitutum poſtea erat, ut noui ſubinde Magiſtratus crearentur, quibus bi-meſtre imperium eſſet, viciffitudine fiebat illa, ut ad homines etiam deteriores, quàm erant illi Appianus & Oſſuna ſumma rerum rediret. Atque ad Calendas forte Martias inituri Magiſtratum erant ſordidiſſimi duo, macellarius credo aliquis & piſtor: homineſque eos, in purpura & imperio conſpectura ciuitas, qui nondum infectam beſtiarum ſanguine, albuſcentemue farina exomidem poſuiſſent. Id ipſum indignabantur iſdem illi, qui formam Reip. hanc inſtituerant, pudorque talis imperij erat idem, apud imperitantes iuxta & parentes, neque his aut illis curae officium ſuum, ſed parti utrique verecundia

cundia praesentis status, timor futuri, & mutua sese intuentium, vel confusio, vel ira. Quam urbis faciem, praesentiaque & imminencia Carolus Gonzaga, quò propior interiorque erat, hoc magis intuens, ac velut intraturo mox Sfortia de salute sua dubitans, quaerebat sibi gratiae locum, & occultis eum nuntijs monebat, si ad Portam Ticinensem sub Cal. ipsas Martias accessisset, fore, ut propter noui Magistratus indignitatem, & fordes irritato populo, in urbem ipse cum exercitu acciperetur: speraueratque id ita posse contingere. Sfortia, & ne fortunae suae deesset, regione saepius ea frustra sese ostentarat. Mirum sane, tam discordem inter se ciuitatem, tam inuisos ciuitati Magistratus, & turbarum quodammodo Remp. importunaeque multitudinis eo tempore regnum, aduersus communem hostem in tam dura obsidione stare aliquandiu potuisse, sicuti stetit, & vlli constanti consilio locum interea ibi fuisse. Non modò irritus ab ea Ticinensi Porta Sfortia dimittebatur, quotiescunque successerat, sed, & vitae discrimen aliquando ipse adiit, displosâ in eum bombardâ, cuius ictum haud sine miraculo vitauit: & Gonzagam die quodam arrepta leui suspicione penè interfecerunt. Confirmabantur animi Mediolanensium expectatione subsidij, quod ab Sabaudiae Duce propediem adfuturum esse dicebatur, alente spem eam Maria filia Ducis illius, cui viduae post Philippi mortem, ob matrimonij modestiam & merita sedes & honor in vrbe idem, tam saeuis

Reip.

Reip. temporibus manebat, & versa domo finito-  
que principatu, ob misericordiam caritas etiam  
major. Tam mites erga se animos in tali sua fortuna  
remunerari aliquo modo volens mulier, aiebat  
identidem, non ultra dilaturum esse suppetias  
patrem: si sustinuissent adhuc paulisper, fore ut  
non poeniteret. Ac sicuti dicebantur ista, ita etiam  
Sabaudus filiae rogatu re ipsa terre obsessae vrbi  
subsidium parabat. Interimque Sfortia, siue suspi-  
catus de ea expectatione & apparatu nonnihil,  
siue iam cernens, per ea stare subsidia quominus  
domitam urbem captamque haberet, misso cadu-  
ceatore monet hortaturque Mediolanenses, ne  
pertinacia defendendae libertatis pati extrema ve-  
lint. Ne Sabaudienti nimium credant, nimiumue  
promissis eius & ope subnitantur. Sibi Venetos  
& Florentinos & Genuenses adesse, quarum  
Rerumpub. auxilijs, & multo magis aequitate cau-  
sae fretus, haud ante soluturus obsidionem sit,  
quam urbem imperiumque sibi debitum recupera-  
rit. Malle id quidem salua Metropoli, saluis tot  
inclytarum religionum templis, quae Metropolim  
Romanae Maiestati fama iamdudum & praedicatio-  
ne aequarint. Sed consilia haec esse pietatis &  
modestiae, quae locus in pace, vel praesenti,  
vel sperata: ubi abrupta sint omnia inter belli  
discrimen & victoriae necessitates, tunc nihil aliud  
spectari praeter victoriam & bellum: & ea etiam,  
quae, vel religione veneranda, vel natura cara sint,  
ruere inter cetera, quae vincenti obstant. Ita pul-  
cherrimam,

cherrimam, & antiquissimam urbem, quam conseruari, & manere incolumen sua plurimum interfit, nisi quamprimum dedatur, esse clade omni peruastandam, atque, sicut existimare possent etiam ipsi, tot militum impetu diripiendam peius iustiusque, quàm direpta Anobarbi temporibus fuisset. Rursum, facta deditione, non modò conseruatuos urbem, & sua omnia Mediolanenses, sed ne libertatem quidem ipsam, cuius inane nomen cum exitio suo defendere conentur, esse desideratuos. Haec Sfortiae dicta ferens legatus, cùm Mediolanum venisset, data sedulò opera est à Magistratu urbis, vt ne plures quàm duodecim, in quorum praeterea manu Resp. erat, eius orationi interessent, datoque atroci responso, facesseret illico ex vrbe iusserunt, & extra portam à viatore legatus est deductus, ne cum vlllo ciuium loqueretur. Spes deinde Sfortiae omnis in obsidione belloque erat, & quia, dum tentantur agunturque ista, fenserat, nuntios, qui ab Sabaudienſe mitterentur, ingredi urbem ab ea parte, quae spectat MODOETIAM versus, possèque regione eadem, tum copias etiam auxiliares, tum commeatus & annonae subsidia intromitti: statuit oppidum aggredi illud, clausa magis & abscissa Mediolanenſibus videns fore omnia, si aditum eum ipse interceptisset. Interceperat autem statim obtinueratque prope sine certanine MODOETIAM, nisi PICININUS, quo animo ad Sfortiam, vt dixi transfugerat, eo corrupisset hanc ipsi occasionem, & in hostili acie pro Mediolanenſibus

lanensibus steterisset. Castra hic ad Sanctam (abest is  
 pagus ab Oppido Modoetia duo millia passuum)  
 posuerat, tanquam ab eo latere impressionem  
 facturum, cum ab alijs duces alij partibus suo quis-  
 que agmine inuasuri essent. Caeterum, vti com-  
 municata & composita omnia cum nostris ille ha-  
 bebat, monuerat occulte Magistratum, si obsessio  
 Oppido subsidium ab vrbe mitteretur, liberum,  
 illac per sua castra aditum fore, nec hostile quic-  
 quam in quacunque parte ageret ipse, Mediola-  
 nenses esse reperturos: eaque res haud dubie Sfor-  
 tianam ex Modoetiae possessione detraxit. Nam,  
 missi ab vrbe milites, cum in Oppidum, ab ea  
 parte transitum dante Picinino penetrassent, refe-  
 cti modica deinde quiete sub auroram erupere cum  
 Oppidanis in Sfortianos alios, qui nihil tale expe-  
 ctantes effusissime somno indulgebant, ac excitati  
 vulneratorum vigilum clamoribus, post iniquam  
 & infelicem denique pugnam, quae cordi salus  
 fuit, aufugerunt. Nostri, bombardas maioris for-  
 mae aliquot, caeterumque castrorum apparatus,  
 & quod pluris aestimabatur, animos ea victoria  
 nacti ingentes, longe plurimum animorum postea  
 sumpserunt, ubi Picinini duo, vel quia iam esse dete-  
 ctam, vel quia diutius non posse latere prodicio-  
 nem, satisque ad id quod voluerant effectum esse  
 arbitrabantur, cum sua vterque manu refugere  
 Mediolanum. His aucti copijs, & duorum ducum  
 ad se transfugio confirmati Mediolanenses, Picini-  
 num minorem cum Carolo Gonzaga subsidium

obfessis ferre Cremonensibus iubent. Picininus & Gonzaga egressi cum idonea manu, ex itinere Melinianum capiunt, ac soluta obsidione, Meltium etiam in reditu expugnant, magnâ curâ injectâ hosti, quamvis callide, & curam, & animi dolorem apud exercitum suum tegere conaretur. Praecipue, amissi Meliniani damnum vrebat. Id utique recuperare Oppidum Sfortia volens, infestum exercitum rapit illuc, primoque impetu, cuncta praeter arcem inuasit. Arcis praefectus, ut circumfideri sese, & cuncta sibi in dies arctiora esse vidit, trium dierum inducias pactus, ut nisi intra eos auxilium ab vrbe mitteretur, praesidium inde deduceret, abiretque, spatium ciuitati dedit ad eius arcis oppidique defensionem emittendi exercitum, quantum subitatio intra muros delectu cogere maximum potuerunt. Locus enim ille permagni momenti ad summam rerum parti utrique habebatur; & in ultimum veluti discrimen processere illuc. Fuere Mediolanensium ad triginta millia, in quibus, equites sex millium explebant numerum. Picininus alter praeerat his copijs, quem super solitos inter contrariorum exercituum duces, animos, stimulat transfugij proditionisque conscientia, quòd Sfortiae castra secutus explorator, fallaci munere expleto deseruisset, collega fraudis fratre, ac nunc agmen uterque hostile ductarent, ne titulo quidem quaesito vllò, cur exuissent fidem, nisi quòd inter belli iura perfidiam censuit omnis aetas. Etiam in ipso nunc procinctu, cum verecundia esse aliqua

aliqua praeteritorum deberet, ausus est ductor iste Mediolanensium Picininus Sfortiam insidijs appetere tam manifestis, ut illudere potius & insultare, quàm insidiari videretur. Adeò, ille, velut oblitus, oblitusue alios putans, quisnam ipse esset, quidue egisset, perseverabat eisdem artibus hostem tentare palam: ac propinquo summae rei discrimine, per Leonem quendam è suis dici Sfortiae haec iubet. Adesse cum sexaginta armatorum milibus sese, inuicta manu, etiam si aduersus parem numerum, & fidos inter se hostes exiret. Sed conpertum esse sibi, quod praefecti nonnulli cohortium alarumque illius in medio certamine translaturi signa essent eumque deserturi. Id pro amicitia monere voluisse. Sfortia, gnarus, nec tantas esse Mediolanensium copias, & de sui exercitus fide satis securus, intellecto dolo, qui ad sese conterrendum nimis aperte intenderetur, vicissim proditori insultans, veniret, dixit: sibi, quò plus hominum aduersa acies habuisset, eò nobiliorem victoriam fore. De alieni militis erga Imperatorem suum fide sollicitus esse desineret: ipsum esse visurum, ut recte constituta & fida omnia circa se habeat. Et imperatores quidem talia inuicem iecerant: pugna verò illa tanti discriminis dilata est, siue, quia pariterque metu defugerint vltimam aleam, siue quia detrectante certamen altero, pro victoria id alter habuerit. Sfortia certe tenuit arcem: & commoto acrius ad obsidendam urbem animo, segetes, quae iam prope maturae in agris erant, undique cor-

rumpere



rumpere immisso equitatu parabat, cum Vigleuanensium defectio, & ab Vercellis Nouariamvsque progressi Sabaudienſes, à populatione simul ipsum & ab obſidione auerterunt. Pro Mediolanenſibus vtraque illa arma mota erant & poſt multas ancipites pugnas variosque caſus, recepto Vigleuano, fuſo Sabaudienſe, victor ab ea parte Sfortia properus ad vaſtandum agrum, vnde fuerat duplici illo periculo repente auocatus, redit. Mediolanenſes interim etiam ipſi apud Seprium alioſque rebelles ſecuerant attriuerantue ſata, vt famem ſolitudinemque Sfortianis facerent, & vbi rediſſet Sfortia, exuſto omni ſuorum agro, non haberet, vnde frumentaretur. Caput in reditu Caſtelleonenſem arcem, quam Brandus ex ea gente Cardinalis condiderat munieratque. Defectiones variae, vel ab Sfortia ab Metropolim, vel ab Metropoli ad Sfortiam fiunt: in quibus, Varienſes, & Luganenſes, primò adſpernati quod ultro antea acceperant imperium, mox contemptâ patriâ ſub idem redierant. Intimilienſis, de quo, Mediolanenſium duce, dein proditore demonſtratum eſt, ad Canturium hoc tempore agens, cum crebris & litteris & nuntijs ex vrbe ſolicitaretur, vt deſerto Sfortia, ſeſe rurfus ad nutum authoritatemque Mediolanenſium conferre vellet, comprehenſum hominem, qui nouiſſime ſuper ea re ipſum adierat, ad Sfortiam in caſtra miſit, ibique ille laqueo eſt exanimatus. In vrbe, Appianus & Oſſuna, circumactò forte iterum ſui Magiſtratus tempore, in-

uiſi

uifi vileſque nobilitati iuxta & plebi coniiciuntur  
in vincula, aegre vitato periculo, quominus po-  
puli impetu opprimerentur. Geſſerant enim fla-  
gitioſe magiſtratum, & ſuae yterque fortunaemo-  
ribus vtendo inſitor & ſcriba, ſicuti erant, multis  
crudelibus auariſque factis irritauerant animos  
etiam apud eos contempti, qui participes & mi-  
niſtri ſclerum fuerant. Succeſſerant iſtis, Appia-  
no & Oſſunae, Guarnerius Caſtelleonus, Petrus  
Puſterula, Galeotus Tuſcanus, quorum modeſtiae  
ac virtuticontigerat, vt ſummam poteſtatem ho-  
mines nobiles obtinerent in eo imperio quod iam  
haud dubie plebis eſſet. Magnopere hi cupierant  
perſuadere populo, vt Franciſco Sfortiae dederent  
vrbem, ſiue manſuetis animis miſerati tot patriae  
clades, & lenitate inſita pertaeſi deſenſionem liber-  
tatis, quae tanto ciuium ſanguine conſtaret: ſiue  
qua alia de cauſa proni in hoſtem. Sed nequaquam  
auſi ad populum referre, ſecretis tantummodo in-  
ter ſe conſilijs & votis rem eam agitabant. Popu-  
lus, neque inclinatione vlla rerum, neque noui  
Magiſtratus propenſione flectebatur, quominus  
abominari & perſequi bello Sfortiam pergeret,  
verboque in concilijs utebantur huiuſmodi: ſi diu-  
tius tueri vrbem nequirent, potius eam ipſos eſſe  
deſerturos, quàm vt regnantem in ea Sfortiam  
viderent. Henricus Panicarola mercator erat Me-  
diolanenſis, qui negotia fortè magna Venetijs ha-  
bebat, atque ibi aliquandiu morabatur, & quam-  
quam abſens, plebis reliquae praefentis animos  
erga

erga patriam gerebat. Huic mandant, vt ab Veneto Senatu petat : ne in eo bello, quòd geratur, stare cum Sfortia amplius velint. Sed cum Rep. potius Mediolanensi foedus iungant, quae Patres eos in parentum vere loco sit habitura, vbi id impetrarit. Atque ille, semel iterumque in Senatum admissus, ostendendo multa & promittendo tenuit, vt quatuor è Patribus darentur, cum quibus agere posset etiam alia, quae secreto agenda in mandatis haberet. Ea cuiusmodi fuerint comperti nihil habemus. Illud minime dubium fuit, partim huius legatione Panicarolae, partim occultioribus Veneti legati qui Sfortiae castra sequebatur ad Senatum suum litteris, esse perfectum, vt Patres, de relinquendo Sfortia, transferendoque ad Mediolanenses foedere magnopere cogitarent. Scribebat legatus è castris, monebatque suos, inexplicabile sibi videri bellum ob munimenta vrbis Mediolani, & pertinaces ibi animos, inexhaustamque multitudinem: ac si spes tamen aliqua esset prius finiendi belli, quàm ipsorum Resp. exhauriretur, cogitandum utique esse Patribus, an deberent suis armis atque opibus facere Mediolani Ducem vnum, qui vbi semel in ea parte inualuisset, spes in perpetuum foret adempta Senatui Veneto consequendae rei, quae necessaria esset, vt maximum suum in Italia imperium facerent. Nunquam postea locum fore Venetorum armis ad Mediolanensis agri glebam vnā occupandam, si teneat eam urbem Sfortia ille tam auidus potentiae, tam solers bel-  
landi

landi artium, tam grauis accola, tam metuendus.  
 His itaque permoti Patres, dissimulato consilio,  
 quo mouerentur, tamquam haud aliâ, quàm Reip.  
 Mediolanensis curâ, Panigarolae dixerunt: ipsos  
 breui daturos esse responsum, quod laetus ad suos  
 perferret, ac monuere, vt eius responsi diem ex-  
 spectare ne grauaretur. Nihil horum sciebat Sfor-  
 tia & coniuncto cum Venetis adhuc exercitu  
 animoque cum ijs vno rem aduersus Mediolanen-  
 ses gerebat. Sancti Angeli municipium appositum  
 Lambro flumini Ticinum inter & Laudem Pompe-  
 iam aggressus tertio die expugnat. Picicatonensem  
 arcem in Abduae fluminis ripa Cribelli fratres, qui  
 ibi in praesidio erant, prodidere, idque postea  
 Cribellis apud Sfortiam initium fortunae amplio-  
 ris fuit. Mox, direptâ Marthesanâ, Vicomercato  
 incenso, rebellionem eius regionis ultus, terróre  
 subegit eo Meltium, & Cassanum & si qua in  
 Briantaeis, vel circa Larium lacum adhuc nutabant.  
 Quae omnia cum tenore vno fluerent in Sfortiam,  
 accessit etiam ad res Mediolanensium aggrauandas  
 aliud ciuile malum quo nihil vtilius esse hosti po-  
 terat. Galeotus Tuscanus & Petrus Pusterula, post  
 Ossunam & Appianum, vt dixi, tenuerant sum-  
 mum vrbis Magistratum homines nobiles & mode-  
 sti, sed apud plebem suspecti magno illo crimine,  
 quasi rem ad Sfortiam inclinare voluissent. Hi,  
 postquam abiire Magistratu, suspicionibus irritata  
 suis plebes, interficere vtrunque voluerat, cumq;  
 Pusterula vim facuam fuga eluctatus euassisset, Ga-

leotus debilitate pedum, senioque tardior obtruncatur. Erat summa necessitudo Galeotto huic cum Carolo Gonzaga, qui, simul indigne ferens amici necem simul Sfortiae rebus commotus secundis & magnis & conuerso olim in eum animo, haud ultra cunctandum ratus, Capra quodam internuntio paciscitur vt dedita Laudensi arce quam ipse impotestate habebat, Derthonam ab eo pro tanto beneficio accipiat vicissim, atque receptus inter principes amicorum in gradu militiae quam honestissimo collocetur. Ita, nostri participem consiliorum omnium amittere Gonzagam, & cum eo, paulo post, etiam urbem, quae horreum populi Mediolanensis ob inclytae fertilitatis agrum haud dubie habebatur. Harum tam secundarum Sfortiae rerum, quas breue spatium coniunxerat, ignari Veneti iam dederant Panicarolae responsum, quale Mediolanenses optabant: velle Senatum foedus inire cum Metropoli, daturosque operam, vt ea salua sit: arma dissociaturos ab hoste, qui nunc lacessat. Haec dicta negotiatori Panicarolae: simul ad Sfortiam in castra missa legatio, quae iuberet ipsum à Mediolanensium finibus abstinere arma: si parum ad id Senatus autoritas valeret, minae etiam adhiberentur. Verum, vbi belli fortunam & rerum earum quas dixi cursum ex legati sui litteris cognouere, mollius rogabant eadem, ac si vellet etiam Sfortia insistere coeptis, iudicium se eius vtrique secuturos esse aiebant. Nam antequam prioris truculentiae mandata peragerent le-

gati, mitiora haec, cum adhuc essent in itinere  
acceperunt. Sic Sfortia liberatus ingenti metu  
(forte enim de prima illa denuntiatione senserat  
aliquid) oppugnare urbem aggreditur: cumque  
infausta impressione subiisset ad Portam Orienta-  
lem, reiectus inde grauius per triduum sustinuit  
certamina, quibus haud multo plus intulit damni,  
quam accepit. Nactus inde spem aliquam irrum-  
pendi per fossas, quae ab Orientali ad Cumanam  
Portam, neque admodum latae, neque satis cu-  
stoditae excurrebant, de tertia fere vigilia noctur-  
no impetu suggestus, pro negligentia & solitu-  
dine quam sperarat, reperit ibi obsepta omnia  
armatis, ictusque crebros edente bombarda,  
cruento & irritato conatu etiam inde abscissum est.  
Quod ubi Veneti Sfortiam tam longe esse pro-  
gressum, tam prope ad summae spei discrimen  
accessisse vident, tunc enimvero patrijs suis artifi-  
cijs, & natiuae lentitudini, solitisque tempera-  
mentis nullum iam esse locum rati, abrupta palam  
omni dissimulatione & astu, legationem in castra  
hanc mittunt. Petenti pacem & amicitiam ab se  
populo Reipublicaeque Mediolanensi ipsos nega-  
re non potuisse, iamque socios & amicos Veneti  
Senatus esse Mediolanenses. Pro ea pace, &  
amicitia & societate, nefas iam esse Venetum vl-  
lum militem in iisdem morari castris, belloque  
quod aduersus populum eum geratur, Veneta  
arma, opes pecuniam, consiliumue adesse. Si  
Sfortia quoque pacem velit, conditione hac habi-

turum vti restituat cuncta Mediolanensibus, quae sub Philippi Mariae mortem habuissent. Alioquin, pro foederatis amicisque suis Venetos strenue arma esse capturos, nequid detrimenti patiatur gens, quae suae fidei sese permiserit. At Sfortia re subita percussus, quaevis primò pauca, deinde obtestatus, vbi nihil profici verbis vidit, ad consilia vertit animum profunda illa scilicet atque quotidiana sibi, etiam vbi nec damno nec dolore sollicitaretur. Temporis spatio maxime indigebat, quo, & absumeretur, quicquid frumenti reliquum Mediolani esset, & duo omnino itinera, Bripientense nimirum & Tritienſe, quibus itineribus ab Veneto mitti in urbem aliquid poterat, interciperentur eorum proditione, qui arcem vtramque habebant. Hac mente dissimulans omneis turbati animi motus, legatos etiam ipse suos Venetias mittit cum querelis & precibus ijsdem, quae ipse Venetum legatum affatus paulo antea erat, petens ne defereretur ab Senatu, cuius auspicijs id bellum suscepisset, inuocans Patrum fidem, inculans quoque & requirens quasi per fiduciam & libertatem. Legati erant, Alexander Sfortia, Angelus Simonetta & Andreas Biragus: quorum ille Sfortiae frater, hi Mediolanensium desertores, cum mandata exposuissent, siue perterriti Senatus auctoritate, siue ita instructi, pacem, in eas condiciones, quae antea iactatae fuerant, acceperunt. Induciarum interea exierat dies, per quas, Sfortia, corruptis clam ad Tritium Bripiumque praefectis, ne Vene-



to transitum ad Mediolanenses darent, facta pace cum Sabaudiae Duce, clausis vndique commercibus, spreta pace, quae per suos inita erat, in Mediolanenses simul & Venetos, tamquam aduersus vnum hostem parabat bellum. Nec in parte altera cessabatur, quamquam in faciem imaginemque pacis dimissa legatio esset. Fortè pontem è nauibus iunctis ad Tritium facere Veneti instituerant, vt copias annonamque transmitters in Mediolanensem agrum possent: & iam ad exitum prope perducta mole prodibant quotidie ad visenda operis incrementa duces nostri, quæ ea iungendi fluminis cura cum Venetorum ducibus communicata erat. Hanc Sfortiae gratificandi occasionem speculatus ille, qui pro nostris praeerat arci, iam antea corruptus ab hoste sicut demonstraui, & occulte ei addictus, indicat posse capi curatores eos operis, si in vicina latebra occultentur armati qui repente profiliant, & naualis fabricae contemplationi intentis strenuè iniiciant manus: Id initium fuit violandae pacis, quae neutri parti rata erat, & integrandi belli, ad quod nouo post irritam pacem impetu resurgere parabant, Sfortia namque abditis in monstratam latebram armatis, & comprehenso Innocentio Cotta, qui fortè vnus ad visendum opus prodierat, eius captiuitate hominis, tamquam oblato mirificè instrumento statim est vsus ad capiendam S. Columibani arcem, quae vna efficiebat, ne Laudensis agri possessione Mediolanenses excidissent. Lucius Cotta captiui frater

arcem

arcem eam cum valido praesidio obtinebat acerrimus Sfortiae insectator, & ab ea commendatione locatus ibi, quia nostris magnopere cordi erat, ne qua proditione frumentarium id propugnaculum amitteretur. Sfortiae iussu dicitur Innocentio, ni praefectus illico dedat arcem, ipsum protinus contra moenia illa oportere suspendi, vt in fratris conspectu nocturni furis more extinguatur: idque confestim Innocentius Lucio significat. Non tulit fraternus animus vim doloris ex obiecto spectaculo, & quasi res ipsa iam ageretur, alienato penitus ab honestate fideque sensu, dedita arce hostem illuc admittit, transitque ipse in castra hostium velut ab scelere ad scelus. His itaque initijs vsurpato belli iure Sfortia copias fere omnes ad Bripium in Briantaeos contrahit, transitu Abduae prohibetur Venetos, qui nuper hostes, nunc socij Mediolanensium, in socium modò, iam hostem armati Sfortiam, superauerant flumen, infederantque collem, cui Genesij Martyris Aedes, quae est in summo eius vertice nomen fecit. Est eo nomine collis in extremo Briantaeorum fine, quem tamen collium aliorum cacumen verius quàm ipsum per se collem appellaueris. Namque colles nostri, Barra monte auulso, qui asper fere incultusque est, molliter ab radicibus expatiantur, deinde assurgunt, spatianturque rursus, donec, perpetuum & vario felicium arborum vestitu fertile dorsum attollere incipiant. Ab dorso dein ipso, leuiter fastigiati alij vertices attolluntur, quos nominant

minant incolae, prout, vel incola vetus, vel situs  
 & natura tumuli, vel priscorum aedificiorum ve-  
 stigia reliquiaeque docuerunt. Stat horrido su-  
 percilio Barra cautibus armatus suis, & ab caetera  
 montium serie abruptus ille scilicet, cuius nomen  
 atque parietinas, inter alia vrbium deletarum,  
 funera Plinius refert. Proximus huic Batauus  
 est collis, credo sic dictus, quia gentis eius homi-  
 nes aliquando ibi constitere. Inde nudo fastigio  
 supra densas vndique siluas Apertus vertex, idip-  
 sum ex nuditate nomen inuenit. Ab Aperto verti-  
 ce, per varios anfractus, montibus suis imminens  
 sylua excurrit, donec in S. Genesij collem, qui  
 etiam ipse nudus apertusque est, desinat. Imminet  
 hic Abduae flumini, fronte quidem in Briantacos  
 occidentemque Solem, tergo autem in Bergoma-  
 tes atque in orientem obuersus: latera meridiem  
 adspiciunt. Ab ipsa Briantaeorum parte series alia  
 collium surgit, quorum Calchus est fere oppositus  
 huic, nec longe inde mons Verus abest indytus  
 ob vina. Collem vtrumque Genesianum & Cal-  
 chum statuerat Sfortia occupare, existimans, si ea  
 munimenta haberet, diremptos ab omni Veneto-  
 rum ope fore Mediolanenses, tractusque Brian-  
 taeorum illos vniuersos, ob crebras arces natu-  
 ramque regionis inter bellorum discrimina, semper  
 munimentis vrbis militari fama aequiparatos in-  
 potestate se habiturum. Verum, vbi Venetos in  
 Genesianum antevertisse cognouit, Calchumq; ab  
 iisdem teneri, penè despera- de de victoria dicitur, ac

tanto magis , quia tempore eodem , in vltiore  
ripa constiterant plures transitumque tentabant , &  
ex collibus ad Briantaeos occupandos magno im-  
petu descendebatur . Pugnatur acriter , & ad colles  
& ad flumen , ne descendant illi , neue isti trans-  
mittant . Pugna maior in Genesiano fuit , descen-  
dendique & prohibendi certamine extracti Sfortia-  
ni in saltus , diuisum aliquandiu cum Venetis ha-  
buere collem . Veneti Sfortianos , altius enixi , quā  
Martyris ipsius est aedes , faxis hastisque detrude-  
bant . Huic rerum discrimini egressus ab Modoetia  
Picininus cū superuenisset , montemque Veterem ,  
& montem Calchum bifariam diuiso exercitu suc-  
cedens coniungere sese Venetis tentasset , retro  
Mediolanum est ab Sfortia non sine clade compul-  
sus . Mox pari victoria Barram montem obtinuit ,  
qui etiam ipse ab Septentrione praeceps in Ab-  
duam , subeuntes ab Olginato Venetos opportu-  
ne prohibebat . Paulatim inde , & qui Calchum ,  
& qui Genesianum collem tenuerant , obtinente  
regionem Sfortia , subacti fame , vel abire inde ma-  
turaucrunt , vel vltro ad Sfortiam transiere . Ita  
auxiliares nostri , cū nusquam in Briantaeo tractu  
consistere potuissent , regioneque exclusi ea simul  
excluderentur facultate defendendae vrbis Sfor-  
tiamque depellendi , statuerunt , capto per Larium  
lacum ambitu regionem eandem ab tergo circum-  
uenire . Quod Sfortia parari cū sensisset , mittit  
obuiam è suis , qui ab illa etiam parte venientibus  
auxilijs obsistant , ne quid laxamenti & subsidij  
alicunde

alicunde Mediolanensibus detur. Ibi verò parumper dolus vnus casusue militaris, & Sfortiae partes afflixit, & Mediolanenses spe auxiliij sicuti videbatur appropinquante, sed ad exitum irrita subleuauit. Ductores copiarum ex nostro exercitu quidam, siue ad fallendum hostem re composita cum Imperatore Picinino, siue concepta vere animis transitione, deinde mutato animo, quam occultissime nuncium ad Sfortiam mittunt: ipsos imperatoris iussu tendere Nouocomum, vt venientibus ab ea parte Venetis sese coniungant, quò facilior tutiorque aditus in Briantaeos auxilijs pateat. Si velit Sfortia benigne accipere, ipsos ad eum cum agmine suo esse transituros. Haud contemnenda res visa hosti. Honestum apud se locum & larga prolixaque omnia pollicitus, mittit octo peditum cohortes, ducibus Salernitano & Intimiliensi, qui manum eam transfugarum accipiant, & ad se deducant transfugae, & numero longe plures erant, & nominis eius obtentu specieque societatis resoluti in securitatem hoste, parati ipsi intentique ad rem gerendam. Vbi inuicem propinquauere, Sfortiani quidem porrigunt dextras dantque sese in amplexus, nostri verò stringunt gladios, & attonitas repentino eo malo cohortes caedunt spoliantq; fugientibus insunt, resistentes paucos, & mortis honestae gloriam quaerentes, tantò infestius lacerant: quosdam & abduxere. Sic Veneti auxiliareis Briantiae terras intrant, & primum omnium, Barrani montem corona oppugnare ag-

Ecc

gresi

gressi frustra id incoeptum habuere. Caeterum, obsidione mox eum capiunt, ac refecto ad Olginatum ponte, quem paulo antea fugientes ipsi interfecerant, captisque aliquot in fluminis ripa castellis, summa Briantaeorum tenebant. Id Sfortia fessus diuturnitate belli, pabuloque ad sustentandum, equitatum necessario iam prope defectus, parum curare coeperat, si montibus sederet hostis dummodo ne ad plana urbem versus descendere eos pateretur. Vrbi ipsi famem admouebat extremam obsessumque Venetum inter cautes & saxa habebat. Iam Mediolani tanta erat penuria, ut vicens aureis nummis hordei modius constaret. Ea ditiorum alimenta erant. At miserrima egentium, multitudo, omnia quae atteri dentibus possent, naturali desiderio velut in rabiem acta carpebant passim: atque interim exempla omnia esurientium edidere quaecunque vnquam, vel obsessis accidere exercitibus, vel ad subiiciendas oculis misérias obsessorum excogitare potuerunt ingenia, quae eos calamitatum humanarum & extremae patientiae annales condidere. Ego in urbis nostrae diarijs hoc reperi relatu etiam horribile & foedum: equorum & asinorum frustra, felesque, & mures, & canes, & animalia caetera, quae nec dici quidem inter cibos ac nominari fas est, venalia interim apud forum esse habita, pretijsque venundata iisdem, quae alias legitima fercula parantur mensis. His nutrita dapibus multitudo fiebat quotidie contumacior, exsueratque obsequium paulatim

eim omne erga eos, sub quorum imperio ac regi-  
 mine talia patiebantur. Magistratus, delegatus  
 exercitui suo auxiliariibusque Venetis cura suppe-  
 ditandi annonam expediendorumq; comneatuum  
 vrbi, & precibus eos & querelis assidue vrgebant.  
 Illi, circa Briantiae colles penè obseffi consultan-  
 do terebant tempus: duaeque res capitalissimae  
 populo Mediolanensi detectae sunt tempore vno:  
 defectionem ad Sfortiam parare Picininum Impe-  
 ratorem exercitus nostri, & maligne lentequerem  
 administrare Venetos, quia sperarent, deductum  
 ad extrema populum, odio Sfortiae, potius dedi-  
 turum ipsis esse urbem: idque Leonardus Vene-  
 rius Reip. eius legatus Mediolani sedens occulte  
 moliebatur inter eos, qui, nec ab Sfortia capi pa-  
 triam, nec liberam esse eandem volebant. Sed  
 Sfortiae destinatum imperium occulto superum,  
 impulsu ruebat in eius humeros, vt domus deniq;  
 illa, sub infelici pondere, post aliquot annos,  
 prioris fortunae quietem frustra exoptaret. Estq;  
 Sfortia in urbem imperiumque acceptus orto inter  
 ciues ipsos maiore tumultu sicuti demonstrabo.  
 Cum ex bello tam atroci, intoleranda fames, ex  
 fame desperatio vltima Ciuitatem inuasisset, &  
 super duo haec semper inter se connexa mala, fere  
 grauius aliud in vrbe malum faeuiret, discordia ci-  
 uium & maiora penè inter ipsos, quàm in com-  
 munem hostem essent odia, conuentus habebantur  
 tam contrarij & crebri, quàm variae hominum  
 voluntates, & quàm diuersae calamitatum formae



orant. In Scalensi templo maxime congregabantur tuendae adhuc libertatis auctores, atque ibi in media fame consilia aliqua inibant, vetuerantque Magistratus accedere eò, nisi quem ipsi nominatim exciuisent. Sed die quodam, Portae Nouae homines ad arma consternati concitant cacteros, & eam publici Concilij sedem irrumpunt rupto imperio terni quaternique prout quosque fortuita congressio, vel necessitudo aliqua consociarat.

A Petro Cotta, & Christophoro Pagano praecipuè stimulabantur, quorum vtrique dedi urbem ac recipi Sfortiam placebat. Et iam plures cum Cotta & Pagano stabant in circumiecta templo area, quàm cum principibus libertatis intra templum. Praefectus rerum capitalium ad coercendam eam licentiam cum lictoribus, & cohorte sua progressus, facto in eum impetu protruditur, aegreque euasit. Par discrimen adierat Lampugninus Biragus, quem ad tumultum cum inspiciendum sedandumque Magistratus ex Templo emisserant. Dira fames, quae iam aderat, quaeue in dies adfutura saeuior videbatur, diuites quoque conterruerat, & finiendi belli cupidine concitauerat etiam eos, qui oppetere cum patria statuerant potius quàm, ut ad vllam inimicam libertati conditionem adduci sese paterentur. Itaque, crescente in momenta, numero coadspersantium auctoritatem publicam, pars haec ipsa fit publici concilij instar: & quò plus virium auctoritatisque haberent, duces sibi duos fecere, Gasparem Vicomercatum, & Petrum Cot-

tam:

tam : Cotta ab authoribus libertatis in vincula conijcitur , & irritatus collegae captiuitate Vico-mercatus, tantò promptius ardentiusque confirmat suos , & rem susceptam exsequi festinat . Circumgrediuntur , infesto agmine Palatium , in quo sedebant Magistratus vrbs , & vidua vxor Philippi, Venetusque legatus , & plerique alij ex tota illa nimium fortasse generosa factiōe , quae libertatem vrbs saluti anteponebat, nec posse vllam absque libertate venire salutem arbitrabatur . In ea irruptione , Venetus legatus , ab Ioanne Stampa interficitur , cū ille repentino excitus tumultu in Aulæ fortè limine ad increpandam irrupentium licentiam , iure gentium , vt existimabat ipse , tutus constitisset . Diffugiunt Magistratus , totaque momento fere vno tribunitia potestas , & illud popolare imperium dissoluitur . Nobiles , disposito ad portarum claustra milite , Palatioque communito , in Scalense templum , ad consultandum de summa rerum postero die secedunt . Non facile inter ipsos conueniebat quid deinde optimum saluberrimumue factu censerent , cū varia in omnes partes itinera consiliorum ostenderentur . Dixerat aliquis eiusmodi sententiam , vt persisterent in defensione libertatis : sed mutata gerendi belli ratione , & vitatis Imperij plebeij vitijs rem sapientius cautiusque militarem constituerent . Alius , nullum id esse consilium demonstrabat . Galliarum regem accersere non nemo : plures Regem Alphonsum : aliqui Sabaudiae , Ducem : pars mitissima Senatus , nusquam

quam beatiorē fore patriam, quā sub Christi Vicario aiebant, ideoque permittebant cuncta Apostolicae Sedi. Sed cū subsidia consiliaque haec in tali statu, vel fera & longinqua, vel infida & imbecilla reperirentur: illata fortē mentio est de admittendo Sfortia, qui filiam legitimi Principis in matrimonio haberet: qui victor prope instaret moenibus: quem si ante victoriam admisissent, non a cepisse coacti, sed ultro fecisse Principem viderentur: tantoque mitius sperare imperium deberent. Mirifica voluntatum inclinatio, qua repente in eam sententiam iere omneis, videri potuit prodigium, vel calamitatum ab Sfortiaco dominatu imminentium vrbi, vel exitij, quod gentem eam dominatumque manebat. Principes, & legati Mediolanensium profecti in castra dediderē Francisco Sfortiae seque, & urbem, & populum, nouumque Principem Mediolanum in ipsam Imperij Sedem laeti deduxere. Ille magnum animi moderati specimen in ipso statim ingressu dedit, quia adornato per principes, & oblato curru quo sublimis veheretur ad capeßenda primordia dominationis, factum eum adspersus, vmbellâ quoque repudiâtâ, pari cum caeteris cultu ad Templum maximum ibi coronandus processit.

# IOSEPHI RIPAMONTII CANONICI SCALENSIS

CHRONISTAE VRBIS MEDIOLANI  
HISTORIARVM AB METROPOLI CONDITA.

DECADIS III

LIBER VI.



**I**N Templo maximo Sfortia coronatus per omne deinde tempus liberaliter ac munificè tractauit Vrbem Ecclesiamque ipsam: & quoriescunque publica aliqua res ageretur, profiteri solitus fuit, debere se nomini huic Metropolitano pietatem, & honorem, cùm etiam Ambrosiana in Sede solennia sui Principatus, principatumque ipsum accepisset. Vicissim inter sacra sacrosque fuit ei deinceps honor, atque paratum ad omnia obsequium, quales iusto ac benemerenti Principi patere gratorum ciuium animos oporteret: raroque vllus antea postue Ducum tam effusa studia Cleri Populue Mediolanensis expertus in omni litterarum hominumue memoria reperietur. Habita est oratio de laudibus eius & familiae splendore, per Guarnerium Castelleoneum notae tunc facundiae virum ex Templi Maximi Canonici: qui semper Ordo, sapientiae studijs inclytus, per ea maxime tempora florebat

florēbat hac laude: cumque ex primoribus Urbis constaret id ferme Collegium, erat simul in eo communis quidam erga Principem fauor, siue quia annexi nonnulli essent exsurgenti tunc primum ad dominatum familiae, siue quia pars haec traheret ceteros, ut vnde potentiores nobilioresque stabant, de more starent omnes, atque ita significatione voluntatum erga Sfortiam hunc certaretur. Publicae gratulationis munus, & dicendi partes mandauere Castelleoneo, quia praeter aptos principum animis mores & inbutam Aulae consuetudine grauitatem, aderat viro dignitas oris accommodata negotio: & nouae dominationi acceptissimum esse ipsi sciebant. Orationis eius sententias ordinemque, aliquandiu qui tunc erant homines propter rei magnitudinem, & Oratoris famam, in sermonibus habuere: deinde, vna cum re ipsa, sicuti cuncta mortalium habentur, dedere obliuioni. Leuis & confusa memoria durauit hoc litterarum beneficio, quae rerum illustrium aeterna vna custodia est, si quid in fluxa mortalitate potest esse aeternum. Ego censeo non esse alienum ab historico nostro opere, quo super tempora & euenta Urbis virorum, etiam illustrium memoriam ab interitu suo vindicare institimus, concionem simul illam ab hominum obliuione vindicare, atque iam prope vanescentem ex annalium quoque monumentis, utcumque retinere, tamquam pro oblitterata & fugiente scriptura certam claramque exhibendo. Castelleoneus igitur in Templo  
maximo,

maximo, cū Sfortia coronatus adesset, in hunc  
maximè modum esse locutus fertur. Semper qui-  
dem antea, Princeps inuicte, Populus hic Clerus-  
que Mediolanensis, qui triumphus tui & suae feli-  
citatē spectator, augustissimam hanc molem hodie  
implet, pro certo habuit, Urbem Rempublicamq;  
hanc curae esse superis, & magnum praecipue  
Parentem Ambrosium, ac praesides alios Diuos,  
à quibus fundati & instituti sumus, ita velle, ut  
post Romanam maiestatem sit haec florentissima  
Sedes Catholicae religionis, rerumque aliarum,  
omnium expetendarum, quibus rebus incolumitas  
& gloria gentium continetur. Sed si ea spes ante  
hunc diem incerta & obscura animis fuisset, desine-  
remus hodie dubitare, cū Celsitudini tuae, no-  
strū omnium regimen ac tutelam imperiumque  
rei Mediolanensis à Deo Optimo Maximo, tam  
praesenti Numine, tam nobili victoria, tanta post  
victoriam voluntate consensuque omnium esse tra-  
ditum videremus. Nam Principes alij, qui nobis  
adhuc imperitauerunt, nascendi tantummodo sorte  
venerant in hanc fortunam, ipsique fortuitum ne-  
gotium erant, neque ultra aestimabantur. Tu,  
quia probitate & iustitia, omnique alia regia vir-  
tute merueras imperium, armis inuenisti: & quia  
talis eras, aperuere tibi Superi viam, ut in excel-  
sam istam sedem, domitis quae obstabant, perueni-  
res: & nos, diuino sic munere datum ascriptumque  
Ducem accipimus alacrioribus aliquanto animis,  
quàm si quilibet ille alius vnico natalium & auo-

rum iure tumens dominus imponeretur: Enim-  
vero Celsitudinem quoque tuam arbitramur, ea  
prudentia, & magnitudine animi, qua res tantas  
gessit, intuentem, & celeste iudicium, quo voca-  
ta electaque est, & Populi huius vniuersi consen-  
tientem laetitiam, & hosce plausus fauoremque,  
& tantae multitudinis gratulabunda ora, & Tem-  
pli ipsius festum apparatus, agitare iam nunc re-  
galem illam curam, vt ad ea, quae sua sponte  
large ac benigne & clementer factura fuit, tan-  
tum scilicet adijciat, quantum & exposcere pro  
diuino in ipsam beneficio tutelares vrbis viden-  
tur, & mereri ciues ipsi postquam ad haec Vestrae  
Celsitudinis initia consurrexere sic omnes atque  
apparuerunt. Vides ne Princeps optime & maxime  
quemadmodum affluxere ad spectaculum innume-  
rabili prope agmine Mediolanenses tui! Vides,  
vt conferto iam Templi sinu, tanquam ad noui  
splendoris exortum accedere velint in singula mo-  
menta plures, vtque turbam vndantem haec capa-  
cissima sedes excludat? Victa & triumphata ciui-  
tas exultat in victoriae faciem quasi vicisset ipsa,  
& triumpharet. Sexus etiam alter ille spectaculis  
insuetus adest: attollunt pignora sua matres ad  
Celsitudinis Vestrae oculos, futurumque populum  
ostentant; & rudem illam aetatem agnoscere ac  
celebrare natalem hunc Patriae diem docent. Et  
promiscuae quidem multitudinis haec tam effusa  
gaudia concursumque Celsitudo Vestra cernebat  
etiamsi nemine perorante monstrarentur. Nos  
verò



verò custodes antistitesque sacrorum, qui ex prima  
 Urbis huius nobilitate iure nostro gentilitio as-  
 sumpti Metropolim hanc tuemur, & ipsa nobiscum  
 tota Nobilitas, quae Urbem ipsam continet ac  
 facit, licet coniunctis omneis animis officioque  
 concordī postquam factiones & arma quievere,  
 nostram ex nouo Principatu laetitiam, tum de-  
 cernendo cuncta, quae fuere publicae potestatis  
 & arbitrij, tum adornando solennia haec, vt quam  
 apparatissime celebrarentur, ostenderimus ac decla-  
 rauerimus: tamen exponere volumus etiam altio-  
 res illas interioresque causas, ob quas, Celsitudi-  
 nis Vestrae imperio magnopere nobis esse laetan-  
 dum arbitremur, Urbemque & Patriam hanc  
 sub tali Duce fore felicissimam speremus. Nam-  
 que primum omnium, repetentes mirificam  
 illam, & adhuc insidentem animis Clarissimi viri  
 Patris tui memoriam, simul inclyta tua facta, vt  
 Patris contubernio adultus incomparabilem illius  
 gloriam aequaueris, vt diuisâ in partes Italiâ,  
 Pontificem Romanum, & sacra defenderis,  
 vt nostrae huic vrbi laboranti malis intestinis  
 ac laceratae seditionibus subsidio saepe fue-  
 ris ac saluti, vt hinc saepe arcueris hostem, vt  
 victricia late propugnator auxiliariisque noster cir-  
 cumtuleris arma: iam quanta lenitate egeris, vt  
 tibi debitum Imperium hoc sine Mediolanensium  
 sanguine reciperes, quàm placide victoriam ip-  
 sam exercueris: haec inquam recentissima omnia,  
 & oculis obuersata nostris intuentes, reliquum

„ ad eandem formam futurum esse principatum omni-  
„ namur & meritò laeti hilaresque sumus : Magnus  
„ Sfortia Celsitudinis Vestrae Pater militari virtute  
„ famam & vim assecutus , vt quaecunque in par-  
„ tem ipse transierat , victorias & imperia transfer-  
„ ret secum , dederat ademeratque Regna quibus  
„ ipse voluisset : Aragonensem Alphonsum ex  
„ Neapolitani Regni finibus prope retro compu-  
„ lerat domum : restituerat extorrem Ioannam :  
„ firmauerat adoptionis iura : fregerat alterum illud  
„ belli fulmen , cui Brachio nomen fuit : Romanas  
„ opes , Pontificemque Martinum egregiè propugna-  
„ rat : ac tantarum denique fama rerum Vicecomi-  
„ tem vltimum commouerat , vt auxiliatorem Im-  
„ peratoremque sibi eum aduersus bella , quae im-  
„ minebant , inuocaret . Postquam ille nouae gloriae  
„ iter tentans in media penè victoria lapsu equi &  
„ vi fluminis est interceptus , diuina consilia , quae  
„ felicitati nostrae viam struebant , paternis incoeptis  
„ dedere te successorem , vimque simul & famam  
„ illius transtulere in tuum caput . Ita spectatus cla-  
„ rusque Neapolitani belli reliquijs Mediolanum ad-  
„ res Vicecomitis afflicta venisti . Vicecomite de-  
„ fenso , compressis Venetis , cum vbicunque bellum  
„ & periculum esset , ibi velut certissima laboranti-  
„ bus salus expeterere , tulisti pro Lucensibus arma  
„ in Florentinos , eiusque Reipublicae libertatem es-  
„ tutatus . Mox domiti rebelles Ecclesiae : Picenum  
„ & Bononia restituta Pontifici , fusae Anglorum  
„ copiae : cuncta per agrata victorijs . Ac si tot  
bellorum

bellorum victori quaequam mala gratia reddita  
fuerat ab ijs, pro quorum imperio & salute dimi-  
caras, iisdem illi versis in ipsos armis, iustas ultrices  
iras sensere. Nec minor excelsi animi laus perse-  
qui ingratos amicos, quàm vincere hostes: facile  
que mitem & largum aduersus obsequia speraue-  
rimus Principem, quem indignitates & iniuriae  
tantopere angunt, & benignum erga minores,  
quem potentiorum iniusta facta sic infensum ha-  
bent. Sed cum apud gentes fere omnes, quae re-  
gnantur, apud Regnatores ipsos, apud liberos  
etiam populos miscueris sic vim, terrorem, beni-  
gnitatem, & cum praeclari istius animi extent ubi-  
que sempiterna vestigia & monumenta: terra haec  
nostra maximè sempiternum erit monumentum:  
imò hercule nos ipsi erimus. Nam statim, ubi Vi-  
cecomite mortuo, res haec nostra Mediolanensis,  
sine capite, sine rectore, ciuilibus trahenda turbis  
in medio relicta erat, cum super intestina dissidia  
magnarum omnium urbium calamitatem, finitimū  
hostes instarent rati finem adesse imperio: primum  
quidem aduolasticum exercitu tuo victore, & spes  
vanas hostium effecisti: deinde verò succedere te  
in Principis fortunam aequum duxisti, cuius filiam  
in matrimonio, & ex ea liberos haberes, cuius  
etiam in mortis tempora propugnator extitisses.  
Vno rerum cursu, & vno victoriae tenore, Par-  
mam, Placentiam, Brixiam, Ticinum, oppida  
caetera omnia, quae, vel detrectabant imperium,  
vel ab hoste infesta erant, recepisti, nosque & Me-  
tropolim

„ tropolim hanc , donec vires vltimae superfuere ,  
„ cunctantes fatigare potius voluisti quàm capere ,  
„ idque Celsitudini Vestrae gloriosius fuit . Atque ,  
„ vt cunctatione nostra delectatum esse appareret  
„ magis aliquanto quàm si nihil experti statim cessis-  
„ semus , honorem hunc habuisti fortissimis ciuium  
„ tuorum conatibus , & spectatae virtuti , vt pacato  
„ agmine victor urbem ingrederere , & violari quic-  
„ quam ab irato milite grauibz edictis vetares .  
„ Scilicet , illa segnis & aliter quàm extrema necessi-  
„ tate facta deditio , degeneres animos argueret , &  
„ quamquam libenter acciperetur , contempta tamen  
„ & vilis apud Celsitudinis Vestrae animum esse  
„ posset . Nunc experti inuicem sumus , & virtus  
„ eadem , quae morata victoriam est , colitur iam  
„ secreta destinatione atque amatur veluti magnum  
„ instrumentum rerum earum quae deinde gerendae  
„ erunt . Haec igitur omnia suis momentis exannu-  
„ ta Mediolanensi nobilitati Populoq; Ambrosiano ,  
„ & nobis praecipue , qui Templi huius Antistites  
„ Clerum nobilitatemque , vel Ordinis amplitu-  
„ dine , vel communione familiarum amplectimur ,  
„ recreant atque confirmant animum nostrum iu-  
„ cundissima illa cogitatione , quanta sub tali Prin-  
„ cipe futura sit huius Patriae , vel gloria , vel  
„ fortuna , vel dignitas & amplitudo , vel securitas  
„ & quies . Habemus praeterea Princeps inclyte  
„ magna pignora nostrae futurae felicitatis , simul  
„ ex fama praedicationeque communi , simul ex  
„ certorum hominum sermonibus , qui Celsitudi-  
„ nis

nis Vestrae mores, & animum, & quotidianae  
vitae rationem & leuiore quoque virtutes, &  
intima omnia, vnde res illae admirandae manue-  
re latere non sinunt. Nuntiat atque nobis omnia  
fama constans, eademque affirmant grauissimi viri  
militares, qui tecum vnà sub pellibus, in castris,  
in acie, in agmine in statuiis, in hybernis, in  
aestiuis, in classibus, in otio denique & aula aeta-  
tem egere. Indicant, animum esse Celsitudini  
Vestrae ad cuncta minima maxima memorem diui-  
narum legum, anxium alterius vitae curis, profe-  
rendae religionis cupidum, largum ad extruenda  
templa, vel ornanda, munificum erga Christi pau-  
peres, sacratarum omnium rerum acerrimum custo-  
dem. Audimus, vt communem illam regnorum,  
& humanae vitae pestem pecuniam contemnas, &  
adspicias oculo irretorto, vtque argentum, & au-  
rum, & gemmarum ludibria ducas non in alia vi-  
litate quam quae humo finguntur. Comitem huius  
esse contemptiois aequabilitatem in iure gentibus  
reddendo sine vlla imbecilla cura quae flectere ani-  
mum possit: inopis & potentis nullum apud tua  
tribunalia valere discrimen, & stare ibi partem,  
vtramque stupore defixam velut extra fortunae  
suae conditionem pari gradu. Pessimas delatorum  
artes, & aulae veneficia, & cuncta reperta ciuium  
exitio, vt oderis audimus: vt fidem ipse colas, quam  
pessimi magistri minime regiam esse artem volunt,  
vt famam tueri, quae certissima est norma Princi-  
patus, vt faucas etiam ingenijs, & literarum studia  
praesidia

„ praesidia religionis , & urbium decus amplectare „  
„ narrat nobis publicus rumor & spem inde agitare „  
„ optimam iubet . Etiam illa pertinere ad gloriam „  
„ securitatemque nostram arbitramur , quae princi- „  
„ pum quidem omnium laudatores ingeniose con- „  
„ fingunt , sed in Celsitudine Vestra seuerè spectata „  
„ sunt ab iisdem illis , qui simul rem gessere , quibus „  
„ ue etiam in contraria nonnunquam acie , & parte „  
„ standum fuit . Referunt enim imperatoriae artis „  
„ mirifica quaedam , & post veterem Romanam mi- „  
„ litiam inaudita , quae ratione & prouidentia „  
„ & altitudine consilij victorias illas tantas tuas „  
„ obtinuerunt , vt nunquam in aciem duxeris „  
„ exercitum , nisi cùm prouisum esset vt vincere co- „  
„ geretur . Atque postquam haec nobis narrauerunt „  
„ milites hostesue tui , narrant simul infatigabile cor- „  
„ pus armorum pondere , fame siti , vigilijs quarum „  
„ rerum necessitatem Imperatoribus etiam belli for- „  
„ tuna nonnunquam imponit . Et acceptis saepe „  
„ vulneribus manante cruore stetisse impavidum di- „  
„ cunt . Iam vilibus contentum esse cibis , eiusque „  
„ parcimoniae testes quamplurimos adhibere conui- „  
„ uas , inter conuiuia vacare supplicum alloquijs , „  
„ & in alia quadam rariore continentia superiorem „  
„ esse mortalitati , & eius rei praeberè caeteris exem- „  
„ plum , sunt admiranda quidem , sed & tot exer- „  
„ cituum testimonio comprobantur , & optime con- „  
„ gruunt ad eum animum , cuius virtute ac consilio „  
„ superiora illa geri & administrari potuerunt . Con- „  
„ gruunt etiam ad istam Regio honore gratam , „  
„ frontem

frontem quam spectamus nunc omneis praesen-  
temque habemus, congruunt ad serenitatem oris,  
ad florem denique virum, quem post tot labores  
temperantia custode manere integrum atque illi-  
batum videmus. Colitote Mediolanenses vt facitis  
carumque habetote Principem hunc diuino mune-  
re datum vobis, futurum huic Patriae mitissimi Pa-  
rentis instar: ac si id fortasse etiam ad vestri gaudij  
cumulum pertinere arbitramini, daturum huic Im-  
perio sinceri sanguinis stirpem ex eadem Domo,  
cui per ducentos amplius annos subiecti fuimus:  
Nec aliud huiusmodi successionem optabilius erat  
nobis. Nam finita Vicecomitum virili stirpe, aut  
externam recipi dominationem oportuit, aut ali-  
quam Reipub. formam institui domi, aut in Patris  
imperium ascisci filiam etiam si Sfortia hic non adef-  
set victor simul, & maritus, & gener, & pater.  
Iugum externum, & vim peregrinam plerique ad-  
spernabamur. Coalescere in Reip. corpus, insta-  
bile sanguinarium truculentumque erat ob factio-  
nes, & partes, ob certamina potentum, ob vrbis  
ipsius magnitudinem laborantem haud dubie mole  
sua. Sfortia igitur libentissime recipiendus erat,  
cuius liberi nepotes erunt Principum, sub quorum  
dominatu maiores nostri nullius alterius populi  
fortunam expetiuere. Cum haec à Guarnerio Ca-  
stelleoneo perorata essent, nemini dubium fuit,  
quin nota laudantium arte cuncta ille in maius  
auxisset. Namque prospera tantum attollendo  
reticuerat de aduersis, & affingendo felicia tristi-

G g g

bus,



bus, illata in Romanos fines arma, Ecclesiae propugnationem appellarat, necessitati Mediolanensium obsequij nomen imposuerat, & pro caetera Oratoris adulatione, mala, quae ipsi dum hostis instaret moenibus plurima perpassi erant, obuersabantur. Certatim tamen omnes, postquam dicendi finis est factus, acclamauere forti, & felici, summaque vocis contentione uti mos vulgo est. Sfortiarum nomini fausta cuncta precabantur: viuere diu, viuere laetum Principem iuebant. Haec in templo maximo acta erant. Singulae deinde Paroeciae nominauere singulos legatos, qui deferrent Principi obsequium & fidem, ac suae quisque vicinitatis nomine in eius verba Sacramentum dicerent. Templi maximi Canonici, praeter solenne illud publicae gratulationis officium, quod à Castelleoneo peractum erat, decreuere duos è suo corpore, per quos Collegij verbis talia quaedam priuatim exponerentur. Ecclesiam Mediolanensem, cui caput Metropolitana Aedes, à D. Barnaba Apostolo fundatam, à D. Ambrosio constitutam, per tantum aeuum multa prospera vidisse, pleraque aduersa, donec ab Othone Vicecomite res illius afflictae in certiores aliquem stabilioremque statum redigi coeptae fuerint. Ab eo rursus tempore, post magna incrementa, retro esse sub lapsam, & prout turbulentae, siue tranquillae principum res, prout etiam principes ipsi benigne adfecti, vel secus, ita Ecclesiam etiam in misero fuisse, vel in florente statu: obtinere magnas antiquitas

quitas immunitates, magnaue priuilegia & munera concessu Pontificum aut Principum, qui, vel Ecclesiae magnitudini, vel nomini parentum & Authorum ipsius, vel Archiepiscoporum etiam aliorum deinde meritis honorem eum habuerint: sed partim intercepta esse, partim diminuta quae priores indulserint, & sacrae vereris opulentiae reliquias tenues admodum manere. Esse hanc Insurbiae totius Metropolitim, & latius olim porrectam habuisse potestatem iusque sacrorum. Ambrosianam Ecclesiam ideo nuncupari, quia descriptis ab illo Pontifice ritibus caeremoniisque seorsim ab caeterarum consuetudine Urbium utatur: & Romanam in eo discrimine auctoritatem nutumque adesse. Petere à Principe, ut Ambrosianum hoc nomen Ecclesiamque & praesides Antistitesque eius vnice commendatos haberet, semperque tueretur. Id adeò ut ita fieret, & Metropolitim, & ipsos praecipuè mereri, vel quia Principes etiam Vicecomites, quorum ille nomen & genus propagandum atque continuandum suscepisset, plurima in eam & maxima ornamenta contulissent, quae deferri non oporteret, vel quia Collegium & Ordo Canonorum Clerusque vniuersus omni sua pietate apud Deum, officio apud homines ad exordia noui Principatus adfuissent, adfuturique deinceps essent ad omnia, quae Principi placere posse arbitrarentur. Respondit ad ea Princeps: non esse sibi ignota quae de antiquitate & amplitudine casibusque Mediolanensis Ecclesiae egregij

viri Canonici exposuissent . Parentes etiam illius Ecclesiae Barnabam Apostolum , & magni nominis Ambrosium colere se praecipua pietate , & res vtriusque gestas in eo Pontificatu voluisse olim , cognoscere cū apud Socerum dominumque suum in hac vrbe commoraretur . Fauere Cleri totius Mediolanensis nomini ac famae , praesertimque Metropolitani Collegij amplitudini ac dignitati : vidisse omnium erga se studia amicosque animos & magnopere esse delectatum Scirent , cordifere sibi , vt gratus vicissim amicusque reperiretur . Retinebantur inde Canonici paulisper in colloquio , percunctante Principe nonnulla de statu conditione Collegij , ac de Ecclesiae rebus : & cū eos dimitteret , velle se postea commodius colloqui cum ipsis aiebat . Quinque dies proximos ei diei , quo peracta caeremonia erat , iussit festos esse Populo Mediolanensi : ac per eos dies ipse praebuit epulum , positoque in propatulo rerum omnium vsu larga insuper munera data pauperibus , aut missa quibus in publico epulari ob sexum religionemque non licebat . Ob ea , maximum Sfortiae nomen apud omnes esse , celebrati sermonibus & literis , & magnificentiae ac splendori veterum Regum aequiparari . Vna res erat , quae Mediolani publicam laetitiam impediret , eademque Principis ipsius magnopere sollicitaret animum , & ea , ipsa res alioqui futura magnis malis initium , , prouido consilio discussa est , origoque sublata suspicionum mutuarum . Iouis arcem magna ex parte

parte dirutam atque collapsam reficere Princeps, ac nouis firmare munimentis in animo habebat, vt eo premeret iugo urbem, si quando cupidine libertatis stimulante ciuium animos, detrectare imperium coepissent. Anceps id erat ac difficile negotium, verebaturque magnopere Sfortia, ne turbarentur animi eo ipso quod parari praesidia aduersus turbas viderent, atque rebellandi principium id fieret. Itaque anxius ea cura, vocatos ad se Parochos rogauit vti popularibus quisque suis ostenderent, ad dignitatem & amplitudinem, et praesidium pertinere Ciuitatis, refici quamprimum arcem & muniri, ideoque petendum esse vltro à Principe, vti fieri id iniperaret. Facile Sacerdotes, & alij cum eis aptae prudentiae viri persuasere populo id quod quaerebatur, passimque per templa congregati Ciues decernebant è sua quique vicinitate legatos, qui Principem adirent petentes, ne immunitam ac nuditam diutius esse Metropolim vellet, inchoaretque pulcherrimum opus, quod praesidio ipsis, terrori hostibus esse posset. In D. Georgij Aedem praecipue congregabantur. Ibi Georgius Plattus Iurisconsultus notae facundiae vir, prudensque idem & modestus atque vitae suae fama nactus authoritatem inter ciues, quanta maxima priuato cuiquam contingere posset: is igitur existimans, ea, quae pararentur munimenta, daninosa fore vrbi, arcemque ipsam, veluti sepulcrum omnis publicae libertatis interpretatus, aduersus eam rem differuit in hunc modum.

„ dum . Viri Mediolanenses : Si Deus Opt. Max.  
„ aliquo singulari beneficio & indulgentia erga Pa-  
„ triam hanc, angusta mortalis aevi spatia Francisco  
„ Sfortiae prorogaturus esset, ita ut sperare possemus  
„ fore posteritatem nostram sub imperio tam iusto,  
„ & aequabili, quam hodie nos experimur : esset sa-  
„ nè superuacanea haec oratio, quam ego pro salu-  
„ te publica aduersus publici consilij auctoritatem,  
„ suscepi . Sed cum vita principum circumscripta sit  
„ iisdem terminis, intra quos nostra quoque priua-  
„ torum vita consistit, censeo lentius aliquantò con-  
„ sultandum esse de ea re quae deliberata iam vobis  
„ & decreta est . Neque enim arbitror ignorare quen-  
„ quam vestrum, quam calamitosa res sint omni li-  
„ berae & honestae ciuitati impositae ceruicibus ar-  
„ ces, nimiumque multis, & aliorum, & nostris ca-  
„ sibus id compertum habemus . Nescimus, quae  
„ maneat in posterum fortuna Ciuitatem hanc : sed  
„ superiorum temporum mala docuere, quanta sit  
„ dominantium potestas etiam si castella non premant  
„ ciues . Sed ita sumus experti, ut tradere generis  
„ huius disciplinam alijs etiam possimus . Arcem,  
„ autem hanc Iouis, tantum abest ut refici velle de-  
„ beamus, ut potius eius ruinas quasi fortunam no-  
„ stram ingentem, & summum Dei beneficium intue-  
„ ri oporteat, & laetari, quòd excidio data fuerit .  
„ Pollicetur quidem felicitatem nobis quietemque  
„ perpetuam inclyta iustitia, sapientiaque & religio  
„ Sfortiae huius : sed dicite mihi, quamdiu Sfortiam  
„ inter viuos futurum putetis . At enim, dicat  
aliquis

„ aliquis fortasse vestrum, extincto eo, spem in ipsius  
 „ prole fore non minorem, quis tandem praestare  
 „ nobis possit istam prolem? Et ut ea contingat op-  
 „ tima, quam diu optimos istos futuros esse nobis-  
 „ cum putatis? Nescimus quae rerum infortunia pa-  
 „ rentur ipsis quoque principibus: & in magna atq;  
 „ opulenta ciuitate multa accidere possunt eiusmodi,  
 „ qualia, neque coniectura nostrae mentis assequitur  
 „ nunc, neque feret animus cum aderunt. Arcem  
 „ ipsam poterit eiusmodi Praefectus habere, qui,  
 „ vel prodat externae tyrranidi, vel occupet sibi,  
 „ aeternoque seruitio affligat urbem, humilis fortas-  
 „ se, & abiectus homo, quales saepe multos extol-  
 „ lere principum fauor amat. Firmissimae ac tutis-  
 „ simae sunt arces, quae fide & caritate populorum  
 „ ponuntur: caetera munimenta, si fides absit, nihil  
 „ aliud, quam populo principique perniciem parant.  
 Summa omnium attentione Plattus est auditus, ac  
 vera esse quae diceret, fatebantur. Sed vicit pau-  
 corum authoritas & gratia, quos Sfortia sibi in id  
 praeparatos habebat, atque in eodem D. Georgij  
 Templo decretum de reficienda arce est factum.  
 Et res quidem ista exitum hunc suum habuit.  
 Sfortiam interea Federicus Imperator, & Carolus  
 Galliarum Rex, quominus in tanta Ciuitatis adu-  
 latione tantisque Populi totius erga se officijs, sincere  
 gaudio frueretur, exercebant. Ille extinctam  
 Philippi Mariae sobolem, versamque donum di-  
 ctitans, antiqua Caesarum iura repetebat sibi: hic  
 Aurelianensem Regulum affinem suum certo gentili-  
 tatis

tatis obtentu ad spem eandem producebat. In eius  
litis molestia tantò gratiora Principi erant studia  
populi Clerique Mediolanensis, & Ecclesiastica  
praesertim authoritate sanciri ac firmari sibi domi-  
natum laetabatur. Fratrem inter caeteros habebat  
Carolus nomine, qui ab ineunte aetate, satis ar-  
morum satisque gloriae militaris arbitratus esse  
domi, quieto insuper ipse spiritu animoque studia  
diuinarum literarum adamarat, & cùm in familiam  
Augustinianorum vltro nomen dedisset, facile prin-  
ceps euaserat eius ordinis non authoritate tantùm  
& fraterni splendoris fama, sed multò magis se-  
ueritate vitae, & omnium laudandarum artium di-  
sciplinis. Concionandi praesertim laude excelle-  
bat, & per omnia sui Ordinis munera magna cum  
approbatione peruagatus, animi quoque pastora-  
lis haud leue specimen dederat. Hunc in tali tem-  
pore Princeps crediderat posse sibi esse praesidio  
& adiumento ad pleraque agenda & obtinenda,  
si Mediolanensem Ecclesiam, quae Nicolai Ami-  
dani morte per eos fortè menses vacua relicta  
erat, ei demandandam curaret. Facile ab Nicolao  
V. (is tunc Romana sacra tenebat) impetrauit rem:  
atque ita vno tempore penes eandem familiam  
vterque dominatus erat, vt indidem, & responsa  
diuini iuris peterentur populo Mediolanensi, &  
vitae necisque arbitrium immineret. Ipsi inter se  
fratres egregie concordēs, potestatem eam, &  
specie tituloque, & re ipsa tantopere disiunctam,  
ac saepe contrariam, stabiliendi principatus causa  
conso-



consociabant. Imperium & potentiam illam arbitram omnium rerum attemperare Princeps ad quotidianos Ecclesiae casus : indulgere Archiepiscopo quantumcunque sacra negotia postularent ac ferrent. Vicissim Archiepiscopus, benefaciendi simul & nocendi facultate maior ita aliquanto quàm per se esset, quicquid illud virium & facultatis habebat ex fratris aula, regerebat eodem, omnibus demerendo modis eos, quos, vel momenti aliquid in ciuitate esset, vel turbidi ac violenti in animo, dabanturque vltro crebrae occasiones à Principe, per quas ingenijs & hominibus eiusmodi ad Archiepiscopum eundum esset. Saepe quin etiam Archiepiscopus ipse magnarum rerum controuersias, & longi subsellij negotia deliberationesque, si modo minimam vllam ansam haberent, per quam in alterum transmitti forum possent, ad magistratus illos reijciebat, atque ibi supplices litigatoresue ita tractabantur, vt officij concordiaeque certamen inter vtraque iudicia, & inter aulam, dominumue vtrumque agnoscerent. Ita fiebat, vt neque commodior vnquam vllus Ciuitati contingere posse status videretur, & verecundia quaedam etiam animis esset turbandi quicquam in tam miti, tam benefico erga omnes duorum fratrum certamine. Aderat enim principibus digna viris interim prouidentia quaedam apta tegendae arti, in quam potentiae causa consensissent, ne scilicet per eum consensum eamue artem alterutra in parte fieri sordidum humileue aliquid quamuis attenti & cal-

lidi ad singula interpretanda nonnulli dicere vllō modo possent. Et nota Pontificis probitas fama; illa, quam attulerat è claustris, dictis factisque omnibus addebat auctoritatem: vt quietis & modestiae nomen haberent ea, quae si fierent ab alio, proxima conspirationi haud dubie haberentur. Nec fortasse debuit ille diuerso esse animi habitu ab fama quam obtineret, potuitque saluo officio ad firmandi principatus opportunitates accommodare si quid etiam alioqui sua sponte leniter ac dextere facturus erat. Cùm haec forma rerum Mediolani esset, pestilentia est exorta, cuius mali originem quia nullam aliam probabiliorem dicere medicae artis homines poterant, contulere in colluionem varij generis mortalium, qui Iubilaei causa Romam hoc tempore peregrinantes Mediolani commorabantur. Ea tanta lues fuit, vt, quae rerum scriptoribus in huiusmodi commemoranda calamitate solent esse communia dictu, ea vere ac proprie sibi tempus id postularit. Interciderat namque fortis humanae commercium vi morbi, qui postquam continua strage conspectus erat totas exhaurire domos, non modò quotidiana ministeria potentioribus abstulerat, sed alienauerat etiam eos, qui sanguinis caritate, vel pudore, vel spe hereditatis, ab morituro semper vltimi dilabuntur. Mortuorum numerus ex promiscua plebe ac nobilitate ad triginta millia est relatus. Princeps & Archiepiscopus, aulaque tota, & proximi fastigio, & minores alij, sed molliter affluentes, vitata vrbe,

amoeno

amocno circum salubria loca victu contagium effugerunt. Et quosdam tamen etiam eorum deprehendit ibi pestis, oppressitque inter symphoniam, aut epulas, & oblectamenta caetera, quae sibi circumdederant aduersus metum: Caeterum, Princeps vterque, quamquam exitio praesenti subducere sese voluissent, tamen excusata per literas & edicta apud Populum necessitate, & quantum poterant, testati, fieri id ipsum Reipublicae causâ, rebus etiam ipsis magnopere contenderunt, vti pastoralis & ciuilis animi fidem facerent eam: & planè assequebantur. Extructa passim tuguria per expatianteis late campos: dirempti omnes ab mutuo contactu: dati qui circumferrent alimenta: dati alij qui procurarent diuinis mysterijs animos: alij qui solatia & hortamenta futurae vitae morientibus ferrent: corporibus euehendis alij, & praesentium poenarum opportuni terrores ad coercendam licentiam, si quos assidua illa mortis imago satis non coerceret. Denique prouisa, & instituta factaque omnia, quae fierent ac providebantur etiam in hac temporum nostrorum disciplina, postquam, & experimenta complura Pontifices ac Principes alios ad eiusmodi casus erudiuerunt, & Pontificum etiam Principumque animi extitere maiores aliquanto quàm illi erant. Et pestilentia quidem haec, siue placato Numine, siue purgata vrbe, siue circumacta & exhausta grauitate & corruptione coeli, post menses aliquot exsaeuierat: alia ferme socia pestilentiae clades ex incultis agris.

Populum Mediolanensem inuasi. Cura eadem, hinc principis, hinc Archiepiscopi, in fame, quae fuerat in peste, non ita potuit obuiam ire malo, quominus longe plures absumerentur. Ad sexaginta millia perijisse quidam annales habent, cum ab dira & vltima necessitate nulli rei parceretur, quae vorari aliquo modo posset. Exhausta in hunc modum & afflicta vrbe Ecclesiaque Mediolanensi, tertia illa calamitas imminebat, quae sacra & profana omnia permiscet semper atque inuoluit etiam vbi calamitate aliâ nullâ res insuper aggrauatas esse contingat. Veneti, neque vllam cum Sfortia conditionem pacis admittebant & castella nonnulla Mediolanensis agri cum capta haberent, insedissentque praesidijs, quasi appetentes vltiora & minitantes, resumî coegere arma, quae parum feliciter etiam antea experti erant. Die, qui fuit D. Georgio Martyri sacer, habitis ad praecipua vrbis Templi supplicationibus, & inuocata Martyris ope, vexilla sunt erecta gerendo aduersus Venetos bello, quod cum varia fortuna gereretur, totaque per id bellum Italia, his aut illis adhaerescens in magna perturbatione esset, Calixtus Pont. Max. (is namque Nicolao successerat) suscepta componendae pacis actione, propter duras hinc inde condiciones nihil magnopere explicabat. Subegerant interim damna Venetos, vti transigere quoquomodo optarent, & nacti Monachum quendam idoneum ad id hominem (cuius ordinis fuerit non traditur) hunc sibi Mediolanum ad Sfortiam legauere.

Vulgò Fratrem Leonem appellabant, de quo homine diuersa fama, varijque sermones erant, prout quique vitam & instituta eius, beneuolè, vel secus interpretabantur, Nam, quia negotijs se principum vltro immiscere vellet, frequens in aula, coetibusque nobilium, ab Odaeio autem triclinioque alienior, idem ordinis sui amictum & voruina tegmina flectens paulatim & mutans in molliorem amoenioremque formam, & legationis alicuius obtentu semper aliquò peregrinabundus: idè quatiebant capita nonnulli, quasi valere iussisset claustra, nolletque dedisse nomen in eam familiam, sic eum cum irrisu facetijsque, vel etiam cum indignatione seueriores adspiciebant. Et erant, qui turbulentum ingenium apertentemque rixarum hominem esse suspicarentur quia fortè, vehementior commotiorque erat Contra, fauentes & mites aiebant, virum esse magnum & grauem & aptum ad res gerendas, cui cordi vtilitas publica, qui necessarios, in Ecclesia labores & actiones ad studia pietatis adiungere sciret optimo temperamento, quales omneis esse sacros homines oporteret. Non vltimam esse religiosae perfectionis laudem, tractare lutulenta mortaliū negotia nec inquinari: Superbis ac delicatis Principum animis insinuari communium commodorum & plerumque salutis etiam ipsorum causa: nec sermone, nec habitu, nec moribus ad id esse horridum & incomptum: haec & alia in negotioso hoc Monacho leniter & anice interpretantes admirabantur. Quodq;

acrior

acrior interdum videretur & audis offensio-  
rum, id ipsum, libertatem Apostolicam atque fastidium  
erga multorum indignitates vocabant. Sed quae  
demum eius hominis vitia, quaeue virtutes essent,  
diuino iudicio certius ac melius quam hominum,  
aliorum interpretamentis discerni potuit. Veneti  
plurimum eo utebantur, siue perferenda Senatus  
mandata precesue aliquò essent, siue callide con-  
sultandum scribendumue nonnihil: eratque idem  
vtrique Sfortiae, Archiepiscopo scilicet & Principi  
perfamiliaris. Ob ea, rebus afflictis Patres hunc  
super impetranda pace legatum destinauere con-  
ditionibus ijs, quas ipsorum fortuna praesens ferret.  
Ille profectus Mediolanum, agendo varia, nunc  
apud Archiepiscopum, nunc apud Principem, eò-  
rem adduxit, vt Sfortiae fratres, quauisquam &  
viribus iam suis, & foederatorem ope, & multa-  
rum euentu rerum haud dubie superiores, victo-  
riâque propemodum exploratâ, ad ponenda arma  
pacemque cum Senatu Veneto faciendam consen-  
tirent. Cùm legatus aliquoties ab Mediolano Ve-  
netias, & rursus inde Mediolanum excurrisset: ad  
viij. Idus Aprilis praeter omnium expectationem  
pax ea promulgatur. Ita, quod neque Pontifex  
Maximus autoritate sua, neque Principum alio-  
rum legationes in id missae assequi potuerant, vnus  
religiosi hominis dexteritate perfectum est, attoni-  
tis & erubescens pudoreque confusis, vt cre-  
dere licet, quicumque trepidantem in aula cursitan-  
temque Monachum elato supercilio antea despicias-  
bant,



bant, siue cauillabantur. Donatus Bossius horum  
ferme temporum aequalis, qui Chronica gentium  
vniuersarum & res omnis aevi per annorum gra-  
dus literis mandauit, in hac referenda pace, Fra-  
trem quendam nominat Simonetam, quo inter-  
nuntio & conciliatore, res apud Laudem Pompe-  
iam inter Sfortiam Principem & legatum Venetum  
conuenerit. Inde ego sum arbitratus, & Leonis  
nomen, quod Bernardinus Corius tradit, & Simo-  
nerae vocabulum, quod apud Bossium extat, ad  
eundem hominem pertinuisse, ut illa esset hominis  
ipsius appellatio, haec gentis. Cumque Bossius  
idem Eremitam Augustinianum hunc fuisse Simo-  
netam scribat, suspicio etiam inde oritur mihi, fa-  
miliaritatem quam cum utroque Sfortia hunc ha-  
buisse legatum memorauit, ortam ex Archiepiscopi  
contubernio, qui familiae olim eiusdem gregalis  
fuiſſet. Sed ex diuerso, magnam huic nostrae con-  
iecturae perturbationem affert Ioannes Simoneta,  
qui Ducis bella posteris narrauit. Is enim, neque  
fratrem Leonem, ut Corius, neque fratrem Simo-  
netam, ut Bossius, sed fratrem Simonem memo-  
rat, qui rudis literarum, innocens vitae habilis ad  
negotia, Senatui Veneto fidus, Sfortiae carus,  
super pace aliquoties ultro citroque commearit.  
Apud eundem porro Chronographum Simonetam,  
pro Calisto Pontifice maximo pacificator Nicolaus  
habetur: eum priore negotiatione, pacem, cui pa-  
lam studere videretur, secreto impedisse, dictitan-  
tem, in periculo fore res Romanas quandocunq;

Insubria



Insubria otium habere coepisset. Quas quidem ego varietates retuli, vt appareret, in magnis paruilq; rebus id quod aliâs etiam monere non destitimus: quàm fallax & fluxa scilicet haec sit memoria veteris aevi, quippe cùm ad proximas etiam temporibus suis aetates hallucinetur historia, & pro luce quam pollicita est, tenebras negotijs authoribusque negotiorum offundat. Pace cum Veneris facta, refectoque Populo Mediolanensi ex peste simul & fame, decesserat publicis quoque rebus, & vniuersae Metropoli status infelix, quem per mala illa inuectum, statim vbi coeperamus exuere, detinuerant & aggrauarant mota repente in hostem hunc arma. Reperio in Bossianis annalibus, Turcam hoc tempore, postquam aliquot castella Genuesium repentina impressione occupasset, vrbem quoque Albam inuasisse: caesos fusosque barbaros ab Ioanne Caruagiala Franciscano, qui coactum aduersus Mahometana arma priuato consilio militem nota Crucis armarit inuicemque, & similem miraculi victoriam reportarit. Pontificem Maximum, eius victoriae diem, qui D. Sixto Sacer dies esset, insignem fecisse maiore celebritate mysterij illius, cùm Christus liberator humanos suos vultus in diuinos repente splendores figurasset atque induisset. Id referri pertinebat ad nostrum hoc opus, vt quoniam dicata Sancto Pontifici Aedes Mediolani visitur, eiusque memoria nominis ibi celebratur ad viij. Idus Sextileis, sciretur etiam, quænam causa fuisset alterius  
confe-

conferendae celebritatis in hunc diem. In iisdem  
erat annalibus: Iubilaeum hoc tempore in Franci-  
scana Aede fuisse Mediolani, & tanta vndique  
peregrinorum multitudinem confluisse illuc, ut  
in turba quidam eliderentur. Ad centum millia  
conuenisse tradunt praeter indigenam Urbis popu-  
lum: in ipso aditu Templi quindecim ingruente  
multitudine esse obtritatos atque exanimatos. Hoc  
etiam tempus illud fuit, quo Principis animum  
mouit Numen, ut sub Nosocomij siue Hospitij  
nomine publicam domum institueret aperiretque  
curandis & alendis vtriusque sexus mortalibus,  
quos morbus & egestas id petere subsidium coegis-  
sent. Namque, per eos annos, cum lues & pesti-  
lencia prius, deinde frugum, ob desertos agros,  
inopia, vastarent affligerentque urbem, debuit  
multorum adspectus esse miserabilis, qui per com-  
pita omnia absque vlla humana ope & solatio  
quiritantes aut insepulti iacerent etiam in illa im-  
peritantium cura & benignitate, quae declarata  
est. Eam speciem, idque deformis spectaculum  
haud sine magno misericordiae sensu insedis-  
se Principis animo credibile est, inde consilium ortum  
aperiendi Xenodochij, ubi lares, ubi tecta destitu-  
tis, & altera quasi patria esset. Neque dubitaue-  
rim ego affirmare praecipuas in eo consilio fuisse  
Archiepiscopi Sfortiae partes, qui Pontificij sui  
muneris cura, ob tale spectaculum, speculatiue  
memoriam anxius, fratrem hominem militarent  
altioribus imperij curis intentum ad pastoralia haec  
inuitarit.

inuitarit. Dimensâ & assignatâ in id opus areâ iuxta D. Nazarij aedem, in veteris arcis sede, primus lapis positus est Id. Aprilis an. sal. millesimo quadringentesimo quinquagesimo tertio, quem tamen, & mensem, & annum, vt pleraq; alia variare, incuria, siue licentia scribentium potuit, etiam vbi recens memoria nullum solitae excusationi locum dabat. Extructis aedibus tanta celeritate, quantam adhiberi par fuit, vbi sacris simul & profanis opibus agebatur res, & vbi pars vtraque contendebat, vt Mediolanenses primo quoque tempore subsidium illud ornamentumque haberent, reliqua erat cura, vt praeter vectigalia & fundos qui destinati statim in hunc vsum, assignatique essent, contribuerentur opes idoneae, alendo & curando quicquid aegrotantium mendicorum illuc affluxisset. Debuit namque crescere & augeri principum animus vnâ cum operis mole, vt Metropoli vrbi-que, & nomini Ambrosiano, opulentia & magnitudine responderet. Valetudinaria, Mediolani, atque etiam extra urbem pleraque alia erant non paruis instructa fructibus & emolumentis iam inde à Bernaboue Vicecomite, qui praeter curandos alendosq; aegrotos, onera haec addidit. Certa cum dote certum ad numerum collocare in matrimonio pauperes puellas, quarum honestati discrimen immineret. Statis diebus diuidere panem ex aliquot tritici modijs. Facere quaedam anniuersaria sacra Manibus mortuorum expiandis. Benigne facere captiuis pauperibus & cibaria mittere, prout  
egentissimi

egentissimi quique in vinculis haberentur. Haec onera Xenodochijs iniuncta veteribus à Vicecomite fuerant, cum vectigalia & fundos iisdem assignaret. Assignauerat autem Xenodochio D. Ambrosij, quod Broliense Xenodochium hodie nuncupatur: Xenodochio Diuae Catharinae, & D. Antonij Xenodochio, & cuncta exemerat oneribus publicis, ne quid inde in Fiscum aerariumue exigereetur, ne hyberna vel aestiua militibus praestarent. Quae postea munera & immunitates Eugenius Pontifex Maximus, rogatu Decurionum vrbis, dato in id diplomate esse ratas iussit anno salutis millesimo quadringentesimo trigesimo quinto, sicuti quidem clausula diplomatis praefert. Post annum inde tertium decimum Henricus Scottus Cardinalis Archiepiscopus Mediolani, & Apostolicus idem legatus, fauens Decurionum eorundem precibus & piaae voluntati, dederat etiam leges & instituta, quae Xenodochia illa regerentur, & constituerat hospiralem quandam disciplinam, cuius deinde disciplinae quarumue legum & institutorum Nicolaus V. Pontifex Maximus author est factus, isque cuncta sanxit authoritate sua & firmavit. Eae leges & instituta, summaque disciplinae eius ab Archiepiscopo Henrico perscripta, à Pontifice Nicolao confirmata, totam Xenodochiorum administrationem, & regimen dabant Archiepiscopo, qui Mediolanensem Ecclesiam per tempora obtineret, idque praecipue sanciebatur, ut Archiepiscopus ipse per tempora deligeret ex

nobilitate quaternos vicanos, qui praecessent No-  
 focomio, cunctaque administrarent. Vestigalia,  
 & praedia, aedificiaque omnia, quae Princeps Ber-  
 nabos Nosocomio donarat, aureorum nummum  
 ad viginti quinque millia annua efficiebant, quae  
 summa amplior aliquanto maiorque tunc debuit  
 esse, quam nunc hic prae se ferat titulus postquam  
 lasciuia temporum effecit vt etiam aurum vilesce-  
 ret. Ad eam summam, donationemque Viceco-  
 mitis accesserant legata priuatorum & quotidianae  
 largitiones: & sedulitate praefectorum, ex annuis  
 redditibus incrementa nonnulla cesserant in annuos  
 alios redditus, dum fortasse, sicuti praepostera non-  
 nunquam amat cura, patrimonio amplificando  
 magis quam caritatis & iustitiae legibus consulitur.  
 Sfortiae fratres, Archiepiscopus nempe Carolus,  
 & Dux Franciscus, pulchrum existimauere, si dis-  
 persa & dissipata illa ex pluribus hinc inde noso-  
 comijs cogerent in vnā sedem, regimenque no-  
 uum & aptiora temporibus instituta adhiberent.  
 Id fore aptissimum constituendo valetudinario,  
 quod publica pauperum omnium domus esset,  
 quod vrbe Metropolitique dignum munus erga  
 Christi liberatoris viscera illa & curam. Petijt à  
 Pio II. Pontifice Max. Dux Franciscus, vt noso-  
 comia, quae Mediolani, quaeue extra urbem,  
 essent, autoritate Apostolica contribuerentur in  
 vnum corpus vnāque sedem, sub Magni Hos-  
 pitalis nomine, quod paulò antea coeptum aedi-  
 ficari iam prope ad tectum fastigiumque perductum  
 esset.

esset. Recenti urbis clade, cum morbus & fames depopularentur Metropolim, repertam esse inuitalem veterem illam dispersi Nosocomij formam, quae plus afferret incommodi, nec satis apte regeretur. Processura omnia melius vtiliusque, si corpus caputque vnum fieret, vnde in caetera regimen, vbi lares, & communium alimentorum domus. Petijt simul, vt quo iure, quaque conditione, quibusue legibus vetera Nosocomia steterent, id ius, & ea conditio, & eae leges transferrentur in nouam hanc formulam nouumque regimen, & vt rata essent, si quae deinceps in constituenda noua familia, demi, mutari, addiue, praesens conditio rerum, aut hominum, aut denique temporum postulare. Et quoniam vnus integri magnique populi domicilium id futurum erat, petebatur, vt esset ei domicilio ius omne sacrorum animis quoque procurandis & adorando Numini: sepulcra, sacella, parochos, aras, aedituos, vt ibi haberi liceret, petebatur. Indulxit atque concessit cuncta Pontifex Maximus cum ea praefatione & clausula, vt sacri & inuiolati soli sedes illa Hospitalis in potestate Archiepiscopi esset, isque administratores & praefectos ex nominatione ciuium daret. Contributis in vnum Xenodochijs, corporeque vno facto sic & constituto, creuere opes paulatim in eam amplitudinem, quae fortunae principalis instar sufficiat hodie magnificentiae ac liberalitati Domus, quae in tanta urbis frequentia, tantoque ad Metropolim hanc ex alijs urbibus concursu

concurſu , & in tantis infeliciũ hominum neceſſitatibus , nihil miſerabile apparere oculis finit . Inuitatus magnitudine operis Paulus III. Pont. Max. attribuit huic Mediolanenſi Xenodochio Sacerdotium amplum , quae Abbatia Sexti nuncupatur , ex pago , cui nomen id circa Verbanĩ lacus initia : Nec multo deinde poſt Pius IV. etiam , largiore erga Patriae ſuae gloriam animo , praedia Mirabundi & praedia Ganae ( Abbatiarum item ea ſunt vocabula ) conceſſit . Ea conficiunt hodie vicena millia nummũ aureorum in ſingulos annos . Cenſus vniuerſus annuus ſexaginta millium explet ſummam : amplius centena millia neceſſarijs vſibus inſumuntur : tantam eam lacunam explent collationes piorum , ſiue qui magnitudinem ſumptuum intuentes congerunt illuc ſtipem , ſiue qui damna occulta rependunt . Forma regimenque negotij totius ; eiufmodi eſt , vt quemadmodum ex pluribus olim Xenodochijs in vnam hanc ſedem coaluerat res , ita ex hac ſede in plura rurfus Xenodochia , tamquam in membra redeat , ac diuidatur : his neceſſaria quotidie ſuppeditantur : illic arbitrium & ſumma rerum manet . Quot ſibi gignit admittitue calamitates hominum vita , quotque caſus & ludibria pati poteſt humanum cõpus , tot fere ſubſidia , totue domus aduerſus ea mala conſtitutae ſunt ex hõſpita hac magna domo : cũ aegrotantium , & conualeſcentium , & aſſidue morientium , & vagientium etiam in cunis ipſa ſit domus . Sed ad D. Celfi velut in ſuo teſto lactantur  
infantes ,



infantes, in quos nulla alia cura parentum fuit  
praeterquam procreandi & exponendi. Ibidem, †  
aluntur educanturque puellae ad nubile usque  
annos: postquam adolevere, maritantur. Si ma-  
trimonium odere, non desunt honesta munera, quae  
occupentur: & domi virgines consenescent.  
Transmittitur grandiuscula puerorum aetas ad D.  
Dionisij, ibique primis literulis, & necessarijs ad  
usum Reip. artibus instruuntur. Si quos foeda  
capitis scabies turparit, his ad D. Lazari stant sua  
domicilia separatim. Qui aquae intercutis morbo  
tumere, decumbunt ad D. Ambrosij. Qui contra-  
xere Gallicam luem, ad D. Stephani curantur.  
Ad D. Simpliciani insanabilium est domus: ad D.  
Vincentij sunt cubilia & saepe miserrimis morta-  
lium, quibus accidit ultimum malorum ut è pote-  
state mentis exirent. Videor humile quiddam &  
supperuacaneum fortasse facturus, si referam quo-  
tidiana etiam instituta, quibus haec non ultima  
pars publicae rei continetur & administratur.  
Sed quaedam religio tenet animum meum, ne hi-  
storica hac cura indigna esse censeam ea, quae  
Pontifices principesque nostri tractauerunt atque  
comprobarunt, literisque etiam & edictis & aucto-  
ritate publica sanxere. Et sicut alibi praefatus  
sum, nihil est hodie tam vulgatum & manifestum,  
quin obscurari possit ac vanescere nisi custodia haec  
literarum accedat. Fortasse etiam exteri homines  
cognoscere auebunt haec ipsa, neque piguerit ex-  
ternis scripsisse, si fastidita nostratibus erunt. Iam  
primum

primùm igitur, vbi tempus aduenit eligendi nobiles viros, qui rem vniuersam hospitalem administrare debeant, conueniunt Decuriones vrbis, atque vnà cum piorum locorum administratoribus nominant ex nobilitate sex & triginta spectatae probitatis viros cum ea descriptione & aequabilitate, vt ex singulis vrbis regionibus senos assumant. Et vocabula piorum locorum, siue sodalitatum, quibus ad nominationem eam ius est commune cum Decurionibus vrbis, haec sunt. Misericordiae sodalitium: Sodalitium Caritatis: Sodalitium Pietatis: Quatuor quoque Mariarum, & Diuinitatis, & Humilitatis nota & benefica vrbi loca siue conuentus, authoritatem testimoniumque suum negotio inferunt, nec aliter fieri nominationem oportet. Postquam Praefecti Conuentuum horum coniuncti cum Decurionibus vrbis nominauere triginta sex illos, quos esse regimini aptos credant, tunc è singulis conuentibus delecti bini descripta nomina tradunt Archiepiscopo, idque post diem, quem Ecclesia celesti ad Virginem Nuntio sacrum colit. Inspecrà schedulâ consideratisque nominibus, Archiepiscopus eligit ex vniuerso numero duodecim, itaut, ex vnaquaque vrbis regione sint bini; sex alij retinentur ex veteribus Praefectis, qui notitia & vsu negotiorum imbuti, de omnibus rebus erudire novos possint. Hic orbis in singulos annos voluitur: nisi biennio interiecto refici neminem licet. Et quò plus authoritatis concilio adsit, additur semper octodecim hisce Praefectis dominatus

natus alterius nutu decimus nonus, quem participem  
 & arbitrum rerum omnium statuendarum esse oporteat: iusseratque id Pontifex ipse Maximus, cum  
 Sfortiae rogatu, Xenodochia omnia, sicuti memorauimus, contribueret in hanc sedem. Kalendae Maij  
 praefecturae ineundae sollemnes sunt. Eâ initâ,  
 principio consiliorum actionumque omnium, statuto die congregantur in ipsius Xenodochij templum Praefecti cum domesticis Sacerdotibus &  
 ministerio toto, fitque res diuina cum ea precatione, ut cuius rei causa vocati diuinitus electique sint, eam rem sancte integreque, & laudabiliter administrare queant absque vlllo sensu, qui  
 flectere ab diuinae gloriae & publicae vtilitatis cura animum possit. Adorato sic Numine, & quaesito Sancti Spiritus auxilio, faciunt è suo corpore Praesidem vnum, qui concilij sit vniuersi caput & author. Creando Praesidi ordo hic seruatur, ut in singula paria Praefectorum circumagatur  
 is Magistratus: spatium ei Magistratui bimensis fiet: ab altero ex Orientalis Portae duobus inchocatur: per Portas deinceps alias ad eundem modum  
 eat vsque ad Nouae postremos binos. Munera Praesidis & eius officij leges scriptae in hunc modum extant. Accedito quotidie statis alienisque  
 „ horis, & inspicito cuncta, & recognoscito, & lustrato. Causarum, controuersiarum, litium, statum  
 „ momentaque & progressus audito: cum patronis  
 „ & iudicibus agito: exponito Collegis omnia quae  
 „ egerit, quacue statuerit agenda esse, ne pauperum

„res, & Christi patrimonium per eas lites & contro-  
„uersas detrimenti quicquam patiat. Decreta,  
„quae de vnaquaque re in conuentu facta erunt,  
„vt per scribas in acta referantur, operam dato.  
„Si quid in alicuius rei deliberatione sententia  
„plurium improbarit, eius quoque custodiri me-  
„moriam iubeto, vt Praefecti futuri sciant quid  
„aliquando prioribus non placuerit, quidue inu-  
„tile aliquando repertum sit. Coemptionum,  
„factarum pretijs erogandis ipse adesto: nomina  
„vicissim pecuniaeque omneis vt ad diem exi-  
„gantur curato: Accepti tabulas & expensi men-  
„struas inspicio, & subsignato. Aegrotos in  
„Nosocomia alia diuidito prout apta cuiusque  
„calamitati domus erit. Neminem autem retine-  
„to domi, nisi cuius sanabile esse malum medici  
„pronuntiarint. Haec omnia prouidenda sunt  
„& curanda ei, qui Collegarum suffragio Praeses  
„appellatus erit. Collegae ipsi communiter inter se  
„negotia prouinciasque partiuntur, itaut bini, ter-  
„niue, quaterniue etiam in vnius rei curationem in-  
„cumbant, & rursus onera complura in singulos  
„inclinentur, prout, velabilitas ipsis, vel pondus  
„& magnitudo rerum administrandarum habebitur.  
„Cum exsequi caetera in hunc modum pararem,  
„reperi edita in vulgus omnia, curamque superua-  
„caneam esse meam hanc putaui: atque ideo relicto  
„valetudinario hoc negotio, magnos Urbis & Reip.  
„casus exsequi pergam. Franciscus Sfortia multis egre-  
„gijs rebus gestis, magno populi Mediolanensi dolore  
„moritur

moritur anno salutis millesimo quadagesimo sexto:  
nec diu marito superstes vxor fuit. De ea muliere  
sic tradunt. Appropinquantem extremis, cum,  
sancte religioſeque vixiſſet, peruerſa medicorum  
adulatione contempſiſſe primò aegritudinem eam,  
& nullam Eccleſiae myſteriorum ad expiandum  
animum habuiſſe cogitationem. Cum morbus  
quotidie magis ingraueſceret, amicique & proxi-  
mi, pari erga morientem adulatione, ſalubria  
omnia eſſe affirmarent, acceſſiſſe Michaelẽ Carca-  
num ex Franciſcanorum Ordine, ac ſeuere denun-  
tiauſſe, quemadmodum finis ei properus inſtaret;  
eſſetque poſtridie moritura. Proinde conſuleret  
animae ſaluti, & amiſſa mortalis vitae ſpe, ſempi-  
ternam alteram meditaretur. Tunc eam, increpita  
adulantium amicorum leuitate, protinuſque abdi-  
cata omni rerum humanarum cura procuraiſſe di-  
uinis myſterijs animum, & cum magna ſignificatio-  
ne pietatis expiraſſe. Non abſuit veneni ſuſpicio,  
& quidam Galeatii filij ſcelus ſuſpectauere. Ca-  
daver eius in D. Gottheardi Aede collocatum,  
biduo poſt in Templum maximum effertur, com-  
poniturque ibi tumulo eodem, qui Franciſci Sfor-  
tiae oſſa contegebat. Fuit eximiae religionis mu-  
lier, duoque inclyta Tempa, D. Mariae Virgini  
Coronatae alterum, alterum D. Agneti Martyri  
poſuit virilis animi eadem, & regendis populis  
apta, vnde initia ſuſpicionum, & cum filio diſſi-  
dium, inſidiaeque demum in matrem ortae cre-  
duntur. Inter haec principum funera, Carolus

etiam Archiepiscopus mortuus erat, & in Deiparae Aede sepultus, quam Aedem à Blanca Maria fratris vxore constructam ipse consecrarat. Archiepiscopum hunc Carolum annales alij appellare Gabrielem malunt, quod illi nomen inditum fuerit, cum in Augustinianos Eremitas, sicuti memorauimus, reciperetur. Nos natale nomen retinendum esse putauimus ideo quia in Francisci Sfortiae literis, quas ad fratrem Archiepiscopum ipse perscriberet, reperimus id non esse mutatum. Successerat huic, siue Carolo, siue Gabrieli, Carolus alter Foroliuiensis, quem Calixtus III. Pontifex Max. ex Celsiani Monasterij Abbate, ob literarum & prudentiae laudem Populo Mediolanensi Pontificem dedit, vt famae quae secuta Sfortiam erat, nouus Archiepiscopus, nominis, & vitae dignitate responderet. Sed breue Pontificatus spatium huic fuit. Stephanus Nardinus ab Paulo II. successor datus, in tertium vsque & vigesimum annum Pontificatum extendit, vnde & maior ei fama, cursusque rerum, & viuendi spatio plus etiam honoris venit. Namque ab Sisto IV. Cardinalis factus, auctusque Sacerdotijs, munificentiae instrumenta large habuit erga ciues, & erga Metropolitim, quae publicis operibus ab eo exornata memoriam ipsius inter Nominis Ambrosiani conditores alios parentesque conseruat. Extruxit ad D. Pauli compitum aedes, eamque iuri inter Ecclesiasticos homines dicundo aperuit sedem. Alias extra Portam Tonsam aedes vnà cum hortis emittit  
quae

quae Archiepiscopo Mediolanensi suburbanum essent. Condedit Romae Collegium, eiusque dispensationem & ius omne legauit eidem Archiepiscopo, ut eius nutu arbitrioque pauperes adolescentes erudiendi literis illuc admitterentur. Collegium Nardinum hodie nuncupatur ex cognomine fundatoris, manetque ius Archiepiscopo Mediolanensi quemadmodum Cardinalis ille voluerat. Multum pretiosae vestis idem ad sacra facienda, conchiliatosque tapetes, & aurea textilia Templo maximo donauit: detrita quidem usu & obsoleta prope iam omnia, sed titulus & gratia largitoris aeternum durat. Rituum quoque sacrorum instaurator idem fuit, cum in Ecclesiae caeremonijs magna labes facta esset ob superiorum temporum incommoda, quae demonstraui: & anniuersarias tridui supplicationes ab Archiepiscopo Lazaro sanctae memoriae viro olim institutas renouauit, postquam pia illa consuetudo, absumptis etiam supplicationum ipsarum codicibus, intermitti coepta erat. Archiepiscopus hic Cardinalisque Nardinus Mediolani sedebat, cum Galeacius Sfortia Francisci F. extincto patre, imperium urbis, quod ille virtute partum amplificarat, regebat dispari animo, ut mox una cum vita infelicissime amitteret. Neque erit alienum explicare, quae vita, qui mores fuerint huic Principi, quandoquidem nimis notum hoc manifestumque est, omnem Reipub. formam, atque conditionem ex eorum semper moribus & animi conditione pendere suspensam, qui profana



profana moderantur ac tenent. Sic saepe, & iustus pudicusque Princeps florentem in Vrbe nostra Pontificatum dedit, & afflictæ Pontificum res ad flagitia referri Principum potuere. Fuit Galeacius hic intemperanter ac misere deditus libidini, quæ multas illustres domos dehonestabat, alliciendo feminarum alias ipsa principatus vi, specieque, cui per dedecus etiam suum gratificari nobilitas aliquando amat, alijs flagitij mercedem offerendo, quantam accepisse, ne ingenuæ quidem illiberale sibi fore arbitrantur. Sed illud nouæ cuiusdam ac penè furiosæ libidinis in hoc Principe fuit, quod feminas easdem, quas ipse stupro vel adulterio tenerasset, prostituere etiam libidini suorum, quod plus ignominiae domum referrent. Par huic intemperantiae crudelitas fuit, cuius exempla hæc traduntur. Clericus Mediolani quidam erat, prædicere futura assuetus; eiusque rei famam adeptus rerum aliquot euentu, quæ fortè ita acciderant sicut ipse vaticinatus fuisset. Hunc ad se accersitum Galeacius interrogat, quæ vitæ ac imperij spatia manere sibi adhuc putet. Vates enimvero nihil cunctatus vndecimum annum canit, eumque mensibus aliquot fore diminutum affirmat. Pretium vaticinio fuit, vt carcere clausum necaret fame cogeretque vti foedis alimentis donec exhaustum omni penitus humore corpus ea quoque denegauit. Alium quendam leuiter offensus inclusit in capsam, sepeli, tque viuum: exsecuit alijs genitalia: & alium, qui intra septa obuium forte leporem sustulerat,

subtulerat, mandere praedam eam, & solidum vorare animal coegit: eaque funesta ludibria fiebant hominum vitae. Sed & multae regiae artes erant ei: studia literarum, liberalitas in Aulae splendore, pietas in ornandis templis, & nisi lubrica aetas, facilisque ad offensionem animus lacefferetur, Mediolanenses sub eo Principe non pessime agebant. Trigesimum tertium aetatis annum ingrediebatur, cum viri nobiles coniuratione facta eum interfecere, casumque referemus etiam hoc ipsi notabilem quod inter sollennia augustissimi Sacri in Diui Stephani Protomartyris Aede Princeps interfectus est, & sacri homines immixti fuere negotio, quo rem vniuersam perturbari Mediolanensem illa aetas vidit. Cum igitur ille, sublata per dolum, sicuti creditum est, matre, disponendis imperij rebus vagatus aliquandiu per vrbes esset, constiterat forte Vigleuani: inde ad sollennia Christi natalium celebranda venire Mediolanum in animo habebat. Sed prodigia deterrebant: stellae crinitae sanguineus primò horror, deinde, intempesta nocte accensus intra cubiculum ignis, & interiore sensu ferebatur interdum eò ne Mediolanum veniret. Vrgente hora, quae, post euentum, vana interpretatione vulgi fatalem necessitatem habuisse credita est, itineri tradit sese, atque Mediolanum venire ad paratam sibi necem pergit. Postquam aliquantum viae processerat, foedum augurium supra caput apparuere treis corui crociantes, neque abscedentes vsquam, permotusque Princeps

Princeps etiam in augurium illud irâ, balistam proposcit, ac coepit vanos dirigere ictus in Coelum, quasi confixurus immundas aues & quicquid augurio illo portenderetur. Sustinuit inde equum abominans iter illud, ac retro vertebat cursum, nisi latens in occulto necessitas & fortuna coniuratorum, sicuti nonnulli credidere, pergere utique coegisset. Ita praeceps Mediolanum actus ipso D. Thomae peruigilio, primo statim aduentu ipse sibi funestum ac triste augurium fecit. Cum enim musicae artis homines magnis vndique stipendijs conductos haberet ad triginta, cohortem eam delicias fere suas festo Apostoli die iussit in pulla veste apparere sibi: eaque diuinatio quaedam insuper animi praesagientis habita est, quod musicis mandauit iisdem, ut arte sua modularentur hunc versiculum canerentque quotidie: **MARIA MATER GRATIAE MATER MISERICORDIAE TV NOS AB HOSTE PROTEGE ET HORA MORTIS SVSCIPE.**

Per haec sui finis praesagia Galeacius tendebat in funestum sibi diem, aliaque fecit etiam aut dixit quae cum fierent aut dicerentur, temerè accepta, ubi casus aduenit, cuncta illuc referebantur. Namque, ut Natalis Christi dies illuxit, summo mane, domesticum sacellum ingressus, quam religiosissime interfuit rei diuinae, eaque triplici litatione peracta, coepit in amicorum congressu extollere suae Domus fortunam, & opes, & quemadmodum

modum ea pluribus munimentis insisteret, parati-  
que in saccula heredes essent. Esse in Domo sex  
fratres egregiâ iuventâ, paruulosque filios, &  
foecunda matrimonia, qualia videns Franciscus  
pater summo opere laetaretur si tollere ab tumultu  
oculos, domumque conspiceret sic florentem pos-  
set. Ea cum dixisset destinatus neci Galeacius,  
epulatus deinde hilare prodijt in campum, accipit-  
rumque volatu sese oblectauit vt extremum illud  
frueretur vsura coeli. Die, qui Sancti Stephani  
memoriam recolebat, proditurus ad Protomartyris  
Aedem, thoraca poposcit, & cum allatum induis-  
set, abiecit, graue gestamen adspersus. Ante-  
cesserat Galeacij iussu domesticus Aedituus cum re-  
gali Sacrorum apparatu: rem diuinam Branda Ca-  
stelleoneus Episcopus Comi facturus erat. Is mis-  
so ad Principem nuntio, valetudinem, siue quip-  
piam aliud excusauit, quominus eum diem, idque  
munus obire posset. Princeps tamen nihil mutato  
consilio prodijt vti destinarat: annotatumque est  
in egressu non potuisse ipsum satiari osculando &  
amplectendo paruulos filios, quae ferme vaticina-  
tio vltimi digressus habetur. Egreditur ex Iouis  
arce turbato confusoque vultu, cingentibus latera  
duobus legatis, Ferrariense & Mantuano, quo-  
rum vterque Mediolani tunc apud Sfortiam age-  
bant. Cum ad Petram, quae Petra Innocentum  
dicitur, peruenissent, coniurati duo, Ioannes An-  
dreas, & Hieronymus, ad dextram ille Templi  
partem, hic ad sinistram, constitere, quae sitaque

specie tanquam summouere turbam vellent, propius ad principem accedere. Prior Andreas impetum facit, duosque lethales ictus direxit, in ventrem, vnum alterum in guttur. Mox Hieronymus addit vulnera, exanimemque aggressi caeteri singulis plagis affecere. Nulla vox morientis audita est, nisi quod Deiparam Virginem, bis terue inuocauit. Fit ad eum casum toto Templo tumultus & clamor. Parricidae, tentato nequicquam effugio, comprehensi & meritis supplicij affecti sunt. Andream Maurus quidam ex infimo Principis famulatu, in Templo ipso adeptus obtruncavit. Secta in partes corpora ad portas vr- bis abiecta ostentui: Andreae Lampugnani cadauer coeno lapidibusque incessantes pueri raptauere per urbem. Hieronymus egregia constantia finem suum nobilitauit. Namque sub carnificis manu, & carmina quaedam haud inconcinne est modulatus, & labantem sibi animum increpuit. Is etiam omnia coniurationis consilia casusque in eo negotio suos scriptis publicae literis intrepidus memorauit, earumque literarum sententia fuit huiusmodi. Reputantem sese libidines & scelera Galeacij Principis, ac de temporum calamitate cum Andrea Lampugnano saepe colloquentem, interficiendi illius coniurationem fecisse. Ac primò quidem, ambigua quaedam & suspensa verba de ea re iacentes, vt fiduciam vicissim indiderint animis, apertius mox atque liberius contulisse omnia, quae ad tanti facinoris exitum pertinerent. Assumpsisse

in

in consilij societatem Carolum etiam Vicecomitem praesentis animi virum, & magnopere infensum Galeacio ob quasdam cum Episcopo Comense lites, & rerum earum causa, quae res super Miramundi Abbatia, siue Sacerdotio in controuersiam vocabantur. Delectum fuisse patrandae neci sacrum illum D. Stephano diem, vel si eo die non successisset, quemlibet alium, prout occasio Principem opportunum dedisset. Iuratum inter ipsos fuisse sanctissimum iusiurandum, ut summa ope tegerent rem, auxilioque mutuo ad spiritum usque extremum ad eam exsequendam adessent. Quaerere sibi socios gerendae rei quosque possent, neque in eo parcerent pecuniae inuitamentisue ullis, quibus allici homines in pulcherrimi facinoris societatem possent. Fuisse Andreae Lampugnani aedes receptaculum sedemque coniurationi: ibi coetibus habitis consilia omnia disposita & agitata: incipiendae rei ac praeparandae ordinem hunc fuisse compositum, ut cum Princeps ipse Mediolanum venisset, oblati ei tribus aureorum millibus, ipsius autoritate, Sacerdotij Miramundi possessionem adirent. Per speciem eius adeundae possessionis, comparata armatorum manu tamquam aduersus Nouocomensem Episcopum qui cum lis & controuersia erat, auerterent omnem ab se suspicionem, & condictam facinori diem, operirentur. His ita constitutis, conuenisse in Ambrosianos hortos, velut animi gratia, atque ibi nouo inter se sacramento esse obligatos, ut qui

ipforum à coniurationis fide defciuiſſet, ſacrumeius  
caput infameque eſſet, eumque caeteri pro patriae  
„ hoſte haberent. Perſequens inde caetera, ſcriptum  
„ ita edidit. Ego, poſt firmatam in Ambroſianis  
„ hortis foederis fidem ingreſſus Aedem ipſam Am-  
„ broſianam, abieci me ad Sancti Pontificis effigiem,  
„ atq; ibi ſum precatus in hunc modum: Magne Pater  
„ Ambroſi columen vrbiſ huius, & ſpes, praefidiun-  
„ que Populi Mediolanenſis: ſi tibi cordi eſt id quod  
„ liberandae Patriae cauſa tui ciues alumnique in-  
„ gredimur, adſis propitio Numine ad magni facino-  
„ ris pericula caſuſque, per quos eundem eſt nobis,  
„ vt tyrannidem hinc, & impuritatem, & monſtra li-  
„ bidinum arceamus. Haec precatus, ad ſocios meos  
„ reuertor, iubeoque bono animo eſſe omneis, affir-  
„ mans factum eſſe me alacriorem poſteaquam Tu-  
„ telarem Vrbiſ in negotij partem aduocarim, idque  
„ laetiſſimi exitus vaticinum propono. Per aliquot  
„ inde dies exercebamur digladiando inter nos, & agi-  
„ litatem corporum imaginemq; periculi experiendo  
„ quod aditurieramus. Septimo ante Chriſti Natalem  
„ die, nouo & vltimo ſacramento fidem obſtrinxi-  
„ mus in ea quae conſtituta prius inter nos erant,  
„ hocque amplius addidimus, vt ſi contingeret, ali-  
„ quem noſtrum ante condictam diem in morbum  
„ incidere, vel comprehendi, caeteri nihilominus  
„ deſtinata exſequerentur. Ab hoc ſacramento ſcor-  
„ ſim egimus, aliuſque alio dilapſi ambulauimus per  
„ fora, per vias, eo conſilio, eaque arte vt ſi qui  
„ noſtros antea fortasſe coetus curioſe notaſſent,



„ijs etiam dissociati cerneremur, recordationemque  
 „illam ex hominum animis tolleremus. Vagati in  
 „hunc modum vrbe tota, & obuersati oculis eo-  
 „rum, quos nostrae societatis posse esse memores  
 „arbitraremur, ad sextam noctis horam, quae nox  
 „D. Stephani diem antecessit, congregamur tam-  
 „quam haud amplius futuri vnâ. In extremo illo  
 „conuentu p data rursus fide definiuimus quam ho-  
 „ram ingrediendi Templum obseruarem, quam-  
 „ue ibi quisque partem caperemus, aliaque mo-  
 „menta peragendae rei, prout in ipso temporis arti-  
 „culo multi fortuiti casus admonere possent.  
 „Summo mane Templum ingressi supplicauimus D.  
 „Stephano, vt pulcherrimo operi, quod in  
 „ipsum Aede patrandum foret, vellet adesse, neue  
 „indignaretur contaminari sua Tempia caedis eius  
 „sanguine, quae urbem & patriam hanc liberatura  
 „esset. In id composita praecatio erat à Carolo  
 „Vicecomite, quam recitauimus vnâ cum precibus  
 „alijs, sicuti descriptae in ritualibus libris extant  
 „Protomartyri inuocandò. Post eas preces  
 „interfuimus etiam rei Diuinae, qua peracta Ba-  
 „rengonem Archipresbyterum Basilicae illius ego  
 „appellaui vt mihi clauēs aedium suarum daret,  
 „quibus acceptis ego rursus abij domum meam, vt  
 „mox in Archipresbyteri aedes abderem me, atque  
 „ibi socios expectarem. Archipresbyter autem,  
 „Barengo, qui mihi clauēs dedit, neque quid par-  
 „rem interrogauit, neque antea fuerat in vlla parte  
 „consilij, nisi quod expostulantem aliquando me de  
 „condi-

„ conditione temporum audiuiſſet, & reſtringendo  
 „ humeros comprobare querimoniam erat viſus  
 „ Acceptis clauibus, & ordinatis domi meae quibus-  
 „ dam, Archipreſbyteri domum ingredior. Mecum  
 „ erant quatuor ſocij conſilij: Mox Andreas & Caro-  
 „ lus ingrediuntur. Cum ibi ante focum federemus,  
 „ ſenſimus venire Principem, ac protinus ingreſſi  
 „ Templum edidimus in eum exempla, quae medi-  
 „ ditati eramus, iacetque nunc ille rerum humana-  
 „ rum exemplum ob ſaeuitiam & libidines ſuas.  
 „ Interfecto Principe, & excitato tumultu, quantum  
 „ rei atrocitas potuit excitare, caeteri quidem con-  
 „ iurati comprehenſi ſunt aut interfecti: ego verò  
 „ elapſus ad paternas meas aedes aufugi. Saeuus  
 „ inhumanuſque pater, quia dixeram interfectum,  
 „ eſſe Principem, meque interfeſtoribus, non qui-  
 „ dem ſocium, ſed amicum fuiſſe addideram, oblitus  
 „ ingenitae erga filios caritatis, increpitum verbis  
 „ atrocibus expellit domo, vltimaque interminatur,  
 „ ſi ibi conſiſtere auſim. Tunc ego trepidus anxioſq;  
 „ proximo diuerticulo in Dominici Calcaterrae aedes  
 „ tranſgredior, atque ibi in ſummam aedium illarum  
 „ contignationem, tectum inter & laquearia perdu-  
 „ ctus à mulierculis & ancillis, quae fortem, meam  
 „ deſhebant, aliquandiu delitui. Mox, pater, &  
 „ Dominicus ipſe Calcaterra, vt comperere eſſe me  
 „ ibi abſconditum, exturbant inde, atque conuicijs  
 „ oneratum, ſuis ipſorum manibus interficiendum,  
 „ eſſe comminantur, ſi circum ea limina amplius de-  
 „ prehendar. At mater mea, Parocho noſtrae vici-  
 „ riae

„ niae accersito, rogat hominem, vt si quo pacto  
„ possit, abducatur me & seruet. Is allato confestim,  
„ ornatu, qui clericorum ad sacra ministeria quoti-  
„ dianus est, in ea veste me domum suam abducit,  
„ digrediturque ipse ad negotia sua, ac me domi  
„ solum relinquit. Ibi ego varijs sollicitudinibus  
„ aestuans, in animo habebam, proximae noctis si-  
„ lentio exsurgere, atque assumptis mecum aliquot  
„ idoneis hominibus vocare plebem ad diripiendas  
„ aedes Simonetae, Ioannis Botti, & Francisci Lu-  
„ cani, quos esse populo praecipue inuisos sciebam.  
„ Totâ hinc turbata & concitata ciuitate, consilium  
„ erat, spe dominationis ac libertatis erigere poten-  
„ tissimum quemque, ita rem facile fore effectam  
„ arbitrabar, cuius rei causâ ipsum interficiendi  
„ Principis facinus aggressi eramus. Postquam  
„ ea sententia stetit, coepi recensere animo om-  
„ neis, quos ad eam rem posse mihi esse adiuven-  
„ to arbitrarer, & Barengonem praesertim Ar-  
„ chipresbyterum sum scripto cohortatus, vt ca-  
„ pessere vnâ mecum liberandae Patriae gloriam  
„ vellet, propterea quod esse mihi auidus famae  
„ & diuitiarum videbatur. Sed cùm penetrarent  
„ in parochi domum ex via clamores eorum,  
„ qui Andreae Lampugnani lacerum corpus trahe-  
„ bant, perfusus horrore attonitusque steti, neque  
„ animus vltra mihi suppetebat. Auctus est mihi ter-  
„ ror, quia Parocho absente, venîre illuc satellites,  
„ & magno cum tumultu perscrutantes omnia, sus-  
„ pectam intutanque mihi latebram eam fecerunt, in  
„ qua

„ qua Parochus ipse me collocarat. Ex eo die, pa-  
 „ uens tremensque, & rerum omnium incertus, ad  
 „ diem vsque Sabbatum egi, eoque die, appetentibus  
 „ tenebris compositus in baiuli formam sublatâ in  
 „ humeros culcitram ad Philippi Marescotti aedes  
 „ processi, qui constringam faciebat. Inde minaciter  
 „ & contumeliose eiectus: errabundo magis quàm  
 „ destinato gressu ad Gabrielem Florenum deueni,  
 „ qui me humanissime acceptum abdidit in occultis-  
 „ simam tecti sui partem, atque ibi fui donec hora  
 „ mihi exitialis adueniret. Nunc sanctissima Dei  
 „ Mater, & te Princeps Bona, imploro, vt animae  
 „ meae salutem vestra clementia, & benignitate  
 „ respicere velitis, tantumque vigoris huic miserrimo  
 „ corpori relinquere, quantum necesse erit, vt pec-  
 „ cata mea rite confiteri possim. Haec sententia  
 „ literarum fuit, quas Heronymus ille nequicquam  
 „ profugus in tristissimo illo ac pleno desperationis  
 „ tempore scripsit Magistratum iussu, nullo tam  
 „ effusae confessionis pretio, nisi vt pie moriendi  
 „ facultatem impetraret. Caeterum, nos in referenda  
 „ huiusmodi literarum serie, barbariem quidem re-  
 „ mouimus eam, quae trepidantis in vltima necessi-  
 „ tate authoris fuit, subiecinus autem alia verba,  
 „ quae nihil immutarent sententiam, & historico  
 „ opere digna essent. Lacerum vulneribus corpus  
 „ Principis in vestibulo Templi collocatum est, eoque  
 „ Bona vxor babylonici operis vestem misit in qua  
 „ humari se Galeacius mandarât si quis etiam re-  
 „ pentinus casus ipsum abstulisset. Magnus hinc in  
 „ vrbe

Urbe tumultus erat, & Itali Principes interfecto Sfortia, suas quique spes agitabant. Pontifex Maximus, audita nece: hodie, inquit, Italia pacem amisimus. Adeo commota esse omnia apparebat. Mox tamen sedato per urbem tumultu, Galeacioque filio in Patris fortunam & nomen assumpto, factum est id quod in omni fere Principum mutatione fieri solet, ut nimirum de publico servitij conditione nihil mutaretur. Et exsequiae tam inuisi Principis omnium ordinum frequentia cohonestatae cum doloris etiam imitamentis; corpusque in templum maximum tumultu maiorum illatum. Ibi nouus Princeps coronatur nemine omnium repugnante, & quasi remunerans meritum ille multos ex nobilitate Mediolanensi equites appellauit: Venere Principum legati ad consolandum eum, ob casum Patris, ac Pontifex ipse Maximus in id legationem misit. Erat postea puer Sfortia sub tutoribus, quorum inter ipsos dissidia populum Mediolanensem affligere nouis cladibus sicuti memorabo: veteraque factionum certamina pars mihi Operis erunt. Erat inter tutores Bona Principis mater fauoratrix acerrima Gibellinorum aduersus Guelfos, quae prope iam oblitterata nomina muliebribus stimulis rursus excitabatur. Gibellinarum partium erat Cecus Simonetas tutorum vnus magnopere insensus Longhignae illi, quem Franciscus Sfortia praefecerat archiepiscopo, iusseratque ibi summam habere potestatem, omnium rerum. Hunc potentiae aemulum, &

M m m

alioqui

alioqui etiam inimicum exturbare Simoneta cum destina- ret, facile persuadet Bonae, vt deiecto eo: praefectus potius alius imponeretur arci, quod protinus factum discordiarum in vrbe molem con- ciuit, sacraque & profana id malum sensere. Si- moneta ipse Longhignanae vicissim artibus euerti- tur atque coniecitur in vincula plectiturque capite, quae magna clades Reipub. totius fuit, amisso custode ac defensore, qualis ille per omne tempus fuerat. Et traxit illius calamitas omneis, qui con- silijs ipsius aliquo modo permixti fuerant: vnde miserranda inter eas turbas Reipub. Mediolanensis solitudo, cum ij, qui soliti erant eam protegere ac tueri, circumuenti ipsi ab inimicis iacerent. Simo- netae finem tradi nostris literis postulant ingen- tia ipsius erga Urbem merita, & conspiratio atrox, qua vir tantus cecidit. Impositum ve- hiculo vnà cum fratre clarissimo viro Ticinum, asportauere quibus id negotij ab aduersa fac- tione mandatum erat. Ibi per aliquot dies saeu- custodia est habitus, donec tollendi hominis con- filia inirentur, omneque machinamentum in caput insontis perfidia inimicorum expediret. Postquam matura parataque omnia fuere, mittitur ab Me- diolano forense ministerium, empti iudices, testes- que falsi, & apta meditato facinori scribarum ma- nus: seriem quoque quaestionis, & responsa Rei meritura necem commenti vltro attulerant secum. Producto Simoneta & interrogato, species & for- ma iudicij effingitur: nec vltra dolis opus fuit.

Veneranda



Veneranda canitie senex, qui sanctae atque innocenter vixerat, cuius plurima & grauissima merita in Urbem Principatumque extabant: capite plectitur, corpusque tanti viri tamquam ob infandum scelus ostentui abiectum piorum cura sepelitur intra claustra Monasterij D. Apollinaris: eique funeri maximum ornamentum publica moestitia fuit, & querelae quamuis premerentur, passim tamen erumpebant in eos, quorum dolo Simone-  
ta euersus foret. Tempora non inerudita erant, ideoque carmina sunt addita tumulo, quorum author incertus, sententia haec fuit. Coecum Simonetam, ideo quia res Insu-  
brum iuste atque cum fide administraret, abscisso capite ibi esse sepultum. Sibi quidem Coeco nomen fuisse: caeterum, dum viueret, vidisse multa, quae caeteri non vidissent: & patriam ipso ablato coecam in posterum fore. Se quidem extinctum esse ob fidem: sed gloriam deberi nomini suo, quia maluerit vita carere quam fide. Post Simonetae huius finem, Ioannes frater magnae etiam ipse religionis vir, & praecipuum afflictis Reipub. rebus momentum in exilium pellitur. Archiepiscopum Mediolanensem hoc tempore reperio cum exercitu aduersus Sabaudiae Ducem exisse armatum eo consilio, vt Sabaudum exueret omni imperio idque totidem verbis Cor-  
rius tradit. Capta Vercellarum vrbe fusum ac fugatum refert. Id cuiusmodi sit explicare non possum. Quomodo enim haberet exercitum Archiepiscopus in aliena vrbe, manente Sfortiarum do-



minatu, amissa iampridem potentia quae Pontifices hosce, principum & Regum prope instar olim, armarat? Nisi si fortasse, Galeacio interfecto, pupillo dominante, inter rudimentum puerilis imperij, muliebremque tutelam Archiepiscopus quoque fuit in parte Principatus, & bella gessit alienis armis. Exarsit deinde aliud longe atrocius bellum, quo tota Italia perturbata est, profanisque simul & Ecclesiastici Principes in ea arma coorti perniciem sibi mutuam querebant. Ab vna parte Pont. Max. Venetique & Genuenses, ab altera Ferdinandus Caesar, Sfortiaque & Resp. Florentinorum sterit. Causa belli fuit, quod Veneti offensi varijs modis ab Estense, vlcisci iniurias voluere, totamque suâ irâ in partes Italiam diduxerunt. Pro Galeacio puero rem Mediolanensem Ludouicus patruus illius administrabat ab legato Ferrariam Ascanio fratre, qui deinde Cardinalis fuit. Post varias clades, pace cum Venetis facta, etiam inter Sfortias sublatae similitudines: Ascaniusque Mediolanum illustri fratris gratia reductus, cum ruptâ prius custodiâ sese ad Venetum hostem adiunxisset. Intestina simul & externa mala quieuisse videbantur: nec sane Mediolani floridior vnquam status omnium rerum: totque iam exhaustae calamitates felicitatis cumulo compensabantur. Principes omnium disciplinarum viri excitati magnitudine praemiorum vndique confluebant in hanc urbem. Latinae pariter & Graecae literae, velut sua in sede constiterant hîc, carmineque & soluta oratione

oratione genus vtrumque exercebatur, & super omnia, musici homines suauitate canendi coelestes choros praeferebant: ciuiliūque artium cultus etiam ad publice rei disciplinam redundabat, & valde iam erudita nobilitas Urbis maiestatem tuebatur. Nimirum, ex magna perturbatione ad summum euecta sic publica felicitas erat, vt more omnium humanarum rerum retro status ille volueretur, temporaque etiam funestiora redirent. Ac sicuti tranquillitate Reip. florentibusq; Principum rebus, Ecclesiae quoque securitas & florentissimae Pontificum res comprehensae fuerant, ita bella, rursus & publicae clades Metropoli vastitatem attulere. Quomodo rerum turbandarum initia sint exorta, memorabo prout temporum eorum monumenta prodidere. Ludouicus Sfortia Galeacij patruus, aetate Principis, & Tutoris iure sic abutebatur, vt nomen & vmbra Mediolanensis Imperij tantummodo penes Galeacium esset, vis & robur omne penes ipsum haberetur. Neque contentus eo vir alioqui magnus & iustus, adu- tum iam Principem redegerat in tantas angustias, vt etiam alimenta quotidiana ille desideraret. Isabella Alphonſi Neapolitani Regis filia, huic nupta Galeacio erat, femina ingentis animi, quae potius indignaretur, quod ex Regia in minorem domum enupſisset, quam vt in ea domo Imperium alterius pateretur aequo animo. Haec igitur minime ferens indignitates, quae ferendae erant, dum Patruī violentia rem in se vniuersam trahit, literas

X literas dedit ad Patrem Regem, quarum sententia fuit huiusmodi . Aliquot iam esse annos , cum Galeacio Sfortiae nupserit in eam spem, vt postquam ille adoleuisset , haberet maritus sui patris imperium , ipsaque Mediolani Ducis vxor diceretur , & viueret cum eo splendore , qui regia stirpe ortam deceret . Sed maritum quidem , & virum iam esse , & patrem : Imperium verò penes eum manere , qui tutoris & patruī vocabulo prenat indigno seruitio legitimum heredem vt ipse dominetur . Iam ed deuentum esse , vt etiam quotidiano cultui necessaria maligne suppeditentur : splendorem omnem in Patruī aulam commigrasse : inde leges , inde etiam responsa diuini iuris peti . Magistratus omnes eum mandare quibus velit , thesauros , & fiscum , & exercitus , & vitae necisque potestatem illius arbitrij facta : Galeacium veluti seruum in aliena domo cum vxore paruisque liberis degere . Quin etiam, Ludouicum hunc praesentī dominatione minime contentum in posteros etiam suos eandem velle transferre ac ne id cuiquam possit esse dubium , filium , quem nuper susceperit, Ticini Comitem destinari manifesta Imperij Mediolanensis praerogatiua . Puerperam , quae partum eum enixa sit , omnibus publice priuatimque cultam officijs , quae Reginam eam adulatione omnium facerent . Ad partus suos moueri neminem , tamquam si vernae nascerentur . Et in tantis iniurijs acerbissimum esse illud , quod insidiarum metu assidue trepidet animus , variaeque sollicitudinum

„dinum fortitiae semper obuerſentur; quales expo-  
 „ſtatio mortis afferre conſuevit. Non ſibi deſſe  
 „regios ſpiritus, & aptam dominationi indolem;  
 „ſtudia quoque populorum & fauorem aſſe; ſed  
 „caetera omnia reſpicere nutum arbitriumque illius  
 „cuius violentia opprimantur. Nunc te pater, in-  
 „quit, imploro, ut ſi quid erga me paterni ſenſus  
 „retines, ſi me tuo ſanguine ortam credis, ſortem  
 „hanc meam iniquam reſpicias, neque eſſe me ultra  
 „cum viro ſaevitiae alienae ludibrium ſinas. Adhuc  
 „ea ſpe ſuſtentati ſumus, quod fore tibi curae ſa-  
 „lutem noſtram crederemus: ſi ea ſpes nunc deſiciat:  
 „potius manu noſtra finem inueniemus, quam ut  
 „in perpetuo ſeruitio degamus vitam. Commoue-  
 „rant haec Alphonſi Regis animum, atque commu-  
 „nicatis inter ſe conſilijs Aragonenſes, lenibus prius  
 „experiri remedijs ſtatu-erunt, quam bellorum diſ-  
 „crimini committerent rem. Oratores duo Medio-  
 „lanum illico diſtinati, priuatim apud Aſcanium  
 „Cardinalem, in cuius manu & poteſtate res  
 „Metropolitana tunc poſitae erat, multa de Iſa-  
 „bellae querimonijs egerunt; publice apud Ludo-  
 „uicum haec diſſeruiſſe feruntur. Legati Regis Al-  
 „phonſi venimus ad te Ludouice Sfortia, primum  
 „ut gratias tibi ageremus, quod non prudenter at-  
 „que integre modo Mediolanenſe Imperium admi-  
 „niſtraueris, ſed maiestatem etiam eius, quae erat  
 „omnis amiſſa recuperaueris, ut Galeatio iam adul-  
 „to maius id auctiusque traderetur. Res Metro-  
 „politana conſtituta tuis conſilijs florentior nunc am-  
 „piorque

„ pliorque est quàm olim fuit . Ciuium rerum  
 „ status fruitur alta pace , & pars vtraque alterius  
 „ vicissim ope sustentatur ac floret . Externa quo-  
 „ que & longinqua composuisti . Heluctios do-  
 „ muisti : Estensem ab Venetorum iniuria cona-  
 „ tibusque defendisti : Genuenses coegisti quietem  
 „ optare sub imperio , quod prius abnuebant :  
 „ Catharinam Sfortiam in patriae fortunae sedem  
 „ restituisi : Ascanium fratrem splendore pruden-  
 „ tiaque tua produxisti ad sacrum honorem , qui  
 „ Maieitati Regum equiparatur . Tot templa à  
 „ fundamentis erecta testantur pietatem liberali-  
 „ tatemque tuam , alioque omni vrbis ornatu &  
 „ magnificentia publicorum operum veteres Ro-  
 „ manos aequasti . Atque vt Sfortiarum nomen  
 „ & fama per omnes terras cum immortalis gloria  
 „ propagaretur , ad tuendum Christi Liberatoris  
 „ tumulum trecena millia nummum aureorum attri-  
 „ buisti religiosi hominibus , qui ibi inter barbaros  
 „ degunt . Verè aestimantibus , conditor Imperij Me-  
 „ diolanensis , & Sfortiacae familiae princeps ac pa-  
 „ rens in omne deinceps aeuum nuncupabere qui  
 „ tam gloriose ac praeclare tutelam gesseris . Sed ita  
 „ demum gloria lausque consequetur istam Imperij  
 „ administrationem & isthaec inclyta facta , si extre-  
 „ ma illa ignominia aberit , vt denegatum esse depo-  
 „ situm dicatur , sicuti quidem adhuc legitimi heredis  
 „ querela est . Iam Galeacius robustis viribus animi  
 „ corporisq; adoleuit , & queritur sub tutore adhuc  
 „ se esse , neque tam ob dominandi cupidinem regio  
 animo

” animo infitam , quàm verecundiâ famae si deesse ei  
” regium animum mentemq; paternae hereditatis ca-  
” pacem arbitrari homines possint . Iam enim ea opi-  
” nio multorum animis insedit ex eo , quod natu gran-  
” dem in nulla parte dominationis vident . Non  
” beneuolentia tua paternaue cura , sed tarditate  
” illius id fieri existimant . Quamobrem à te petit  
” Rex , vt tradere iuueni imperium velis , lubricum-  
” que aetatis illius corrigere si qua in re labantem  
” videbis . Id profecto gloriosius tibi erit , quàm  
” imperium ipsum tenuisse , meritoque Lycurgum  
” populi Mediolanensis ob inclytam iustitiam fama  
” te omnis feret . Ludouicus audita legatione ,  
pauca magis in speciem composita & adornata  
respondit , quàm de tradendo imperio quicquam  
in animo habebat , coeperatque statim parare om-  
nia , quae ad bellum haud dubie imminens pertine-  
rent . Et auxerat illi animos magna fortè spes orta  
Pontificis maximi obitu , cùm ei successorem Ascan-  
nium Sfortiani Cardinalem fama destinaret , quae  
circa magnum illud diuinæ prouidentiae arcanum  
tumultuari suis consilijs atque ineptire amat . Si  
consentanea sermonibus hominum esset res , crea-  
returque Sfortia Pont. Max. haud dubitare Ludo-  
uicus , quin opes habiturus esset tantas , quantas  
necesse esset habere , vt sese tueri aduersus Regem  
posset . Diuisa studia erant inter Ascanium hunc ,  
& Cardinalem alium , qui Calixti fratris F. & treis  
deinde alios Pontifices Maximos varia fortuna  
emensus , omnium Romanarum rerum vsu peritus

X callidusque erat. Is, vt aemulum Sfortiam amoueret, offert ei grandem pecuniae summam, opulentum praeterea Vicecancellariae munus, & magna quaedam alia pretia quiescendi. Sfortia quoque non incallidus erat: ac videns inparem se aemulo ad suffragiorum numerum fore, statuit accipere quae offerebantur & donare, quod erat amissurus. Scilicet opes easdem fore sibi adiumento, quandoque vacua rursus Sede competitorum alium nancisceretur, qui gratiae vel potentiae minus haberet. Ita diuinum negotium tractans humanis consilijs, omissa nunc spe atque negotiatione omni, fauorem partesque suas ultro ad Cardinalem Borgiam inclinat, in quem studia Patrum ferebantur. Mox tamen subiecit animos, Hispani generis esse hominem, damnumque Italici nominis fore, si Romanae opes in id genus translatae essent. Subita mutatione voluntatum alienatis omnibus, in Sfortiam rursus, vel in quemuis alium ibatur. Borgia enimvero circumire, prensare singulos, polliceri quae cuiusque animo esse aptissima existimaret: ac Sfortiae ante alios ipsi supplex obtestabatur, ne se ab summa spe praecipitem daret cuerteretque. Superatis in hunc modum difficultatibus, Borgia Princeps Sacrorum appellatur, nouoque nomine Alexandrum VI. nuncupauere Patres, ignari, quem ille animum sub eo magno nomine occultaret. Et Ascanius quidem Sfortia Cardinalis, Ludouicusque frater ex magna spe depulsi in hunc modum erant. Bellum, quod vrbis Reipubli-



Reipublicaeq; statum Mediolorum turbaturum erat, ab hoste Rege summa vi apparabatur. Erat Neapoli Alexander Sfortia Ludouici frater ex pellice natus, & profugus ob dissidia cum fratre dominante metumque potentiae illius. Is ab hoste benigne acceptus in parte consiliorum habebatur, instigator simul & instrumentum gerendi belli, docebatque immunita & incustodita omnia sic esse Mediolorum, vt bellum haberi pro confecto posset. Statim vbi Neapolitana signa conspecta essent, concursus ad Regem fore maximos: nobilitatem vniuersam & sacros homines, quae sit pars non spernenda Ciuitatis, pro iuvene Galeacio contra Ludouicum impigre omnia exsecuturos. Adeò, & odisse violentiam huius, & afflicto ac prodito illi fauere. Gnara cuncta Ludouico erant & sua sponte suspicanti quid pararetur, & exploratoribus subinde indicantibus quicquid odorari siue expiscari poterant. Itaque, cum maiorem aliquantò expectaret molem belli, quam quantam sustinere se posse consideret, Gallica in Italiam excire arma pessimo consilio decreuit. Ea postquam stetit sententia, dat literas ad Carolum Galliae Regem, & congruentia literis mandata suo apud eum Oratori, quibus ille permotus haud cunctanter capeffit bellum. Tracto in partes Gallo Ludouicus, ad maiorem aliam curam adiecit animum, vt Maximiliani Caesaris autoritate Mediolorum Dux appellaretur, Erasmusque scribam suum intimum in id legauit. Quò facilius impetraret à

Caesare id quod volebat, Blancam Mariam fratris sui filiam in matrimonium ei offert. Accepta conditione, & inito Caesarem inter & Sfortiam foedere, Ludouicus Mediolani Dux appellatur, Gallicaque arma superfundebantur Italiae rebus allatura vastitatem Vrbi, quanta vix antea fuisset vnquam, siue post futura videretur. Anno millesimo nonagesimo quarto supra quadringentesimum, Carolus Galliae Rex magno exercitu Ticinum venit, ac prima ea calamitas Reipub. Mediolanensis fuit, quòd Sfortia, vt Gallo gratificaretur, eiusque animum sibi conciliaret, matronas aliquot gratissimum iuueni munus misit, ac fama fuit, pulcherrimas earum stupro cognitae regi: vnde illustrium domorum nota, magnumque dehonestamentum, donec sermones hominum consenescerent, & aliquibus memoria dedecoris in longum mansit. Id ego à scriptoribus eorum temporum relatum omittere non debui, ne viderer sedulo occultare quicquid aliquando accidisse nollemus, vnde fides abrogaretur mihi quoties honesta & gloriosa memorarem. Et alioqui memoria calamitatis in patriae annalibus extabat, quàm exprobrare non possunt vrbium aliarum ciues in ipsorum reperturi monumentis etiam maiora flagitia, quae licentia dominantium, cladesue bellorum inuexerint. Galeacius interim lenta correptus febri decumbebat haud sine occulta suspitione, subesse patruum dolum, & paulò post in mortui corpore signa veneni apparuerunt. Sed Ludouicus ipse auerten-

auertendae suspitioni, omnibus erga supremam illius memoriam officijs fungitur, exsequiasque celebrari quamapparatissime iubet, quas ipse cohonestauit, & in funebri veste pauperum agmen traxit secum. Ticini diem suum obierat. Inde cadauer Mediolanum deportatur atque in Templo maximo sepelitur apparatu & pompa, quae Principem deceret. Antequam mandaretur humi corpus, iacuit in feretro diem vnum scilicet vti contrectaretur omnium oculis, atque vt suspicio, quae multorum animis infederat opprimeretur cum non esse repente subductum viderent. Ea ipsa res praebuit sermonibus materiem, & querelae audiebantur. Caetera deinde peraguntur horribili dissimulatione, quam aulici, qui tunc erant homines Tiberij artibus aequauere. Nam simul atque peregit pietatis & moestitiae simulacra Ludouicus, ciuitasque suis erga mortuum Principem defuncta muneribus est, abdidit ille sese in arcem, & per dies aliquot abstinuit publico, tamquam adhuc moereret. Inde conuocatis principibus Ciuitatis, in frequenti eorum conuentu praefatus pauca de publica orbitate & moerore suo, dixit erigendos esse animos ad Reip. curam, eligendumque ex Galeacij filijs, qui succederet in Patris fortunam, ac si praerogatiuam aetatis sequerentur, deberi principatum Francisco, qui stirpis maximus esset. Parati erant qui sententiae huic aduersarentur, & dixere, nequaquam id esse Reip. tempus, vt committi pueris deberet. Quia succederet ipse imperitandi

tandi vetus, efflagitatus Reip. voce, ab stirpe quo-  
 que iustus heres Imperij : ac ne recusaret, obse-  
 crabant. Ita ille nihil sane cunctatus, in aurea veste  
 alboque equo inuehitur in urbem, ac sicuti prio-  
 res vsurparant, in Templo maximo supplex ad  
 aram adorato Numine, praeiuit speciem legitime  
 adeuntis Imperium, & plausit adlatio publica,  
 Ducique acclamauit. Aes campanum ex aedibus  
 sacrarum turribus personuit, vt non ciuium modò  
 consensu, sed Ecclesiae quoque gratulatione re-  
 cipi principem appareret. Non multò deinde post  
 adfuerunt duo Caesaris legati ferentes literas & man-  
 data, quorum autoritate Mediolani Dux corona-  
 retur. Caeremonia coronationis huiusmodi fuit.  
 Ad xiiij. Kal. Iunias, qui dies erat D. Feliciano  
 sacer, in Templo maximo Dux & legati rei diui-  
 nae interfuerunt, qua peracta, ad Templi valuas  
 in celsissimo pegmate diplomata Caesaris recitan-  
 tur. Insignia deinde Principatus prolata, & Episco-  
 porum manu, qui aderant ornatus Princeps stetit,  
 plaudentibus in speciem cunctis, quamuis alte ani-  
 mis moererent: ob euersam Galeacij domum, &  
 externis armis proditam Italiam, tantumque malo-  
 rum eius iniuriae causa concitatum. Iason Mainus  
 peritia Legum nactus famam, habitusque ea tem-  
 pestate Iurisperitorum disertissimus, pauca de Lu-  
 douici laudibus, & noui Principatus felicitate pe-  
 rorauit magis in speciem ornata verbis, quam vt  
 sentire crederetur. Ea peracta caeremonia, Prin-  
 cept ad D. Ambrosij Aedem, cum magno princi-  
 pum

pum aliorum agmine processit, ibique supplicauit  
Tutelari Urbis: & ea simulacra pietatis, optima  
spe, vt in malis, confirmarant animos, fore vt  
sancte ac religiose Imperium ille administraret.  
Ab D. Ambrosij Aede Sfortia sese contulit in Ar-  
cem, atque ibi laetitia celebrata est ludis & epulis,  
tantamque magnificentiam nunquam antea conspe-  
ctam fuisse Mediolani omneis fatebantur. Sed  
aggrauabat vt dixi, deformabatque omnia tristis  
Galeacij casus, & profuga cum paruis liberis vxor,  
quae fugiens lucem, adspectumque hominum, Ti-  
cini in obscuro cubiculo clauferat sese violenta  
luctu & nescia tolerandi. Neque verò calamitas  
erat ea, quam tolerare muliebris animus posset,  
cùm super mariti acerbam mortem, amissumque  
Principatum, Gallicis quoque armis, & inito ad-  
uersus auum patremque foedere Neapolitanum,  
Regnum infestaretur. Sed & Ldouicum ipsi sunt  
infestae res appetebant quarum praesagium,  
fuere nocturni ignes exorti supra arcem, sta-  
timque secuta est interpretatio: Sfortiarum,  
genti exitium & finem imminere. Et coeperat ipse  
nihil laeti faustique expectare, postquam Beatrix  
vxor exanimem partum enixa cum doloribus acer-  
bissimis mortua est, eodemq; tempore treis ipsius  
filij decessere continuatis funeribus, quae funera  
non secus atque venturae cladis vaticinium accepta  
sunt. Sepulta est Beatrix in Templo Deiparae  
Virginis, cui cognomentum ex Gratiarum nomine:  
memoriaque extat, amplius quindecim millia num-  
mum

mūm aureorum in id funus insumpta esse . Per septem continuos dies in eo Templo super tumulum cecinere preces, actaeque iui per totidem noctes excubiae . Dein dona ampla data , tum Templo ipsi D. Mariae Gratiarum, tum Templo Maximo cum ea precatione ac voto , vt mortuae Principis animae bene esset : poenaeque noxarum, si quas ipsa contraxisset, diuina benignitate remitterentur . Dona autem ipsa quae data sunt extant descripta in annalibus quibusdam, praecipue haec . Templo maximo frontalia duo aurea conchyliati coloris cum familiae insignibus : calices & pixides & alia sacris faciundis . Ad singula subiectarum ciuitatum Templo, frontalia item bina ex holoserico violaceo, magnusque cerae numerus ad omnia Templo Urbis , vt per omnes exsequiarum dies plurimis luminibus arae collucerent, atque in reliquum deinde etiam tempus ad Sacrorum vsum cera suppeteret quibus parandi aliunde difficultas esset . In D. Mariae Gratiarum Aedem atratus Sfortia per eos exsequiarum dies venit, & vnā cum eo legati Principum aut Regum & Rerump. Hispanus, Venetus, Florentinus, Ferrariensis, Mantuanus, Vrbinas, Bononiensis : & praeter legationes hasce, non minus splendida cohors principum ac dynastarum Imperij Mediolanensis, qui beneficiario iure oppida pagosue obtinerent . Ea cohors cum Principe Sfortia in Templo D. Mariae Gratiarum exsequias celebravit . Galeacius Sanseuerinas, qui Blancam Ludouici filiam in matrimonio habebat, processit

processit in Templum maximum, vbi tanto maiore apparatu funebre sacrum fiebat, quanto plus ibi maiestatis & opum, & Metropolitanis nominis splendor. Deduxere Sanseuerinatem alij principes annexi Sfortiarum domui, Magistratusque vrbis, & legati Ciuitatum, & aula ferre tota: Iurisconsulti praeterea & medici & collegium omne mercatorum, & ex singulis vrbis regionibus duodeni viri nobiles, quos inuitari Princeps iusserat. Togae omnibus erant pullae, isque funestus, collos, Principis sumptu toto Templo praetentus erat. Die, quo mortua Princeps erat, ieiunium in aula fuit, & per totum deinde annum Sfortia dedit hoc moerori ac desiderio, ne accumberet vnquam, sed stans vesceretur, totoque hoc tempore atratus fuit. Ascanius Sfortia Cardinalis hoc tempore, quae licentia fuit illius aevi, treis simul Ecclesias obtinebat: Mediolanensem nimirum hanc nostram, Ticinensemque, & Cremonensem, ingenti tunc potentia, quae nunc piaculum scelusque esset. Nimia ea potentia regnanti quoque Ludouico videbatur, ac coepit magnopere vrgeri Cardinalem, vt vel Mediolanensis Ecclesiae gubernacula omitteret, vel Cremonensem Ticinensemue Pontificatum abdicaret. Id ita petebat rogabatque Princeps, vt satisfaciendum esse fratri Cardinalis videret, ac si cunctaretur, vetera dissidia, & Ferrariense exilium documento erant. Potius quam vt alterutrâ minorum illarum deijceretur, omittere Mediolanensem hanc maluit, ac pro omissa Metropoli tradi-



dit ei Pontifex Maximus Ambrosiana vestigalia, quae ampla & opulenta quondam attributa Monachis, hoc tempore Cardinalibus assignari coepta erant, ut quae fuerant prius alimenta Monachorum, fierent Ecclesiae totius maiestas & splendor. Id igitur Ambrosianum Sacerdotium Afcanius adeptus, primum omnium hanc curam suscepit, ut ipsius Monasterij mores disciplinamque constitueret, si quid forte corruptum ibi remissumue erat, atque impetrata in id à Pontifice Maximo facultate, instituit, ut in Monasterio Clarae Vallis Abbas Monasterij Mediolanensis eligeretur. Is Abbas Monachos triginta duos haberet, qui cum reliquo Cisterciensi Ordine corpus vnum efficerent. Monachorum Ambrosianorum viginti Sacerdotes essent: reliqui his ministrarent, & vteretur ordo simul vterque legibus & institutis, quibus maiores eorum vsi essent tunc cum res Ambrosiana sancta florensque habita esset. Pecuniae, quae superessent Monachorum alimentis hoc ordine ac descriptione dispensarentur. Quaternae quotannis ingenuae virginēs cum honestis hominibus ex ea pecunia collocarentur in matrimonio. Dos singulis earum centeni floreni nummi essent. Panis & vini tantum in pauperes anniuersario die diuideretur, quantum ducentis aureis nummis emi posset. Die Veneris in perpetuum aurei nummi singuli pauperibus singulis darentur. Anniuersario D. Ambrosij die pauperes deni donati singulis vestimentis cum Abbate ipso accumberent, largeque epulum darentur.

tur. Natali Christi Liberatoris die, qui pauperes ob aes alienum vincti attinerentur cuius alieni aeris summa ducentarum librarum esset, ea summa Monasterij sumptibus dissolueretur, captiuisque demerentur vincula. In Monasterij aedificationem quotannis librae bis mille insumerentur. Haec omnia qui exsequeretur, Ioannes Tussignanum Abbas ab ipso Cardinale datus est, ac deinde Abbates alij legibus eiusmodi parvere, donec solita licentia quaedam oblitterarentur. Et Cardinalis quidem Ascanius ad haec opera religionis attentus pie sancteque erga Patriam agebat: Ludouicus verò frater illigatus atroci bello, varia fortuna conflictabatur, & omnes belli clades Italiam vastabant. Haud fuerit alienum referre casum, atrocem vnus inclytæ sapientiae viri, quem tempora illa in perniciem traxere, licet ad Mediolanensem Rempub. ille communi tantum iure attinuerit ob rei magnitudinem & nouitatem. Hieronymus Sanouarola erat accerrimo ingenio, diuinaeque philosophiae profunditate adeptus nomen tamquam humanae mentis captum longe supergrederetur. Vitae quoque sanctimonia & seueritate famam eam ipse adiuuabat, & cum in Sanctissimo Dominicano Ordine prope consensisset, ad Ordinis eius disciplinam & instituta priuatis suis exemplis addiderat, vt non alibi plus rigoris esse vulgò omneis ferrent. Vates quoque ille habitus iam in tatum authoritatis peruenerat, vt quae ille futura praedixisset, pro certis ac praesentibus

sentibus haberentur . Ibatur vndique ad eum, nuncupabaturque Sanctus, quia fortè multa contigerant haud secus, quàm ille ventura esse fuerat è superiore loco vaticinatus . Namque Gallorum in Italiam aduentum , & Petri Medicaei eiectionem ab eo praedicta mala comprobauerat euentus, aliaq; tum in publicis, tum in priuatis rebus erant pleraque sic gesta quemadmodum vaticinia Sauonarolae huius ferebantur . Eiecto Medicaeo, res Florentina per xx selectos viros administrabatur, idque regimen consensu principum institutum satis prospere cadebat, cùm Sauonarola idem coepit publice denuntiare atque vaticinari , Reip. formam eam breui tempore ad finem esse venturam , nouumque tyrannum parari : proinde si saluam esse patriam vellent , maturarent quamprimum tollere imperium, quod publicae cladis semina originemque contineret . Haec aliaque vaticinando Sauonarola peruicit, vt sublato xx . Virorum dominatu res ad populi potestatem redigeretur , quo impetrato arbiter ipse rerum omnium erat, nec aliter, quàm ad nutum voluntatemque eius nuna omnia magistratusque demandabantur . Inde flagrantissima odijs materies , & vnus hominis causa tota confestim ciuitas in duas factiones discessit . Partis vnus caput erat Sauonarola ipse regebat alteram exortus Dominicano aemulus ex Franciscana familia haud minus acer ingenio promptusque . Hominibus hisce parebat Ciuitas, & vtrunque sequebantur sui , veniebantque ad  
cos

eos nocturnis temporibus vt consultarent de Republica & quicquid illi respondiſſent, tanquam ex oraculo quodam accipiebant . Certamen inter duos partium duces maximum erat, vter ſanctior acceptiorque Diuinitati haberetur, eoque certamine proceſſere in tantum vanitatis, vt Franciſcanus hanc Dominicano conditionem ferret : vt per flammias vterque tranſirent, atque ſanctimoniae laus penes eum deinde eſſet qui euaiſſet intactus . Suberat illa tacita ſpes, fore vt prohibentibus ſuis, non timuiſſe periculum, ſed periculo exemptus crederetur admiratione virtutis . Ita Sauonarolam quotidiano conuiſio laceſſebat timidum diffidentemque & male ſibi conſcium increpans qui committere ſeſe discrimini non auderet . Sauonarola, minime recuſabat ille quidem, ſed fore aiebat, vt ambo cremarentur . Affecſae interim vrgebant inſtabantque ne cederet aduerſario : fugam eam, periculi, confeſſionem fore agnoſcentis falſa eſſe quae prius defendiſſet . In eo discrimine, Sauonarola diſtractus ancipiti cura, cum neque temerè agere quicquam vellet, & defugiſſe experimentum, duceret ſamae ſui nominis alienum ac damnoſum, populi ſtudia ſumpſit obtentui, tamquam intra Monasterij ſui clauſtra inſeſſusque teneretur, ne tale periculum adiret . Et fuere, qui ſimulationi huic inſeruietes cingerent obſidione Templum Monasteriumque, atque egredi Magiſtrum prohiberent . Res demum exceſſit eò, vt inſectantibus Sauonarolam praecipue qui  
tamquam

tamquam Ludouici Sfortiae amicum eum ode-  
rant, Pontifex Max. hominem igni creman-  
dum damnaret. Ita vir clarissimus,

& ante tumultus eos innocens

habitus, non miserabi-

li solum, sed

etiam

ignominioso

sine clausit

vitam.

IOSEPHI RIPAMONTII  
CANONICI SCALENSIS

CHRONISTAE VRBIS MEDIOLANI  
HISTORIARVM AB METROPOLI CONDITA

DECADIS III

LIBER VII.



OPVLVM Rempubicamq; Medio-  
lanensem interea suae calamitates  
lacerabant, versis in Sfortiam ijsdem  
armis, quae ipse arma ad sui defen-  
sionem in Italiam acciuerat. Cum  
que res Gallorum felicius quotidie  
procederent, & vno victoriarum tenore iam illi  
regionem eam, quae trans Padum est, subegissent;  
trepidus Sfortia principes vrbis conuocauit, vt  
quid in tali tempore agendum esset, ex eorum  
sententia constitueret. Erant in eo conuentu;  
praeter alios consilio auctoritateque principes  
viros, Cardinales treis: Ascanius ipse Ludouici  
frater, Sanseuerinas, & Estensis, qui Archiepisco-  
pus vrbis hoc tempore erat, & propter intimam  
cum Sfortiarum domo affinitatem, magnis etiam  
Imperij rebus miscebatur. Sanseuerinas pariter  
affinis intimusque erat: Ascanius insensum sibi  
Pontificem Romae expertus, relicta ea vrbe con-  
cors agebat fratri, paribusque cum eo consilij ad-  
mini-

ministrabat rem. Hi cum adessent, Ludouicus sermonem eum est ingressus, vt diceret, se augmentem bello rem Mediolanensem, atque propulstantem aliena pericula suis armis, repente à quibus minime debebat, fuisse destitutum. Si sic pergant, haud dubitare, quin perdita profligataque omnia propediem in potestatem hostium ventura sint, ipseque cum tota domo profugus & extorris, humanarum rerum exemplum praebiturus. Urbem Mediolanum, & patriam communem hanc, & Metropolim Insubriae, Nomenque Ambrosianum in manu fore Gallorum, qui crudelius infestiusque quàm ulli barbari vastare terram Italiam parent. Proinde orare, vt si mite suum iustumque Imperium semper experti fuerint, mitiusque etiam & liberalius in posterum sperent, ab ea fide ne desciscant, quam iureiurando obstrinxerint sibi tunc cum in Tepli maximi cellissima Sede sit Mediolani Dux appellatus. Affirmauere omneis, donec sanguinis & virium quicquam superesset, impigre laturus opem, & pro salute imperioque tam bene meriti Principis ad extremum vsque spiritum esse dimicaturus. Id pro se quisque ostendebant atque profitebantur. Etiam fuere, qui descripta offerrent nomina paucorum, quibus ambigua fides, & prona in Gallum studia essent: monebantque principem, vt eos coercendo, statueret exemplum vindicandae perfidiae, quo exemplo suspensi caeterorum animi res omittere nouas cogerentur.

+ Non tamen in eos animaduersum est, quod bonitate



tate Ludouici factum credidere quidam : alij Fati vim occultam obstitisse per leuitatem aiebant . Antonius erat quidam Landrianus praecipuâ apud Ludouicum gratiâ , idemque summo inter ciues odio , propterea quod , exigendo acerbe vectigalia , fundos tectaque omnium , vsque ad publicae immunitatis violationem , immodice onerando , priuatorum fortunas afflixisset . Sed cum esset ille Principi acceptissimus , execrabantur magis eum homines , quàm violare audebant . Hunc Simon Rigonus Gallicarum partium homo , ratus impedimento esse quominus Sfortia Mediolano eijceretur , tollere agitauit , adfuitque facinori fortuna , & interfectus ab Rigone Landrianus , absque vlla funebri pompa post biduum in D. Petri templo , quod Benedictini Patres tuentur , est sepultus . Eius hominis nece concidère penitus Ludouico animi , neque dubitatum est , quin res ea Sfortiam profligarit . Namque saluo Landriano , aut ipse Sfortia mansisset in arce , aut illum ibi constituisset , & varietates eae , quae versantur in bello , fortasse aliquod interea salutare momentum attulissent . Postquam ille cecidit , pauens tremensque Sfortia , conuocatis primoribus ex vniuersa nobilitate populoque Mediolanensi , praesentem rerum statum maiore quàm antea querimonia demonstrat , obsecratque , vt debitam in omni fortuna principi suo fidem tanto magis in eo rerum discrimine ad vltimum vsque praestare velint . Mox ipse , compositis ad fugam rebus , sublatisque thesauris , & prae-

P p p

missis

missis Comum filijs, proripere sese ex Gallorum manibus in Germaniam ad Caesarem parabat. In discessu, cum patriam, & fortunae suae sedem, Urbique hanc relinqueret praedam hosti, non defuit infelix, & nihil profutura cura, qua disponderet alieni iam imperij negotia tutelamque ultimam. IV. Viros, in quorum prudentia & fide plurimum spei haberet elegit, qui urbis & Imperij statum in media illa desperatione regerent ac tuerentur. Hi fuere, Hieronymus Landrianus vniuersi Humiliatorum Ordinis Antistes: Ioannes Iacobus Castelleoneus Archiepiscopus Barri: Antonius Triultius Episcopus Comi: Franciscus Bernardinus Vicecomes. Hi deinde ex principibus urbis eligere pari secum arbitrio & potestate octo alios debebant. In D. Mariae Aede, quae Rosa dicitur, pronuntiata sunt eorum nomina, quos IV. Viri ad afflictæ patriae tutelam allumerent secum, princepsque omnium fuit Gibertus Borromaeus, ille ad cuius nomen procumbere veneratione legentes velim sicut scribenti mihi procumbit inclinaturque pietate animus. Hic enim D. Caroli Auus fuit: ex huius prodire stirpe post aliquot annos debebat vnus homo qui patriae nostrae salus, Orbi terrarum vniuerso miraculum esset. Caeterum, plenus fugae trepidationisque Stortia, cum raptum hunc ex aliena iniuria principatum relinqueret, miserabile exemplum praebuit omnium rerum, quae in tali fortuna spectari possent, quarumue spectaculum humanus animus esse consuevit, vbi caligo despera-

desperationis & diuini Iudicij horror incessere .  
Restituit Angleriam & Aronam & castella alia  
Borromaeis , quae licentiâ dominatus occuparat  
insensus opibus & nobilitati Gentis , cuius gloriam  
in fastigij sui diminutionem accepisset . Alijs illu-  
stribus familijs illa damna compensauit large &  
effuse , nec tamen magnâ in vulgus famâ , quia  
ruentis iam fortunae prodigus , & fera illa velut  
ex alieno liberalitas dicebatur . Sacra praecipue  
sensere eiusmodi munificentiam , missis raptim ad  
templa regalibus donis , & data pauperibus stipe ,  
ne re omiſsa vlla , quae in tali tempore placamentū  
irae celestis , blandimentumue ciuibz foret . Tunc  
Galeacij quoque domum , & vxorem , & prolem  
respexisse clementer est visus , tamquam calamitas  
ipsa euicisset animum ad misericordiam sui sangui-  
nis , quem in secundis rebus opprimendo & abo-  
lendo , se ipsum euerterat . Namque multis cum  
lacrymis amplexus Isabellam , rogare institit , vt  
Franciscum e filijs natu maximum adsportandum  
secum in Germaniam Gallorumque violentiae sub-  
ducendum daret . Quod abnuere illa excusationi-  
bus varijs : sed reuera metus erat , ne raptor Im-  
perij patruus , etiam Imperio amisso , heredem  
odisset velut exprobrantem infelicis iniuriae dede-  
cus , & quacunque incederet extorre agmen , com-  
moturum iras aduersus authorem calamitatis .  
Ille testatus superos , cordi semper fuisse sibi Pa-  
triae huius salutem , & commoda ciuium , & Me-  
tropolitani nominis dignitatem , nec habere , quod

Ciuitatis Populique mutuam erga se fidem, officiumue accusaret, profiteri non desijt & affirmare vltro, quemadmodum iratum sibi Numen agnosceret: eius arcano iudicio in illas miseras incidisse.

— Pridie Cal. Septembris inclinato in vesperam die, egressus Arce speciem praebeuit, tamquam recta Nouocomum tenderet: ac sequente nobilium agmine cum aliquantum viae processisset, conuersus ad eos: Satis inquit haecenus officij est, redite iam ad lares vestros, & Patriam istam tuemini concordibus animis, ac estote memores nostri. Credidere qui sequebantur, velle Principem vitatâ frequentia & celebritate properum expeditumque ire, ac nihil cunctati conuertebant capita equorum, domumque abibant. Enimvero Sfortia, quamuis abundi certus, tardabatur patrij soli dulcedine, cogitabatque identidem, quanti discriminis foret, ipsam Imperij sedem reliquisse: latebras & effugia semper se inuenturum: vbi semel excessisset, reditum fore in potestate aliena, discessuque illo cuncta hosti in manum dari. Talia, sicut existimare licet, animo voluens, flexo ad lacuam itinere (nam Porta Comensi exierat) ad Deiparae Aedem, quae Gratiarum dicitur, cum paucis adequitauit. Ibi flexis ad aram genibus aliquandiu moratus, ac deinde collocutus cum Antistite Monasterij primoribusque Patrum, in Arcem, vnde exierat, redijt, plenus suae, plenus alienae moestitiae, quam in singula momenta, facies adspectusque locorum, & hominum augebat. Namque Aedem illam D. Mariae

Mariae Gratiarum, familiae suae opibus conditam  
ornatamque intuendo: Arcem deinde ipsam, pa-  
tris sui monumentum, & in ea sede fidissimos ami-  
corum, ceu nunquam postea visurus, ultimum illud  
oculis vsurpando,angebatur. Tradunt, cum ex  
Templo in Arcem rediret, obuersante imagine tot  
ornamentorum ac munerum, quae per Sfortias  
collata in eam sedem erant, simulque recurrente  
memoria fidelium sibi illic hominum, quorum  
sermonibus & consilijs plurimum vti consuescet,  
conuersa ter facie respexisse eò: idque signum  
aegerrime digredientis retulere qui simul ibant.  
Retulere insuper iidem trepidarum illarum pro-  
fectionum comites, cum ex Monasterio digre-  
deretur, religiosos illos homines exisse vnà lacri-  
mantes vbertim: quae tam humilia & minuta reti-  
cenda non putauit, vt Principis huius in tali tempo-  
re perturbatio animi, & Sanctissimi Ordinis in  
eum caritas cognosceretur. Noctem, quae inse-  
cuta est, in Arcis mole inquietam egit: postero die  
in viam sese dedit, Nouocomum, sicut antea destina-  
uerat, iturus. In campo qui subiectus est, quicquid ab  
altera parte praeiacet arci, stabant turmae cohortes-  
que deducturae fugitiuum Principem, ad tria fere  
hominum armatorum millia, qui deinde numerus,  
dilabentibus quotidie multis, ad quingentos pau-  
latim est redactus, tantaque cohors cum eo in  
Germaniam peruenit. Vix ille suburbano agro  
excesserat, cum pauci Gallicae factionis homines,  
Ducis nomen crebris acclamationibus transulere  
illuc

illuc: & dubitauere Nouocomenses clauderentne  
venienti portas, an aperirent. Ibi quoque adiutus  
est Sacrorum studijs, quae semper in omni Catholi-  
ca Ciuitate Christianoque populo maxima & po-  
tentissima pars rerum, sicuti Mediolani Sfortiarum  
nomen extulerat auctoritate beneficijsque suis, ita  
in paruam etiam illam Vrbem porrecto erga fami-  
liam eandem fauore, inclinauit ad profugum hunc  
accipiendum animos. Episcopi aedes hospitio  
fuere: illuc euocati Decuriones Vrbis fidem suam  
in omnes rerum euentus obligauere Ludouico:  
ipseque profectionis suae causas explicauit, vt ce-  
dere potius quàm fugere videretur. Dum ibi  
colloquijs & sacramentis teritur tempus, iam Galli  
successerant ad moenia Vrbis Mediolani totisque  
suburbij praedabantur impetu ac furore, quem  
secum asferret ea gens etiam si non licentiâ belli  
accenderetur. Quicquid sacri fuit extra moenia,  
prima illa irruptione agebatur inter ceteram prae-  
dam, eumque nuntium Andreas Ecclesia Sancti  
Laurentij Canonicus tremens pauensque ad Prin-  
cipem attulerat. Is Canonicus, cum asferre se  
diceret quae ad Principis salutem magnopere per-  
tinerent, introductus exposuit quidem audientibus  
etiam alijs captiuitatem haud dubiam Vrbis, & in-  
stantem moenibus hostem, sed petito dein secreto,  
grauius atrociusque quiddam indicauit, vnde Lu-  
douico vltimus horror, & consistendi vsquam finis.  
Ostenderat enim docueratque Canonicus, compo-  
situm esse quendam ordinem insidiarum, vt Nouo-  
comi

comi comprehensus retentusque Sfortia Gallo traderetur ducendus in triumphum: agenda rei tempus, proditoresque domesticos, paratas operas adfuturum his in tempore subsidium, caput auctoremque negotij, & momenta omnia indicarat. Ea cum ipse comperisset, facere non potuisse, quominus deferret cuncta cum cura & fide, sicuti debitum tam benemerenti Principi officium postulare. Caeterum, quia rem tantam necessario officio adductus aperuerit, scire se, quanto suo cum periculo id fecerit, nisi per principem adhibita sit quaedam ars & diligentia, ut aliunde potius id manasse indicium etiam apud proximos increbescat. Plena omnia esse proditorum & speculatorum, qui accedentes exeuntesque diligentissime observent, ipsosque certis inter se nutibus, ac significationibus, & ministris, communicare quicquid suspicentur fieri vel cogitari, ita ut temporis fere momento rem eandem omnes sciant. Ad haec ipsa, Canonicus consilium quoque suum adiciebat: ut nimirum, quoniam sciri non posset, quid sinceri & fidi, quidue secus esset in extorre illa & nutus iam alienos respiciente aula, discederet occultus, falleretque discedendo fidissimos etiam, quo tutior ad caeteros fallacia esset. His auditis, Sfortia, quamquam magnopere intus aestuaret, quietus ac securus in frontem, reliquum diei consumpsit agendo quae instituerat, praetulitque quandam eiusmodi speciem, tamquam in singula momenta fieret captantibus opportunior: ac nihilominus circumspi-



circumspicere quantum poterat omnia, ne interim caperetur. Appetente vespera, cum per eandem imaginem securitatis, velut animi gratia ad naues descendisset, conscensa repente praetoria, cuius neque militi, neque remigi diffidebat, innuit, ut quamcelerrime & vehementissime nauigium concitarent. Ac princeps quidem eluso in hunc modum & turbato insidiarum, quae sibi parabantur, ordine, per medium lacum ventis & remis ferebatur. Reliquae verò naues, aliae statim, aliae spatio interiecto sequebantur, partim integra fide, & nesciae quanam subita res incidisset, partim attonitâ perfidiâ, & inter se suspectae, quia detectam esse rem apparebat. Ita Ludouicus Belasium appulit, feliciter, ut in malis, vitato ludibrio, conseruataque libertate cum Imperium amisisset. Eo Cardinalis Ascanius, duoque Cardinales alij, quod erat Ludouico intimum consiliorum, antecesserant, yna cum paruis liberis educatoribusque eorum, & magistris, nobilium fere manu, & inerant praecipui quidam è Clero, quos ab vitae literarumque commendatione Princeps in eam curam asciuerat. Illic igitur fretus praesidio & auctoritate trium Cardinalium, idque nomen pro maximo munimento existimans: simul cingentibus latera proceribus urbis, qui Cardinales & liberos affectati, extra perfidiae suspicionem erant, dicitur velut ex magna defatigatione respirasse paulisper, diraque captiuitatis imagine attonitum animum collegisse. Ingressus deinde mixtam quandam ex indignatione  
simul

simul & metu orationem, blandimenta, minasque  
& preces iaciebat. Comites exsilij sui, prospera-  
rum aduersarumque rerum socios, carissima sibi  
capita, & partem optimam ciuitatis, & firmamen-  
ta imperij appellauit promiscue omnes, qui adef-  
sent vnà & sequerentur. Nulla posse tam bene-  
meritis ciuibus satis digna praemia reperiri: sed  
praemiorum omnium instar fore memorem semper  
animum & gratissimam erga tales amicos volunta-  
tem, qui fide ac pietate erga se ipsum, abrumpere  
sefe ab ipsa patria maluerint, omnemque subire  
fortunam, quam expectare domi necessitatem eam,  
infidos socios, barbarum hostem intra moenia vr-  
bis admittere cogerentur. Enimuero fortium vi-  
rorum, & honestissimi comitatus vniuersi meritum  
id gloriamque esse, quam tamen pauci dedecora-  
rent, specie quidem & corpore sequentes princi-  
pem, animis verò spectantes Gallica arma & fauo-  
re hostium imbuti. Neque tamen hos ipsos pec-  
care perfidiâ, sed errore quodam humano, prop-  
terea quod praesenti rerum motu perterriti, ad  
partem inclinent eam, in quam vergere cuncta  
videantur. Sed scirent, exitum fore Gallo dispa-  
rem longe ab ea specie, quae caliginem nunc ipsis  
offundat, & spes vanas, terroresque falsos reprae-  
sentet. Se quidem in praesentia cedere tempori,  
quae non vltima pars Imperatoriae prudentiae  
semper habita sit, quodue summi principum & re-  
gum non sine laude factitarint, quoties fortuna  
contra daret: & illam tantopere laudatam anti-

quitatem plenam eiusmodi exemplis esse. Caeterum, & hostes ipsos, & si qui deprauati sint ab hostibus, breui esse intellecturos, quantum intersit inter initia bellorum & finem, qui primorum euentuum laetitiam saepe funestam inanemue fecerit. Ire se ad Maximilianum Caesarem tam arcto vinculo connexum sibi quàm omneis scirent. Superesse studia populi, & urbem adhuc, & arcem, & tanti exercitus robur. Conciturnum, externa arma, si domesticae vires, si auxilia proximorum labarent. Esse in domo stirpem egregiam liberorum, esse fratrem Ascanium praeditum ea dignitate, quam Reges ipsi sociam & aequalem, suae Maiestatis admittant: esse munimenta alia, quae Sfortiarum generi ac nomini duraturam in saecula successionem promittant: & quantulum, profectum fore hosti, si tollatur ipse vel cadat? Talia fere Ludouicus ad familiares ducesque suos egerat, agnoscentibus plerisque artem, qua res suas profligatas attollere erat conatus: pauci spem vllam de ipso bonam habebant, laetiue quicquam ominabantur. Cum Ascanio Cardinale sermo tristior fuit. Rogauerat ille primo statim congressu, quam curam tuendae arci, quodue praesidium frater adhibuisset? Vbi est à Ludouico responsum, Arcis custodiam creditam esse Curtio fido homini & probo, tunc Cardinalis Ascanius, vatis in modum: nos verò euoluti sumus (inquit) omni iure ac possessione Mediolanensis Imperij, iamque cuncta in Gallum cessere. Haec ad Belasium

sum acta dictaque erant . Ab Belasio , enauigato  
lacu , magnis itineribus , quanta per confragosa &  
aspera loca potuit adhiberi festinatio , Oenipontem  
peruenere : atque interim alij super alios nuntij  
perditarum rerum assequebantur agnien , vaticini-  
umque Cardinalis , exitu comprobatum in ore  
omnium erat . Oeniponte Maximilianus Caesar  
moerentem afflictumque Sfortiam erexit , cum  
caetera omni benignitate , tum hilare ac large pol-  
licendo , fore quamprimum ut in fortunae suae  
sedem ipso adnitente restitueretur . Ita Ludouicus  
ab magnae fortunae culmine lapsus ad ima , rursus  
excitabatur , spemque inter miseras ingentem vo-  
luebat : & quia non satis impigre pro ardore iraq;  
sua moueri Caesarem videt , rem aggreditur , futu-  
ram horrore omnibus , qui Metropoli huic nomi-  
nique Mediolanensi eam impositam esse labem  
cognoscent . Ausus namque est Turcarum in  
Italiam vocare arma , quale flagitium in tanta col-  
luuione ac varietate dominantium non viderat  
Vrbs , quae secundas in principatu Catholicae  
religionis partes , & fundatorem Apostolum , so-  
bolemque per tantum aevi Parente dignam prae-  
fert . Referam tristissimi negotij seriem & ordinem ,  
ut huius etiam abominandae rei memoriam prae-  
senti felicitati temporum haec nostra cura reprae-  
sentet . Postquam Sfortia lentam Caesaris opem ,  
auxiliumque pertaesus , stimulante cupidine recu-  
perandi imperij , in Gallum irâ , in paruos liberos  
misericiordiâ , metuque insidiarum , & pudore tam

deformis fortunae nullum quietis locum inueniebat, vertit animum ad consilium illud infelix, ut barbarum exciret in Italiam, & Mahometana vexilla ferret in Gallos, qui ipsi auxilio vocati eiecerant focum. Haec ubi taetra sententia stetit animo, Mediolanenses homines duos elegit, in quibus & fidei plurimum habebat, & satis esse calliditatis audaciaeque rebatur, quantum scilicet barbaricam terram aulamque adituris esse oporteret. Hos onerat promissis, & ubi assensere, mandatis instruit, legatioque ea Catholici hominis ad Turcam nonis Nouembris iuit. Legati, Ambrosius Mendax, & Martinus Cafalis fuere, tamque iusta fors fuit ad custodiendam indignissimi facinoris memoriam, ut literae ipsae sint repertae, quae Princeps ipse duobus illis Ambrosio & Martino scripta mandata formamque legationis obeundae, edidit in hunc modum. Martine, & Ambrosi, quos nobis ad Turcarum Imperatorem legamus. Prudentia utriusque vestrum, & magnis rebus perspecta erga nos fides ac beneuolentia singularis facit ut arbitrio potius vestro relinquamus ea, quae ad rem istam commode administrandam pertinere visa erunt, quoniam ut auctoritate iussuque nostro complecti ac definire singula velimus. Dedimus vobis literas ad Turcarum Imperatorem, ut fides legationi sit, itemque nostra manu subscripta pura folia octo. His utemini, prout dies tempusque, & ratio rerum monebit. Quae autem exponi agique nostro nomine apud Turcam velimus,

„ mus, haec sunt, & ea ipsa iudicio prudentiaque  
„ vestra moderabimini. Primum omnium, si ita vi-  
„ sum erit, impetrato aditu reddetis Principi literas,  
„ ut legatos vos esse nostros sciat, fidemque vobis  
„ habeat omnium rerum. Dein perfuncti primae  
„ salutationis officio, demonstrabitis, pulsos nos  
„ Imperio sedeque nostra, non alibi, quam in Tur-  
„ cico fastigio spem habuisse collocatam, ad cuius  
„ Imperij magnitudinem spectet, ne qua iniuria mi-  
„ noribus fiat. Cetera deinde, vel statim, vel spatio  
„ interiecto, vel coram, vel per Baxas Portae pro-  
„ ceres exponetis: causas nempe belli Gallorum &  
„ Veneti Senatus impotentem cupidinem, qui appe-  
„ tant Italiae dominatum, ut si prima procefferint,  
„ ad reliqua transgrediantur, & nomini quoque  
„ Mahometano terribiles fiant. Galliae Regem im-  
„ minentem vrbi Genuae ut mare illud in potestate  
„ haberet, postquam per conditiones assequi nihil  
„ potuerit, hostem ex amico repente factum iuisse ad  
„ arma: Venetos eodem consilio quo Gallus mo-  
„ ueretur, tentasse Pisarum urbem ob maritimas  
„ item opportunitates, & quia Mediolanensibus  
„ armis ea spe fuerint deiecti, in nostram perniciem  
„ coniurasse cum Gallo. Pontificem verò Romanum  
„ à quo reconciliari discordes oportuerat, prae-  
„ buisse potius alimenta igni, & adiutorem fuisse  
„ coniuratis: aliosque Italiae Principes in nos esse  
„ armatos ob eam causam, quia armantibus se con-  
„ tra Mahometanum Imperium obstiterimus. Haec  
„ omnia Turcarum Imperatori, si vobis ita visum  
„ erit,

erit, exponetis Ambrosi & Martine, prout res ipsa,  
vel reticendi vel addendi aliquid, consilia vobis su-  
biciet. Ac ne indigna Turcico auxilio videatur cala-  
mitas nostra, si fortè illic existimati erimus arcuisse  
segniter hostem & aperta immunitaq; omnia prodi-  
disse venienti: narrare poteritis quos vidistis etiam  
ipsi nostros ad omnia defendenda conatus, muni-  
mentaque & praesidia, & quicquid aliud aduersus  
hostilem impetum compararet faceretur quilibet  
prouidentissimus imperator. Sed ita tulisse casum  
infestum, & faeuissim belli procellam, vè cùm ab  
pluribus simul partibus instaret ingrueretq; hostis,  
qua potissimum parte irrupturus esset, nesciretur,  
nec ad omnia itinera aditusque sufficeret miles.  
Auxilia, quae promissa erant, in tempore venire  
non potuisse cùm Caesar Heluetico bello implici-  
tus teneretur: Florentinos Pisana res distineret.  
Classẽm verò, quam ab Genua in sinum Hadriati-  
cum mittere destinaramus, vt aduersus communes  
hostes cum Turcica classe conjungeretur, non tan-  
ta celeritate potuisse adornari, quin celerius ipsi  
abire cogeremur & vnà cum Imperij tuendi appa-  
ratu, imperium quoque ipsum omittere. Duas  
vtique res fuisse, in quibus aliquid spei colloca-  
tum haberemus: alteram, si Mahometana arma  
ita vrgerent Venetos, vt respectu rerum suarum  
ab Gallico foedere abstraherentur: alteram, si Cae-  
sar, facta cum Heluetijs pace mittere nobis copia-  
rum aliquid posset. Vtramque spẽm impetu ac  
celeritate hostium fuisse delusam, propterea quod  
prouisu



„ prouisu ac metu talium auxiliorum stimulatī illi ..  
„ nihil reliqui fecerint vt expectationem illam no- ..  
„ stram anteirent opprimerentque . Poteritis quoque ..  
„ demonstrare , quemadmodum , oppresso in Prouin- ..  
„ ciae finibus praesidio , acciderit hoc , vt repentina ..  
„ consternatio praesidia caetera exercitumque vni- ..  
„ uersum inuaderet , ac sicut in bellis accidere con- ..  
„ suevit , parua illa res labefaceret cuncta & proflī- ..  
„ garet . Nos , cū exiguas infirmasque copias ha- ..  
„ beremus , cumque vrbium nostrarum alias expu- ..  
„ gnasset iam hostis , alias oppugnaret : nec tantam , ..  
„ duorum coniunctorum exercituum sustinere posse ..  
„ multitudinem videremur , abeundi consilium cepis- ..  
„ se , scilicet ne manendo & cunctando , ludibrium ..  
„ fortasse dedecusque aliquod contraheremus , qua- ..  
„ lia exempla in potentissimos etiam Reges aliquan- ..  
„ do fortuna belli edidit . Arcem Mediolani fuisse ..  
„ validissimam vnam , quae si salua maneret , irrita ..  
„ omnia faceret hosti , & nequicquam cum Veneto ..  
„ Senatu Rex Galliae conspirasset . Instructissimam ..  
„ hanc omnibus rebus in discessu nostro tuendam ..  
„ dedisse homini , quem nobis ob beneficia fidissimum ..  
„ esse omnium arbitramur . Ab eo nos homine pro- ..  
„ ditos esse vna cum Arce , mancipijque fraudem , ..  
„ vnus , non virtutem fuisse Gallorum , quae Gen- ..  
„ tem imbellem in Imperij nostri sede collocarit .  
„ Vbi Rex Galliae , coniuratorum ope , solitudine  
„ nostra , proditione praefecti , Mediolani fixerit pe-  
„ dem , statim concursus ingentes ad eū esse factos  
„ omnium , qui Turcicae maiestatis hostem atque  
aemulum

„ aemulum hunc valescere cuperent : ceteros inhor-  
„ ruisse successu illo palamque nouum Imperium  
„ auersari : voces audiri passim faustas in nomen fa-  
„ miliamque nostram : paratos cerni omnes in quem-  
„ cunque motum spes aliqua obiecta nostri reditus  
„ postularit . Nunc ipsum Galliae Regem abiisse  
„ domum eo consilio, vt primo quoque tempore  
„ reuertatur in Italiam, quam sibi spe vana despon-  
„ derit vniversam cum vaniore illo voto, vt Con-  
„ stantinopolim vsque victor eat . Nobis ad recupe-  
„ randi Imperij spem haec adesse : Vacuum iam pace  
„ Heluetica Caesarem, Florentinos item ab re Pi-  
„ sana iam solutiores : studia populorum erga nos :  
„ par odium in Gallos, famamque communem ad-  
„ uersam Genti : & nos ipsos, si quis adiutor existat,  
„ nec segnes ad pericula, nec infelices quamuis ho-  
„ stibus adhuc proditoribusque nostris plus adfuisse  
„ felicitatis videri possit . Haec ipsa postquam Otho-  
„ mano demonstraueritis, vel coram, vt dictum est,  
„ vel per ipsius intimos amicos, vel amplificata, vel  
„ diminuta prudentiae vestrae consilijs & praesen-  
„ tium rerum admonitu, vel denique omnia simul,  
„ vel iteratis alloquijs : tunc Ambrosi, & Martine,  
„ rem suppliciter à Principe petetis ipsam, cuius rei  
„ causa mittimus vos & legamus . Petetis autem,  
„ vt acriter exercere bello Venetos velit, nec mari  
„ solum, sed etiam circa vrbes, quas in continente  
„ habent, mittendo copias in Italiam & iustum ab  
„ hac parte bellum inferendo . Quod quidem ultro  
„ ipse facturum fuerat, atque etiam eius rei promissa  
ferentem

„ferentem legatum miserat: sed celeritate opus est,  
„idque ipsum non sine accuratissima gratiarum actio-  
„ne propter tam enixam erga nos voluntatem, ex-  
„ponetis. Si celeriter adiuti erimus, & Turcica  
„ope recuperauerimus Imperium: opes nostras om-  
„nes animumque & fortunam, & florentissimam,  
„illam Italiae partem, Urbemque Genuam & mare  
„Ligusticum fore instrumenta rerum earum, quas ad  
„sempiternam Othomani nominis gloriam excelsus  
„illius animus molitur. Sin autem responsum erit  
„vobis, ipsius suspicabimini, malle Turcarum Inpera-  
„torem, pacem habere cum Veneto Senatu, quàm  
„bellum gerere, atque inclinatos in eam partem  
„animos videritis: tunc Ambrosi & Martine, mutata  
„negotiatione, curam precesque conuerteris eò, vt  
„ne pax aliâ fiat conditione, quàm restitutâ nobis  
„per Senatum eum Cremonâ, castellisque & locis  
„alijs, quae bello hoc capta de nobis habent. Age-  
„tis item & petetis, vt inter pacis eius condiciones  
„excipiatur, ne Veneti cum Galliae Rege quic-  
„quam agant, neue foedere aduersus nos inito  
„teneantur in posterum, neue arma in nos ferant.  
„Si dabit haec annueritque Princeps, vos verò, non  
„pollicebimini praeterea quicquam, & omni vitata  
„rerum aliarum mentione, toti eritis in eo, vt cer-  
„tissimam fidem auferatis fore ita omnia, sicuti pe-  
„tita promissaque erunt. Sin eritis de re aliqua  
„compellati, quam rem à nobis praestari nominatim  
„Othomanus petat: cauete, ne certi quicquam  
„ac definiti nostro nomine promittatis, atque hoc

„ vtemini verbo : quodocunque restituti in Impe-  
„ rium simus, facturos omnia quae velit, & ipsius  
„ fore arbitrij domum, ac fortunam, & vitam, quam  
„ ipse nobis dederit. Pecuniae summa siqua petita  
„ erit itavt nulla declinatio necessitatis eius relinqua-  
„ tur : vos quidem videbitis, vt ea summa quantum  
„ fieri poterit, circumscribatur atque coarctetur :  
„ caeterum, neque pecunia, neque quicquam aliud,  
„ tanti erit, vt aliqua sequatur animorum offensio,  
„ siue alienatio, quae negotium hoc, & spes nostras  
„ inchoatas abruptat turbetue. Cum his igitur  
„ mandatis Ambrosii & Martine profisciscemini, man-  
„ dataque ipsa, & vniuersae legationis ordinem,  
„ praesentium rerum facies & forma gubernabit.  
„ Nos porro legatos alios alia via duos mitemus,  
„ vt si quid vobis in itinere acciderit, quominus  
„ expedito cursu peruenire possitis in Aulam, res  
„ nostra propter eiusmodi casum, detrimenti nihil  
„ patiat. Quod si vtraque legatio feliciter ierit, id  
„ ipsum afferetis ad demonstrandum, quantopere  
„ cordi nobis fuerit, vt ad Principem postulata no-  
„ stra perferrentur, & quantam in ea re spem posi-  
„ tam habuerimus. Vtri priores in Regiam veneritis,  
„ fungemini legationis officio, prout hominum illo-  
„ rum, Aulaeque, & Principis, & rerum habitum  
„ formamque repereritis. Qui posteriores aderunt,  
„ hac se nota & tessera praebebunt prioribus agno-  
„ scendos, si familiae nostrae nomen in primo con-  
„ gressu ter enuntiarint : eaque inter vos arcana  
„ significatio erit, ne qua forte fraus fiat, neue ad  
„ consilia

„ consilia nostra excipienda & cognoscenda , legati  
„ nomen ementitus aliquis sese vobis immiscere  
„ ausit. Legatione peracta, impetratisque suppetijs,  
„ & quoquomodo ad causam adiuncto Turcarum  
„ Imperatore, rem inter vos ita comparabitis atque  
„ partiemini. Excurret statim è vestro numero vnus  
„ ad nos in Germaniam, siue in quem alium locum  
„ delati erimus. Remanebit alius in Regia, nimirum  
„ ad continenda illic & fouenda studia, quae conci-  
„ liata erunt, ne vanescant aut immutentur, neue  
„ res ipsa differatur, quod perinde esset ac si nihil  
„ foret impetratum. Placet autem, huic diligentiae  
„ & curae praeesse potissimum alterum è vobis Am-  
„ brosi & Martine, scribentem subinde ad nos ea,  
„ quae dies feret. Tertius verò aliquis ire cum ter-  
„ restribus copijs debet, & affectari eas ab Con-  
„ stantinopoli per totum iter, isque de itineris pro-  
„ gressu certiores nos faciet per literas & nuntios  
„ quoties dandi & mittendi facultas erit. Epistolae  
„ porrò omneis, quae, vel ex aula, vel ex itine-  
„ re mittentur ad nos, erunt scriptae notis occultis,  
„ ne si fuerint interceptae spes simul omnis nostra  
„ intercepta perierit. Dona Principi, praeter quae  
„ misimus iam, vellemus quidem adhuc mittere,  
„ daremusque vobis perferenda pro maiestate ipsius,  
„ & munificentia nostrâ: sed praesentis fortunae  
„ conditione impedimur: atque hac ipsa excusatione  
„ vtemini etiam apud Purpuratos, fidemque dabitis,  
„ fore, vt recuperato imperio, singuli colantur do-  
„ nis, quae digna ipsorum fastigio, & magnis erga

„ nos meriti erunt . Nec praesentis tantummodo  
„ munificenciae daturi sumus dona : sed aliquot  
„ etiam millia nummum aureorum , si nonnullis  
„ eorum in singulos annos nostro nomine promiten-  
„ da esse duxeritis , pactum promissumque id ratum  
„ habebimus , annuaque tributa in Regiam mitte-  
mus . Hisce monitis & mandatis , Ludouicus  
Sforzia , parto per scelus imperio superstes & ex-  
torris Turcicam illam legationem instruebat , in-  
expiabile flagitium admittens erga Metropolim  
hanc , quae tot perpeffa saevae ac irreligiosae  
dominationis calamitates , nihil tale viderat aut  
meminerat . Exciri Mahometem in Regna Ca-  
tholicae Religionis ab Mediolani Duce ? Adu-  
lationes , & preces , & munera , & tributa  
obsequiumque infimum ultro versa in commu-  
nem hostem ? iteratasque legationes hinc in  
barbaram terram , in falsi Prophetae spurca domi-  
cilia , quod Christiani Principes antea iunctis exerciti-  
bus ibant , ut depellerent humani generis monstrum  
& labem ? At quo tanto pretio suscepimus hanc  
labem , quidue docuit confidere mostro ? vetus ,  
atque iampridem insita mortalium animis superbia ,  
quae infatuat animos , ut in hac humanae vitae  
scena eminere supra alios velint , atque ad ludi-  
crum illud & inane fastigium etiam per scelera  
enitantur . Viderat vrbs Mediolanum , atque haec  
Ambrosiana sedes , pertuleratque violenta tyran-  
norum ingenia , & armatas in Metropolim sectas  
Haereticorum , obfessa templa , quaesitos ad necem

Archiepiscopos, & quicquid aliud in principatu  
 impio, funestum, atrox, dirum accidere potest  
 huic sacrae & Apostolicae potestati. Etiam legiti-  
 mi iustique, sed regnandi artibus importuni princi-  
 pes attulere luctum Vrbi, & sicut gloriosi ac  
 lacti plerique dies, ita infelices plurimi per  
 omne tempus fuerunt. Nullum tamen arbitror  
 acerbum magis ac triste tempus incidisse, quam  
 vbi solita regionum arcanorum vanitate, per  
 susurros primò, deinde apertius paullo & liberius  
 postremò palam & publicè fama haec manavit:  
 fugituum Principem mittere legationes ad Turcam,  
 & Mahometanae Aulæ stipendiarium esse factum.  
 Scilicet quid deinde futurum, si felicissime caderet  
 res, annueretque postulatis barbarus? feros auxi-  
 liares, truculentos socios, impia signa, rapacium  
 copiarum ductores inhumanos, & vno verbo,  
 Turcarum genus per eiusmodi legationes in Italiam  
 acciri: quae colluies acerbiorum omni clade vi-  
 ctoriam datura esset, etiam si res tam incerta, pro  
 explorata iam & praesenti haberetur. Vincere  
 talibus auxilijs, an vinci, calamitosius foret, ex-  
 plicari non posse. Nam vtram in partem Mars  
 anceps belli exitum inclinaret, praedae ac direptio-  
 ni barbaris Italiam fore. Quid si Mahometanus  
 hoc patefacto aditu figere in Italia pedem destina-  
 ret? quantum id dedecus ciuitatis, vnde causa,  
 & initium huic malo? Nusquam esse gratuita  
 tyrannorum, ac ne Regum quidem auxilia, mer-  
 cedemque illam, quae persoluitur auro vel ar-  
 gento,



gento, nisi magnitudine summae inter instrumenta bellica destineretur, speciem tantummodo ac titulum esse consilij intimis maiora semper & diuersa quaedam spectari. Hi ciuium sermones, quaerelaeque & curae erant, postquam missam esse legationem rescuere. Caeterum, ne Ludouico quidem ipsi liber à religione animus erat: idque facile apparet in extrema literarum earundem clausula per quas mandata legatis dabat. Cum enim antea posuisset, dari literas ad Turcam, vt esset fides auctoritasque legationi, subitâ poenitentia mutatum id reperitur: pro literis eiusmodi, pura folia se daturum ait, adscripto nomine signoque impresso: his, prout occasio ferret, vterentur. Scilicet, horror animum subierat, pudorque tanti decoris, idque diuerticulum excogitarat. An verò, inter tantas fortunae minas, trepidus, anhelusque & confusus, dum eas literas dictaret, scriberetue, excogitabat primò aliquid, deinde damnabat, atque hinc illa varietas & inconstantia potuit oriri? Sed non minus miseranda facies in iisdem expressa literis cernitur egestatis, quae regnatorem tot nuper opulentissimarum urbium circumstaret, quamuis alioqui, largus promissis, annua tributa Mahometano polliceretur. Nam in attribuendo assignandoque sumptu legatis, qui tam longum iter, aulamque tam opulentam simul & auaram, cum tantis promissis, de re tanta adirent, quingenti omnino aurei nummi perscripti pronuntiatique extant, quantam hodie summam, semilixa, vel scriba

scriba paullò callidior, ex tam longinqua legatione sese abliguriturum speraret. Nos, dum hanc Ludouici Stortiae fugam, causasque & initia calamitatis, iniuriam calamitatemque alienam, deiectum Imperio iustum heredem, venena in fratris filium, quaeue tragicum hunc dominatum antecessere, quaeue secuta sunt, exsequeremur: honestiora Pontificum negotia seposita hinc habuimus, ne contagione eiusmodi rerum inquinarentur, neue, si secus fieret, alterutra pars, haud perinde ad suam memoriam valeret. Stephani Nardini Pontificatum exceperat vir omni pontificia laude nimine dispar, literis etiam, & familiae splendore clarior: iamque non integre solum & sancte, sed magnifice & splendide per tales viros, quantum conditio temporum eorum sinebat, Sacra administrabantur. Nomen successori Ioannes: origo ex Arcimbolda Gente, quae multa pacis decora tulerat etiam priore aeuo, vnde ad nepotes gloria, & studium aemulandi, idque rursus nouae gloriae alimentum, & ad posteros alios cura, vestigia maiorum sequendi, magnaue hinc per Urbis Annales, Arcimboldorum claritudo. Ioannes ab adolescentia ius ciuile didicit, non sicuti pleraque nobilitas solet, Academiae titulum ad licentiam luxumque referendo, sed ex licentia luxuque iuuenili assumendo id tantum, quo modestiae nomen graue inter lasciuientes temperaret. Ne studia quidem ad communem illam formam fuere, quae syllabarum aucupes, praeconesque formularum ipso, iuris prudentiae

dentiae nomine indignos gignit alitque. Paullus, & Scaeuola, ceterique disciplinae eius antistites & conditores in manibus erant iuueni, sicuti quidem inter gregales manauit primò fama, deinde etiam in Historiam venit. Traditum ita scriptumque est: praeter ipsos ciuilis prudentiae fontes, quos penitus animo comprehensos haberet, omnis veteris memoriae notitiam, quae nostris, quaeue Graecorum literis contineretur, adfuisse ipsi: neque hanc absque delectu, cum, & in tanta Chronographorum turba politissimum quemque rerum gestarum explicatorem & in rebus ipsis, magnorum praesertim Imperatorum, Senatorumue facta & dicta, conuersiones Imperiorum, illustrium virorum exitus, & maximorum motuum minimas causas, aliaque digna Principe viro sequeretur. Etiam retulere consilij studiorum huius Arcimboldi, curam oblectamentumque fuisse ei, cognoscere principum sui temporis consilia & vires, & ipsorum inter se dissidia, & quicquid occultius pararent. Colloquendo cum peritis, & opportune mutando sedem studiorum, & multorum vndique literas curiose lectitando, id assequebatur. Exactis per haec studia compluribus annis, varietate peregrinatus Arcimboldus, cum domum reuenisset, facile de eo fama peruenit in aulam, & magnis statim Imperij muneribus admouetur. Senator primò, deinde Quaestorum Praefes, tum Consiliarius intimus, postea legatus, Florentiam, Venetias, in Galliam, in Germaniam, Romam iuit super ijs rebus,

rebus, quae tunc Sfortiarum domum ac fortunam cum Rege, cum Caesare, cum Pontifice Maximo, cum utroque Senatu implicitam tenebant. Romae cum ageret apud Sixtum IV. captus admiratione, viri Pontifex ille Cardinalem creat, primò quidem Sanctorum Achillis & Nerei, deinde verò Sanctae Praxedis: ea sunt quasi cognomen Patrum: Romana consuetudo Titulos appellat. Ferunt admodum aegre tulisse Sfortiam, quòd vir sibi talis ereptus foret. Ereptum namque interpretabatur, quem sacer honos supra suum ipsius fastigium extulisset. Et rarum est, ut Principes Regesve talia suorum incrementa rectis oculis adspiciant, nisi cum ipsi auctores extitere. Speciem tamen vultumque gratulantis induit, vel quia dignitas ea adulari iam cogebat, vel quia, tam spectatae virtuti proximus ad summum rerum humanarum apicem esse gradus videbatur. Fortasse etiam recordatio meritorum, & tantis experta rebus fides, subitos illos animi motus, quos in omnibus negotijs, malitia principum ciet, ad sincerum verumque gaudium mutant. Novus Cardinalis, ea statim opinione sui commoverat omnium animos, ut Perusium & Umbria ei cum Imperio traderentur, quae provinciae, potentiorum inter se inimicitijs, quotidianisque caedibus prope versae in latrocinium ac rebellionem erant: nec Pontifici Maximo, nec hominibus eius in ea parte magnopere obediebatur. Fuerant quin etiam interfecti nonnulli ex Pontificijs illis ministris inter exercendae quaestionis

apparatum, siue dum praeferre quempiam tentarent, siue dum mandata alia exsequerentur. Et satis constabat, inita fuisse consilia in prioris legati caput, imbutosque sicarios inimicorum suorum, sanguine, sacra etiam illam potestatem, veluti sicarium inimicumque vnum destinasse caedi, nisi paratas insidias vimque imminuentem, cautior ad fugam solertia Praefidis euitasset. Referam inhumanum & horribile dictum, quod in ea Prouincia ante Arcimbaldi aduentum, leue quotidianumque habebatur. Hereditaria illa odia praepotentum prouincialium, ac minus etiam potentum, sed crudelitate insigni, ardentibus ad vindictae dulcedinem ingenijs, eò excedebant vt totae domus internecione delerentur: nec ante conquiescebant, quam ex inimica stirpe, quicquid etiam sexu, vel aetate inualidum, delessent ferro. Alliserat aliquis ad parietem paruos liberos hominis inimici, grauidamque coniugem obtruncarat, & quomodo rostra vnguesue ferarum, ostentatione venatoria postibus affiguntur, ita stirpis inuisae reliquum vnum infantem rabies eadem ad fores confixerat. Atque palmaria haec demum, gloriosaeque inter illos facinorae facinora erant: cruenta verò illa officina calebat assidue feruebatque, vel mandati semper in alicuius caput, vel conducendarum operarum, vel insidias struendi. Haec disciplina iuuenum erat, perseuerabant senes, cum successor simul & ultor electus Arcimboldus ita coercuit gentem, vt nobile exemplum statueret etiam in posterum ad caeteros,

teros, si quos fortè similis intestinus furor aliquando lacerare coepisset. Namque, priusquam in Prouinciam iret, diligentissime firmavit arces & castella praesidijs, immissoque solutis ordinibus milite, mox ipse subsequutus cum validis equitum turmis, sanguinarios illos homines repentino terrore confudit. Truculenti aliàs & diri trepidabant adspectu Cardinalis, quem & gratiae imperuium antecedens fama nuntiarat, & vndique armatum, videbant. Sed nihil magis exterruerat, quàm, quòd, dissimulatione mira, sine strepitu vllò firmatae arces, sparsique per prouinciam manipuli essent & communi omnes metu perculsi, factionum & certaminum, inimicitiarumque prope iam obliuiscabantur. Postquam ea caligo animis offusa est, nihil quidem ab legato mouebatur, vnde coniectura aliqua posset oriri, quidnam ille acturus esset: appositi tamen speculatores & homines idonei passim obseruabant quicquid partium duces agerent ac mouerent: colloctiones atque congressus nocturni siue diurni, commercia traiectionesque pecuniarum, consilia denique omnia referebantur in Aulam. Simul erant ad opportuna loca dispositae stationes armatorum, ne elaberentur aliqui, quos & fugam meditari compertum erat, & comprehendere, retinerique domi tutius habebatur. Quà versi in latrocinium globi aliquot, ad extremos prouinciae fines constiterant, globis erat maioribus imperatum, vt regione vagarentur eadem: simul admoniti praesidiorum, & arcium praefecti, vt

quà cuique proximum esset, cum suis in eos excurrerent; edictumque statim; qui exsul, quiue capite damnatus, exulem alium interfecisset, is ut impunitatem haberet omnium, quae commississet antea, tutoque ac libere in patria commoraretur. Hac indagine Cardinalis legatusque Arcimboldus, cum Prouinciales illos ex caede viuentes cinxisset, vulgoque existimarent, satis fore ei, si quietam haberet Prouinciam, ac nullum nouum in eius imperio flagitium admitteretur, ipse quidem, tamquam praesenti tranquillitate ac modestia paceque contentus aliquantisper quiescebat. Mox, sopita omnium fere expectatione, paucos insignes duces factionum, & scelerum capita, quos euadere volebat ne absentes etiam Prouinciae statum sollicitarent, vnius horae momento omnes, vnaque nocturna satellitum & militum impressione circumscriptos, in latumias & castella seorsim misit; iacebantque ibi per dies aliquot inuicem ignari captiuitatis alienae, ac se tantummodo quisque esse captum arbitrabatur. Ita comprehensis vinctisque flagitiorum & saeuitiae proceribus caeteri, queis exsilium sine publica noxa vel periculo perniciem egestatemque vltimam afferret, & edictis literisque quotidianis, & misso viatore, & denuntiatione poenarum citabantur. Patuit his fuga: cumque caput & vitam quisque suam fortunis omnibus anteferebat, abiire sic multi cum vanis fugiendi artibus, nec sine vaniore laetitia quòd Magistratum elusissent. Legati erat artificium, ut sine carnifice,



carnifice, & securi purgaret Prouinciam, nec locus interea relinquebatur infami ac vulgatae in multos principes querelae: crimina reosque conquiri, ut aerarium augetetur. Aufugiebant enim ultro, & capita deuota poenis vltimis, voluntaria fortunarum amissione redimebant. Seruitia, quorum manu atrocissimum quodque facinus patratum, erat, amisso pabulo, vestigia dominorum sequebantur: si qui horum fuere segniores adfugam, de his sumpta supplicia seruilem in modum, & vili sanguine satisfactum exemplo. Latronum & exsulum veteranae cohortes instrumenta saeuientibus, & modestis etiam calamitas, prouinciaeque totius malum, primo statim Cardinalis aduentu, sicut ad tepores solis nebulae dilabuntur, euanuerant. Namque promulgato edicto, quod occidenti socium, impunitatem praemiaque insuper dabat, aut inter ipsa latrocinia latebrasque, decollabantur à gregalibus subinde aliqui, & quotidiana exempla dissociabant ceteros, aut ab emissarijs opprimebantur. Feroces procerum animi, tabe carceris, & fortunae conditionem aggrauante sumptu, & audita demum in vinculis prouinciae totius trepidatione, fugaque, vel captiuitate, vel nece aliorum, ac suum inde periculum aestimantes conscenescebant ac frangebantur rabie, moerore, metu. Conticuerat atque deserbuerat omnis repente furor, ac si quod imperium nutusue Cardinalis in publicum foret, sedulo cuncta atque obedienter fiebant tamquam à bene moratis, vel discipulis in magistrum,

strum, vel filijs in parentem. Tunc ille, perstrictam & afflatam ceu fulguris ictu prouinciam, cernens, satis iam esse terroris, satisque minarum arbitratus, institit etiam tractare quietis vias, & fomenta adhibere animis, vt ferre concordiam, vellent. Cognitis inimicitiarum causis, & origine factionum, quae familias iam inde à principio alienassent iniurijs etiam & damnis, quae essent accepta, & illata vicissim, pacificatores ad reconciliandas eas familias adhibebat idoneos, & auctoritatem, ipse suam interponendo, spem faciebat, tum honesti tutique redditus in patriam illis qui aufugissent, tum maturae libertatis ac salutis ijs qui in custodia haberentur. Fortunae interim noxiorum atterebantur. Corpora in vinculis degebant: & amicum aliàs patriae nomen exsulibus horrore erat. Sed cuncta, quae Arcimboldus in Romana illo legatione imperioque fecerit aut instituerit, persequi non operae habeo cum adea, quae sunt huius Metropolitanì instituti vix sufficiam. Erat adhuc in prouincia Cardinalis, cum Episcopus Nouariae mortuus multos eius Ecclesiae cupidos excitauit. Namque Nouariensis Ecclesia, praeterquam quod late admodum patet, estque in amoena Insubriae parte vectigalibus instructa satis amplis, adiunctam etiam habet dynastiam, imperiumque locorum, aliquot haud ignobilium, & fertilissimi tractus. Ideo pontificatum eum atque iurisdictionem haud obscuris in Ecclesia meritis homines, appetebant. Sed Pontifex Sixtus Arcimboldum praetulit.

Sixto

Sixto postea successit Innocentius VIII. isque vacuam Nardini morte Metropolim hanc eidem mandat Arcimboldo, quam triennio rexit absens. Nitebatur enim per ea tempora Romana res huius praecipue consilij & auctoritate, nec ei discedere ab vrbe iam licebat, ibique est mortuus. Adoleuerat ad omnem eximiae virtutis gloriam disciplina & imitatione Ioannis Arcimboldi, frater eius Guidus Antonius non minus ingenij studiorumque similitudine quàm natura frater. Quippe animaduersum hoc in omni aeuo compertumque est, ut corporum, in familijs, ita etiam animorum esse similitudines atque germanitates, & quomodo naeuum aui notamue aliam, post longum saeculorum ambitum retulit nepos aliquando vnus, ita vitia virtutesque, & mores habitusue nepotum prauis siue honestis saepe regenerauere auos. In fratribus quidem id ipsum vsu venire tanto magis potest, ut referant alterius alter animum corpusue eaque naturae imitamenta passim spectantur. Caeterum Arcimboldis hisce fratribus etiam quae vano nomine dicitur fortuna vim suam immiscuisse visa est, ut euentis quoque rerum, & honoribus ac vitae cursu congruerent inter se, itineribusque ijsdem fere irent. Fuit in Guido Antonio praeter iuris ciuilis prudentiam studium illud litteraturae interioris, quod à Cardinale adhibitum fuisse retulimus, ut ipsum ius ciuile, temporum & hominum vitio barbarum prope atque infuscum expoliret. Fuit item animus ei, sicut fratri, gubernator qui-

dam,

dam, & apte compositus ex modestia simul, & quicquid illud est, quod huic virtuti mansuetudinique diuersum gubernatio populorum iniungit. Ad tractanda principum negotia par cum fratre, habilitas, & quidquid illud item in moribus & sermone requiritur affine regnantium animis, vt minorum alloquia grate admittant. Ea nimirum habilitate & gratia, naturaeque munere Ludouico Principi placuerat, quoties inter illos nutantis fortunae motus, atque etiam antequam nutare inciperet, mittere voluerat de imperij rebus ad amicos Principes legatum. Ita Neapolim, in Pannoniam, in Hispaniam, ac denique Romam est missus. Sed & munera domi magistratusque gesserat eosdem fere, qui Cardinalis etiam animum in minore fortuna nobilitarant, quosue ille nobilitarat. Consiliarius intimus fuerat vtriusque Sfortiae: iura pacis, arbitria belli, foedera & societates, & rem quoque familiarem principis tractarat. Pertot muncera peruagatus cum esset, velut struente atque continuante fortuna illum fraternae similitudinis tenorem in extremo quoque actu, euenerat, vt Romam à Principe legaretur sub idem fere tempus, quo tempore Cardinalis decessit. Ibi, sicuti antea frater, ex Sfortiae legato, Mediolani Archiepiscopus creatur. Et vt in simili re parique negotio, idem etiam Principis animus erga nouam hominis sui dignitatem fuit. Torua reputabat mente Romanam indulgentiam erga domum hanc Arcimboldorum, in qua summus vrbis honos, Ambrosianusque

7  
ianusque Pontificatus continuata per fratres successione retineretur. Amisso quoque ministro, & quoddam occasione legationis creuisset, angebatur. Sed postquam redijt ille Mediolanum, Metropolitique capeffiuit, fiebat artibus & lenitate noui Archiepiscopi, vt mansuefieret atque verteretur in bonum, quicquid asperi, siue iniucundi erat. Super omnia commouerat animos splendor, & magnificentia viri, & proiecta cura pecuniae, quae tabes ac venenum omnis honestae famae esse consuevit. Priores Archiepiscopi, siue incuria aedificandi, siue temporum ad eam rem inscitia, siue etiam perturbatione ac varietate honeste ac laxeminus aliquanto habitabant, quam Urbis nomen, & amplitudo Metropolitana, tantaeque opes postularent. Sanè voluerant subinde aliqui veterum Pontificum, vt cuique animus & otium obtigerat, dignitatis aliquid adijcere domicilio, atque dum id conantur, aliquoties etiam mutata translataque Sedes erat. Nondum tamen, vt dixi, satis commode satisfue decore ad hanc sacri Imperij maiestatem habitabatur. Arcimbaldus ei curae animum adiecit: & sicuti politior iam cultiorque aetas illa erat, impetrata etiam à Principe, area, extulit aedes in amplitudinem eam, quae contenta esse possit etiam haec temporum nostrorum elegantia supergressa nimium & aspernata priores conatus. Templi maximi cultus vt auctior maiorque esset, ad veterem Sacricolarum numerum, tredecim adiecit alios, & pecuniam, vnde res

diuina bis quotidie in perpetuum fieret, assignauit. Attribuit quoque pecuniae magnam vim ea conditione, vt perducendo ad fastigium operi infunderetur. Haec agentem mors oppressit nono anno postquam Archiepiscopus creatus erat. Successit deinde ei fratris filius Octauianus nomine cùm trigessimum aetatis annum, vel, vt alij malunt, trigessimum alterum haud dum expleisset. Tanta indoles virtutis fuit. Huius animum, siue natura ipsius, siue parentis voluntas flexit in alia studia, quàm quae maiores adamarant. Namque cognita philosophiae parte, quae versatur in subtilitate differendi, deinde ea, quae posita est in naturae obscuritate moribusque hominum, & vita, transgressus ad celestia & diuina, totum hunc maximarum scientiarum cursum ita confecit, vt non anteferretur solum aequalibus, sed esset etiam admirationi illis, qui in eo genere aetatem consumpserant. Ea certe fama de iuvene hoc manauit, atque ita nobis narrauerunt seniores, qui aiebant sese puerilibus suis annis audiuisse grandaeuos alios memorantes auditum id sibi cognitumque ex maioribus natum cùm ipsi adolescentes adhuc essent. Curricula illa vtriusque philosophiae feliciter emensus, sicuti fama eadem tenet, ac sicut etiam literis traditum est, conqueuit in studio quodam etiam politiore, vnde nitor & auctoritas, pondusue literis illis, quas antea sectatus erat. Voluit enim hoc assequi, vt praeter latini sermonis elegantiam & copiam, quam semper ad studia illa seueriora adiunxisset, Graecorum

eorum etiam Hebraeorumque literis, tum ad monumenta utriusque linguae interpretanda, tum ad explicandos animi sui sensus, instructus expeditusque esset. Sequebatur iam eum fama, tamquam literati gentium etiam illarum homines concederent ipsi tempestate ea linguae suae principatum: atque cum publico hoc favore maturam capeffendis honoribus iuuentam ferens, Romam est profectus. Iuuenis erat tunc annorum fere quatuor & viginti, floremque illum aetatis, mite ingenium, & dignitas oris adiuuabant. Itaque, quamquam inciderat in tempora non admodum amica virtuti, cumque Alexandri VI. Pontificatus, alijs potius hominibus & ingenijs fauere videretur, omnia tamen est consecutus, quae gratuito contingere possent: ac sub Pontifice alio nihil fore ei imperuium autumabat urbis rumor. Pius III. Alexandro mortuo, regimen humani generis adeptus id statim augurium animorum comprobauit, assumpto in Patru locum iuene: ac sperabantur caetera cum mors eripuit Vrbi Archiepiscopum, qui ostensus magis erat quam datus. In aliquot deinde annos durauit haec nobis calamitas, ut absente Archiepiscopo, per Vicarios regeremur, pastorumque nomina audiremus magis quam ipsos videremus. Namque principes Estenses, Hippolytus primus, & Hippolytus secundus, tum, ob fortunae magnitudinem, in qua nati educatique erant, tum ob legationes amplissimas, aliaque Romana munera, queis occupabantur,



haud magnopere rem hanc Mediolanensem curabant, inspiciebantur. Ita, per eos annos, disciplina solutior fuit, & squallebat Ciuitas, non Pontificum tantummodo desiderio, sed etiam importunitate noui, nec duraturi dominatus, cuius mala & turbas nulla commodius narratio repraesentauerit quàm nomen ipsum Gentis. Ac tanto maior erat ex ea gente clades vastitasque Mediolani, quia Rex ipse redierat in Galliam, quo praesente vix contineretur exercitus illius licentia: adeò, per se furentes, contemptu etiam absentis accendebantur. Imperator autem ipse Gallicorum exercituum, cui discedens Rex summam reliquerat omnium rerum potestatem, eiusmodi erat, vt si vel modestia exercitui, vel vrbi otium maneret, posset ipse partem vtramque in furorem agere factionum stimulis, & magni nominis inuidiâ, rabieque & instinctu multorum qui fouebant eius viri potentiam, siue detrectabant. Iacobus is erat Triuultius, animo excelsus, vt inimici interpretabantur, inquieto, opibus nimis. Ludouico infensus, Gallis ob multa belli pacisque decora inuisus, neque aberat suspicio quasi plusquam ciuilia agigaret. Inter Mediolanenses fecerat sese Guelfarum partium caput, eamque sectam dum fauore fauore effert, ciuilia certamina exercuerat, quomodo, ne inter hostes quidem faueatur. Hinc dolor & ira Gibellinis aduersae factioni; postquam arbitrio inimici se esse subiectos viderunt. Et animos ipse asperabat, exercendo per inimicorum iniurias imperium,

perium, eiusque vim vniuersam ad opprimendos aduersarios conferendo. Ad haec, Ciuitas tota militaribus alijs iniurijs foede lacerabatur, nusquam prohibente Triuultio nisi cum iniuriae pars ad Guelfos illos suos pertineret. Si citra nominis eiusdamna dedecusue staret rapina vel libido, impune erat & magnus alioqui vir Triuultius, imperijque seueri, partium studio sic auferebatur. Ita, dum inimicitijs & odijs indulgetur, illustres etiam familiae suscepere labe, quae vel inimicissimum animum aliquo sensu communis humanitatis mouere possent, atque permissam eam Gallico exercitui licentiam sacrata quoque claustra sentire. Triuultius demum ipse ardore animi progressus eò, vt quosdam ob tributa tumultuantes medio in foro sua manu obtruncarit, facinore hoc totam irritauit plebem, & ore vulgi Sfortia passim Gallis etiam audientibus poscebatur, seditiosa ea vox rebellandi principium & nouorum malorum causa erat. Cumque cresceret quotidie, hinc intemperantia & saeuitia Gallici dominatus, hinc fremitus & consternatio Gibellinorum, & in Sfortiam fauor; ea res accendit exuli principi animum ad tentandam Imperij recuperandi spem celeriore aliquanto quam quae Caesariana vel Mahometana ope inchoata erat. Non enim audiebat tantummodo voces adspernantium Gallici Imperij formam, atque fauentium sibi: sed etiam ob indignitatem rerum, quae quotidie fiebant. Vltro relicta patria nobilissimus quisque ad eum ibat, ac si redire vellet,

X vellet, pecuniam & arma, & vitam ipsi suam pol-  
licebantur. His erectus Ludouicus vna cum Asca-  
nio fratre, tumultuaria Heluetiorum & Belgarum  
manu, celeritate mira superatis montibus, nauibus-  
que conscensis, per Larium lacum vrbi Nouoco-  
mo successit. Eadem ibi alienatio in Gallos erat,  
quam Mediolani conciuerant rapacitas & libido,  
duo aptissima instrumenta demoliendis imperijs,  
etiam inueteratis, nedum, vt recens illud & nu-  
perrime inchoatum aduersus eam tabem impetum-  
ue stare posset. Itaque municipales, vt adesse Sfor-  
tiam senserunt, nihil sane cunctati, faustis vocibus,  
venire iustum legitimumque principem iubent;  
armis, & infesto clamore Gallos proturbant.  
Neque illi segniter cessere, statimque Sfortia sine  
sanguine oppidum receperat. Id Mediolani audi-  
tum, satis iam per se concitatam multitudinem ar-  
mauit, imparque Triuultius absente magna exer-  
citus parte, cum se noctu in arcem abdidisset, po-  
stridie excessit, Mox Cardinalis Ascanius & Ludo-  
uicus urbem intrauere insigni leuitate fortunae  
militaris ad eripienda restituendaque imperia  
dominosque commutandos. Sed non pari facili-  
tate caeterae vrbes, vel aliquam etiam Sfortiae  
violentiam olim expertae, vel eandem pro Gallo  
fortunae commutationem ac leuitatem metuentes,  
reducem Ludouicum admittebant. Iam ille Me-  
tropolim tenebat, & Gallicum adhuc retinere  
praesidium malebant Laus & Placentia, & quic-  
quid terrarum in transpadano tractu subiectum  
Metropoli

Metropoli esset. Velut ex rerum euentu capturae consilium cunctabantur, atque suspensos ex fortuna animos gerebant, ex ijs, quae post fugam repente Ludouico tribuisset, quàm incerta esset, aestimantes. Itali verò principes, aut expectatione fluctuabant eadem, aut subsidia leuiora pollicebantur, quàm quae praesens necessitas rerum, & imminens rursus ex Gallia periculum postularet. Instaurabatur ab Rege bellum apparatu maiore: pudorque & dolor ob amissam Insubriae Metropolim, & ira in Mediolanenses, quò maiora erant incitamenta Gallo, tantò plus minarum, Sfortiae cacterisque per Italiam dominationibus ea rerum, facies ostendebat. Et Cremonae Episcopus missus ab Cardinale Ascanio ad Venetos, triste responsum retulerat: placere Senatui foedus, quod cum Galliae Rege ictum haberent, neque legationem, praeterea vllam esse admissuros, quae aduersus initam eam societatem mitteretur. Sanscuerinas verò Cardinalis in Germaniam ad Caesarem eodem terrore destinatus, spem illam tardi nimium lenti-que moliminis haud magnopere mouebat. Genuenses appellati precibus infimis, vt pristina erga Sfortiam obsequia fidemque resumerent, praecise abnuebant: itemque Florentini appellati de pecuniae summa quam olim eorum Reip. credidisset, prope inficiabantur. Gonzaga, cum in D. Michaelis ordinem ab Rege Galliae cooptatus esset, Ordinis eius religionem & insignia excusabat, quominus ab Sfortia contra Regem suum staret ferretue

retue arma. Irritum in tanto discrimine ac propè contemptum auxilium erant, Mirandulanus, & Carpenſis, & Corregienſis, & Rubeus, & Verminæus, nobilium quidem Regulorum, atque Dynaſtarum nomina, ſed nihil ad Gallici apparatus molem. Ne Senenſes quidem cum certo pecuniæ numero, momenti quicquam faciiebant. Tanta vi Gallus ingruerat. Sed quamquam erant arcta omnia Ludouico, non tamen ei deſuit miles: & bene geſſerat rem, pugnaueratque manibus æquis niſi proditio malum vltimum acceſſiſſet. Cùm enim in vtroque exercitu magnus Heluetiorum numerus eſſet, eaeque copiae ductores ſuæ gentis haberent, compoſita inter eos duces fraude, Sfortia rerum humanarum ludibrium fuit, ac præbuit foedius aliquanto ſpectaculum, quàm cùm antea fugitiuus ab vrbe proficiſceretur. Ad Nouariam, inſtante hoſte, barbari ferociter ac ſeditioſe flagitare ſtipendium incipiunt: ni perſolutum illico numeratumque ſit, ſeſe domum eſſe abituros minitantur. Non erat principi ad manum, vnde ſatiſfieret, relictusque Mediolani Cardinalis Aſcanius in oppugnatione Arcis, anxie tentabat mouebatque omnia, vt conficeret aliquid pecuniæ, quod mitteretur ad exercitum. Id ipſum excuſans oſtendenſque Ludouicus, prolato argento omni, quod in militari ſuo inſtrumento domeſticaque ſuppelleſtile haberet, vaſa illa tumultuantibus offert. Addebat preces, & lacrymas, haud minus efficaci ad humanum animum delinimento, ſi gens eſſet

esset alia, vel nisi parata iam & meditata proditio penitus animos efferasset. Accepto quod dabatur argento, cum Sfortia ducere in aciem vellet, summae rei discrimen facturus, quod vnicum esse remedium effugiumque malorum putabat, tunc verò Heluetij talia quaedam dicere coeperunt. Esse in contraria acie fratres consanguineosque suos, quorum nollent foedari sanguine: nec posse cum alijs suae nationis hominibus absque principum auctoritate dimicare: super ea re, quid mandati, quidue decreti ab domo afferretur, ipsis esse expectandum. Cum eiusmodi dictis abibant, ut sese ad Gallici exercitus Heluetios adiungerent, vnoque agmine omnes irent domum. Tunc Ludovicus obsecrare institit, ut quando ita decretum esset, sinerent saltem ipsum quoque ire vnà, Helueticoque gregali cultu caeteris peditibus immistum abducerent secum atque conseruarent. Fortasse nihil aliud maluerant proditores ipsi, statimque annuentibus eis, Sfortia braccatus, & coeno foedatus inter calones, & lixas ibat deforme spectaculum fortunae principalis. Per media Gallorum castra ducebatur, ut ipse credebat, occultus & ignoratus: ut res docuit, monstratus hosti per eos ipsos qui tegentium & occultantium imagine ducebant. Ita comprehensus repente & detracta larua in custodiam datus, tam ignominioso consilij infelicitis euentu confudit etiam hostium animos, quibus tantae rei laetitia ex insperato oblata erat.

Neque Cardinalis Ascanij fuga felicior fuit. Is co-

Vuu

gnito

ignito fratris casu , victori & irato , & mox adfuturo hosti subducere sese cum properaret , nocturno fatigatus cursu quiescere paulisper ad Ripaltam voluit , & eius rei causa diuertit ad Conradum Landum hominem sibi & vetustate amicitiae , & verò etiam affinitate coniunctum . Fugiebant vnà cum Cardinale potentissimus , & clarissimus quisq; Gibellinorum , itemque è Nobilitate Mediolanensi viri graues secuti Cardinalis aulam , & in varia ministeria assumpti , prout cuiq; , maximarum rerum vsus & oblectando principi sermo eruditus , & artes bonae . Ea cohors affectata Cardinalem , per domum illam inhospitam fessa corpora strauerat , & securi de sua herilique salute partem quietis hauriebant . Sed proditori Placentino , rebus suis opportuna res visa , dum sopitos domi hospites haberet , gratissimum id munus exhibere Gallo . Nec mora : oblitus amicitiae , hospitijque & sanguinis oblitus , accitis ab Placentia Carolo Vrsino , & Soncino Benzono , qui in Veneto exercitu ordines ductabant , fessam eam inermemque , & semisomnem manum tradit . Varia inde & miserrima conditio captiuorum fratrum fuit , quorum olim nomen & famam res Italiae cum admiratione respiciebant . Cardinalem primò Venetias duxere Benzonus & Vrsinus , quibus à proditore traditus erat . Ibi aliquandiu seuerè magis quam honeste custoditus , repetente dein Gallo deportatur Lugdunum , mox in Burgensem arcem ablegatur , quae biennio ante custodia Regis ipsius fuerat .



fuerat. Ludouicus ipse protinus è castris in urbem eandem Lugdunum cum valido praesidio raptatus, ut in conspectum Regis admitteretur, impetrare non potuit. Ostentui ciuibus fuit: dein intra arcem inclusus extabuit moerore vir alioqui magnus, & dignus utique principatu, nisi hunc ipsum scelere partum habuisset, ex quo factum est, ut mala principia similes euentus consequerentur. Mediolanenses attoniti captiuitate Sfortiarum, & exitio familiae, & alternantis fortunae ludis, Gallica vi, rebellione sua, dolore hinc, poenitentiaque & metu, per supplices Oratores polliciti fidem & obsequium in posterum, veniam in praeterita ab Rege impetrauere. Sed haec ipsa fluxa irritaque erant, & quaedam eiusmodi rerum series parabatur, ut ab nouo Principe venia esset petenda, quòd huic fauissent. Namque dum Ludouicus in Gallia tabe carceris absimitur, Maximilianus Caesar in paternum imperium restituendi Maximiani suscepit actionem, estque restitutus, ut paulò post etiam ipse caperetur, & paternae calamitatis simulacrum fieret. Anno tertio postquam, erat ab Caesare restitutus, capitur ab Galliae Rege, atque super patris fere vestigia ducitur in Galliam attributo triginta trium millium aureorum nummum vestigiali in cultum & alimenta captiui principis. Hae vicissitudines & haec profecto scena circa hanc Insubriae Metropolim spectabatur: ac sicuti truditur clauo clauus, ita Sfortia Gallum, & Gallus Sfortiam inuicem extrudebant.

Parabantur enim rursus eae vices, eratque futurum adhuc, vt ab Sfortia Gallus pelleretur Caroli Caesaris auxilio, atque hic ipse pelleret primò illum, deinde restitueret. Neque finis certaminum & varietatum aliarum, donec versa Sfortiarum, stirpe rediret Mediolanense imperium ad Caesarem: atque ibi in conseruatrice ac praeside Catholici nominis Domo diu illaceffitum maneret. Haec ipsa cum causis rerum atque consilij trahentia secum conditionem, & fortunas statumque Vrbis, paulò post ordine cuncta exequar, Nunc Ludouico capto, dominantibus Gallis, acciderat hoc, vt indicto aduersus Pontificem, Maximum Concilio sedes vrbs ipsa Mediolanum destinaretur: eaque res gesta est in hunc modum. Postquam Iulius II. Pont. Max. ingenij vehementia verso in arma Pontificatu, maiestatem illam galea thoraceque foedare visus erat, ac nouo ad eam diem exemplo miscuerat sese palam factionibus, & odijs, & castris feceratque sese quasi caeterorum principum vnum, & publicarum cladum partem: tunc principes & Reges alij, quorum ille meruerat conciueratq; odia, siue profanum adspersati Pontificem, siue ad suas ipsorum vtilitates irasue titulo hoc vfi, illam Concilij indicendi actionem mouere atque ferre clandestinis primò, deinde publicis consilij atque sermonibus institerunt. Ea vltima necessitas est Ecclesiae desperatae: id vinculum, id fraenum antiquitus repertum supremae potestati, quotiescunq; Pontificis ipsius culpa, & vitio

Catholica

Catholica fides detrimenti aliquid accipiat, neque aliter vnquam illuc descenditur. Sed Iulium hunc praeter illam armorum atque certaminum inuidiam grauabat etiam sinistra principum interpretatio, cum idipsum, quod proferre fines Imperij, & amplificare Romanae Ecclesiae opes conaretur, ad priuatae gloriae cupidinem referrent. Adeò nimirum in malam partem accipiuntur, tam benè quàm malè facta, vbi coepit aliquis esse inuisus, & vbi censura iudiciumque rerum alienarum, cum aliqua etiam nostra priuata cura peragitur. Nam alioqui magna, & excelsa quaedam erat cura Pontificis, vindicare patrimonium Apostolicum, repetere armis quae per vim aut fraudem olim essent intercepta loca: dum id ageret, obiectare periculis caput, & ad bombardae etiam ictus aliquando expositum manere. Caeterum, vbi aduersus bellatorem Iulium, telum illud acerrimum excogitauere Principes infensi, palamque Concilij terribile nomen intentabant: statim etiam inter Purpuratos erant studia fauentium ei actioni, siue aduersantium, prout scilicet quemque Cardinalem, principum, illorum aliquis, Pontifexue ipse addictum sibi obstrictumque haberet. Varie agitata, & iactata res eò demum adducitur vt Mediolani congregati treis legati Caesaris, legati Regis Galliae, principumq; aliorum legati vn. cum factionis eius Cardinalibus Concilio diem statuerent Cal. ipsas Septemb. anni huius, qui motu hoc praecipue insignis à Christo nato millesimus quingentesimus vndecimus agebatur.

tur . Ad eum diem conueniri Pisas iuebant , elegerantque prius conuentui locum cum ob alias etiam opportunitates, sed praesertim ob memoriam prosperarum olim illic rerum cum de Pontificatu ambigeretur . Edixerant proposuerantque locis omnibus: Pontifex ipse Iulius vt adesset : ni faceret, interminabantur atque denuntiabant ea, quae interminari ac denuntiare mos est etiam Apostolicae potestati, quoties edicta promulgat . Tanta coniuratorum audacia perculerat haud dubie Pontificem Maximum, confuderatque : sed eodem spiritu ac seruire, quo arma tractabat, etiam ad iura exsequenda acer, indicto aduersus Pisana conuenticula legitimo Lateranensi Concilio, causam protinus aduersariorum actionemque iugularat . Simul poenis acer, potentissimum quemque Cardinalem secessionis auctores profanat Apostolicis notis exauguratque, & sacro senatu mouet in perpetuum, ordineque illo indignos declarat . Illi tamen cum assentibus fautoribusque suis in Pisarum vrbe perseuerabant, paria decreta, sed non pari auctoritate facientes in Pontificem Iulium, donec parua dictu & fortuita res deturbaret eos inde, Mediolanumque cum insana trepidatione compelleret, vt mox etiam hinc disiecto conuentu dissiparentur . Cum enim ea ciuitas iam inde a principio haud vnquam concoquere hoc potuisset, quod Romanae secessionis semper ipsa sedes atque receptaculum fieret, ac propter eam causam tumultuari non desineret : mulierculae vnus impudicae

dicac aduersus Gallum militem clamor & q̄ iri-  
tatio, paucos primò, deinde plures, postremo  
ciuitatem vniuersam iam per se irritatam armauit.  
In eo tumultu, quidam etiam è familiaribus Car-  
dinalium vulnerati sunt, aut interfecti, & crude-  
scente in singula momenta seditione, Patribus haud  
dubie ipsis periculum imminebat. Iraque damnosum  
nimis ad Concilij dignitatem & famam existimantes,  
si quis è suo fortè numero violaretur, post die  
seus dici, quo tumultuatum erat, altero suo con-  
gressu, quam secundam ipsi Sessionem appellabant,  
decretum fecere, vt relicta infesta vrbe, Mediola-  
num inde transirent ad reliquas res consultandas  
atque perperrandas, quarum rerum causa Concilium  
esset indictum. Quintodecimo die, postquam ve-  
nerant Pisas, sublati repente rebus Mediolanum  
inde abibant, eratque per totum agmen minime  
simplex habitus animorum. Cardinales & capita-  
lerum, egregie, vt in malis consultum esse existi-  
mationi ac saluti arbitrabantur, quòd repente con-  
sternatis ad arma Pisanis, violentia & ira populi  
neminem ipsorum attigisset. In urbem iri opulen-  
tissimam, tranquille ibi ac tuto cuncta peracturos  
in Metropoli totius Insubriae, in Galliae Regis  
imperio, recentique dominatu, vbi flagrantissima  
erga nouum principem obsequia ciuium forent, vbi  
demum alterius Romae nomen & fama antiquitus  
sederet. Alijs terrori ad exitum rerum erat nota.  
Vrbis religio, ne Pisanos ibi quoque motus inue-  
nirent: alijs id ipsum in spem trahebatur, si actio  
tam

tam iniqua & irreligiosa consistere posset nusquam,  
semperque impediretur. Erant enim in eo numero  
pleriq; , quos, non ipsorum voluntas, sed Galliae  
Regis imperium ad celebrandum eiusmodi conuen-  
ticulum adduxisset. Hi moras & impedimenta  
omnia ponebant in lucro: ac si Mediolani etiam,  
vti Pisis, tumulti nonnihil oriretur, diem fortasse  
allaturam aliquid ad sanandos animos, resque  
componendas autumabant. Non ego subij-  
ciam oculis quaecunque, adueniente impiorum  
coetu faceret omnis bene morata & Catholica  
Ciuitas: sed transferam huc testimonium auctori-  
tatemque Francisci Guiciardini, apud quem de ta-  
lium hominum in urbem nostram aduentu reperi-

„ ita fere scriptum. Cardinales, vbi peruenere Me-  
„ diolanum, contemptionem sui nominis, atque  
„ peragenda rei difficultates reperere easdem, quæ  
„ in Pifarum vrbe conflictati erant. Clerus namque  
„ Mediolanensis, quasi, non Purpurati patres, sed  
„ infanda capita & homines execrandi urbem intras-  
„ sent: ita repente cuncta diuinarum rerum officia  
„ cultumque sua sponte omisit. Multitudo autem,  
„ ipsa, quotiescunque eorum aliquis egrederetur in  
„ publicum, non tacite praetereuntes execrabatur,  
„ sed contumeliosis alte vocibus personabat: terga  
„ passim obuertebant, & motu corporum indecoro,  
„ dignitatem illudebant eam, quam semper antea  
„ cæu diuinum aliquid adorare soliti fuissent. Cum-  
„ que promiscue vniuersos, & sibilis & probris in-  
„ sectarentur, infestissima irrisio Cardinalem Sanctæ

Crucis

„ Crucis excipiebat , propterea quod ille ; & supra  
„ cacteros emineret magnitudine nominis ac fania ;  
„ & vltimo Pisano confessu , caput Praefessque Con-  
„ cilio creatus esset . Exsequendo inde caetera scrip-  
ptor idem refert querimonias etiam , quae populi  
Mediolanensis indignatione iactatae assidue in  
Concilium actionemque totam , haud sine magna  
gloria ciuitatis vulgarentur . Sed repressit aliquan-  
tis per constantiam ciuium fregitque Gaston Foix ,  
qui pro Galliae Rege praerat Vrbi , armaque &  
exercitum habebat . Is etiam domuit vi sua , &  
subegit presenti terrore Sacerdotes , Clerumque  
vniuersum , vti repeterent pristina sacrorum munia ,  
neque quicquam in vlla diuini cultus parte desi-  
deraretur . Hinc robur & fiducia Cardinalibus in-  
staurando Concilio , cui sedem circumspicere no-  
uam coeperant , iamque si sic res iret , poenituerat  
consilij , quo Pisarum urbem reliquissent . Cum  
ex insperato quies auctoritasque nonnulla rebus  
eorum obtigisset , congregabantur statis diebus in  
Templum huius vrbis maximum , atque dedecus  
illud , ceu nouam aliquam cladem crebro cum ge-  
nitu Mediolanenses adspiciebant . Rursus tamen  
factio vicissim ipsa languebat , & obtorpuerant  
Cardinalibus animi , propterea quod nullus ab  
Caesare procurator , legatione nulla compareret  
quae momentum adderet decretis . Et dixerat  
quidem annueratque Caesar , adfuturam in tem-  
pore suam ex Germania manum : sed mutato  
nunc animo recedebat à causa sensim & varias



nectendo moras, varieque declinando, id agebar, ut negotium diffidiumque illud quamlenissime relinqueret Gallo caeterisque, quibus agere & prosequi ea magis placeret: ac dissoluendi Concilij principium id fuit. Sed quomodo tandem haec parta de impijs victoria fuerit, utque Christi Vicarius, & diris, & armis, & vi tota Pontificatus animique sui ad extremum usque persequi rebelleis institerit, inter caeteras eius acui turbas, publici annales memorauere. Mediolani sedes atque domicilium rebellibus illis erat, donec pulsus Gallis, restituto Maximiliano, fugarentur hinc vnà cum Rege fautore Concilij, atque signa sequentes victa in Galliam abirent. Neque Mediolani per eos acta vlla in patriae annalibus extant, nisi quod, ipsum Sanctae Crucis Cardinalem referunt in Templo maximo Summum Pontificem esse appellatum, & Martini nomen sumpsisse cum antea Bernardinus Caruaialis vocaretur. Hunc, Ordo Columbinianus, qui D. Hieronymi Aedem in Vrbe Monasteriumque habet, hospitem fuisse suum contendit, quamdiu ille Mediolani Concilij factionisque eius causa moraretur. Ipsos inter tumultus aestusque tam infeliciam curarum, atque in medio circumfremetis populi strepitu, curam hanc fuisse Cardinali, ut Templum illud, templique frontem pijs imaginibus eximie picturatam, velut hospitij pretium exhiberet. Natione Hispanus hic fuerat Caruaialis, quod familiae nomen hodie inter primas eius Gentis claret, ac tunc nihilo obscurius humiliusue

humiliusue agebant. Aderant viro literae & artes, quae principem decerent, & honesta omnia, nisi deformarentur adipiscendi summi honoris cupidine. Ea transuersum egit hominem, & dum primus esse mortaliū tentat, ad infimos prope est delapsus. Non viderat fortasse Roma ab condito Pontificatu ludibrium tale superbiae, quale postea spectatum ibi est tunc cum Caruaialis hic, & facinoris collega Sanseuerinas, Pontificis Leonis indulgentiā restituerentur in Ordinem, vnde Iulius vtrumque deiecisset. Scilicet, principes olim & duo lumina Collegij, alter etiam ille, vsurpato sacrorum Regno adoratus à suis, posteaquam Pontificem exorant, noctu in urbem admissi, postero die, pro purpureo sirmate, nigra in tunica pileoque colore, frequentissimis Vaticani locis per hominum ora traducuntur. Cardinales in sedem processere suam. Pontifex Maximus Apostolico solio sublimis eminebat: spectator, tantae Urbis populus & genus prope humanum aderat. Falsus ille Pontifex cum collega suo positus humi genibus ante solium procubere dum facinori damnando petendaeque veniae compositae preces recitantur. Subleuati dein, ad genua Cardinalium aliorum singulatim accedebant: ibi sine motu voceque vlla excipiebantur, donec per tota subsellia circumducti Collegio redderentur, & ipsi quoque considerent. Id inter caetera, contumaciae secessionisque piaculum fuit. Sed externa haec, & temporum etiam, ordine dissipata, temporum rerumque nostrarum

ordinem prope iam abrumpebant. Cùm Rex Galliae, Sfortiam vtrumque, sicut memorauimus, alterum Heluetiorum fraude, perfidiâ Placentini proditoris alterum in potestate vniculisque haberet: vrbenique Mediolanum, & Metropolim hanc ceu tutissimum aduersus hostilia tentamenta castrum praefectis & armis infedisset, coeperat esse negligentior ad continendos atque demerendos animos eorum, qui prodito Sfortia victoriam ei simul in manum tradidissent. Itagens, etiam si non irritaretur, facilis ad transferendam fidem, postquam contemptui se esse insuper videt, ad societatem, cum Romano Pontifice ineundam inclinat, Fixum, destinatumque Pontifici Iulio erat eijcere Mediolano Gallos Italiaque tota, non tam odio in hostem Regem, quam gloriae cupidine, vt Italiae liberator ipse diceretur. Ideo gentem eam Heluetiorum inter caetera auxilia adiungere sibi saepe nequicquam conatus, vbi offensos alienatosque ab Rege esse animos cognouit, vsus inclinatione voluntatum, & legationibus, & promissis, & praesenti pretio tenuit rem, vt haberet eadem in Gallos arma, quibus armis Galli antea totam conterrefacere Italiam potuissent. Simul, cum Rege Catholico Venetisque aduersus communem eundem hostem icerat foedus. Ac primò quidem foederata illa arma infelices euentus habebant: magnoque ad Rauennam praelio victor Gallus de summa rerum metum ingentem fecerat: Heluetijque etiam cunctabantur. Mox fortuna versa est, & cuncta pro Pontifice

Pontifice aduersus Gallos erant, vt quamprimum  
eictio gentis fieret. Anglus & Aragonius, &  
Caesar ipse, suo quisque metu anxij si tantae Gal-  
lorum opes forent, in partem descendebant eam,  
quam, potentiae huic esse infestissimam videbant.  
Et iam aderant Heluetij praecipuus Gallorum ter-  
ror, praecipuaque spes Pontificis vt eae copia di-  
gressae in Mediolanensem agrum & cum Veneto  
exercitu coniunctae circumfunderent Gallum à  
tergo pellerentque. Summum vero peragenda  
rei adiumentum ipsi Mediolanenses irritati Gallo-  
rum moribus, & imperiuni illud accerbissime per-  
ferentes, tamquam exercitus aliquis habebantur.  
Iam enim propter quotidianas iniurias, eò proces-  
serant indignatione ac dolore, vt Regij praefecti,  
nullum nisi per neces & supplicia ius obtinerent,  
saeuendique materiem assidue praebebat res illa  
Conuenticuli, de cuius origine, & exitu antea de-  
monstratum est. Nam cum ad finem vsque Gallici  
dominatus, rebellium illorum secta Mediolani  
perseueraret: quamquam repressa, sicut memorauimus,  
cuium aduersus eos libertas, per interualla glisce-  
bat acrior infestiorque, nec vllis ab Clero popu-  
loque contumelijs in factionem totam abstineba-  
tur. Rursus Cardinalem Medicaeum, Pontificis  
legatum, quem Rex ipse Mediolanum in custodiam  
miserat colebant omnibus officijs, eaque erat vni-  
uersae ciuitatis pietas in captiuum, vt contumelia  
inde in Regem appareret. Vulgò petebantur ab  
captiuo illo Cardinale & legato piaculares abso-  
lutiones

lutiones ad celestem veniam, animaequae salutem, ut quisque, vel pro Galliae Rege tulisset aduersus Pontificem Maximum impia arma, vel aliquo ministerio Concilij temeratus foret. Qui piacula eiusmodi contraxerant, neque fuerant absoluti, his, si interea morerentur, sacra sepultura denegabatur à Populo Mediolanensi, omnesque in profano defodiebantur. Tradunt temporum eorum scriptores, tantum fuisse numerum eorum, qui absolutionis causa Legatum adirent, ut ad conficiendas patentes literas non sufficerent homines, asciti in id munus, ac subinde alios assumere scribas necesse esset. Id Regijs aegre tolerabatur, ac dum reprimere poenis eiusmodi concursus volunt: neque assequebantur, & ciuitatis animos asperabant magis, quae iam tota rebellionem spectabat. Sed nulla alia res magis erat apta & opportuna Gallis eijciendis, quam Galli ipsi, discordes inter se: dissipati circa praesidia paruarum urbium: ad summam rerum, non quantum oporteret attentis alienandis auxiliariis faciles: conscribendis nouis militum copijs auari, quam etiam ipsi culpam in medio discrimine rerum inuicem obiectauere. Et nutantem sic afflictamque eorum fortunam strauit penitus evertitque Maximilianus Caesar properis ad Germanicum peditatum literis & mandatis ut ab Gallico exercitu discederent protinus atque redirent domum. Tunc etiam ipsi Gallorum duces desperauere, posse ultra rem Mediolanensem ab sese retineri ac defendi. Ingruebant enim magna

vi foederatorum arma, & prope vna eademque res fuit, excedere Mediolano Triuultium, caeterosque Regios praefectos, & foedere sacro (hunc enim sibi titulum indiderant) iunctas manus subire illuc. Cardinales capita Concilij ad primos perditarum rerum tumultus in Galliam aufugerunt. Medicaeum, Galli fugientes, cum rapido secum, agmine ducerent, homines probi familiares ipsius, facta manu raptoribus eripuerunt, ipseque etiam vim adiuuit astu, & simulatione morbi, qua morari potuit agmen tantisper dum componeretur ordo peragenda rei. Quidam ipsum euasisse Mediolano, deceptis custodibus malunt, artificemque fugae Blasium Cribellum memorant. Pulsis in hunc modum Gallis, recepto Mediolano, statum vrbis Octavianus Sfortia Episcopus Laudensis, regebat, interea dum Maximilianus Ludouici filius reduceretur sicuti Caesari foederatisque placuerat. Iam enim Veronae erat Maximilianus, ibique Caesaris iussu & auctoritate, possessionem adibat imperij paterni, Mediolanum venturus, vbi primum Episcopus Gurgensis, quem Caesaris nomine oporteret interesse actioni, venisset ab Roma, quò Lateranensis Concilij causa, nomine eiusdem erat profectus. Vt ille adfuit, deducitur Sfortia Mediolanum accipiturque summâ Ciuitatis laetitia, quamquam inesset timor & cura multorum animis, quos praefens potentia Gallorum externo imperio fauere coegisset, quiue etiam vltro illuc inclinassent. Cum ad portam vrbis pompa peruenisset, paulisper

paulisper dubitatum est inter Cardinalem Sedunensem & Catholici Regis Legatum, vter eorum, Portae clauēs Principi traderet, quae caeremoniam ipsam continebat, vtri etiam parti Sfortia; fortunam eam in quam restituebatur, ferre acceptam deberet. Tandem acrius tendenti Sedunensi cessit Hispanus, vt Heluetiorum genti blandimentum id daretur. Cū Sfortia restitutus in hunc modum esset, deinde Mediolani per aliquot dies is habitus & ea facies rerum, erat quasi natale quoddam huius patriae tempus Ciuitas tota concelebraret. Principem enim receperant natium: & quamquam sublatus veneno alter paternumque beneficium ante oculos adhuc obuersaretur, magis tamen valebat in animis memoria Aui, in cuius mores abiturum esse iuuenem sperabant. Neque Ludouicus scelere quaesitum imperium pessimis alioqui artibus exercuerat. Ac si nihil horum esset laetabantur tamen, quod ex pristino seruitio in qualemcunque statum euasissent. Adiuuabat verò ipse laetitiam hanc spemque communem pietate erga res diuinas, comitate erga omnes, ac praesertim excelsō dissimulans animo offensionem in eos, qui studuissent Gallis, vltroque necessitatem incusans, ne dissimulata ira in maius crederetur. Satis constitit, factionis Gallicae homines, tum ex Populo ipso, tum ex praecipua nobilitate, quos conscientia praeteritarum rerum meditari fugam coegisset, perspecta noui Principis indulgentia, consilium id omisisse, ac domi esse retentos. Quidam etiam,



etiam, cum vestigia secuti Gallorum abissent, rediere, neque in cuiusquam bona saeuitum. Fiebant haec modestia quidem & probitate iuuenis, sed principum etiam ipsorum consilio, per quos in Imperij sedem erat deductus. Substitere namque Mediolani consilijs agitandis disponendisque rebus aliquandiu, Catholici Regis legatus, & Sedunensis, & Gurgensis, grandes natu homines, & regendis mortalibus, atque tractandis Regum negotijs inueterati. Horum igitur prudentia primis diebus Maximiliani animum regebat, ne in magna potentia magnisque hominum culpis, aetatis etiam vitio quicquam fieret secus atque tam lubricae res postularent. Non ille tamen effugit occultae coniurationis initia eruptura haud dubie in necem, nisi ante tempus inditium emanasset, ut reseruaretur ad ludibrium idem humanarum rerum, quo pater ipsius hostili in terra contabescebat. Sacramorus erat Vicecomes, partium Gallicarum acerrimus instigator, & multa hostilia pro Rege in Sfortias ausus. Non credebat is totam ex vero & sincero clementiam esse, quam Princeps Maximilianus ad initia rerum adhiberet: siue credebat, & sicuti sunt animi quidam implacabiles, manebat infensus & toruus. Assumptis in consilij societatem, quibus tandem esse suspicionem, eundemue animum sciret, corruptisque in eundem sensum nonnullis alijs, quorum solerti audacia spes facinoris patrandi indigeret, coniurationem interficiendi principis fecit. Negotio fuit euentus, qualis esse conspirationibus

bus solet, eaque in suum caput deprehensa machinatione Princeps, Urbem ipsam Mediolanum, adspernabatur oderatque, ac suam ibi tam infestam esse vitam sciens, Nouariam hinc secessit. Sed Gallorum arnia iam ipsum appetebant, momentis omnibus fremente Rege, quod amissa per suorum negligentiam vrbe Mediolano, Italiae possessione deiectus foret. Et ille quidem Rex Galliae Ludouicus, dum totas aduersus Maximilianum Regni vires ciet, in medio saeuissimi belli apparatu mortuus, hunc etiam conatum vni cum reliqua regiarum curarum mole vanum reliquit. Caeterum ei successit, Italiae potiundae appetentior, ingenioque feruidiore Franciscus qui, vel capi ipse, vel capere Mediolanum certus, cum validissimo exercitu in Italiam descendit, auctus etiam Venetorum auxilijs, quae Resp. pro Sfortia nuper aduersus Regem Ludouicum steterat. Mutabantur enim inter eas Italiae calamitates, foedera societatesq; principum vna cum rerum ipsarum statu, & saeuus ille ludus spectabatur, vt postquam alieno sanguine vicerant alios alij, mox aduersus victoriam ipsi suam iidem pugnare vellent. Sic Veneti, cum pro Maximiliano consociauisent nuper arma, nunc in eum ibant, vt prioris foederis euentum abolerent foedere nouo. Pugnatum est ad Melinianum decimo ab vrbe lapide cruenta vtrinque pugna: sed vicere Galli. Rex Franciscus in loco victoriae Monasterium postea extruxit, attribuitque Fratribus Celestinis, quod monumento ad posteros esset.

Misera,

Misera, & magna Ciuitas toties victa, totque tam breui tempore sortita dominos, ne nunc quidem, stabile adesse quicquam videbat. Secuta tamen id quod adesse videbatur, legatos misit ad victorem, Regem, qui dederent urbem, & patentibus ipsum expectari portis nuntiarent: populum Nobilitatemq; Mediolanensem expectare quid Regiae maiestati placeret. Confestim ille sequendo rerum cursum, Mediolanum venit, ibique Sfortiam victoriae cumulum adeptus, cinctum eum militari custodia ablegauit in Galliam, ne, vel interfectus, in faeuitiae exemplum abiret, vel profugus obesset securitati rerum quae longe aberat Regi. Iam enim hostis maior ei imminabat, ab longa Caesarum stirpe procreatus, Caesarque ipse, paterna origine Germaniarum alumnus, ab Auiae dote septemdecim prouinciarum heres, materno iure Hispanias & tot secum regna trahens Carolus, cui vim geniumque victorem aduersus Gallum cum Regem adfuisse post euentum credidimus.

## IOSEPHI RIPAMONTII

CANONICI SCALENSIS

CHRONISTAE VRBIS MEDIOLANI

HISTORIARVM AB' METROPOLI CONDITA

DECADIS III

LIBER VIII.



**N**OVA hinc & continua circa Metropolim bella exsequar, quorum pars minima erunt Sfortiacae Domus reliquiae: resque agetur inter maximos duos orbis terrarum Reges, interiecto superstitite adhuc vno extuleque Sfortia, dum restituitur iste, arceturque vrbe, quae Caesarum primò sedes fuerat, deinde vsurpata libertate, rebellis eorum & inimica, dein, domesticos inter tumultus, serua ciuium suorum, tum ab alienigena domino rapta & occupata nunc demum egesta paulatim tyrannide redigebatur ad iura veteris Imperij, & magnitudine sua Carolus Caesar, hoc Insubriae Regnum, parta nobis in perpetuum securitate, Domui stirpique suae assignaturus erat. Ac veluti aequitatis etiam fama diuinitus pararetur exsurgenti tunc ad Catholicae Religionis tutelam Imperio: Austriaca arma prius reduxere extorrem Sfortiam: deinde, postquam orbitate eius & senecta, res adhuc Mediolanensis

diolanensis ad externa vel intestina pericula prolabebatur, insuperque suspecta fides, & ingratus erga tantum beneficium animus offendebat, quasi perfidiam viciscerentur, in eundem incubuere, Gallus tamen etiam ipse, sua iura suasque actiones & veterum matrimoniorum vocabula habebat, aliaue firmamenta causae: quae nunquam Regibus desunt. Dabant & famae Rex uterque, pariebanturque diuulgari tamquam arcanum, id quod potius tegere ipsi ac dissimulare debuissent, si causa utique belli ea esset. Angi scilicet ipsos mutua inuidia & aemulatione potentiae: ideò, quicquid gereret tentaretue alter, alteri id esse impediendum: famaue ista volentibus etiam ipsis, ciuiliū ingeniorum, & aulae susurris iactabatur. Re autem vera angebat animos nomen & magnitudo Urbis, ciuitatumque subiectarum, quae cum Metropoli sua Imperium aliud omne comparatione opportunitatum eleuare, ac minuere per se viderentur, etiam si nulla Imperitantibus aemulatio esset. Sed antequam certamina haec duorum Regum, & infestiora penè inter ipsos consilia quàm arma, stratosque Gallorum aceruis Insubriae campos, Regias quoque captiuitates, atque de vrbe nostra dum dimicatur, collatos in prouinciam aetatemque vnam, seculorum & terrarum prope omnium casus: haec antequam narrare aggrediar, Sacrorum quoque statum, qualis inter calamitates, vel exhaustas iam, vel exhauriendas ille fuerit, repetam. Caput regimen-  
que

que iam inde ab Hippolyto Eftenſe ſacris abſuerat  
rebus, & Eſtenſis ipſe, Gallica legatione, pater-  
naeque fortunae ſuperbia ſemper abſens, per con-  
ductos aliunde miniſtros, totum id paſtorale mu-  
nus obierat. Ita facta erat Vrbs ceu profani  
populi coetus aliquis, populusque ipſe peregrini-  
tate infuſa colluiem quodammodo barbarorum  
referebat. Namque Borbonius, & Odettus, &  
poſtea Lotrecus, & alij, qui pro Regibus ſuis res  
adminiſtrauere Inſubrum, homines innutriti ferro,  
& militares violentias, omniaque exercituum  
flagitia ſpecioſo neceſſitatum nomine appellare  
ſoliti, praedandi conſuprandique licentiam, ceu  
ſtipendia praemiumue laborum militi ducibusque  
& praefectis, & fortasſe ſibimet ipſis offerebant  
eadem licentia. Miles ex variarum colluui-  
gentium, procul ab domo, procul ab ſincerae re-  
ligionis cultu, & longa egeſtate efferatus, etiam  
ſub ſeuero imperio praeceps ad ſcelera, contumax-  
que aduerſus omnia quae coercendis flagitijs ex-  
cogitata ſunt. Terra proſectò haec haud immeritò  
flos dicta terrarum aliarum, & amoenus hic opu-  
lentusque populus, atque per monaſteria, per  
templa, tantum pretioſae ſuppellectilis, tantum  
ſacrati auri vel argenti, non leue incitamentum  
militaribus iniurijs eſſe potuerant, etiam ſi tam cre-  
brae illae mutationes inſtabilesque victoriae, &  
alius ex alio dominatus, haud perinde immitem  
auidumque hoſtem inuexiſſent. Quanta igitur ma-  
teries iniuriarum ſaevitiaeque in Metropoli erat,

tot

tot modis barbari desaciuerē in urbem, quae si sua arma haberet, poterat tremenda esse illis: tunc amissis vnā cum principe armis, obtorpuerat metu, oderatque simul, & seruiebat, & lacerabatur, Domus, & fortunae singulorum ciuium aliquandiu suffecere furori: primisque diebus, & rapiebatur inde quicquid ad splendorem vsusque penatibus adesse honestis solet, & postquam auaritiae satisfactum erat, libidinem aliam corpora explebant. Mox vtriusque libidinis causa, rerum scilicet corporumque sacra claustra perfrangebantur. Virgines incolae, vitando dedecori omīsa rerum cura petebant longinquos abditosue secessus: & pudoris olim sanctimoniaeq; domicilia turpis inquilinus profanabat. In re vtiq; illa sexus infirmioris, tanta petulantia eius externae tyrannidis fuit, vt quamquam ablatis, sicut dixi, armis conciderant animi ciuium, egregia tamen facinora ediderint viri feminaeque vel in ipsa dedecoris patientia, vel ne dedecus paterentur, vel vt vindicarent, postquam passi erant. Nam, aut pater, fraterue, maritusue, cui filiam, vel sororem, vxoremue temerauerat barbarus, aut mulieres ipsae petitae ad flagitium verso in rabiem dolore constupratores adulterosq; suos, vel dum concepta turpiter libidine aestuant, imminentque sceleri, vel vbi iam victrix impudicitia frustra reluctantes ipsas expugnatat, interfecere. Diripuit ab insultantis latere pugionem vna infelix puella, iugulumque eiusdem hausit, & simul, ab moribundo ipsa iugulata est. Tardior ad vindicandam



dicandam iniuriam, sed felicior alia deuoluit è fenestra graue pondus, itaut eliso capite concideret. Ruprator in limine domus, cui recentem labem intulerat, labesque simul ipsa deleteretur. Aliqua sibi intulit vim exanimisque collapsa horrore confudit impudicum. Inexsuperabili declinatione recusabat alia, donec ab irato eodem, & impudico obtruncaretur. Et mulierum nostrarum aduersus barbaricas turpitudines facinora quidem huiusmodi fuere. At viri, quos in communi calamitate proprius aliquis eiusmodi iniuriarum attingebat dolor, sicuti viros, sicuti Mediolanenses decebat egere, passimque in cloacis & ad loca spurciora reperiiebantur exanimis barbari, suo mandentes ore ea per quae peccarant. Quod foedum ac turpe dictu retuli tamen ad omnis impudicitiae terrorem: exemplumque prodi ac memorari istud ipsa rei indignitas postulat. Non enim homines illi amatorijs vllis obsequijs artibusue quaerebant sibi aditum, si cuius fortè formam adamaissent: sed qualia mulierum, transalpinarum ingenia sub comitatis nomine aluntur, talem eum apud nos esse sexum rati, pecudum ritu irruebant. Tantaque ea proteruia fuit, vt iuuenes nostri, non ferentes ignominiam irrumperent in regionum domos, vxoresque & filias eorum raperent vicissim & mancipijs suis pollundas darent. Hae vices reddebantur: vnde irritatis dominantium animis, miserior quotidie conditio seruientium fiebat. Sed in eo insolentiae libidinumque certamine, non aberat plebi diuersum, aliud

aliud contrariumque malum fames , quae apud perditam intestabilemque mulierculam in saeuitiae diu inauditae exemplum excessit . Isabella nomen fuit vni , quae vagos per viciniam infantes puerulosue excipiebat , & dissectos in frustra conditosque sale vorabat clam absque vlllo feralis cibi horrore sicuti carnes aliae manducantur . Ea , nonnullas falsamenti eius ollas , cum domi haberet , accidit fortè , hoc , vt felis , quod animal audissime vncta omnia persequitur , extractam ex olla puerilem vnâ manum circumferret absque flagitij intellectu proximamque ei carnificinae domum intraret , ex qua domo subtractam paulo antea infantem secuerat Isabella asseruaratque . Et coeca omnis erat coniectura parentibus , quidnam factum de puella foret , quoue per errorem delata esset . Inter querelas anxietatemque perquirendae infantis , conspecta pecude , quae conceptam ore dextellam ferebat , indicium primò id arripuere , dein vestigia bestiolae obseruantes , dirum subiere tectum , atq; ibi diuerticula omnia perscrutando reperere quas dixi ollas , & separatâ in ollâ nondum plane concisam infantem suam . Confusae adhuc oris notae cernebantur , & comprehensa protinus venefica , nec sane inficiata quicquam , in rotam agitur , deinde crematur . Catharinae Seronae ( id puellae nomen ) lacera membra composita puerili tumulto , ad D. Mariae Secretae valuas in supero limine collocantur , atrocemque casum tabula subiecta narrauit . Atrox namque visum Gallico quoque

Zzz

magistratui

magistratui, poenasque cùm expetiuiſſent, memoriam etiam prodidere. Caeterùm, toto illo Gallici dominatus tempore, quod fuit annorum circiter duodecim: ſicuti ius omne vitae communis, vt demonſtraui, interciderat, ita Sacrorum quoque iura ſublata & oppreſſa erant: ac praecipua violentia Lotrecus aduerſus Eccleſiae maiestatem, omnia, quae continentur Apoſtolico imperio, Pontificumque nutu, ſumpſerat ſibi & uſurparat. Ille ſacerdotia demandare quibus vellet, iniicere Sacerdotibus manus, fortunas & alimenta, & hereditates eorum arbitratu ſuo diſpenſare, contemptor diuinarum legum & irriſor ſi quid ab Roma denuntiaretur. Sed ne Clericorum quidem interim inſtituta & mores erant Mediolani ſecus atque tam importunae dominationis vi partem etiam corrumpi hanc neceſſe conſentaneumue erat. Non moeſtia coloreque veſtitus diſtinguebatur is ordo à caeteris: ad Tempſa negligenter, & incondite agebant ac ſi teſta eorum ingrederere, mariti parentesque vocitabantur. Nec multò plus litterarum in vnoquoque reperires, quàm in patrefamilias & opifice ſordidae artis. Quotus quiſque crederet, aut hunc illum eſſe Clerum, qui artium optimarum ſtudijs, & vitae ſanctimonia cunctis per Italiam, gentibus ad Eccleſiaſticae diſciplinæ perfectionem antea praeluxiſſet: aut Cleri famam eiſdem ab maiore mox gloria per terras omneis eſſe diſſipandam? Tunc utiq; vel ſua, vel temporis, vel impetantium culpa miſer abſurdusque repente factus erat.

erat. Quis verò etiam crederet in tam perditis rebus, tamque profligato & desperato vrbis statu, aut posse vlla mortalium pectora concipere spiritum vllum pietatis, aut si quae pietas hinc Coelum pulsaret, locum ibi aditumque esse inuenturam? Attamen, siue parante Deo praesidia vrbis salutemque rebus ex vrbe ipsa, siue hominibus ipsis, quemadmodum in periculo, vel metu consueuere, propitiare annitentibus Numen, & quaerentibus placamenta aliqua diuinae irae, constat pleraque per tempus illud funestum esse instituta Mediolani pie ac religiose, qualia vel in florentissima pace fierent atque instituerentur. Nam primum omnium, cum ad D. Ambrosij subterraneam Aedem opis exposcendae causa frequentissime à ciuibus iretur, & inter piacula alia, largae quotidie stupes egenis circum ea claustra certatim darentur: paulatim ea tumultuaria pietas in ordinem disciplinamque adducta est, ac sub eius subterraneae Aedis nomine, factum aerarium, quod subsidio pauperibus esset. Ab eadem publica trepidatione, initijsque ijsdem propagata fuit alia subleuandae egestati societas ad claustra D. Marci, factaque sodalitus sedes ibi in Aedícula, quae Crucifixi dicitur. Crescente dein fama & autoritate sodalitis eius, cum principes etiam vrbis nomina illuc darent, Franciscum quoque Regem cum Claudia vxore & filijs duobus adscriptum inter caeteros lego. Namque Regi ei Francisco, super ornamenta caetera, quae inter alios vrbis nostrae

Reges aut Duces cùm bona recordatione colli nomen eius possit, adfuerat etiam pietas generosa, & syncera, & digna Christianissimo Rege, non callida & infelix illa, ancilla necessitatum Regni, ludibrium populis, ingrata Deo, fraudum comes, vel fraus potius ipsa. Portenta, quae sub breui illius imperio viderat ciuitas, & calamitates infandae, quas eo per ministros hinc imperitante pertuleramus, imputari debent bello, nec omnia Gallorum genti, sed gentibus simul alijs, quae in expeditionem eam secutae Gallos, & victoriae imperijque participes, vagae per prouinciam, immistae per urbem, barbarica libidine simul & nuditate & violentia & contemptu religionum turpiter & crudeliter impieque latrocinabantur. Semper ista quidem exercituum victoriarumque omnium fuere, nec miles postea Caesaris in sua victoria contentior fuit. Praefectorum quin etiam ducumue Gallorum, sicut impotentes & dissoluti aliqui fuerant: ita nonnulli specimen eximiae Religionis, vereque Catholici sensus edidere. Sed in recenti crebrisque mutationibus obnoxio imperio, in atrocibus bellis, in infida pace, in terra aliena mistum ex pluribus gentibus exercitum, eumque aut exultantem parata nuper victoria, aut mox educendum in aciem, coercere difficile fuerit etiam integro moderatoque Duci, qui, vel nullos, vel sibi concordēs Imperij collegas haberet. In Gallica multitudine, praeter turbæ militaris effrenem intemperantiam discordia quoque & dissimilitudo ducum, & eorum inter ipsos

ipſos, tum vitia, tum virtutes aggrauabant rem,  
populusque interim & Reſp. Mediolanenſis ple-  
tebatur. Caeterum, Iacobus Triuultius, & Ga-  
ſton, & Cardinalis Sedunenſis, & Octauianus  
Maria, Laudenſis Episcopus, qui tenente Inſubriani  
Gallo, pro Regibus illis urbem exercitumque &  
Imperij ſummam apud nos aliquandiu adminiſtra-  
uere, potuerant natalium quiſque ſuorum magni-  
tudine, vel ſacri honoris verecundia, vel indole  
etiam animorum ita eſſe affecti, vt nihil indignita-  
tis, nihilue iniuriarum admitterent admittitue ab  
alijs paterentur. Gaſtonis certè qui Galliae Regi  
ſororis filius, & Triuultio particeps in adminiſtra-  
tione rerum fuit, tum res geſtae mirifice ac diuini-  
tus, & inſigni ad Rauennam victoria mors clarior,  
tum verò poſt mortem impenſa cura in monu-  
mentum ei regali ſumptu faciendum, & eius monu-  
menti marmora irrita, quae apud D. Marthae vir-  
ginès exſtant: haec omnia credere prohibent, ſor-  
didum aut humile, irreligioſumue quicquam  
adfuſiſſe ei vt ad infanda illa conuiueret. At huius  
Patriae ciuis Triuultius, ob exortas ei cum Ludo-  
uico Sfortia inimicitias tranſgreſſus in Galliam, &  
ſumma ibi adeptus, indeque cum imperio redditus  
vrbi, debuit caritate reſpicere aliqua natiuam tel-  
lurem, ne externa militari violentia diripi ſic ac  
foedari eam pateretur, ſi utique ad tantos inhiben-  
dos impetus valeret vlla poteſtas, vel certe ſi  
inhiberi eos poteſtati expediret cuius firmamenta  
iniuriae illae habebantur. Is origine Mediolanen-  
ſis,

sis, transitione Gallus, cùm in nouo imperio  
potens rerum ferme omnium esset, viciesque cum  
hoste pugnasset, & par fere numerus victoriarum  
eius celebraretur, tactus ad extremum desiderio  
patriae quae naturalis cuique mollicitudo est in ea  
Coemeterij Nazariani parte, quae Paradisus dicitur,  
sepulturae locum sibi & posteris elegit sicuti  
alte suspensa illic hodie cenotaphia Triuultiorum  
cernuntur. Sacellum id dicauit Mariae Virgini  
victrici, testatus hoc ipso, quòd res prospere gestas  
ad eam referret: addiditque sacrorum cultum,  
praedia & pecuniae summam, & mystas septem,  
& alia quorum hodie vix vlla pars manet. Parum  
attinuerat excoluisse pijs operibus in mortis tempora  
urbem, quae viuente ac presidente eo ingemuerat.  
Sed ne capita quidem beata praesentium indigenarumque  
sanctorum, vim arcuere, quae tunc Mediolani saeuiebat.  
Habuit enim etiam, aetas illa celestis animas, quae  
furente in Metropoli tempestate, latenteis in occulto,  
acceptae Numini, ignotae mortalibus, & seculo dignae  
meliore, exitium quidem suis meritis ab Rep. prohibuere  
vltimum, non tamen ea, quae dixi mala auerterunt.  
Monasterium, quod D. Marthae nuncupatur, est  
venerandae in vrbe antiquitatis, etiam ob incorruptam  
ab origine sui famam, & nullo vnquam susurro,  
nullaue suspitione violatos virginum eorum honores  
longe venerabilius: ipsoque Gallicarum importunitatum  
tempore, cùm nulla vsquam satis tuta latebra honestati esset,  
nihil



nihil omnino labis intra claustra illa fuisse illatum constat, nihilue tristiùs cuiquam earum accidisse, dum in agris quoque sicut ferebant tempora, morarentur. In eo Monasterio fuit Veronica Nigrona, quam Leo X. Francisci Regis rogatu ritè Beatam appellauit, cum sub Pontifice Regeque illo fama vitae ipsius, & aliud ex alio quotidie miraculum, quamuis occupatos longe diuersis negotijs animos, magnitudine rerum ac nouitate perculisset. Namque statim ubi excessit, secuta signa haec feruntur. Dariae cuiusdam Virginis insanabiles tumores depulsi solo cadaueris contactu: Christophoro Laudensi consolidatus humerus, & sanata luxatio cum is quoque medicinam ab eodem contactu petijisset. Virgines duae ordinis eiusdem, amisso ob tumorem incessu, deportatae Mediolanum, impetrauere vt admouerentur, & rediere illico ad vsum crura. Gallorum etiam vnus, qui Mediolanensi praeerat arci, nuncupato ob filiae salutem voto, quàm diuturna tabes absumebat, filiaque ipsa delata illuc, vbi intepultum adhuc Veronicae corpus concursu ciuitatis frequentabatur, damnatus voti suspendit in Templo D. Marthae pretiosam vestem, & erogato in aliquot solennia sacra sumptu, admirabilem in Sanctis suis diuinam vim publice adorauit. Nec deinde cessatum ab miraculis alijs, quamdiù corpus exsequiarum causa iacuit in feretro, quod spatium quatrihui fuit, vt publicae pietati desiderioque satisfaceret: interimque nobiles viri, qui munus sibi illud ambitiose

ambitiose efflagitarant, in Templo excubias egêre.  
+ Iacobina quaedam, cui naturale vitium respirandi  
difficultas & pectoris angustiae lethaliter ingraue-  
scebant, affluente illuc populo ad spem erecta,  
simul atque in conspectu cadaueris stetit, sensit  
meantem libere spiritum, & longo deinde vitae  
spatio perpetuum ipsa miraculum fuit. Maffeolae  
Glussianensi contractum foede brachium, & elapsi  
in prauum artus, pari miraculo, motum, & deco-  
rem, vimque suam recepere cùm infelicia membra  
corpori beato applicuisset. Et ad intimos quoque  
sensus animosque mortalium penetrante cadaueris  
eius potentia, fratres duo, qui furialibus accensi  
odijs, alter alterius haurire sanguinem parabant,  
condixerantque locum & diem quo stringerent  
gladios in mutuam necem, positis repente inini-  
citijs, detestati scelus in sinceram & fraternam vere  
pacem coaluere, postquam soror eorum Luchina  
tragicam suae domus abominata calamitatem, flexo  
iuxta exanime corpus poplite petierat, vt propul-  
satrix illa tot malorum, etiam huic imminenti fla-  
gitio remedium pararet. At vbi subductum oculis  
fuerat, humique mandatum id Veronicae corpus,  
nihilo leuiora impetrabant quisquis recenti adhuc  
talium rerum memoria spem opemque eandem  
tentabat. Paulatim inde, vt nequitia & secordia  
mortalium est, impietas obliuionem, obliuio diffi-  
denciam genuit, & dum sperare miracula non au-  
dent, obtinere desierunt. Sed donec erga virginem  
admiratio calorque animorum vigeat, singulis  
ciuibz

ciuibus, vt cuique pia spes, & sine remedio calamitas aliqua erat, Veronicæ velut manu salus è Coelo mittebatur. Borela Comarchus hac ope repente conualuit è phtisi, quæ, cùm medicos omnes fatigasset, pharmaca simul omnia consumpserat, & experimentis illis irritata inanibus quotidie faeuior fiebat. Tunc inuocata virgine, votisque nuncupatis, conspectus scilicet illico est ab lectulo profiliens, & consensu hilare equo per urbem circumuectus esse ferebatur. Isabella Crotta, Blanca Lucia Stanga, Blanca Marcellina, Camillus Falconius, & ingenti agmine alij cùm in malis quisq; suis, tutelarem sibi Veronicam aduocassent, exemplo etiam alijs fuere quò promptius eadem illa inuocaretur. Captiuo populo, miseræ ciuitati, accisis Ecclesiæ rebus, hoc per ea Gallica tempora subsidium fuit. Quo quidem tempore, in eodem D. Marthæ Monasterio, præter Veronicam hanc, claruere mirifico spiritu ac diuino, Michelina insuper, & Iustina, & Thadea: & harum quoque enimverò diuersus ab mortalium consuetudine animus, & in hac ipsa mortali vita affinitas cum coelo quædam, postquam ab oculis abiire, intellecta est. Sed Veronicæ maius nomen, & maiora omnia, per quæ nomen venit. Extant Apostolicæ litteræ Leonis X. per quas D. Marthæ Monasterio Pontifex ille concessit, vt Veronicam apud Ordinis eius Templâ & aras, ceremonijs, & omni imaginum honore coli licitum esset, eiusque concessionis diploma Martinus Episcopus Maconiensis, Francisci Regis

apud Pontificem Max. eo tempore legatus abstulit, cum haberet hoc ab Rege mandatum, ut negotium id inprimis Romae ageret. Nam & diplomati ipsi exordium id fuit optasse ista Regem, & preces de ea re suas mandasse Legato. Scilicet in maximi belli rerumque commutandarum destinatione & cura, quam coquebant Pontifex & Rex, in vastis consilijs, inter mutuas suspiciones, in profundo animorum aestu, qui paulò postea ad hostilem infectionem & foedera inimica erupturus erat, tractabantur inter eos ista & curabantur. Cacterum, imminente bello, cuius exitu, Gallorum eiection, Galli Regis captiuitas, & nouum ac duraturum Mediolani Imperium parabatur, antecessere omnia, per quae Numinis indignatio, & rerum, finis externo portenderetur. Nam praeter ea; quae iam demonstrata sunt mala urbis, perseuerabat Mediolani publica fames, & intermisso per iram atque per solitudinem agrorum cultu, descensum naturali necessitate erat ad animalia etiam ea, quae tamen abstinetur cum ab legitimo cibatu ad alimenta damnata transire extrema illa calamitas coegit. Et epulis nutritos infelicibus mortales, languidosque sicuti necesse erat, ad sui defensionem, lupi fugitium aliàs & syluestre animal, tunc immiscere se ciuibus ausi, corripiebant passim, & suo trepidantibus periculo qui debuerant feras propulsare, depascebant. Die, autem qui Apostolorum martyrio sacer fuit, accidit res, quae prodigium videri malorum imminantium potuerat,

nisi

nisi malum ipsa grauiſſimum habita eſſet, ac ſi videretur atrocius expectari poſſe quicquam eo, quod caſus ille tulerat ſecum. Tranquilla, & ſerena coeli facies erat. Sol emenſus orbis noſtri iter, ad occaſum vergebat alteri mundo laturus facem. Pleraque nobilitas, & feſto die greges artificum, ab operibus feriatu ſuis, Clerici quoque, peracto quicquid ad templa peragendum erat, & pilentis vectae ſuis matronae ditiores cum ſobole alia comitatuque iuuenili, miſta noſtratibus alienigenarum paria, prout Mediolanenſibus iunxerat Gallorum aliquem ſeruitij neceſſitas, vel ſuperbia imperij, conſuetudoque diuturna, & familiare commercium etiam inter inſenſos, cuncti, vt ſit, appetente veſpera egreſſi in campum, qui Iouis arci ab interiore parte ſubiectus, fruitur libero ac patente coelo, captabant auras leuamina caloris diurni, perque ſpatia illa ibant & redibant lente viam, conſederant in herba, ſive alicubi coronantium fiebat. Turba ciuium infelix, quae tantisper fortasſe à calamitatibus quieſcebat, dum ſuas ibi calamitates loquitur: hospites ſacui qui tantisper ceſſauerant ab iniurijs, dum iniuriae materiem circumſpectant ibi & proſpeculantur, omneis ſimul repentino celeſti caſu percuſſi ſunt, ſive vt eximerentur malis, quae aſſidue multiplicia ſuſtinebant, ſive in terrorem aut poenam, aut in aliorum ſalutem, cum exemplo illo impiorum & ſine, violentia minor reſtaret. Volitans coelo flamma fulminis in modum cecidit ante portam ipſam arcis, quæ

sulphurei pulueris cadi complures stabant fortè constipati vt nocte illa plaustris aucherentur . His illapsa cadis flamma comprehendit illico voracem ignis materiam , & reboatu ac fragore excitato ingenti traiecit in proximam turrim materiae plenam eiusdem , atque ibi violentius inter angustias luctando ignes , molem eam à fundamentis repente conuulsam longe ac late per aera dissipauerunt , ita vt feruida saxa magni ponderis ultra quingentesimum ab arce passum quasi contorta balistis inciderent . Minores lapides longius etiam volitauere . Tunc enimuero , per totum campi spatium strages facta est , qualem , non nisi ab Numine fieri appareret . Saxa ingruentia è coelo capitibus inciderant , priusquam daretur cogitandi tempus vndenam venirent . Et quia , e sublimi veniebant , quò flammea vis eiaculata marmor erat non fracto sed aucto circa finem impetu , violentiâ ipsâ properoque exitio moriendi sensum plerisque auferebant . Tristior conditio fuit eorum , qui minore aliquo ictu quassati adaperto & lacerato ad vitalia capite , per aliquot deinde horas nulla in spe animam trahebant . Ac saeuientibus etiam equis terrore simul & lapidum vi fusae è carpentis mulieres , & pari alienorum equorum consternatione protritae , apertis quae tegenda erant & dum eiulant humi , dum euoluuntur , eadem superne peste multae perierunt . Virorum quosdam , intellecta cladis origine trepidantes in circumiecta tecta cadens nihilominus vndique saeuus imber ,

imber, dum se putant euasisse, oppressit. Totos & in circulis globos, iuuenum vti colloquentes stabant, non lapis vnus, grandeue saxum, sed integra pars ruinae, sicut abrupta, & in altum proiecta deciderat, inuoluit arietauitque in terram, & quibus citra mortem ruina illa acciderat hi propter mutilata & inutilia membra caeteramque quassationem, ipsis postea mortuis inuidere potuerunt. Periere intra arcem ad centum quinquaginta, praefectusque ipse arcis, quam quidem ruinae continentes ab ea parte, ita nudauerant, vt nisi attoniti eo casu Mediolanenses plane animis concidissent; nihil negotij fuerit, etiam ex tam misero assurgere statu, & magis attonitos fluctuantisque Gallos deicere inde patriamque liberare. Sed pars vtraque in id intenta, quod Numinis irae tanto principio ultionem aggressae minitarentur, prope desierat persequi vel timere alteram. Non sane ego nimium vnquam incredibilia & prodigiosa secutus fuerim, satisque habeam in tradenda hac memoria antiquitatis, si fraudes & misérias ipsorum inter se hominum, vel si quid etiam homines cum laude egerunt, & magnos patriae casus, qui, vel pace, vel bello euenire, memorauerim ita vt cum fide accipiantur. Aduersus miracula quidem superbi nimium saepe sunt animi legentium: atque, vt nostra facile simplicitas, & diuinæ magnitudinis gnara mens conuiescat, non eadem mansuetudo ad credenda ista ciuilibus ingenijs erit. Caeterum, approbatam rem aliam Pontificum



tificum autoritate traditioneque communi, & hominibus spectatam illis, qui ad nostram aetatem vixere cum pueri tunc fuissent, transiri atque omitti prohibet teneritudo etiam illa, quam erga res omneis diuinashabemus. Canobij, qui locus est in Verbani lacus litore, frequenti mercatu, & vetere Borromeae Domus Comarchia insignis, ibi in publico hospitio, imaginem Christi Saluatoris, quae ex pariete suspensa pendeat, ferunt, diebus iisdem, quibus haec Mediolani clades accepta erat, magno repente tremore fremituque horribili vltro esse concussam: dein sacrosancti lateris hiatu vim sanguinis effusam, qui toto conclauī manaret, respergeretque adstantes: postremò ab hiatu eodem paruam costam excidisse: Antistitem Canonicosque loci & populum eum omnem, renuntiata aduolasse illuc, ac postquam suxerint spongijs omnem diligentissime cruorem, solenni pompa spungias ipsas, tabulamque pictam, vna cum costa, quae inde profilierat, templo intulisse. Addunt inde miraculum aliud: cum spongiarum earum sanguinisque contactu diuinitus quotidie multa patrarentur, & petendae opis causa templum illud vndique adiretur, mercatorem vnum, die quodam, sacerdoti, qui rem diuinam in ea ara faciebat, argenteum nummum dedisse spongijs costaeque admouendum, cumque ille admouisset protinus esse occoecatum, haud dubie quia mysteria illa tremenda circumforaneo aere profanarat. Haec licet prope excedant fidem, firmantur tamen eorum testimonio, qui  
proximi

proximi temporibus illis fuerunt, & narrantes  
 audiuerunt eos, qui ipsi spectaculo affuerant, inho-  
 ruerantque. Et nostra memoria D. Carolus,  
 cum Dioecesim suo more lustraret, interrogatis  
 eius orae senioribus, & re comperta quae acci-  
 derat, cohortatus loci incolas, ut domum eam  
 publice coemerent, aream templo designauit  
 ibidem ubi sanguis manarat. Nunc prodigijs  
 omissis, causas & initia belli expediam, quod  
 bellum gessere inter se Reges, dum vrbis Me-  
 diolani vterque imperium trahit: neque origi-  
 nem tantummodo exitumque contentionis, sed  
 iura simul, & momenta causae explicabo, ut  
 intelligatur, quid aequi, quid iniqui fuerit in  
 vtraque parte, imperiumque hoc ipsum, vtri duo-  
 rum Regum, finita (quod propediem fore appare-  
 bat) Sforciarum domo, deberetur, etiam si non  
 rerum euentus instar iudicis fuisset. Nam nisi ius  
 in armis pars vtraque regio more collocatum ha-  
 berent, aiebant Regi Francisco homines sui, ipse  
 que publice aiebat: aut rem Mediolanensem. In  
 subriaeque Principatum recuperandum esse sibi,  
 aut Galliae quoque: Regnum omittendum, &  
 parte hac vxoriae hereditatis posse indignum videri,  
 nisi illam quoque vindicasset. Quippe Va-  
 lentinam Ioannis Galeatij filiam auiam suae vxor-  
 is, cuius dote haberet Regnum, ea conditione  
 datam fuisse Ludouico Aurelianensi, ut proles,  
 quae ex ipsa nasceretur, succederet in Mediola-  
 nensis Imperij iura, quandocunque, finita fratrum  
 stirpe

stirpe , finis successioni Vicecomitum fieret . Conditionem eam , pactumque nuptiale illud , esse Pontificis maximi autoritate confirmatum . Id valere perinde ac si Caesar ipse confirmasset , quandoquidem vacua tantisper imperij sede , ratum , esse oporteret quicquid in eiusmodi rebus à Pontifice decerneretur . Etiam alia Pontificum decreta , transferendo , siue confirmando beneficiario iuri , quod ius Caesarum Imperatorumue esset , nunquam in controuersiam vocata esse . Bona omnium pace stabiles & legitimos manere principatus , quoscunque suprema Sedis Apostolicae potestas , nullo Caesare adiudicavit . Item , Valentinae sanguini datum à parte , confirmatum à Pontifice munus , Deo hominibusq. approbantibus , se esse conferuaturum exemplo maiorum suorum , Caroli , & Ludouici , quorum alter , post Philippi Mariae Vicecomitis excessum , maternam hereditatem , strenue , licet improspere vindicare sit conatus , alter prospere vindicavit , & capto , qui alienum Imperium tenebat , Sfortia , fuerit etiam Apostolico diplomate restitutus in pristina iura , ipse posteriq. eius . Dicebatur contra : Philippi Mariae obitu , qui sine vlla virili stirpe decessisset , rediisse Metropolitani in Romani Imperij arbitrium atque potestatem , vnde olim alienata exciderat . Maximilianum Caesarem Caroli Caesaris Auum diserte clareque reuocasse , rescidisse , abolessse quicquid exturbator pupilli Sfortiae Ludouicus impetrasset antea emisissetue , Magna iniuria violari Apostolicae Sedis famam ,

famam, ac dedecorari supremum tribunal, si damna, & raptus, & alienae rei donationes inde expectentur atque referantur illuc, vnde summi infimique mortalium praesidium & opem aduersus talia petant. Ne Caesarem quidem ipsum dignum fore Maximiliano Auo caeterisque maioribus suis, si longo prouisu reseruatam sibi ab eis Insubriae hereditatem, cuncta ratione vel desidia esse apud alienos sineret. Reseruasse namque Auum nepoti terrae eius imperium, & rite etiam de manu in manum tradidisse tunc scilicet cum Gallo prius tradidisset ea conditione, si vnica Infans illius Claudia, quemadmodum infanti item Carolo pacta esset, matrimonio iungeretur. Eo protinus dissoluto nuptiali foedere, Claudiaque desponsa alteri, rem simul fuisse inanem, & Carolum statim ab eodem Caesare auoque Maximiliano coram Philippo patre in iura Mediolanensis Imperij fuisse ascitum. Haec igitur, & alia assidue audiendo, siue dictitando cogitandoque exasperabantur iuuenum Regum feruida ingenia, alteri quidem ad tuendam, alteri verò ad recuperandam terrae possessionem, quam vterque relictam sibi à maioribus crederet: siue credi ab alijs vellet. Et magnae rei euentus accenderat insuper auxeratque animos, hinc gloria, hinc ira, postquam mortuo Maximiliano, nomen Imperiumque Caesaris tenuerat nepos, irrito omni Regis alterius tentamento, quem VII. Viri Electores repudiauerant, vt alienigenam & externae fidei, praetulerantque Carolum originis suae, sanguinisque

guinisque Caesariani, & opum magnitudine tantae moli parem, vimque & famam imperio ipsi vltro additurum. Tertius annus Regi Francisco erat parti per Insubriam Imperij, compositarum, vt ipse tebatur, Mediolani rerum, & illaceffitae pacis, cum occultis agitata consilijs, & diu inclusa pectoribus machinamenta denique eruperunt: iunctisque cum Pontifice Max. Caesar exercitibus ad Gallos eiciendos, Italiamque sicut ipsi ferebant, liberandam incubuere vi tota. Namque Pontifex Leo, Mediceae nobilitatis natus in Domino, cuius nimia potentia, ne Patriae quidem suae ferre libertatem posset, impatiens ipse otij, & magnitudine Pontificatus irritato magis quam expleto animo, studiorum quoque genere pronus in an ipitia laceffebat vltro magnas occasiones, & apud eum consilia nouandarum rerum assidue agitabantur. Ac principio, quidem, is animus & pares animoque opes ex Romano imperio simul & Florentina Rep. quam Pontificis pater tenebat, conflatae, versis in Galliam studijs, ac prope inito illic foedere, cladem Caesari Hispanisque prope conflabant. Sed, dum occulti foederis arcanae conditiones in Gallia, Romaeue tractantur, controuersia, vel difficultate exorta aliqua, hinc diffidentia gliscente inter partes, postremò irritatis palam alienatisque animis, consilia eadem, quae pro Gallo aduersus Caesarem inclinarant, pro Caesare aduersus Gallum steterunt. Fueratque tanti ad ea, quae agitabantur, praesidium Apostolicae Sedis adiunxisse

adiunxisse sibi, atque Pontificem habuisse coniuratum, ut absque momento eo, rem torpere ipsam, & Regum haerere animos, atque à belli consilijs auocari necesse esset. Non enim, id virium alterutri Regi eo tempore erat, ut posset tuto laceßere alterum: & Gallo socia ac propinqua Venetorum arma tegebant Insuorum fines, ne nuda apertaue Hispanis exercitibus prouincia Mediolanum esset: & Hispani vicissim Neapolitanum Regnum vota altera sollicitudinemque Gallorum, si nihil ab Pontifice moueretur, egregie munitum habebant. Heluetiorum mercenaria auxilia copiaeque venales, non huic, aut illi Regi addictae, sed in partem eam pronae semper, quae praesentis pecuniae vi acrius instaret. Caeteri per Italiam populi principesue, neque admodum per se tunc validi opibus aut armis, ut maximis duobus Regibus interiecti, dare vel adimere victoriam possent, neque ita affecti animis, ut vnum magis, quam alterum, inualeßcere Regem vellent. Hanc rerum aequalitatem faciendo bello alienam Apostolica arma Romanaeque opes parti alteri adiunctae disiecerant nunc, atque ex inutili illo torpore excitarant. Caeterum, Pontifex Leo, quamquam initum iam, haud dubie cum Caesare foedus haberet, nec sensibus tantummodo intimis, sed etiam negotiatione tota conspiraret aduersus Gallum, voluerat tamen eius foederis initio, vires potius & arma quam nomen & famam ad Gallos eijciendos commodare Caesari, urbemque Mediolanum ita circumueni-

ri posse autumabat, vt tentata simul & patrata re;  
conatus exitusque negotij tempore vno ingrueret  
atque ab sensu foederis initi auerteret animos.  
An fortasse, incerto adhuc euentu latitans, nihili  
faciebat hoc, si re denique perfecta in parte ope-  
ris ipse deprehenderetur: vel etiam, post euentum  
deprehendi vltro molitor & artifex Gallicae  
eiectionis volebat? Huius autem repentinae  
irruptionis, quae callide instructa celaret appara-  
tum suum, vt exitu prius quàm motu aliquo fen-  
tiretur, disposita consilia in hunc modum fuere.  
Nobilissimus quisque Mediolanensium, qui, vel in  
exilium acti & proscripti Gallicis edictis, vel ob  
indignitates quae perferendae quotidie erant,  
exsules vltro ac fugitiui auos secessus in extremis  
Patriae finibus quaesierant, adierantue finitimas  
vrbes, aut, in Tridentinis alpibus circa extorrem  
Sforciam constipati motum desperatae vrbs ali-  
quem expectabant, hi simul omnes repentino, quàm  
quibusque proximum esset, incursum, dispersos per  
varia Insuorum loca obtruncare Gallos debebant:  
praesertimque Mediolani strages futura regnantium  
erat in ipsa iniuriarum sede & libidinum Regno.  
Alios oportebat exsules ad Regium in Pontifi-  
ciam per ea tempora urbem congregari vniuersos:  
partibus ibi vicibusque descriptis, & assumpta in-  
super alia militum manu, discedere globos ad sua  
quemque munia, defungique caede Gallorum, &  
patriae malis imponere magnum diem. Respicie-  
bant cuncti nutum auctoritatemque Hieronymi  
Moroni,



Moroni, qui Francisci Sfortiae continuus ipsum quoque regebat, & cognita Pontifex ac Caesar prudentia viri eius gratiaque quam apud exulem is teneret, cuncta cum eo composita, & communicata habebant: pleraque etiam reliquerant ipsius arbitrio & fidei gerenda, prout gnarus homo opportunitatum animorumque Prouinciae & vrbis maximè censuisset. Is inter caetera mandauerat Manfredo Palauicino potentiorum exsulum vni, vt nocte quadam per Larium lacum furdo remigio delapsus cum idonea manu succederet ad moenia vrbis Nouocomi: paratam ibi prodicionem aditumque & cuncta in tempore affutura monstraret. Ab altera parte, tempore eodem, mista ex Pontificijs Caesarianisque nauibus classis contra Genuae portum obiciebatur in spem aut terrorem commouendis illic etiam rebus, sicuti turbata factionibus intestinis Ciuitas auxilia aliqua externa circumspētabat. Ordo insidiarum hic fuit, quae nullum felicem exitum habiturae erant, credo, quia iusto potius bello debellari eisque Gallos oporteret, ne tantus ille liberandae Italiae titulus, & actio tam praeclara turpi fraudum vllarum nomine dehonēstaretur. Dum trepidant exsules, dum ad facinus accinguntur, exceperē Galli indicia omnia rei, quae summa ope tegenda erat, vltroque Scudus, qui Mediolani Regis nomine prouinciam tuebatur, obuiam iuit, & auctis per omnia loca praesidijs, crexit populares ad sui custodiam, atque ita illud tantae spei consilium repente discussum est.

est. Ad Nouocomum verò facta eruptione insidiatores oppressi, & Manfredus Palauicinus militari custodia ductus in urbem obtruncatusque est vna cum Barptolemaeo Ferrario, quem à Morono sollicitatum fuisse constabat vt pro salute patriae aliquid auderet, neque rem ad magistratum urbis ille detulerat. Adjicitur crimini, & supplicio patris filius, propter aetatem nullius consilij particeps ille quidem: sed ob detectas insidias, impetus & ira Gallorum etiam fortuita pro crimine arripiebat. Ita motus omnis, & coniuratio exulum irrita fuerat. At Genuenses, ad foederatae classis adspectum erectis subito animis, & coepta rebellionē compressi sunt ab Duce fregoso qui cognito ciuium motu, sese & vim imperij strenue obiecit, atque in ea etiam parte spes elusae. Spes deinde omnis in aperto Marte relinquebatur: Pontifex Leo collata in violentiam manifestumque feruorem latendi arte, qua ad eam diem vsus fuerat, abrupta palam omni cum Galliae Rege amicitia, cuius nanebat adhuc species, quaesitaque noua specie, quasi tunc primum cum Hispano iniretur foedus, causando Gallorum in Apostolicam sedem iniurias, obsequium & beneficia Caesaris, armorum societatem, quae pacta & dissimulata erat, sanxit ceremonijs, atque de ea re statim in hanc sententiam edicta promulgantur. Pontificem & Caesarem ad pellendos vrbe Mediolano totaque Italia Gallos, arma, & imperium animosque coniunxisse, quòd eam rem Apostolicae Sedi Ecclesiaeque

clesiacque Catholicae, & nomini Italo. salutare  
atque gloriosam fore statuerint: de eius rei prof-  
pero exitu, vti omnes, enixe Deum obsecrarent,  
foederisque ipsius pro publica salute suscepti san-  
ctum, & inuiolabile nomen fauore ac veneratione  
amplecterentur. Foederatorum deinde ipsorum  
nomini ac maiestati, principio consentanea cuncta  
erant, belli duces, equitatus robur, peditum co-  
hortes, stipendia & commæatus: & quacunque  
exercitus incedebat, reuerentis animi erga agmen,  
quod Pontificis Leonis, & Caroli Caesaris missu  
ad liberandam ire Insubriam dicebatur. Summa  
copiarum fuit, equites quinque millia, peditum  
viginti millia & quingenti. Imperium & tota rei  
militaris potestas penes Mantuae Demarchum &  
Prosperum Columnam, sed ille huic parere iussus,  
moxque eodem imperij iure Daualus accessit.  
Vnde postea aemulatio ducum, & saepe discordia  
inter ipsos allatura exitium rebus, nisi in hostem,  
iretur iam consilio superum, iam mortalium ira  
eiectioni triumphoque destinatum. Gallus tamen  
etiam ipse vicissim audito hoc rerum motu strepi-  
tuque foederis, totas Regni vires ad defensionem  
Prouinciae Mediolanensis impigre ciebat: & exer-  
citus aliquanto validiorem habuisse fertur, duces  
quoque nihilo deteriores nostris, Lautrecum &  
Scudum germanos inter se fratres, concordēs eo  
vinculo, & continendis caeteris efficaces. Si pe-  
cunia, & quae temere inuocatur fortuna adfuisset,  
pars contraria in suam ipsorum perniciem inierat  
foedus,

foedus, magnamque Pontifex & Caesar cum ignominia cladem accepissent. Sed apud iuuenem Regem infensi fratrum gloriae principes, & Regina Mater muliebribus angustijs subsidia belli vertens in alios vsus, fortes Lautrechj conatus & magna coepta saepe turbauerunt, atque pene ad desperationem adduxere ipsum: interimque, si qua data erat opportunitas, fugacia occasionum momenta, e manibus elabebantur, admodum prochiui ad exitium itinere, cum Ducis culpae fortunam sua sponte vergentem aggrauarent, fortuna quasi lacefleret culpas, quò celerior veniret clades. Neque rursus in foederato exercitu ludibria siue vitia eadem defuere, qui, cum initio decorus tremendusque omni Imperatoria & militari disciplina incessisset, eique disciplinae consentaneus exitus communi omnium expectatione desponderetur, paulatim deinde perturbatione exorta, confusis attenuatisve rebus, irritatis animis, infausto etiam expeditionum aliquot euentu, eò est redactus, vt, & Gallorum potius quàm Sedis Apostolicae, vel Romani Imperij exercitus videretur, &, qui Gallico exercitui finis fuit, cum quaeri ultro & prouocari ab foederatis hisce appareret. Cum enim in aggredienda Metropoli, statuissent prius expugnare Parmam & Placentiam, scilicet vt tuta ab tergo cuncta relinquerent antequam negotio illo maiore implicarentur: magnum id imperatoriumque consilium, & sua sponte infelix fuit, & quò infelicius addita insuper ignominia esset, errores & dissidia  
ducum

ducum fecere. Oppugnata per dies aliquot nequicquam Parnia : diminutis exercitibus : abscellum à moenibus tunc cum si paulisper institissent , capi vrbs potuisset : flagitij eius verecundia accensi mutuis odijs duces , cum alius in alium culpam conferrent , omnesque verius deliquissent : prope alienatus à Caesare Pontifex , foedusque prope dissolutum : facta apud populos imperatoriae existimationis iactura . Neque res alia ab foederato exercitu cladem vltimam prohibuit , quam Lauterchi maior infelicitas , & infortunia hostium , maiora , si nomine appellari licet isto , quicquid illud ineuitabili potentia arcanoque impulsu , & modis occultis incubuerat genti Gallorum , vt Mediolano , Italiamque pellerentur . Postquam turbulente consultando , misere exsequendo , criminandoque inuicem consumpsere duces tempora illa inutiliter , dum iurgantur adhuc , tentantue non-nihil , haerentue , aut trepidantium modo subinde stationem mutant , adfuere decem millia Heluetiorum expectatum ante auxilium , & praecipua causa trepidandi , quia incertum fuerat , an venirent . Venere per Bergomatum fines : aduentusque gentis & fortuita res etiam iter , quo minime sperabatur initio & aditu victoriam dedit . Quia enim circa eos Bergomensium fines coniungi exercitum vtrumque oportebat , occasio inde nata est transendi flumen Abduam , cuius vltior ripa Mediolanensem agrum inchoat finitue . Prosper Columna erat vt dixi in foederato exercitu arbi-

ter omnium rerum, de quo homine secunda plé-  
raque ad famam, nonnulla secus prodidit anceps  
fere circa magnos viros historia memoriaque ho-  
minum adeò recens vt nondum exoleſcat. Is, non  
apud caeteros modò duces militaremque turbam  
inuidia laborabat quòd Parmae oppugnationem in  
propinqua ſpe eius capiendae vrbis ſoluisset, ve-  
rùm etiam Romae atque in Hispania coeperat ea  
res eſſe infamis: indeque labor & inquietudo ipſi,  
vt conſilium illud ſuum ingenti aliquo facinore &  
felici exitu principibus iratis & communi famae  
approbaret. Speculatus ad Vaprium facile traie-  
ctu flumen incuſtoditamque ripam, inconſultis  
Daualo & Gonzaga, vt famam gloriamque rei  
ſolus haberet, vitata etiam per obtrectationem  
omni Hiſpanorum militum ope, nocte intempeſta,  
cohortes aliquot Italici generis, praeparatis in-  
idipſum ante ſcaphis traiecit. Vt primi qui tranſie-  
rant, locum tenuere, alios ſubinde, atque alios  
Columna tranſmittebat: & orta luce, plenam mi-  
lite ripam, ſeque operis auctorem ducibus reliquis  
exercituique vniuerſo oſtendit. Tunc enimuèrò,  
felici inuento acclamauere etiam qui inuidebant, &  
mox flumini pro ſe quiſque varie inſultanteis ve-  
ſtigia vniuerſi ibidem poſuere. Acre certamen in  
ripa, fuit dum Galli ſerò ad deiiciendos qui primi  
tranſierant, accurrunt: & fratris miſſu Scudus ipſe  
cum quadringentis aderat. Sed maiora deinceps  
agmina tranſuehente flumine, opprimebantur.  
Diuerſo deinde tramite, tempore eodem, exercitus  
vterque,

uterque, Galli ad custodienda moenia portasque  
urbis, foederati ad spem conatumque irrumpendi  
tetendere. Gallus propero agmine suburbia vicof-  
que infedit: nostri capto longiore ambitu, Meli-  
niano ab municipio in Clarac Vallis prata proces-  
serunt. Ibi statua habebant: melioreque iam for-  
tuna, & specie etiam augustiore ob Cardinales  
Legatos, Medicaeum, & Sedunensem, queis Cru-  
ces argenteae praeferebantur, imminebant Vicinae  
urbi foederata arma, cum res accidit, quam poli-  
tica etiam subtilitate fastidiosi scriptores quasi crede-  
rent, retulere: referamque ego Francisci Guiciar-  
dini fere verbis pene admirabilem casum. Apud  
Claram Vallem, in prato, dum Legati Cardinales,  
caeterique principes exercitus federent ad inspi-  
ciendas cohortes tendentium ordine Helvetiorum  
intenti, stetit in eorum conspectu quidam natu  
grandis: os habitusque plebeij hominis erat: & ab  
D. Satyri Paroecia missum se esse vociferabatur.  
Pergerent, venirent: populum Mediolanensem;  
conspecto liberatore exercitu, protinus arma in-  
Gallos esse capturum: id modò cum magna voce  
dixisset, abiit repente ex oculis, & quamvis acri  
postea Legatorum cura ad inuestigandum quisnam  
ille mortalium esset, nusquam est repertus. Cae-  
terum, Cardinales ducesque caeteri, nonnihil qui-  
dem etiam omne permoti eo, sed multò magis  
consilia sequentes sua, quae praesens forma rerum,  
& ex vicino conspecta cuncta hostium dabant, mo-  
tis ab Claravalle castris, appetente nocte subiere



ad fossam, quae duabus Portis, Ticinēsi & Romanae interiecta muniebat vallum, & vallo regionique ei Veneti pedites custodiae causa appositi erant. Hi, simul atque fistulatores conspexerunt Hispanos, quam de industria manum Daualus obiecerat, dant impigre terga, valloque nudato, & statione relicta, liberum ab ea parte aditum irrunpentibus dedere. Mox, & priorum vestigia sequentibus alijs nouosque sibi aditus aperiente exercitu, & effusa obuiam ad accipiendos libertatores nobilitate, tumultuante populo, praesidijs labantibus, mutata omnium fide, plena omnia Caesarianorum fuere. Pontificij, cum in extremo agmine fuissent, captam iam haud dubie urbem, quantum specie intrabant. Gallis in tam repentina clade subsidium vnicum erat fugere in arcem Iouis, cuius haud vnquam neglecta, siue intermissa custodia fuerat. Inter tela, & gladios, & ingruentia etiam superne saxa, proripiebant sese eò milites, duces, magistratus ipsi, & dum euadere tendunt, vulnerabantur ab ciue simul & ab hoste velut hostes in aliena vrbe deprehenfi. Sua nuper tribuna lia suasque domos respergebant sanguine, si quos ibi cunctantes deprehenderat victor: atque tam improuisa res obstupescerat animos ab vulnere pene sensu, cum omnia captiuitatis exempla adesse viderent antequam captam esse urbem suspicarentur. Nec minus obstupescerat tam laeta fortuna victores, quod absque suo sanguine, absque difficultate vlla caput belli Metropolitimprina irruptione

f.

ne cepissent. Dederat autem foederatis tantam ex insperato victoriam ille qui plurimum in rebus humanis potest casus, quique in bello praesertim res saepe magnas & admirandas effecit. Namque foedo imbribus tempore, versis in coenum campis atque corruptis itineribus, non crediderant Galli, moturum hostem eo die castra, maxime propter bombardas, quae humido paludum, & profunda passim vligine, (sicuti regio est illa) tarde transuerherentur, etiam si celestium aquarum proluues illa non accessisset. Ea spe resoluti in secordiam Galli, fessique insuper recenti ad urbem cursu, aut nocturno ad Vaprium praelio, segniter obibant munia ipsa ad quae accurrerant. Sed Daualus interim, monstrata sibi fortè per agresteis semita glareosa quadam, substructaque, & marginata, atque ob id firma plaustris, & expedita agmini, contempto pluuiarum incommodo, traduxit repente tormenta, & exercitum, oppressitque inopnantes. Capta in hunc modum, vel potius liberata, Metropoli, subiectae vrbes capiuntur vi eadem, exemplumque secutae, caesis pulsisque Gallis, acceperunt nostros, & cunctae fere Caesaris nomen inuocabant. Lotrecus & Scudus cum infelicibus reliquijs profugi ab vrbe, vagati aliquandiu per Bergomensium fines, & petito inde supplemento, Cremonam postea aggressi, prospero illic euentu, & fiducia Mediolanensis arcis, locorumque nonnullorum, strenue reparabant bellum. Interea Pontifex Leo exstinguitur haud sine veneni fama, siue

siue corrupto pincerna, vti creditum est, miscuere aliquid Galli: siue lautior victus, assiduacque curae inuexere febriculam, & homines suo more interpretati sunt. Morte eius, atque perturbatione nouorum comitiorum, Interpontificique licentia, sustulere Galli animos: decessit ingens Caesari auxilium, & magnis ad reliqua belli perficienda consilijs, atque apparatus, nec pecuniae facultates, nec copiae militum eadem ab Roma aderant. Itaque, in ea rerum inclinatione, cum quidem etiam Caesar transalpino alio aduersus Regem eundem bello implicitus teneretur, metus ingens inuaserat omnes Insubriae populos, ne fortasse deserti redirent in Gallorum potestatem, & acrius deinde premerentur eo iugo, quod excutere conati essent, quoue excusso nimium laetati. Parmam Lotrecus acerrime oppugnabat: habebat Cremonam: Nouaria & Alexandria, Tritium, & Domusfola, & Arona, praesidio Gallorum adhuc tenebantur: & praecipuus omnium terror ab Iouis arce Metropoli imminens hostis quasi minitabatur, repentina illa & nimium felici irruptione nihil esse actum. Dux Ferrariae, qui Pontificis Leonis metu dubitarat, postquam ille excessit, nudato penitus animo, commodabat Gallis arma, ipseque prodierat aduersus prouinciae salutem armatus. Heluetij, decem millia suae gentis prius negata Regi Francisco concesserant nunc, caeque copiae digressae Rheticis alpibus in Orobios, & eodem ylae titulo, qui foederatis fuerat, ad liberandam Insubriam,

Insubriam, Hispanosque pellendos ire sese enim  
uero gloriabantur. Non res magis alia spem po-  
pulis inchoatae salutis absciderat, quam auxilia ea  
repente addita Regi Gallo: quem rerum bellica-  
rum more, ex afflicta fortuna perditoque statu,  
rursus Mediolani esse regnaturum credebant. Ad  
haec, incertus exitus comitiorum, ancipiti expe-  
ctatione distraxerat curas, cum tam Gallicae quam  
Hispanae factionis contingere Pontifex posset,  
sicuti profane vaticinantes loquebantur. Qua va-  
ticatione & metu, Prosperus Columna, Cardi-  
nalem Eporediensem per Mediolanensis agri fines  
Romam ad comitia illa properantem, vi, seu do-  
lis inhibuit: incertumque fuit, Caesaris iussu, an  
sua diligentia, rem eam atrocem ausus fuisset.  
Nec minus ipsi inter se Cardinales id celeste nego-  
tium intra conclaue studiis humanis frustra impe-  
diebant, dum principes partium & factiosissimus  
quisque, in Gallum, aut Hispanum proni, Pontifi-  
cem, qui huic, aut illi cordi foret, anteponunt,  
ad momenta maxime belli huius certamina ipsi sua  
contentionemque dirigentes, atque ita gratificantes  
Regibus. Sed hominum nequitias altitudine sua  
contemnens Deus, vertensque saepe in bonum,  
eo certe comitiorum tempore, si vnquam aliàs,  
eludit simul, & coegit instrumentum esse rei, quam  
nemo futuram vnquam existimasset. Dum enim  
Medicacus, & Columna, primores Patrum, aut  
habere ipsi, aut arbitratu suo collocare summum  
honorem volunt, magnisque conatibus & artificijs

ad

ad sua nituntur vterque vota , & pleni artium , earundem caeteri Cardinales , hunc , aut illum , sequuntur , die quodam ad ferenda suffragia de more congregati , de Adriano Cardinale mentionem fortè iniecerunt . Erat is natione Belga , homo moris antiqui , expers Italicae consuetudinis : & simplicitatem eius , rudemque ad fraudes aulicas animum plerique adspernanteis , barbarum appellabant . Fuerat pueruli Caesaris magister , & in eius gratiam creatus à Leone Cardinalis , Hispaniae regna , hoc tempore , Caesare ipso absente administrabat . Cum nullo alio consilio , quàm extrahendi temporis causa agi de eo homine coeptum esset , laudesque viri , litterae , & apertus animus , & Apostolica innocentia memorarentur in speciem tantummodo , caeterum securo aemulatu , quia de absente , & abnuente , omnibusque ignoto & vicissim ignorante omneis , agebatur , incaluere repente vniuersi , ac regente animos Deo , Pontificem eum fecere , cum ne ipsi quidem , sententiae iudicijque sui rationem intelligerent , cur tam dubijs Reip. temporibus , tam praesenti necessitate , petissent regimen ab homine , qui nec vidisset vnquam Italiam , & tanto maris terrarumque spatio discretus maneret . Pontifice renuntiato hoc , & ex Hispania accersito , irrita machinatio fuerat eorum , qui Sedis Apostolicae opes atque praesidium ad Gallos potius inclinare voluissent , Caesarque rem Mediolanensem maiore animo amplexus , ante omnia id agebat , vt Franciscum Sfortiam ab Tridento

adento reduceret Mediolanum, sisteretque Urbem, cuius assidue voce expofcebat. Verum ea redemptio quomodo facta fuerit, & quibus etiam ea res aduersus prohibenteis Gallos indiguerit artificijs, paullo post explicabo. Nunc erecti Galli Leonis obitu, perturbatione Comitiorum, ac deinde spe noui Pontificatus elufa, cum eis quae dixi Heluetiorum auxilijs, ad recuperandam Metropolim, incubuerant, ac pofitis castris Vercellenfem inter Cumanamque Portas, vi tota Lotrecus obfidebat oppugnabatque urbem miferanda rerum facie, cum Caefariani intra urbem à Gallis, Galli intra arcem à Caefarianis obfiderentur, atque duobus exercitibus interiekti ciues malorum extrema fufinerent. Attamen, tanta erant Populi Mediolanenfis in Gallos odia, tam iucunda expectatio flagransque defiderium propediem adfuturi Ducis, vt neque tumultuarentur ob calamitates, & cuncta pro defenfione urbis strenue exfequerentur. Vltro quin etiam defcripto per fingulas Paroecias oftiatim milite, ducibusque regionatim electis, ibant ad loca omnia, vbi plurimum laboris ac periculi ostenderetur, & voluntario illo delectu, praelia statim, neſue ipſi excipiebant, vt quies feſſo Caefarianorum exercitui eſſet. Refert Guiciardinus, idque ego in alijs Patriae monumentis reperi: fuiſſe eo tempore in vrbe Andream Barbatum hominem, Auguſtinianum, plauſibili concionum eloquentia, quem audire, populo Mediolanenſi vacaret etiam inter eas miferias: cuius oratio lenimen quaſi ce-

leste miseriarum haberetur. Namque magna vitae auctoritate concionator Augustinianus, solidaque, doctrina, & verborum vi, rum acer & seuerus, tum blandus & mitis, adspectu quoque venerando, & ob ieiunia toruo, Gallorum gentem assidue infectabatur, qui facuitia, & libidine, & moribus suis amoenam & piam, & ob merita saepe felicem, inclytamque Metropolim, facere Babylonem alteram tentassent. Liberatrix Caesaris arma, brachium excelsum ac forte Leonis, Pharaonem & Aegyptum, & promissae telluris bonam iam in vicino: Aenobarbi quoque tempora, & sementem inhumanam falis, eoque diro mysterio damnandam iterum aeternae solitudini patriam, hanc, aliaque profana & sacra, vetera & recentiora, crebris concionibus arte sua miscebat Ecclesiasticus orator, attollens partam vrbi salutem eiectione Gallorum, deplorans atrocia dictu, quae sub imperio illo passi essemus, quaeue passuri etiam atrociora, nisi longius eijcerentur. Ad haec, Parmae & Placentiae paruarum Vrbium nouissima exempla referebat: quae si depellendae tyrannidi pertulissent obsessae vastationem agrorum, famem & cedes, quantò magis aduersus eadem mala durare Metropolim oporteret? His accensi ciues, quibus satis per se odij, satisque patientiae aduersus imminentem vrbi hostem esset, nihil recusabant perferre incommodi, nulla munia detrectabant. Conferebant ex priuato quicquid pecuniae priori latrocinio subtractum adhuc occultarent.

Inde



Inde stipendia exercitui aliquandiu suppeditabantur, dum à Caesare, non quantum necesse esset, venit. Cumque aquarias molas, Lotrecus & Scudus circa urbem demoliti essent, manuarias inuenere sibi, quarum arte, iniuria illa hostium elusa, frumenta terebant. Urbis interim moenia quatiebantur & volitantes ab arce globi maiore tamen terrore quam damno ferebantur, credo, quia inclusi illic, & obsessi Galli, aut timerent irritare nostros, aut parcere se crederent urbi, cuius nondum tota possessione excidissent. Erumpere enim etiam, accepto in arcem, ab exteriori parte, maiore suorum numero, parabant, spe certa, pellendi Caesarianos urbisque capiundae, si utraque res ex animi sententia cecidisset, ut & intro accipere suos, & una cum eis facere eruptionem possent. Quod ipsum, in tempore suspicatus Columna, ab utroque arcis latere per totam hortorum latitudinem, duas ingenteis moles, hinc ad Cumanam, hinc ad Vercellensem portam opere subitario, & nocturno perduxit, & in molis utriusque capite propugnaculum excitauit. Ibi disposita tormenta cohortesque, fistulatum prohibere poterant, ne qua in arcem subsidia reciperentur, ac ne qua etiam eruptio ex arce fieret: opusque fuit illud, tum subtilitate inuenti, tum usu ipso praeclarum & militari fama celebratum diu: quod quidem etiam casus opportunus mirifice adiuuit. Cum enim ea ipsa nocte, quae faciendo operi destinata erat, plurima è coelo cecidisset nix, usus Columna beneficio illo, prototypa molium

ex niue raptim instituit, simul ad facilitatem atque descriptionem perficiendi operis, simul ad tutelam operarum, vt exemplaris obiecti mollities ipsa frangeret ictus, si qua in fossores ab arte tornienta disploderentur. In hoc statu res bellicae Mediolanensium erant, cum Leone Pontifice mortuo, suffectus ei Adrianus, nondum inito Pontificatu, absens, nomine ipso factionis, & terrae, vnde erat, nostris animum, hosti dolorem & stimulos addidisset. Mox Sfortia ipse ab Tridento aderat, maximum, vt dixi, leuamen ciuitati, quae defensores inter & hostes afflicta, & oppressa, sub Principe deniq; natiuo, & Caesaris ipsius autoritate constituto, sese respiraturam sperabat. Distulerat autem Sfortiae aduentum pudenda dictu res, pecuniae difficultas, dum exuli, propter quem tot millia in armis erant, modicus & necessarius ille sumptus ad familiam fortasse instruendam, iterum faciendum decisset: liberalitasq; Caesaris aduersus id incommodum frustra inuocabatur. Scilicet, potentissimi Reges, ac domini terrarum, quibus genus humanum seruit, quorum gloriae ac cupiditati nationes armantur, queis auriferi amnes fluunt & montium dorsa perpetuo vehunt argenteas glebas, qui margaritarum denique piscatu prouincias fatigant: hi paruam saepe pecuniam in thesauris suis frustra quaesiere: ridetque interea cum sordido suo marsupio collybista & mercator diues. Sic nimirum etiam Sfortiae huic ad breue iter exigua summa non suppeditabatur à Caesare, qui,

vt

vt reduceret eum in patriam, tam graue ex longinque bellum gerebat. Cardinalis denique Medicaeus, qui Sedis Apostolicae nomine bello ei praeerat, adspersus in re tanta ridiculum id ac miserabile impedimentum, procrastinationesque Regionum, deprompsit vltro aureos nummos ad nouem millia, misitq; exsuli, conditione hac magnifica & prolixa, vt ne aliter quàm melioribus postea suis rebus ille restituendi cogitatione sollicitaretur. Ad id subsidium alleuato animo, & laxatis vtcunque rerum priuatarum angustijs, Sfortia profectus ab Tridento, per Veronensem agrum, Mantuam, inde Placentiam venit. Ab Placentia Ticinum vsque progreditur: ab Ticino Mediolanum sine mora iturus erat. Id modò inter duces, praecipuosque amicorum ambigebatur, ex duobus itineribus, breue, & expeditum, an longius, eoque Gallis inexcogitatum sequeretur. Nam licet sex millia Germanorum peditum, equites trecenti, & valida exsulum manus, tenderent vnà praesidioque essent, placebat tamen reditus incruentus in patriam, & intentos ad prohibendum pugnandumq; Gallos falere cupiebant. Delecta tutiore via, per calles inuios, per transuersa, per directa, per nemorosa, per aperta, in pagum, qui, quoniam sex millia passuum ab vrbe distat, Sextus ex eo dicitur, peruenere. Auersissima ab hoste via haec erat, egressusque Columna obuiam novum Ducem, ab Sexto pago tranquillissime in Urbem deduxit. Fertur Lotrecus, post amissam Caesariani exercitus irruptione

irruptione Mediolanum, nulli magis rei ingenuissey  
quàm ei, vel errori, vel calamitati, cùm furto quo-  
dam itineris Stortia introductus illuc foret: id quod  
assidue prospiciens ac timens, obsederat ipse qui-  
dem ab Ticino diuerticula pleraque & egressus  
ferè omneis: sed vti fit, ad caetera solers, in vno  
coccus aperuerat occasione viam, errore, qui tunc  
denum intelligeretur, cum iam idipsum intellige-  
re, moestum inutileque esset. Caetera deinde ad  
eundem modum frustrabantur Gallorum duces,  
neque Lotreco, & Scudo, quicquam magis defuit  
quàm fortuna, cùm rebus alijs haud sanè contem-  
nendi essent, itaut plerique numen inane belli ve-  
tere verbo vsurpantes, iniquum Martem esse illis  
dicerent: eaque de fratribus fama in vtroque  
exercitu esset. Potius autem infensa prouidentia  
veri Numinis fuit, quae per ea Gallorum infortunia  
struebat imperio alteri iter, vt reducto exule, fir-  
matoque Principatu, post eius finem. Prouincia  
Catholicae magnitudini accederet, augeretque eam  
& vicissim ibi exhausto, quicquid perferendum  
erat, denique frueretur pace. Sic absente Scudo  
Lotrecus, cùm exclusus vrbe cuncta camporum  
teneret, aditum exsuli redeunti in urbem, damno  
irreparabili dedit, & postquam ille cum militari-  
bus pecunijs ex Gallia redierat: intercepto per  
nostros, atque ad Aronam obsesso argento, ir-  
ritus fratri iungitur. Mox vterque ad Bicocam,  
obscurum prius, & nobilem postea semper Gal-  
lica clade pagum, cum exercitus penè inter necio-  
ne

ne dimicauere . Quo praelio perditas res , dum Lotrecus ad Regem excusaturus vadit , summum Scudi opus fuit , deditis ad quae defendenda relictus erat , pepigisse vt redire in patriam posset . Redijt cum exercitu , qui ad Bilocam superfuerat cladi , & Regi iam Gallo ex tota Prouincia treis tantummodo arces , Cremonensis , & Nouariensis & maximum vtique , sed breue momentum , Metropolitana haec , manebant . Quae vltima , sepulcrum potius bustumue Gallorum , quàm arx diceretur , si emortuum iam penè praesidium , & quotidie immorientes reliqui , si pallores etiam luctusque viuorum , & desperatio , & rerum omnium penuria quae clausa ibi & secreta ab nostrorum oculis latebant , in aperto essent , qualia , cùm deditio posita fieret , apparuere . Sed demersa profunde moles , alte imminens ciuium tectis , cincta lato fossarum ambitu , vndique armata tormentis , fama etiam & superiorum temporum casibus ingens , intacta conditionibus , veluti inexpugnabile quiddam , relictæ est , cùm quid intus miseriarum esset , à nostris ignoraretur . Vt autem , cum exercitu suo Scudus in Galliam redijt , tunc , qui ibi relictæ in praesidio fuerant , siue quia non possent sustinere diutius , siue etiam moerore victi , quod in aliena terra se esse destitutos viderent , nudauere vltro miseras suas , pactique vt cum vestimentis . & armis abire sibi liceret , arcem permiscere Caesarianis : annuitque Caesar , vt ea Sfortiae traderetur . Id solum Duci defuerat , ad solidi

di principatus speciem, & vt maiorum suorum fortunam vere recuperasset. Acres magna quidem, ingensque opus, haud sine praesenti Numinis ope effectum ita erat: scilicet deiectis ex confirmata propemodum Insubriae possessione Gallis: restituta Metropoli sub imperium, quod pro natiuo & domestico iam expetebatur: Sfortiâ post graues ex filij sui aerumnas collocato in sede, ex qua auus ipsius & pater magnitudini Regum comparati essent: Ciues tamen ipsi malis fere premebantur iisdem: & nisi quod barbaricae libidinis saeuitiaeque exempla depulerant, nihil magnopere erat ex pristini status calamitate diminutum. Non enim, vel temporum miseriâ, vel aulae ministrorumque vitio; acra militaria procedebant, atq; idipsum pecuniae, quod ex Hispania, siue ab Neapoli ad exercitum mitebatur, lentum & mancum fere conuulsatumque veniebat, vt penè quasi veniens ex longinquo victor peregrinationis labore consumptus, sic pecunia illa multorum lacerata manibus in itineris fine exspiraret. Et magnanimitate sua Caesar tardus remissusque ad cognoscenda ista & vindicanda, furandi interuertendique licentiam alebat inter suos. Hinc licentiâ maior, insuperque irae victoris & egentis exercitus, stipendiaque multorum mensum assidue requirens miles, rapere, spoliare, assueuerat, itaut accepta ab Hispanis salute Mediolanenses, praeda iisdem manerent: Constat, Caesarianum cum exercitum aliquando ob stipendia tumultuantem, cum in hyberna dimitteretur, iuisse populabundos,

bundos, vt nisi purpureae cruces (namque id insignes Caesarianis) distinguerent gentem, manipulos adesse Gallorum municipia, & pagi arbitrarentur. Nec abstinencebatur sacris, quæ, religione populi, post Gallorum iniurias instaurata statim & resecta, rursus militari violentiæ sufficiebant, atque trahebantur ab iisdem, à quibus defendi & conseruari talia oporteret: maiestasque interim erat nulla quæ prohiberet vim. Nam Sfortiæ nouo Duci etiam sua sponte mitis animus, tum verò mollior fiebat recentis exsiliij recordatione & verecundia quadam, velut in alieno imperio, quod armis recuperatum alienis, alienâ manu datum sibi esset. Reliqui duces exercitus, & praefecti copiarum, obstricti legionibus, quarum virtute vicerant, cum nihil dare possent aliud, hanc fortasse praedandi veniam, vbicunque praeda esset aliqua, sicuti saepe mos imperatorius fuit, dabant. Caesar ipse nimium absens: & absente, sicuti dictum est, adhuc Archiepiscopo, Sacra per ministros regebantur, quæ, id pastorale munus alienigenis, pastor etiam alienigena delegarat. Caeterum, ea populo Mediolanensi tolerabantur etiam iucunde, vt in malis, quia spoliatores circumspiciendo ipsos, non iam amplius cernebant Gallica illa ora, & petulanti rubore armatos vultus, quorum ipse adspectus ciuitati toti loco calamitatis antea erat. Decem millia nummum aureorum pronuntiauerunt Reipublicae nomine exercitui quæ darentur, eoque blandimento mitigatus miles deserat velut in hostico

Eccc agere,



agerè, & victoriae fructus aliquo modo sentiebatur, nondum tamen verus ille, & duraturus. Vix totus ab eiectione Gallorum annus exierat, cum varij primum rumores, certi deinde nuntij attulere, Galliam omnem strepere nouo armorum apparatu, iam iamque adfore exercitum, cuius ingressu terram Italiam contremiscere oporteret. Vocabat Rex Franciscus ad arma omneis, dictitans palam ad recipiendam Urbem Mediolanum esse mittendos, praeparansque exercitui itinera & com meatus, rei etiam gerendae consilia disponens cum Imperatore nouo, qui, Boniuetus Galliae Admirarchus fuit. Interiore sensu tacitoque consilio statuerat in Italiam ipse transire, existimans, ducibus suis ad eam diem, non tam fortunam defuisse, quàm curam: idque animi sui arcanum premebat alte ob discordem in ea re matrem Reginam quae filij caput obiectari casibus nolebat. Verùm, & ea, quae aperte moliebatur Rex, & id quod occulte parabat, fuere simul in ore famae: commotique principes & Reges alij, quorum intererat, rem Mediolanensem, Italiamque totam, in eo manere statu, quo tunc esset: aduersus Gallica arma cum Caesare confirmauere foedus: pecunias, arma, exercitus, tormenta & naues contulere in vnum, vt siue terra, siue mari veniret Rex, communi animo obuiam irent. Haec ipsa dum agitantur, & dum Mediolani, ex turbulenta illa pace, tristisque ob militum insolentiam victoria, bellum etiam, quàm superiora omnia atrocius expectatur, Bonifacius

nifacius Vicecomes Mediolanensis occidere Sfortiam est conatus ob iram interfecti eius iussu Hectoris Vicecomitis, quem ipse propinquo sanguine attingebat, & iuuenem vulgò Monsignorinum appellabant. De ea caede, in Hectorem patratâ, in Sfortiam tentatâ, pauca supra reptam, non solum, quia res vtraque insignis ad memoriam fuit, sed etiam, quia caedes illa Monsignorini vnde minime crederetur, exorto maximarum rerum motu, Sfortiam ipsum rursus in discrimen de summa imperij totius adduxit, indeque varietatum humanarum portenta extitere, vt, & priuatus hominum Mediolani Duce bellum gereret, & reconciliatus postea Caesari, infereret principum famae nomen domumque suam, ac ex domo eadem, fratres duo, alter summum militiae decus, alter summum Orbis regimen obtinerent. Hector Vicecomes, cui Monsignorini cognomentum, sumpta fortasse prius, dein omissa toga, & Ecclesiae honorum rudimenta, tentata primis annis indiderunt, fuit ex Ducis Bernabouis sanguine, quem ille, sicut in ipsius principatu memoravi, ob crebros mulierum amores late diffusum reliquit. Ex ea spuriorum stirpe procreatus hic, gloriabatur potius origine, quàm erubescere, sumptuque inde vltro spiritus nimios ac feroces. Aderant diuitiae, & magnae propinquitates, & cateruae affeclarum: hominesque assueti caedibus ipsius sumptu, multi palam, alij occulte, in vrbe, in domo, foris etiam apud amicos ad nutum intenti he-

rilem alebantur. Vastus animus, promptum ingenium, & capiendo consilio natura celeritas, sermo blandus, obuia munificentia in omnes, miraque mixtura, varius, iracundus, iniustus, inconstans, idem exorabilis, clemens, misericors, excelsus, gloriosus, humilis, ferox, cautus, & omnia pariter, vbi res, vbi tempus postularet. Inde, principum etiam externorum amicitia, veneratio populi in eum, & publicus fauor, neque abnueret ei quisquam, iusta, siue iniusta ingrederetur. Magna eius merita fuerant in Sfortiani domo principatuque extorrem, ac toto illo exsiliij tempore, tum apud exsules alios, autoritate, tum apud principem ipsum, consilio, ad eos qui domi remanserant, litteris & nutu, cum principibus Italis, gratia & familiaritate, Gallorum quoque nulli contemptus aut reiectus, varie sic adiuuerat rem quò maturius exsul in urbem principatumque restitueretur. Vt cessere Galli, pristinaque cum Principe suo redijt aula, tunc Monsignorinus iste enimvero apud reducem velut suo beneficio Sfortiam, stare ante omnes, regnare sese gratia & autoritate aequum censebat. Volebat in primis regere iudicia & magistratus arbitrato suo, facinorosi semper alicuius fautor, semperque aliquem eripiens capitali supplicio, petens etiam praemia sibi & honores, ac volens utique anteire Moronum, à quo anteiri sese turpe arbitrabatur. Potiebatur enim aula Moronus, & in nouo principatu cuncta nutu illius fiebant. Cum nescio quid absurdi ac violenti  
die

die quodam apud eum tentaret, abnuensque Moronus, subnecteret etiam causas, quamobrem id fieri non posset, exiit hoc Monsignorino verbum: fore se aliquando apud eiusmodi Herum, cui non semper Magister ab tergo iret: addiditque, telam, quam ipse tenuisset, esse retexturum eadem manu. Quid postea sermonis, quidue consiliorum super ea re fuerit Sfortiam inter & Moronum, nescitur. Monsignorinus certe paulo post mandato Moroni occiditur ab Iacobo Mediceo, qui digredientem cum arcto comitatu alicunde eum speculatus, direxit vulnera, & patratâ caede euasit. Iacobus Mediceus, primâ iuventâ ferox inquit, iratusque natalium suorum fortunae, ex qua nihil nisi inopem nobilitatem, & magnae stirpis inane nomen haberet, contractis olim in vrbe inimicitijs, & aemulo interfecto, profugus, adiuncta sibi exfulum manu, qui pulsi dominantium Gallorum iniurijs, circa Larium lacum praedabundi vagabantur, caput sese fecerat ad Gallos ipsos quacunque posset ope insectandos, tempore scilicet eo, cum Sfortia rerum exitum expectans apud Tridentum sederet. Ita, aperto sibi magnarum rerum itinere, cum iuuenum suorum globo, die quodam ingressus urbem, tabellarium, qui ex Gallia literas ad regios ministros ferebat, obtruncarat luce palam, quo facinore, omnia Gallorum arcana Caesarianis & Sfortiae innotuisse ferebantur. Ad facinora deinde ministeriaque cuncta, ubi presentia & vigore animi opus esset, cum fere adhiberetur,

adhiberetur, tum verò post iactam illam temere ab Monsignorino vocem, potior nemo est reperi- tus, cuius manu, Sfortia, & Moronus, suspectum sibi quidem semper antea, nunc scilicet etiam aperte minitantem cum tolli posse existimarent. Sublato in hunc modum Monsignorino, cum & minister caedis, & qui iusserat caedem pariter anxij sollicitique essent, obsequijque, & mandati conscientia inuicem animos inquietaret, hinc suspicio- ne, ne prodito arcano, potentior quàm hodie- gens illa Vicecomitum ad arma iret, hinc metu, ne qui prodere poterat rem, ipse tolleretur: Medicaeus ita procul ab coetu colloquiisque vrbani- ablegatur in Mussensem arcem, quae ad radices montis in Larij Lacus litore sita est. Ibi quid para- tum interfectori esset, anceps opinio interpretan- tium fuit. Sed ille in tali tempore audendum ra- tus, data fortè occasione, insedit firmavitque sibi arcem: atque ab eo principio, quae fortuna viri fuerit, in tradenda deinceps fortuna Sfortiae casu- busque vrbis exponemus. Nunc novos anticipet- que casus, & incredibile bellum, quod ab ministro- magnae caedis Medicaeo hoc imminebat, porten- dere Duci visa est noua item ac penè incredibilis audacia Bonifacij Vicecomitis, ex cuius domo Monsignorinus fuit. Is namque, desiderio conso- brini violentus, & audus petendae vltionis, neq; ambigens vnde ea petenda esset, redeuntem ab Modoetia Principem stricto pugione aggressus, iugulum primò ipsum appetiuit; deinde, cum ietus

ille

ille in irritum cecidisset, educto longiore gladio, laeuum eius humerum vulnerat, & quia circumfundebatur à Praetoria statim ipse cohorte, proripit sese praeceps, ac celeritate barbari equi quo uehebatur, inter tot armatos euasit intactus. Abisse in Subalpinos ad Sabaudiae Ducem memorant: ibi saluum fuisse sub Principis tutela, per cuius fines, adfuturo mox Gallorum exercitui iter parabatur. Sfortiam ex tanto periculo seruauit minima dictu res, humilitas nempe paruulae mulae, quam ad illud suburbanum iter fortè poposcisset. Ea scilicet, equi pariter equitisque assultu, & micante ante oculos ferro contremefacta subduxit consternatione sua vulnere fessorem, qui ipse humilior, venientes in caput alte ictus sefellit proceritate vulnerantis & leuiter humero caesimque excepit. Magnus inde metus erat veluti per miraculum uiuo & saluo Principi, ne coniuratio ciuium ea potius quàm furor hominis vnus fuisset: ac vitata vrbe Modoetiam reuersus pauebat etiam ibi umbras, suspectaque cuncta habebat. Moronus & Columna, ad eius rei huntios, protinus excitato satellitio turbauere quaestionibus urbem: iudicesque & scribae, importuno suo more confecere volumina, quae confessiones, & indicia multorum inerant, quasi genus omne Vicecomitum, & eis adnexi alij manifestae coniurationis tenerentur. Tormentis enim & carcerum vi, fraudibusque suis cogebant homines ea de se confiteri, quae ne cogitassent quidem: adeò non moliti essent. Re autem vera  
fuit

Ticinum amnem tenuerè , mox ipſius quoque  
traiectu amnis ingenteis & fortunati nimium , ac  
prope inuenta expeditione , ſi extrema primis  
reſpondiſſent , ac niſi coecaſſet eos violentia &  
altitudo cauſarum inexſuperabilium , quae ſolidam  
vllam vnquam in hac terra contingere Gallo victo-  
riam prohibebant . Nam alioqui tempore eo aper-  
ta ad vrbeni & obuia cuncta venientibus fuere .  
Princeps ipſe vulnere licet leui debilitatus ob me-  
tum , & ſuſpecta coniuratione , animo magis quàm  
corpore aeger . Offenſa , & pauida , & irata ple-  
raque nobilitas terrore & acerbitate quaefſionis ,  
cùm ob facinus vnus , vniuerſi inquietarentur . Moe-  
nia quoque vrbiſ quaffata paſſim & fracta ſuperiori-  
bus bellis per crebros hiatus ruinaſque pateſcenteis  
aditum hoſti praebebant . Columna morbo implici-  
citus iacebat , qui , ſiue fortuitus , ſiue inuectus , vt  
creditum eſt , veneno , vltimus certe ei fuit . Reli-  
qui duces eum ob valetudinem adſpernabantur , ob  
ſummum belli regimen odera t . Igitur ipſe tan-  
tum praefidij deprehenſis in eo ſtatu rebus affere-  
bat , quantum poterat & natura cunctator ac len-  
tus & moriturus breui . Circa lectulum huius , ha-  
bito conſilio de ſumma rerum , ad caetera diſcor-  
des , & mutuis odijs inſenſi , communi animo ſen-  
tentiam hanc dixerant , vt relicta Metropoli , ad  
Nouocomum , ſiue ad Ticinum euaderent fugâ ,  
prout hoc , ſiue illud iter , alterutro venientes Galli  
vacuum opportunumque reliquiſſent . In tali diſ-  
crimine ſeruauit vrbeni cunctatio hoſtium prope

Ffff

fatalis ,



fatalis, qui transgressi celerrime Ticinum, morati  
deinde circa flumen, post aliquot dies ad Clarae-  
uallis Monasterium transfudere segniter castra. Ibi,  
triginta millibus armatorum, occupatis late campis,  
& circummisso ad Modoetiam quoque minore  
exercitu, ne quid comineatum alicunde veniret,  
decreuerunt expugnare lenta fame urbem, quam  
sine mora vlla capere potuerant, si, quemadmo-  
dum à Caesarianis factum antea erat, quo vene-  
rant die, intrare apertam desperatamque voluis-  
sent. Obsidionis mala cito vertere in ipsos, itaut,  
Mediolani tum ex anteparaeparato suppeteret  
annona, tum equites nostri egressi presidio ad ea,  
quae supportabantur, secundis etiam aliquot cer-  
taminibus affligerent Gallorum equitatum: eiusque  
detrimenti fama Gallum imperatorem inter suos  
vexabat. Simul Heluetij, qui in eo exercitu erant,  
ob frigora tumultuantes, perpulere, vt castra re-  
tro Ticinum versus moueret, aegre cohibitis no-  
stris, quominus terga abeuntium jacerent: quod  
si factum esset, non dubitant, quin torpida, & ri-  
gentia membra aegre molientes, atque profectio-  
nis etiam eius ignominiâ consternatos ( & erat ni-  
ualis forte dies ) opprimere Caesarianus exercitus  
potuisset, recens nimirum ab urbanis hospitij, vn-  
de spe optima & ignium tepore alacer in pugnam  
iret. Sed Columna, praeterquam quod cautus na-  
tura & lentus tuta consilia ex ratione, quàm pro-  
pera ex euentu semper maluerat, etiam tabe mor-  
bi, & pauore supremorum alienatus fere á com-  
muni

muni sensu abnuit discrimen, & sicuti vocibus poterat intermortuis, differuit pauca in eam sententiam: contentos ipsos esse debere, quod cunctando & sedendo abire prope à moenibus hostem, coegissent. Galli, quacunque irent, ferro & igni cuncta permiscenteis, incenso Rosato municipio, praedati quicquid obuium fuerat, ad Abiatum, constitere, qui locus quatuordecim millia passuum ab vrbe est: & quia satis validam, vti tunc erant munimenta, arcem habebat, idoneus visus, vbi noua auxilia Heluetiorum, quae mittebantur ab Rege expectarent. Ferme sub id tempus, quo Gallus Imperator reducto ab Claraualle caeterisque suburbanis locis exercitu, & amissa occasione capiendae vrbis, nullum nisi tristem de tota expeditione nuntium mittere ad Regem poterat: Cardinalis Medicaeus, qui ipse in parte foederis aduersus Gallos initi, Leonisque animorum heres fuerat, Pontifex Max. renuntiatur. Id accidit quinquagesimo die, postquam Adriano mortuo, Patres intra conclaue abditi, studia sua, & altercationes, & astus consumpserant in ea re, quae diuino semper nutu peragitur: & mores negotiationemque mortalium excelsa Numinis benignitas ac prouidentia admittit illuc, vnde tamen mortalitas tota arcetur. Nec sane Cardinales antea in vlllo alio Pontifice tam intentis animis altercati erant. Creatus hic, Clementem VII. dici se voluit, vel appropinquante celebritate Diui eius, vel, vt non minus mansuetudine spem omnibus faceret, nul-

lius offensae, nullarum sese inimicitiarum memorem, paterno in genus humanum spiritu noua ineuntem itinera vitae, capeffere fastigium illud. Nota tamen erant, & celebrata sermonibus, in Caesarem fauor, in Gallos alienatio, studium rei Mediolanenses, & foederis necessitudo, quo sese olim vrbis eius causa illigasset. Ea Mediolanensibus, & defensori Mediolanensium Hispano spem, animosque addiderant Gallorum genti incusserant solitudinem atque inuidiam, & moerorem, si semper infensum sibi, semper Hispanae factionis Pontificem habituri essent. Super omnia, vrebat animos recordatio Leonis odiosa genti, quod eo scilicet Pontifice aduersus Regem Franciscum, ineunte foedera, Pontificatus opes ad arma conferente Hispanorum, eiekti Mediolano essent, quam nunc frustra repetentes urbem, in hostili terra conflictarentur. Pontificis nempe eius sanguineum, gentilem, heredem, spiritus animosque retulisse eosdem imbutum esse consilij illius, & pari cupidine tollendi in perpetuum ex Italia Gallicum nomen, ne ad recuperandam urbem Mediolanum adspirare vnquam possint. Eadem apud Regem Franciscum quamquam falsa agitantur. Hunc etiam angebat conscientia dati per ipsum veneni, vel certe, credito, tamquam dedisset. Successorem simul & ultorem adesse. Mediolani moritur iisdem diebus Prosper Columna, veneno amatorio, sicuti creditum est, illigatus, mansitque inter annalium monumenta Clarae meretricis

retriciis nomen, quae deperierit virum. Eam Bonueto vsque eò cordi fuisse, adeò, vt cum ab Claraualle moturus castra esset, miserit in urbem Galeatium quendam, qui visceret feminam, ac de inclyta pulchritudine eius comperta & spectata oculis referret. Columnae morte, summa rei militaris redierat ad Carolum Lanoiam, qui Neapoli pro Rege erat: iamque ille ob Gallorum aduentum & Columnae valitudinem prouinciae metuens, delegatâ Regni curâ alijs, profectus inde cum valida equitum peditumque manu aduentabat, ita moderans iter, vt ne prius ingrederetur urbem, quàm Columna, qui iam nulla in spe trahebat animam, expirasset. Id honori hominis dederat, caueratque laudabili modestia, ne propere intrando praecepisse imperium, & viuenti quodammodo ducere voluisse funus videretur. Paulò post Borbonius ipse aderat transfuga Regis Galliae, sicuti dictum est, nouus Caesaris amicus, anxia sedulitate ad probandam ostentandamque fidem, ne intentis in se totius aulae oculis & susurris, vlla, vel actione, vel voce, vel motu vacillans ambiguusue reperiretur, vtque probaret omnibus hoc ipsum, quod à priori aula, non ingenij vitio, sed coactus inuitusque desciiisset. Vicissim Caesar absens, & occulto eius nutu Sfortia, & Lanoius & Daualus, caeterique intenti, nè proditor obseruari sese intelligeret, ne ve intelligere ipsi, aut meminisse viderentur illud, quod sui Regis desertorem in exercitu haberent. Inde, liberalitatis & diligentiae

diligentiae certamen, qualia solent initia esse omnibus, qui transire ad hostem. Borbonij transi-  
tione huius, a duentu Lanoiae, foederatorum auxi-  
lijs, exercitus noster, cum, & ducibus, & milite  
instructus egregie esset, diuiditur bifariam, & par-  
te relictâ vnâ ad custodiam praesidiumque vrbis,  
caeteri Ticinum transeunt ad ea recuperanda, quae  
hostes ab repentino alpium transitu tenuerant: ipsi  
statim ad eadem defendenda concurrunt: pugna-  
baturque leuibus praelijs, quorum taedio, & dam-  
no Boniuerus ad vniuersam rei dimicationem ve-  
nire concupiuit. Sed detrectauere nostri, non,  
quod animis, aut vlla virium parte inferiores essent,  
sed quia ferociam imitari Gallorum nolebant, quos  
fatigari & dissolui, compellique domum posse  
cunctando spes erat; sicuti etiam euenit. Boniue-  
tus ingentia de se principio pollicitus Regi, ipso  
etiam expeditionis initio non infelix, mox occasio-  
ne felici improuide abusus, fessus postea rebus  
ambiguïs, siue infatistis, relinquendae Italiae con-  
siliu cepit, rediensque in Galliam, nullius bene-  
gestae rei gloriam ad Regem ex provincia Medio-  
lanensi tulit; nisi quod quatuordecim millia num-  
mum aureorum, quae Caesar ad exercitum mitte-  
bat, interceptisset. Abeuntes Subalpina Regione  
Gallos, qua etiam irruperant via, Eporoediam,  
vsque persecuti nostri, partem impedimentorum,  
& plerasque bombardas relinquere coegerunt.  
Quominus etiam conuertere agmen, atque in aciem  
adstare cogarent, ea res obstitit, quia, nec totus  
exercitus

exercitus ductus erat ad persequendum, & Vene-  
torum auxilia, simul atque fines Sabaudiae Ducis  
attigerant, negauerunt habere se id ab Senatu suo  
mandatum, vt in ea terra vestigium ponerent :  
ideoque progredi vltius recusauere. Boniuetae  
expeditionis in Mediolanenses exitus hic fuit, cu-  
ius infortunio Rex Gallus irritatus, abruptis quae  
obstabant, venire ipse Mediolanum, & fortunam  
experiri decreuit. Quod decretum atque consilium  
optimi & generosi quidem, sed in re ista Medio-  
lanensi semper infelicis Regis, qualia rerum huma-  
narum, & fastigij regalis ludibria ediderit, postea  
narrabitur. Iuuenemque Regem, post pristinos  
infelices conatus, toto nunc potentiae suae moli-  
mine ingressum feliciter Italiae fines, capta statim  
vrbe Mediolano, caetera obsidentem, & Neapoli-  
tani quoque Regni iam prope dominum, mox,  
dum suo corpore miscet certamina, sternitque ho-  
stes, in medio seruore pugnae, suffosso equo str-  
atum humi, captiuum inde, & per alium aliumque  
carcerem ductum in victoris Caesaris aulam, cum  
vetere nouoque regno factum alieni iuris, vitam  
denique & spiritum ab hoste deprecantem exhi-  
bebo. Sed prius exponam Urbis nostrae casum,  
longe foediorum etiam, quam ille hostis Regis fuit  
exortâ scilicet interim pestilentia, quae, dum Rex  
ille ab domo exercitum mouet, dum transit alpes,  
dum expedito agmine aduentat, sine telo, sine  
sanguine, tabe funeribusque debellauerat urbem,  
& venienti infesto Gallorum exercitui, reliquias  
cuium

ciuium quasi deuinctas & ligatas, patefactis moenibus, ac remoto omni portarum obijce obtulit: Initia mali ad Abiatum, quò Boniuetus ab Claraeualis Monasterio cum exercitu sese contulerat, extitere. Inde, breui confinio, faciliq; traiectu peruenere in urbem, & corripuere cuncta, manante scilicet paulatim per corpora, per domos contagione rerum earum, quas sordidi, & marcidi putresque Galli, cum inde pellerentur, reliquerant. Ac primò quidem, milites nostri, rerum earum contactu, & aegri erant, & moriebantur. Postea, qui curant eos, quique inuisunt, aut ministerio aliquo contrectant, propinqui, familiares, amici, etiamsi nihil aliud, quàm spiritum habitumue communicarant, commercio illo trahebant luem; atque ad alios deinde perferebant. Hi rursus, alloquio vel adspectu contaminabant plures, & à pluribus ad vniuersos permeante morbo, citius quàm credi posset, vrbs tota exhauriebatur, populusque morientium erat, iacente passim alio mortuorum populo, cum ne solita quidem sepeliendi cura maneret erga id, quod semper ab superstitum oculis & communi luce submouetur. Haec ipsa iniuria cumulus alimentumque mali erat. Iacebant enim strata per vias, perque vacuas domos cadauera: & similem exitum expectantes eos, qui supererant, pestifero odore, nec minus tristitia, & praesentis imagine mortis afficiebant, ut in eosdem ruere acervos quamprimum cuperent, quod vnicum remedium calamitas ipsa afferebat.

Sublata



Sublata sensus humani consuetudo: & quos tabes illa infecerat, aut neglecti desertique moriebantur, aut, si quis assidere voluerat, fiebat ipse ceteris exemplum ne cunctaretur adsidere quisquis mori, & finire misérias vellet. Neque solita effugia dabantur in villas amoenosue secessus, cum etiam illi qui rure agebant, conditioni vrbanoꝝ inuiderent, ac proripere sese eodem conantes caderent in itinere ipso, & cadauera sua, ceu fugae vestigia infelicitis spargerent. Moriendi tamen celeritas, agrestibus iuxta, & vrbaniis, leuamento erat aduersus rerum omnium egestatem, cum tota ciuitas, & vicina pariter ac longinqua rura, per aliquot iam annos, inter maximorum exercituum, lingua moribusque dissonas, licentia & rapacitate simillimas gentes, spoliata, & exausta, & vastata, ne vulgaribus quidem & quotidianis alimentis sufficerent, adeo pharmaca, haustusque delicati, & mollior aegrotantium victus deesset. Vix amplius negotiatores, & olim opulenta nobilitas, ob recentium bellorum iniurias deserto agrorum cultu reque coarctata familiari, pestilenti illo tempore propulsabant famem. Egens vero semper populus, & miserrima pauperum multitudo contabuerat fame nisi velocius aliud malum remedio esset. Et miserabilis adspectus interea erat manducare volentium inimica palato, & in ipso manducandi conatu ob pestem alteram exeunte vita. Sed & aliae tristiores formae mortis traduntur, quas referam, vt ex comparatione temporis eius agnoscat

Gggg

omnis

omnis populi Mediolanensis aetas, quanto mitius in se agat Numen . Neque enim talia exempla celestium irarum, vel rediisse vnquam, vel in posterum reditura esse arbitrabamur . Vna nec inhonestā domus fuit, quae ante illam pestilentiae calamitatem, ab Gallo violentiā & rapinis, ab Hispano tributis, & immodico exactionum pondere afflicta, nuditatem & famem aegre tolerabat . Vbi grassari morbus totamque depopulari urbem coepit, domum etiam hanc irruit inter primas, scilicet affectis iam corporibus animisque, & paruo illo sordiduloque grege conferto intra angustias humilis tecti . Omneis ibi exanimis ab ijs, qui fortè ingressi erant, reperti sunt, sed alius alia facie lethi melioreque postea ciuitatis statu celebrata sermonibus res digna est visa pictoribus, qua certatim exprimenda specimen gloriamque artis ostentarent . Collapsa repente retro mater fregerat illisum pauimento caput, & fusa per plagam viscera cernebantur . Duo lactentes adhuc infantes, nullo materni casus intellectu adrepserant ad notas sibi papillas, & emortuo illic lacte irriti mordebant alimenta sua siccatosque fontes, & spiritum vltimum morsu exhalabant : caetera grandiuscula, & propter aetatem tamen secunda proles circumfusa mortuae parenti, aut mandendo simpliciter terendoque dentibus aliquid expirarat, aut incertum relinquebant in adspicientium animis, contagio, an fame expirassent . Ac deforme dictu : liberorum pater, mulieris maritus, victo malis animo, cunctantem

stantem mortem vltro accerserat, vitaeque suae attulerat vim, & pendentem ab iugulo nodum, notauere, quo sese exanimarat. Talia viderat retuleratque vicinorum aliquis funestam eam forte domum ingressus: casusque ille assuetudine quotidiana horribilium spectaculorum, quamdiu manebat pestis, in leui habitus, vbi haec abierat, salute vrbi reddita, in nouo deinde populo, materies, vt dixi artificum etiam ingenijs fuit. Pleraque alia generis eius, & narrabantur ab ijs, qui publicae cladi superfuerant, & inde audita scriptores etiam litteris mandauere. Vigiles, qui excubias in arce agerent, exanimis in fossam esse delapsos: praefectum ipsum arcis, dum circuit muros, custodiasque obit, repentino pestilentiae ictu praecipitatum, absumptum illic praesidij robur, vt nisi propugnacula, & bombardae, & turres, & portae cataractae conspicerentur, nihil fere arcendo & deterrendo hosti ibi esset. Senatores, & principes vrbis, quosue alios, in tanto suae vitae discrimine cura aliqua publicarum rerum attingebat, dum congregantur vtique consultandi causa: dum sententias dicunt: dumve ab inconsulto illo concilio redeunt domum, infirmae plebis sorte corruentes, siue domi manserant, pari exitu, reliquerant fere absque regimine urbem, & quibus saeuitia morbi pepercerat, confuso iam nobilium ignobiliumque discrimine, autoritas nulla eis, & prouidendi iubendiue quicquam irritus labor. Dum cadunt atque coaceruantur promiscue clari simul & obscuri, virorumque & femina-

rum cadauera sine vllō intuentium pudore iacent  
passim ita vti naturae simplicitas & miseria sese  
habet, ipsi etiam inter se viui nihilo plus pudoris  
ac verecundiae retinebant. Tamquam mox amissi  
furi vitam, ad id quod aderat praesensque erat,  
desperate & inuerecunde plerique ferebantur: &  
certa ante oculos mors, quae supremi iudicij ter-  
rore flagitia inhibere debuerat, eadem erat velut  
illico morituris incitamentum, ne scilicet vsurpare  
cunctarentur lasciuias, à quibus in perpetuum abi-  
rent. Valuit apud alios obiecta oculis animoque  
species dissoluendae mortalitatis, futurae vermibus  
alimento, & abiturae in vermes, quodque longe  
terribilius, os immane Orci, praesens tartarus,  
sempiternae flammae, & ex diuerso, beatoris vitae  
praemia, quorum spe ac meditatione multi innoxie  
sanctaeque agebant: taliumque pia facta & mortes  
ipsae nobilitauere deformem eum annum. Nam,  
diuino vere spiritu feminae virique, pedibus nudis,  
cincti funibus colla, & voluntario frequenti ver-  
bere fundentes ab humeris sanguinem, exposcen-  
tis flebili voce celestem veniam adibant templa,  
interimque tamen vrente intus peste absumpti non-  
nulli eorum cadebant, testati splendore oris, quod  
eiusmodi morte vitae poenis eximerentur in celum,  
nec poena sed praemium ipsa esset mors. Iam,  
inclytæ animae subsidia urbis, apud suum pars  
vtraque sexum, sanctae erant Apostolico munere:  
cibos & hortamina egenis tulerant: quid post mor-  
talem hunc spiritum reliqui esset, docuerant igna-  
ros,

ips, siue nihil tale cogitantibus iniecerant alterius  
vitae curas, spemque aut metum. Iam veteris  
quoque Tobiae erga insepultos studio & caritate,  
quantum potuerant in tanta strage assequi, per se,  
per alios adlaborarant, ne corpora exanimata in  
publico & aperto putrescerent; & pastores isti  
haud dubie Urbis in tali tempore fuerant. Nam  
absente, sicuti dictum est Pontifice Urbis mercena-  
rij ministri, quibus interim Ciuitas commendata  
erat, minime mouebantur animarum clade: ac sicuti  
lupo superueniente, custos alieni gregis dat impigre  
terga, deseritque nihil ad se pertinentes ouiculas:

ita conductitij illi curatores, nulla alia

quàm sarcinarum & peculij sui so-

licitudine ad prima pestilen-

tiae signa, sublatis cal-

lide rebus abierant

domum.

IOSEPHI RIPAMONTII  
 CANONICI SCALENSIS  
 CHRONISTAE VRBIS MEDIOLANI  
 HISTORIARVM AB METROPOLI CONDITA  
 DECADIS III  
 LIBER IX.



**P**LACATO tandem Numine, annoque circumacto pestilenti (is fuit humanae salutis millesimus quingentesimus vigesimus quartus) Populus & Respub Mediolanensis, ignobili paruae vrbis populo, quàm Metropolitanae Maiestati similior erat: & sicuti corpora momento vno dissoluuntur, tardis incrementis augescunt, lente ab noua stirpe renascebatur. Rari & attoniti qui fieri parentes possent: vacuae pleraeque domus: inania procerum etiam tecta: parui magnique penates iuxtà deserti: compita, & viae, & fora illa calcata tantae quondam multitudini herbescebant agresti simillima solo: & singuli ciuium velut attollentes ab tumulo caput, iratam adhuc fuscamque lucem adspicere sese putabant. Mansueuisse coelum, inhibita esse pestilentiae tela, tutam esse sibi vitam, vix fides. Et erant ista tamen, licebatque iam crescere, & nouam sobolem reparare vrbi, cui Rex Gallus imminebat, vt statim victor,

Victor, postea captiuus cladem ignominiamque inde aegre elapsus vincula, referret domum. Incitauerant destinata eius Caesariani ipsi illato in Regni fines bello, Massiliaque per quadraginta dies diuerberatâ, & quassatâ, non tamen captâ: quae oppugnatione postquam irrita fuit, confirmato ob eam rem animo, & ad veterem impetum addita recenti ira, parem eis animis offensionique exercitum celeritate mira in Italiam rapit. Simul Duces nostri cognita profectione Regis, timentes vrbi Mediolano, quam, & relictî illic praesidij tenuitate, & eo ipso quantulocunque praesidio, sicuti demonstratum est absumpto, apertam fore hosti prospiciebant, concitato ab Massilia nauium cursu legentes oram prospera velificatione Monoeci portum tenere. Ibi exposito exercitu, tormentisque membratim in iumenta impositis, pari fere cum hostibus gradu, diuerso itinere procedebant, ita, vt eodem die Galli Vercellas, nostri Albam peruenirent. Inde, & hostes nemine prohibente, traiecto Ticino, Mediolanum versus recta contenderunt: & Caesariani praemisso iam ad prouidenda quae tempus moneret, Hieronymo Morono, quanta maxima poterant celeritate subsequentes anteuenire sese posse Gallum sperauerant. Sed Moronus, vbi solitudinem vrbis, vastaue & squalentia cuncta vidit, relato etiam mortuorum numero (centum, quadraginta millia periisse constabat) squalens ipse & confusus, desperata defensione, vltro rogare & hortari ciues institit, vt saeuienti fortunae submitterent



terent capita, neue Gallo venienti faeuendi insuper materiem praeberent. Acciperent exercitum Imperiumque cui frustra resisteretur: Id Sfortiae, id Caesari gratius fore, quàm si pauci & inualidi tot armorum millibus offerrent sese trucidandos. Satis spectatam esse populi Mediolanensis virtutem: nunc saluti consulendum: generosa pectora melioribus suis & Reip. temporibus reseruarent: memorem Sfortiam fidei ciuium optimorum: si cedendo temporis conseruare eos potuerit, adnixurum, ut pristina quoque ipsorum gloria recuperetur: vindicem fore Deum, nec homines vitio daturos, quòd in manifesto discrimine cauta consilia temerarijs antetulissent. Haec & alia praesentium miseriarum solatia & hortamenta, suadente desperatione Moronus admovebat ciuium animis qui aduentantium fama Gallorum vndique exciti, concionis more circumsteterant virum, & in tam dubia re, quidnam ille afferret, suspensi ab ipsius ore expectabant. Ac caetera quidem eius miserae consolationis peregit Moronus, apud Populum Mediolanensem quomodo quilibet etiam alius orator, desperatarum rerum ignominiam & pudorem eleuare verborum arte potuisset. Illud verò nouum & singulare, & ad Christianos animos maximè efficax attulisse est visus, quod in excusanda defendendae urbis necessitate, tenerrimam illam Evangelij vocem vsurpauit, qua Saluatorem in extremis suis rebus mortalitate succumbente esse vsum tradunt. Praefatus enim, ut in paribus animi tormentis,

mentis , verbum vſurpare idem licitum ſibi eſſet : ſpiritus quidem promptus eſt, inquit, caro autem infirma : & reliqua deinde ſicut expoſui , ſubiicit . Ab ea concione , datis quibuſdam propere mandatis , & firmata ſicuti potuerat , arce, Mediolano egreditur : ac vitata militaris viae celebritate ſeſe Ticinum confert , qua in vrbe Caſſariani duces cum Franciſco Sfortia exercituque toto ſubſtiterant . Sub ipſa vrbis eius moenia Sfortiam reperit egreſſum impatientiâ diutius expectandi quid ipſe renuntiaret . Vbi , perditas res , iamque tenentem Metropolitana moenia Gallum accepit, pauca cum Morono eodem ſecretò colloquitur : deinde recipiunt ſeſe vnâ intrò ad Caſſarianos , ipſos quoque intentòs in nuntium, vnde cuncta pendebant . Quidnam illud ſecreti ſermonis , quæue ſuſpicandi cauſa Caſſarianis fuerit , neſcitur . Ex eo certe die, Sfortia & Moronus in Caſſariano exercitu haud ſecus adſpiciebantur , quàm ſi Gallis Metropolim ipſi prodidiſſent . Et eae deinde ſuſpiciones ab qualicunque ortae principio, caeterâ additâ offenſione animorum, ſive , per artem & calumniam arrepto quolibet obtentu , in tantum exceſſere , vt apud Caſſarem grauiffimo rebellionis & ingrati animi crimine Sfortia accusatus infeſtam inter miſerias & pericula vitam ageret, atque partâ de Gallis victoriâ, pro hoſte ipſe haberetur : quas principis infeliciffimi calamitates, & eius negotij exitum reliquosque Sfortiae caſus ad finem vſque vitae ſimul & imperij, in ſequentibus

libris demonstrandi locus erit. Nunc perculsis repente casu Caesarianis, Rex Franciscus sine certamine victor Metropoli instabat adeò non repugnanti, ut imperium accipere eius, cum bona prioris domini venia, communi ob recentem pestilentiam approbatione famae, superùm etiam quasi iussu parati illic cuncti essent. Ille enimvero, neque ingressus urbem, neque ingredi passus quemquam suorum, tantùm collocato circa moenia praesidio & constituta obsidione arcis, graui proposito edicto ne quisquam Mediolanensium vlla iniuria violaretur, infesta ad Ticinum signa repente conuertit, ne urbem scilicet eam ab tergo relinqueret, idque caput esse belli dictabat. Caesariani duces, iam oppido probe communito, circa vrbes diuisi alias, in rei Ticinensis euentum intenti, sese ad Metropolim denuo recuperandam accingebant. Miserant Borbonium in Germaniam ad conducenda gentis eius aliquot millia. Sfortiam & Moronum interim, neque ut palam irati tractabant, ne alieno tempore exasperarentur, neque ut incauti, ne suspecta iam eorum fide, locum nouae fraudi aperirent. Angebantur difficultate pecuniarum, exiguis ut semper ac lentis ab Caesare subsidijs, & mutata Pontificis voluntate, qui in minore sua fortuna, arcendis Italia Gallis, ut demonstraui, foederatus, abnuebat nunc omnem armorum societatem, Apostolicoque nomini indecoram esse profitebatur. Florentini item antea foederati & moniti iam ex foedere, quibus auxilijs Metropoli-

tana

tana res indigeret , consentanea quaedam alienationi Pontificis respondebant . Paria referebantur ab Venetorum Senatu , qui prudentiae suae genere , consilium ex inclinatione rerum capere soliti , postquam cum magno exercitu prope victorem in Insubria sensere Gallum , iam amicitiam armaq; illius spectanteis , non teneri sese arbitrabantur foedere , quod fortuna inutile fecisset , & haud dubie immutati verba pro rebus dabant . Alienatis ita multorum animis , & ob res aduersas , vti fit , quotidie magis detecta mutatione voluntatum , res vna tamen exercitui nostro ducibusque Caesarianis adiumento erat , quodd nimirum , Rex Franciscus aggressus magno impetu Ticinensis vrbis moenia , & praesidij robore , & oppidanorum virtute inde repelleretur . Atque dum Gallus ibi tempus terit , & nunc dimouendo auertendoque amni , nunc agendis cuniculis operibusque frustra fatigat militem , interim confirmati nostri Heluetiorum auxilijs , quae Borbonius adduxerat , & animorum fiduciâ , minime dubitabant , quin recepturi Metropolim , breui tempore essent , & excitata sic priore fortuna , deiecturi Italiae finibus Gallos . Spem quidem illam , vt Rex etiam ipse caperetur , vtque tantum munus in Hispaniam ad Caesarem possent mittere , nondum credo agitabant . Cum nostra hostiumque negotia in hoc statu essent , & Gallus , quia Mediolanum haberet in potestate , mox caetera sese habiturum speraret , Hispani , quia oppidi vnus irrita oppugnatione detinerentur , frangerenturque

H h h h 2

hostes,

hostes, propediem crederent fore debellatum: tempus id opportunum tentandae pacis inter Reges visum est Pontifici Clementi, dum scilicet pars utraque victoriae pignora manibus teneret, dum Rex etiam uterque vinci sese posse arbitrari posset. Sanè Pontificis eius animus initio fuerat, ne sese immisceret Regum armis, & dispari quondam studio molitus bella, factiones foederaque amplexus, famam nunc ingentem illam & Apostolicae maiestati consentaneam adamarat, ut Pater humani generis, publicae pacis cupidus, turbarum inimicus omnium haberetur. Caeterum, securitatis etiam ipse suae causa, dederat hanc occulte Gallo fidem: cum, bona sua pace Mediolanensem expeditionem eum semper esse obiturum, neque ab Roma quicquam unquam ad eam rem ei fore impedimento. Postea, Gallicas quoque copias euntes ad Neapolitani Regni damna transmiserat per Ecclesiae fines, causatus apud Hispanos hoc ipsum, quod nisi exercitui infesto praeuisset iter, auersurus in se bellum fuisset. Denique haud procul iam aberat ab eo, ut Gallicae potius quam Hispanae factionis diceretur, indueratque in communem sese laqueum, nec ferme sentiebat. Implicatus ita & haerens, suspectansque multa & vicissim ipse suspectus mittebat crebras de pace legationes, in Insubres quidem, ad Gallum Regem, ad Lanoiam, ad Dauadium: in Hispaniam verò, ad Caesarem ipsum, eisque legationibus miscebat consilia, preces, & Apostolicos hortatus, & quicquid à Pontifice ma-

ximo communis otij causa Idici Regibus posset. Repurarent incerta belli, & longinquam ab domo militiam, & ancipites casus; & tot infidas ab vtraque parte victorias, & tantum Christiani sanguinis haustum iam & hauriendum. Conditiones quoque proponebat, vtilis vtrique parti, sicut arbitratur ipse & honestas: vt Regis Francisci filius natu minimus, ab Caesare Dux Mediolani appellaretur: pro eo munere Caesar ipse pecuniae summam acciperet quantamcumque dari iustum foret. Ita rem Mediolanensem, extra Gallici Regni corpus, & Caesarem, eius dandi, vel adimendi principatus authorem fore. Nusquam ea secundis auribus accepta sunt. Negabant Hispani, glebam vnam Italici soli Gallis vnquam esse relicturos, insuperque taciti indignabantur, quod consilia pacis & hortamenta sibi mitterentur ab eo Pontifice: qui relictum foederis fide, sese manifeste fecisset hostem, hostiliaque iam coepisset. Rex Gallus, capta iam Metropoli, & Neapolitanae conquisitionis vanitate vitioque natiuo inflatus nihilo aequiorem sese ad Pontificis monita accipienda praebebat. Ea pertinacia Regibus, isque vtriusque aulae consensus ad dirimendam hanc ferro litem, quasi, non Insubriam in eo discrimine, sed Regnum pars vtraque suum, & omnem ad reliqua famam agi censerent. Laetitia fuit vnus in Hispana parte, qui, posteaquam circumfundi Neapolitano etiam Regno Gallos senserat, provinciae suae metuens, inclinaret nonnihil ad pacem animum, vel certe summam virium illuc transferre

transferre conaretur. Inde pugna sententiarum e cum Daualo, contendente, si abscessum Mediolo- no esset, Insubriaque relicta Gallis, etiam Neapo- litani Regni nullam irritamue fore defensionem, & nulla alia spe minitari Neapolitanis rebus Gallum, quàm vt exercitum nostrum ab Metropoli abstra- heret. Si manerent in Insubria, posse vtrumque succedere, vt & deijcerent Mediolano hostem, & Neapolim, eo, qui ibi esset milite tuerentur. Insubriâ desertâ, hanc simul Regnumque amitti, & profectioe ipsa fieri famae militaris irreparabile damnum, quod tristius foret etiam, quam Regna & prouincias amisisse. Potiora haec visâ Concilio, ipseque Lanoia, dâmnata priore sententia vinci sese passus, prouisis quibusdam ad firmanda prae- sidia Regni, totas huc vires animumque intende- bat. Iam exercitus erat noster Gallico exercitu, nulla virium parte minor, fortasse etiam, Ger- manica auxilia, quae cum Borbonio & Fran- spergo, & Marco Sitico venerant, non aequa- uerant modò, sed excefferant hostium nume- rum. Decem millia peditum, duo equitum, millia fuere veterani fere militis, quod robur fida Caesari pars Germaniae, & Ferdinandus eius frater, accuratissimo delectu miserat, ne- cessitate simul tanti discriminis, & gloria elatus, vt Germanicae militiae vim intentis in rei Medio- lanensis exitum principibus gentibusque omnibus ostentaret. Haec ad veterem exercitum addita subsidia spem haud dubiam attulerant, si duae con- trariae



trariae acies libero campo adfisterent, posse victoriam esse Caesarianorum, Gallosque profligari. Non minus virtutis in exercitu Gallorum erat, ducesque ibi, vel animi fortitudine, vel armorum usu, nominisque etiam gloria pares nostris. Sed apud iuuenem Regem, Anna Momoransius & Philippus Ciabotus, ob amoena ingenia gratosque mores, antestabant. Inde toruitas, & indignatio caeterorum, quibus saepe iratis, pleraque in exercitu negligebantur. Rex ipse Franciscus, acer facine bellator, sed nunquam ita ad negotia intentus, ut voluptates obliuisceretur. Dum Ticinensibus adsidet muris: dum coronâ cingit urbem: dum admouentur scalae, scandereque frustra conatur miles: cum illis Annâ & Philippo abditus Augustali inter ludicra sermonibusque vagis terebat tempus. Laborabant adhuc uti semper pecuniae difficultate nostri: sed apud hostem, stipendia militum intercipiebantur avaritia quorundam & fraude nequaquam ibi tantum factitatâ, dum scilicet, ementito militum numero, redundantia aera praefectis cedunt. Abduxerat etiam ex Gallico exercitu sex millia Rhaetorum insigni facinore Iacobus Medicaeus, de cuius audacia initijsque fortunae antea demonstraui. Is, patrata caede Monsignorini, praemium eius nauatae operae malum aliquod timens, eoque metu factus audacior, ac pericula ipsa magno discrimini remedium quaerens, ab sua illa solitaria Mussensi arce, quam sibi in tam anticipi fortuna, prospere, siue secus conandi aliquid sedem

sedem initiumque destinarat, perscribit significatq;  
Daualo, posse ipsum, Clauenensi arce capta effice-  
re, vt Rhaetorum procures, qui miserint auxilia  
Gallo, in metum ingentem de summa rerum sua-  
rum adducantur. Sic auxilia illa domum esse re-  
uocatuos: de ea re, quid sibi mandatum sit expe-  
ctare. Haud displicet Daualo res, laudatoque  
consilio viri, & missâ ad eum pecuniâ, quò promp-  
tius libentiusque exequeretur, monet dicta factis  
comprobare. Si succedat, honori atque emolu-  
mento id ei apud Caesarem etiam fore promittit.  
Exibat matutinis horis ab arce quotidie Rhaetus,  
& ibi ante portam aliquandiu inambulabat. Ea  
quotidiana consuetudo praefecti nota Medicaeo:  
posuitque in vicina latebra insidias, ac profiliens  
inde ipse repente comprehendit hominem & mul-  
tae simul iniectae manus. Ad quem casum trepida  
captiui coniunx, cum reddi sibi maritum ex arce  
conclamaret, furcâ repente in eius oculis erectâ  
Medicaeus, strangulari laqueo iniecto ipsum iube-  
bat, nisi porta patefacta illico esset. Ita, capta  
per Medicaeum arce, timentes Rhaeti, ne initium  
id belli esset aduersus libertatem suam exorientis,  
quo exardescente mox bello, depellerentur vni-  
uerso Vulturenae Vallis tractu, sciucere suo more,  
Vt Tecanus, qui ductor popularium in exercitu  
nostro erat, illico rediret domum, seque & copias  
illas patriae periclitanti restituere ne cunctaretur.  
Ea non parua lacuna facta erat in Gallorum exer-  
citu: machinatorque fraudis Medicaeus, ab ea  
primum

primum commendatione, innotuit Caesari simul, & incussit aliquam ducibus sollicitudinem, si homini tam prompto ad facinora, minitarique rebellio-  
auso, tantum etiam prouidentiae ad militaria ope-  
ra esset. Caeterum, ita sicuti demonstrauius aucti-  
confirmatique nostri, ab Laude Pompeia, qua it-  
vrbe sese recollegerant, numero copiarum inito ad  
Melinianum processere. Inde Ticinum vadunt, &  
castris prope nostra castra positis tantulo interuallo  
vt partis vtriusque fistulatores inuicem sese lace-  
sere possent, plumbeaeque glandes hinc inde certo  
ac destinato ictu adigerentur, paruis illis certami-  
nibus summae rei specimen auguriumque capta-  
bant. Castra Regis Galli in eum modum sita fue-  
re, vt pars militum tenderet intra ferarum septa,  
quae veterum Vicecomitum oblectamenta, sexde-  
cim miliaria campi peramoeni includunt, pars la-  
tius ab exteriori parte porrigeretur, diruerantque  
morum interiectum quanto necesse erat hiatu, ne  
ab ope mutua dirimerentur. His castris, vti dictum  
est, appropinquauere Caesariani, partim, conspe-  
cto per campos & prata exercitu, partim abdito  
nemoribus, ad D. Iustinae, ad D. Lazari, sicuti  
planities tunc ea patefcebat, obscurabaturue. In-  
terfluebat dirimebatque munimenta flumen satis  
profundo alueo praecipitibusque ripis cuius fons  
ex septo ipso manat. Accolae Vernaculam dicunt.  
Circa eum amnem crebra certamina erant transire  
conantibus nostris, prohibente Gallo. Et muni-  
tiones alioqui caeterae castrorum, aggereque, &  
Iiii fossae,

fossae, & bellicâ arte reperta cuncta militum securitati, intra suum vallum partem vtramque defendebant, vt neutri alteros ad pugnam compellere possent. Atque compertum postea est, secretò monitum fuisse Regem à Pontifice Clemente, ne pugnae discrimen adiret multis iam rebus impar: daret Hispanorum exercitui spatium, quo senescerent paulisper atque debilitarentur: non posse diutius eos ob pecuniae angustias in eo loco sustentari. Nec vique poterant, & ideo cupiebant quamprimum per aelio defungi. Ad x. Cal. Martias nocte, quam saepe Apostolo Matthiae dies, idemque natalis Caesari sequebatur, Daualus, & Borbonius, & Lanoia, mandant caeteris ordine praefectis, vt singulos milites tunica alba super extimam vestem iniecta iubeant esse amictos. Id signum, & quasi tessera debbat esse, per quam inter se dignoscerentur, ne obscurum noctis & gladiatorum agitatio anceps, vulnera & ictus ab oste in ipsos auerteret. Ita praeconium missum: temporisque fere momento, sicut imperatum erat, stetero omneis ad nutum intenti Ducis. Tum de tertia fere vigilia adscutatum est hostium castris, atque ab diuersa parte praelio ostentato pars septum irrumpunt, alij regiam stationem aggrediuntur. Et Rex ipse, audito strepitu sentiens adesse discrimen, prodierat ultro ab statione illa eduxit atque suos in liberiores campum sperans equitatu superiorem se esse. Populere primò Galli nostros quia, necdum vniuersi irruerant & equestribus procella vehementius ablatere

latere incubuerat. Mox Lanoia cum Germanico peditatu superuenit, inclamante Daualo, ut opem ferre properaret. Eius aduentu cessere nostris Germanis peditibus Gallorum Heluetij, qui primo impetu feroces aegre antea sustinebantur. Pugna erat atrox, magnumque discrimen etiam ijs qui deinde vicerunt. Rex ipse ante alios terrorem & caedem eximio bellatore equo, & victrice per aliquod tempus machaera animoque elato circumferebat. Strauerat humi multorum corpora equosque abscissas à brachijs manus, abscissaque brachia, & detruncatas ab reliquo corpore ceruices: suorum quoque nonnullos coecus sua & noctis caligine obtruncarat. Demum ipse lapsu faucij morientis equi in fossam effunditur. Tectus humeros fuerat argentea clamyde vincente tenebras noctis splendore suo: caetera ignotus quinam homo esset. Spe praedae treis gregarij milites illico circumstant, recusantemque dedere sese & obluentem interfecturi erant, ni Regem se esse dixisset. Tanto magis tenent inhihentque attoniti magnitudine suae fortis & subita reuerentia in captiuum. Accersebant deinde Borbonium, ut is exciperet Regem: qui, proditorem contumaci ore abominatus, etiamnum imperitans, venire potius Lanoiam iubet. Ab eo exceptus, & cum omni honore, qui captiuo Regi haberi posset, ductus in Hispaniam, quae deinde libertate adepta ob rem Mediolanensem hostilia, & infausta adhuc tentarit, in tempore exponemus. Captiuitate Regis, consternato

& fuso dissipatoque omni Gallorum exercitu, diei insequentis lux Populo Mediolanensi victoriam, aperuerat & dilapsis repente etiam qui obsidebant arcem, nocte sese vna potuisse liberari admirabantur. Galli, qui praelio affuerant, quiue circa praesidia dispositi celerem acceperant famam cladis cateruatim, siue solutis ordinibus abeunteis, haud prius constitere quàm relictas sibi ab tergo alpes cernebant. Mediolani, pulso in hunc modum hoste nullus in praesentia fructus tantae victoriae erat, inanemque laetitiam fecere populo ea quae secuta sunt. Iam Rex ille, qui Metropoli prouinciaeque bellum intulerat, ductus in Hispaniam ad Caesarem, Madriti in arcē custodiebatur humanarum rerum & regiae fortunae miserabile exemplum, cum Caesar victor ne adspicere quidem eum voluisset: vnde moeror captiuo, & ex moerore morbus, qua denique miseria impetrauit, vt benigne inuiferetur ab eo, quem armis ipse laceffiuerat. Iam Regina Mater prius etiam abominata infestum illud in Italiam iter filij, tanto nunc magis consilia belli consiliorumque authores oderat. Et Gallia tota, caeso insuper, aut casibus alijs amisso nobilitatis flore, omnique propemodum amissa militari sobole, poterat lugere magis quàm vindicare casum Regis: ac discordijs & moerore utiq; occupata desierat iam reparare vel minitari nobis bellum. Vrbs tamen ipsa, quasi nocturnâ illâ victoriâ, strageque hostium, & captiuitate Regis nihil actum esset, oneribus adhuc exactionibusque immodicis

modicis, & quod omni onere acerbius, victricium legionum licentia & rapacitate vexabatur. Ab gregario egenoque milite simul, & abducibus opulentis, exhauriebantur civium iuxta & agrestium, dices pariter & vacuae iam domus. Carebant adhuc pastore Mediolanenses, sicuti deinde etiam caruere vsq; ad Ioannem Angelum Arcimboldum, cui postea Cardinalis ille Hippolytus sua fessus absentia, & conscientiae credo stimulis ictus, Ecclesiam hanc auctore Pontifice Maximo tradidit, cum Ambrosiana emolumenta curis semper intentus alienis diu ipse percepisset. Facile quilibet ex eo coniectauerit sacrarum rerum adhuc nuditatem, & miserias, quae in tanta militari proteruita & turba male propulsarentur etiam si suus Pontifex Metropoli praesens intentusque esset. Sfortia porro ipse, quem illa arma defenderant, quive vnus defendere nunc urbem ac tueri suos deberet, miserrimus vere mortalium erat, ac miseratione sui moerorem publicum augebat. Namque ducibus Caesarianis, iam antea, quomodo narraui suspectus, ceu prodidisset ipse Gallo urbem, siue innocens ab ea parte & aemulatione forte aliqua inuisus, indeque apud Caesarem accusatus falso, perfidus amicus, occultus hostis habebatur: & velut in alieno adhuc imperio cuncta feruentium mala sustinebat. Nec Caesari tantum erat obnoxius cuius beneficio redisset in urbem, cuius etiam armis & praesidio ad reliqua pericula casusque indigeret, sed mancipia eius erant ipsi Regum instar: incredi-

bileque



bileque dictu, Dux Mediolani nemini regnantium  
antea secundus, regionum hodie nutu supercilioq;  
regebatur. Suspiciatus etiam erat ipse, & sicuti  
scriptum lego, compererat, habuisse Lanoiam illud  
à Caesare mandatum, vt, si fieri posset absque tu-  
multu, sese detinerent abderentque aliquò, vbi  
mouendi quicquam adempta facultate vacuam,  
relinqueret imperij sedem ad ea quae pararentur.  
Quae ludibria, atque tam infestam principatus &  
vitae conditionem effugere volens, agitasse fertur,  
de Hispanis, qui Mediolani erant, interficiendis,  
atque de ea re cum Galliae proceribus perniciosè  
inīta consilia habuisse. Nec ego de ea coniuratio-  
ne certi quicquam affirmauerim, cū temporum  
etiam eorum scriptores, quibus notiora cuncta esse  
potuerunt, negotium illud omne haesitanter &  
ambigue tetigerint. Sed neque omittam ea quae  
scriptores iidem posuere pro certis, dum coniura-  
tionis crimen aduersus Caesarem, inter Sfortiam,  
& Daualum, & Moronum diuidunt trahun-  
turque, & ipsum adèd Pontificem, Venetosque  
Senatores suspicione nonnulla adspargunt, vniuer-  
si scilicet facinoris authore & quasi proxeneta Mo-  
rono, de cuius hominis apud Sfortiam gratia &  
potentia nonnihil etiam antea demonstraui. Is  
Gallicarum irruptionum tempore profugus vnà  
cum Sfortia, calamitatum omnium exsilijque co-  
mes, dein exorta apud Caesarianos suspicione so-  
cius criminis, post victoriam hoc tempore non con-  
tensus victoriae fructu, sua principisque conditione  
inquietus,

inquietus, coquebat moliebaturque assidue multa animo, & molientibus noua alijs aptus opportunusque erat. Ingenium ei cum magnis virtutibus, nec extra vitia, quae ab virtutum ferme confinio oriuntur. Animus ingens cum superbia & fastu: belli pacisque artes cum fraude ac dolo: fides & obsequium erga Principem haud sine adulatione emolumentisque quotidianis: apud pares, apud superiores, modestia, & submissio: comitas erga infimos: iustitia in omneis: sed cuncta potentiam spectabant. Etiam patientia rerum aduersarum, atque quotidianas inter offensiones, tenor semper idem oris, eorum interpretetione; qui talia intelligebant, ad vindictae cupidinem & expetitur inde solatium referebantur. Hunc, magnae cogitationis, per haec indicia compertum sibi Daualus, siue Daualum ipse pares animo fluctus voluentem sagacissime odoratus, post colloquia nonnulla, post captos varie ambitus ad aegrum animum, vbi tutares visa, socium sibi assumit ad ea, quae sortis vterque suae contemptu noua, & praecipitia experiri statuerant. Id modò incertum fuit, vter eorum iecerit prior tam periculosi sermonis aleam, aususque fuerit emittere primam illam funestam vocem, quam etiam audiuisse, capitale foret. Sed, siue Moronus incoepit, siue Daualus: prodidit certe Regnicola hic homo Mediolanensem illum, & nostrati simplicitati Neapolitana fides illudit: apparuitque nostrorum hominum astutias fraudibus cedere externis, etiam vbi palmam in eo genere

nere non nemo fortasse est affecutus : quae certe palma Morono illi tribuebatur . Regnicola igitur Daualus, primo quidem communicauerat consilia cum Morono , vt bona fide proderet absentem, Caesarem, vtque Hispanorum caede firmato Sfortiae principatu, eo deinde adnitente, Neapolitanum Regnum ipse adipisceretur . Verum , vbi gerendae rei difficultates , & pericula horrenda, summumque discrimen, inter consultandum primò , deinde inter moliendum , occurrere animo , ne nihil plane lucratus esset , impedimenta ipsa , & vaecordem iam fatali prope calamitate animum, Moroni pro lucro arripuit . Ceu fidissimus homo Caesari, defert vltro per celeres nuntios ad eum , quam deprehenderit Moroni mentem : quid secum ille communicare ausus : qua adhuc spe & destinatione sustentetur . Nec vnus esse Moroni flagitium illud , sed Sfortiam , interprete mancipio , deprompsisse quae ingrato aduersus liberatorem, suum animo concepisset . Vt autem auderent vterque depromere , effectum esse arte sua , & prouisu , quo speculatus inquietam vtriusque mentem , tumultuantemque perfidiam, fingendo se quoque aegrum animi , & fortuna sua male contentum, illexerit vt portenta secum illa communicarent . Cognouisse etiam, parari aduersus rem Hispanam Sfortiae ipsius instinctu nouum foedus, eique foederi Pontificem Romanum addere arma & opes suas . Rem esse in magno discrimine, frustra que captiuum teneri Gallum Regem, frustra  
partam

partam esse de Gallis victoriam, si Dux Mediolani finatur ille, qui per satellites suos id agat, ne Caesaris nomen audiatur in Italia, utque faturetur ipse caede eorum, quorum sanguine patriam atque principatum ex miserrimo exilio recuperaret. Contexta in hunc modum accusatione Daualus, qui ipse maxime accusandus foret, missoque in Hispaniam Ioanne Baptista Castaldo familiari suo, qui Caesari cuncta ordine demonstraret, dum ille proficiscitur, prospiciebat deinde agebatque omnia, ut Sfortiam & Moronum publice atque testatò arguere coniurationis posset. Cùmque Sfortiam ipsum interim in colloquia eadem traxisset, mirificà insuper tentauit obtinuitque fraude, ut certus ab Roma cum Pontificijs litteris sibi mitteretur homo super ijs rebus, quae aduersus Caesarem foederis lege agendaessent. Ita, & testibus iam, & indicijs illigatos impruidos homines tenebat Daualus: iam res nota Caesari erat, & quotidie tamen Sfortia & Moronus cum socio eodem & proditore suo tamquam de re arcana secretò consultabant, fallacià atque errore etiam apud animum nostrum miserabili, nisi fraudulentimachinatoris exitus, qui propediem insecuturus erat, ex imagine moesta & tristi laetam iucundamque aliam offerret. Daualus enim ipse, dum irati Caesaris mandata in Sfortiam & Moronum postea exsequitur, mortuus est è phtisi, & marcidum illud liuore ac malignitate pectus concepta fallaciarum labore tabes absumpsit. Nunc laetus Castaldi reditu,

tu, & Caesaris mandato, rebellioni puniendae rebellis ipse strenue intentus erat. Mandauerat autem Caesar, ut propter irritatos victoriâ recenti suâ principum Italorum timores: qui velle ipsum oppresso etiam Sfortia Italiam occupare totam suspicabantur, atque ob id inter se coniurabant, eâ quâ instituisset simulatione Sfortiam Moronumque detineret. Sic posse consilia melius hostium cognosci, & securitate iniecta illis, spatium interea sese habituros, ad prouidenda & comparanda cuncta, quae aduersus noui foederis pericula opponerentur. Miserat verò interim etiam diplomata, quae Sfortiam Mediolani Ducem creabat auctoritate sua, siue ad dissimulandam animi offensionem, indiciumque tegendum; siue, ut tumentem illius animum hoc dato blandimento placaret: eaq; mollior interpretatio fuit. Mox Daualus, incertum, Caesaris iussu, an sponte sua priuatoque consilio diuersa quaedam orditur. Volebat adimere Sfortiae Metropolim, arcem, vrbesque subiectas, & imperium hoc omne Mediolanense inuadere Caesaris nomine, quasi pristinus possessor manifestò perduellis, ob id crimen omni iure excidisset. Opportune ad id etiam valetudo Sfortiae ipsi acciderat, anceps adèò & grauis, ut vulgò actum de eius vita existimarent. Vnus ob stare posse Moronus videbatur, quia fessum animum Principis ille consilio & spe optima sustentaret, ne rebus succumberet aduersis, neve frangeretur metu. Hunc ad se accersitum, & quambenignissime exceptum

artifex

artifex doli, per speciem colloquij secretioris cubiculo inducit, ubi Antonius Leua, peristromata inter & parietem, obscuro in angulo compositus occultabatur, ut suis ipse auribus, ea, quae ab Morono dicerentur audire posset: audiuitque cuncta & excepit, quasi res iam ipsa gereretur. Namque simplicissime Moronus ignarus adhuc fraudis, illato per duplicem illum proditorem sermone, assentiri interdum & laudare hanc illamue consilij viam: interdum addere de suo, & exponere tutiora, siue expeditiora quae sibi visa essent: ambigere nonnunquam: sciscitari modò aliquid, & super omnia, instare ne rerum dies verbis amplius & segni consultatione absumerentur. Interimque Leua Dauali manibus in turpi illa collocatus latebra, voces etiam audierat, quae ipse destinabatur neci. Nam inter caetera conuenerat hoc, ut ille occideretur. Ab scena deinde illa fallacique colloquio mittitur Moronus in Ticinensem arcem, & Daualus eò confestim subit ad quaestionem de scelere habendam, cuius participes auctorue ipse erat. Scilicet, impudentia & malignitate Tiberianis quoque temporibus fortasse intolerabili, certe ab temporibus moribusque ducta ipsdem, interrogabat reum, pariter reus sociusque coniurationis, & ex reo ac socio, repente inimicus, accusator, iudex. Respondebatque Moronus, non sicuti ira & desperatione deberet: plura scire Iudicem, quam alios omnes, sed qualia verba mistus fiducia pavor gignit: adibebatque temperamentum, ut si qua reliqua

liqua esset salus, tam ne sibi libertate intempestiua  
 abrumperet. Reperio quin etiam, scripsisse sua ma-  
 nu eum seriem vniuersam coniurationis, prima  
 postrema omnia, & quemadmodum inito aduersus  
 Caesarem foedere Sfortia, paratisque insidijs exer-  
 citui Hispano, nihil aliud quam idoneum gerendae  
 rei tempus expectaret. Reticuit de Daualo ipso,  
 quod vnum tacitum atque dissimulatum prodesse  
 sibi poterat. Debuerat namque placari Daualus  
 facta significatione tam reuerentis animi erga ipsum  
 atque ea modestia apud quemlibet alium utilis  
 futura reo fuit. Sed callidus homo, ex Hispania  
 oriundus Neapoli natus, iam inde à puero stipen-  
 dijs semper nutritus alienis, domi diues, potentiae  
 maioris audus, nihil praeterea curabat aliud: non  
 humanitatis iura, non famam ad posterós: & iam  
 eo processerat, vt ne parcere quidem aut eleuare  
 crimen posset. Interrogato reo, & extortâ quam  
 voluerat confessione, ipsum quidem in vinculis  
 relinquit, augetque custodias, tamquam sceleri  
 insensûs, ac nec elaberetur: Sfortiam verò ipsum,  
 ne quis grauior in vrbe motus existeret, haud  
 quaquam pari violentiâ statim aggredi ausus, rogat  
 primò, vt publicae salutis atque securitatis causa  
 tradi sibi iubeat arces quasdam Caesaris nomine  
 custodiendas: deinde etiam vt circumuallari arcem  
 Iouis sineret, petit. Petebat simul vt dederet sibi  
 Ioannem Angelum Ricium, & Angelum Politia-  
 num, quorum vterque scriba intimus, hic Moroni,  
 ille ipsius fuisset. Oportere vtrumque interrogari



de rebus ijs, quas ipse aduersus Caesarem molitus  
 esse argueretur. Sfortia adhuc morbo implicitus,  
 & multo magis ob eiusmodi rerum statum dete-  
 ctamque coniurationem animo aeger, consilio prae-  
 sidioque nudatus omni, neque negare audebat, &  
 concedere omnia flagitiosum rebatur. Tritium,  
 Leucum, Picicatonem, has in Abduae fluminis ripa  
 politas arces, sicuti petitaerant, concessit: Iouis  
 arcem, ipsum esse Caesari conseruaturum aiebat.  
 Ricij opera ministerioque quotidiano indigere:  
 velle apud se detinere Politianum, vt in tempore  
 testem hunc Caesari exhiberet earum rerum, quas  
 Moronus se inscio atque aegrotante egisset. Non  
 enim eandem esse suam & Moroni causam: & quae  
 vixisset erga Caesarem fide, cum ea sese moriturum.  
 Haec ab Sfortia respondebantur, litterisque etiam  
 & libellis agebatur res: quicquid Daualus haud dubie  
 vincebatur: sed vincebat ipse manifestam iam in  
 eum quoque violentiam, sparsoque per urbem &  
 agros late exercitu: rursusque diuiniae iustitiae telo  
 est victus. Namque, dum aduersus Iouis arcem  
 pergit excitare munimenta quae destinarat, dum  
 obsessum ibi Sfortiam tenet, dum etiam adactis in  
 Caesaris verba populo Mediolanensi, omnique  
 vetere deiecto magistratu, Caesarianos magistratus  
 imponit, atque ita ceu patratore ingentium rerum,  
 praemium hoc a Caesare promittit sibi, vt ne pro-  
 uinciae vnquam huius imperio & administratione  
 dimoueretur, mors eum quae iam est repraesentata  
 dimouit. Cuius tamen viri manibus detur-

etiam

etiam narratione hac nostra elogium, quod dedere scriptores alij: neque perfidiâ magis infamem neque bello clariorem vllum per ea tempora fuisse. Et Daualo quidem finis Mediolani obtigerat ille, mitior etiam, quàm proditori Caesaris, proditori sociorum suorum obtingere debuisset: Metropolis autem, ab eo conatu, in quo eum vita destituerat, nullum, extincto quamquam authore, calamitatibus inueniebat finem, atque conuersis in vnam, urbem Regum gentiumque fere omnium armis, tempore vno, sicuti aliquando etiam aliàs, ab suo hostilique exercitu eadem patiebatur: & facti erant hostium loco, qui defendebant: populi que ad eò pars inermis, dum aduersus defensores suos, ob atroces iniurias armatur, grauiora quotidie mala indidem prouocabat. Pontifex Maximus, & cum Galliae Rege Veneti, Sfortia princeps, & Caesar ipse, finitimi longinquiue alij, quos ira, quos dolor & inuidia, curaue aliqua, & ex aliena felicitate damnum, & generi humano infestae regnantium necessitates stimulabant, omneis vno conglobati armorum turbine, Urbem atque prouinciam, de qua dimicabant inter se, vastauerunt, & amens ob talia populus, sui vastator fuit. Id erat foedus, quod Caesaris metu sollicitati principes, post victoriam ad Ticinum captiuitatemque Regis agitare inter se coeperant, & liberato nunc Rege, obsequioque intra arcem Sfortia tantò magis inire propebant, ne Caesar, addito ad Neapolitanum Regnum imperio Mediolanensi, appeteret etiam reliqua,

qua, & totius Italiae arbiter foret. Dilata autem in hanc diem confirmatio foederis eius fuerat ob plures & diuersas inter se causas, necessitate rerum, diffidentiâ partium, fraudeque aliqua minime sociali, cunctatione etiam innoxia, & prouisu, & spe, timoreque nonnullo: & super cetera, tardauerat rem idem qui nunc incitabat Sfortiae Moronique casus iniectus proditione Dauali, patefactis quae secreto agebantur, & postquam detectaerant, celeritate assumpta subsidio. Cumque cunctarentur adhuc & ipsa destinatione celeritatis, Gallo quidem Regi moram inijceret multis etiamnum vinculis illigata libertas: ut se carcere eximeret, proles data obsidio, & relicta apud Hispanum carissima pars sui, & pacta vicissim ipsi Caesaris soror: Pontifici autem Senatuque Veneto obstarer imperij vtriusque natura, & Rex Anglus (is quoque enim inibat foedus) lente ut ex longinquo moueretur: abruptis impedimenta eis cunctares Mediolanensis in vltimum iam adducta discrimen, quae si apud Hispanum maneret, haud dubitabant, quin Italicis externisque imperijs periculum ab eadem potentia, ut dixi immineret. Mittebat ad eos inclusus obsessusque Sfortia crebras ex arce literas plenas vltimae desperationis, quae litterae, partim per intermissa custodij loca, fida manu & occulto itinere perueniebant eò, quò destinabantur, partim ab ipsidem, qui ferebant, proditae, vel quo alio casu interceptae nudabant arcis miseras, & ea, quae semper ab obsessis teguntur,

tur. Vix mensis vnus alimenta esse sibi: ex octingentis peditibus, quos secum initio habuerit, partem absumptam esse fame, & paucos qui supersint, fieri quotidie inutiliores: nimiumque multos esse prae annonte modo: si subsidium ultra dilatum sit, minimum malorum fore deditionem: dedita arce, videre ipsos, quantulum Caesari ad opprimendam seruitio Italiam restet. Maturando foederi, quod multa simul distulerant, haec fuere. Sed & Mediolani propter intolerandas exactiones, cum hostilia cuncta Caesarianos inter populumque essent, spem propè certam foederatis inter se hostibus ea res fecerat: si ad urbis moenia successum esset, posse obsidione eximi Sfortiam, Caesarianosque depelli. Namq; abdito & obsessio intra arcem Sfortia, versaque Metropoli in Caesaris ditionem, pecuniae ferè nihil in militum stipendia à Caesare mittebatur, & Daualo successerat in rei militaris administratione Antonius Leua bellica laude ei par: magnae fortunae vitij, & prodiga rapacitate damnosior etiam vrbi. Tricenos aureos nummos singulis diebus publicè exigentem sibi, ampliusque quotidie effundentem, non interea caruisse coaceruandi seponendique curâ aiunt. Et quora pars calamitatum vnus homo tot inter duces legionum, quae capto Rege triumpharant Gallos, quae, cum Regem esse sibi Caesarem gloriari possent, post tantae victoriae fastum, nitebantur absentis Caesaris indulgentiâ, ducum suorum exemplo, & licentia in urbem, quam praedae sibi datam esse interpretabantur?

tabantur? Quotidiana tributa exercitui huic alendo, quinûm millium aureorum summam explebant: & sparsi per domos manipuli occupabant fortunas vnde summa illa reficeretur. Itaque populus Mediolanensis, ob iniurias & damna vimque sibi illatam, semel atque iterum concitato tumultu arripuerat arma, pugnaueratque in hospites suos, & direpta praefecti rerum capitalium domo, minitanti fuerant haud dubiam à Caesare ipso defectionem, nisi nobilium precibus & autoritate placati inhibitive essent. Popularis igitur ille tumultus principum interuentu sedatus in praesentia, cum saepius deinde renouaretur, opportuna res visa foederatis ad coepta proseguenda Metropolitique Hispano adimendam, qua liberata, non Sfortiae tantummodo principatum, sed imperia omnia libera & constituta fore aiebant. At Caesar, posteaquam videt, Regem Gallum, non modò spreta pactorum fide, quibus pactis liberatus ab se dimissusque esset, verum etiam hostili post mutua pignora animo, neglectuque pignorum ipsorum, non relictæ prolis, non desponsæ Eleonoræ memorem rursus ad arma ire, hostes assumere alios, caputque fieri foederis, nimium quantum etiam ipse turbatus, tentato nequicquam, si fortè disjicere foedeus illud posset, vbi vana ea spes erat, parare ac prouidere cuncta institit, vt negotio illo infestissimo quamminime laederetur. Atque, ne in ipso quidem belli apparatu, quo Caesaris

LIII

interim

interim Regna perstrepebant , destiterat vltro  
compellare , nunc Regem , nunc Pontificem ,  
vt amabiliter , & clementer , fraterneque vellent  
agere , potius quàm vt bello secum aeterno im-  
plicarentur . In eam rem Vgo Moncada Romam  
à Caesare proficiscens cùm Mediolanum extirpare  
diuertisset , petito Sfortiae ipsius colloquio , in  
arcem vnà cum Martino Carraciolo , qui Romanae  
dignitatis vocabulo Protonotarius vocabatur , ad-  
missus , egit dixitque multa , vt Principem obsef-  
sum , cuius gratia foedus hostile inibatur , Caesari  
reconciliaret . Si permetteret eius sese fidei ac be-  
nignitati , fore aiebat , vt perduellionis crimen,  
cuius insimularetur , compendiaro iudicio cogno-  
sceret diiudicaretque Carracciolus , de cuius erga  
se animo dubitare ille non posse . Et erat sanè  
summa necessitudo Sfortiae principi cum Carracio-  
lo hoc : vnusque iam iste Caesarianorum manebat ,  
qui , vel casum fortunamque illius respiceret miti  
aliquo sensu , vel ab ipso sine offensione animi  
adspiceretur : poteratque sperare iudice ab illo  
exitum causae fortasse meliorem , quàm si res de-  
cernenda ferro permetteretur . Affirmabat etiam  
Moncada multumque testabatur : non iudicium  
illud , sed imaginem & vmbram fore iudicij , vt ea ,  
quae accidissent , simulacro saltem aliquo regeren-  
tur , & in restituendo imperio rescindendaque Da-  
uali actione , maiestas & iustitia Caesaris aliqua  
emineret . Moncada deinde Romam ire pergit ,  
ibique apud Pontificem Clementem multa de pace  
est

est locutus . Summa sermonum fuit . Mandasse Carraciolo Protonotario Caesarem , vt cognosceret quambreuissime de ijs , quae Franciscus Sfortia aduersus imperij sui statum egisse argueretur : ab ea cognitione relinqueretur in eo statu , quo ante perfidiae crimen fuisset . Ob eam rem , eamque causam , nihil opus esse exitiabili bello , & prope ciuilibus inter Christianos principes armis . Responsum à Pontifice est : iam rem in eum locum esse deductam , vt arbitrij sui nihil amplius foret . Si sibi esset integrum , facturum omnia libenter , quae Caesari grata , & vtilia posse esse arbitraretur . Ad bellum inde haud dubie atrox res spectabat , parato etiam vtrinque exercitu , quantae partium opes , & quanta discriminis magnitudo erat : & spatium comparandi cuncta habuerant dum ea quae demonstraui aguntur . Sed apud Caesarianos infestissima vna & capitalissima res manebat , quae si relinqueretur absque remedio , sicuti confirmauerat magna spe iam inde à principio foederatorum hostium animos , ita victoriam illis esse datura videbatur nisi plaga sanata illa foret . Et remedijs exulcerabatur ipsis , grauioremque vim mali eam fecere Hispani dum curant . De qua quidem seditione bellouae intestino sic tradunt . Populus Mediolanensis , patiendoe quotidie grauiora , & iniurias ab Hispano milite vorando assiduas , seipso contumacior factus iam eo processerat mutuis iniurijs , vt vicissim timeretur . Non modò vllum habere domi militem , hospitiaque & alimen-



ta praestare exercitui abnuebant: sed si quis in  
vlla vrbis parte solitarius miles, biniue, & terni  
deprehenſi erant, ab iuuenum noſtrorum globo  
ſtrenue interficiebantur. Atque irritati illi manu-  
larium ſuorum nece, multorumque iam caſibus &  
exitio cautioreſ facti, nuſquam ferè niſi gregatim  
incedebant adoriebanturque noſtros, qui item ag-  
mina cogenteſ maiora prodibant ultro, & per  
compita quaerebant pugnam. Multae paſſim acieſ  
dimicabant in vrbe nuſquam aliàs adeo incertâ,  
dominoſ, an hoſtem intra muros haberet, quippe  
cùm, & facerent hoſtilia, & paterentur iſdem, qui  
Metropolim tenebant. Tunc Antoniuſ Leua,  
propinquantem maiore cum hoſtibuſ alijs diſcrimine,  
proſcribit ediſto quos capita eſſe populi compere-  
rat, finita die, intra quam exiſſe portis deberent.  
Ob id ediſtum, tantò violentiùs armari plebeſ ſta-  
tionemque aggreſſi Hiſpanorum magno impetu  
ſtragem dedere. Leua etiam ipſe facto eo magiſ  
irritatur, & diripiendam dare exercitui cum pro-  
miſcua caede urbem parat. Tutiuſ id inter belli  
imminentis pericula meliuſque fore, quàm ſi Hiſ-  
panuſ exercituſ, pro amico & ſubieſto populo  
hoſtium gentem circa ſe habituruſ eſſet tunc cùm  
aduerſuſ vndique circumfuſoſ foederatorum exer-  
cituſ rem geri oporteret. Igitur, concitandae  
multitudiniſ ultro initium quaerent Leua, arripi  
repente è foro negotiatorem vnum obtruncarique  
iubet, ideo, quia ſedent in apothecae ſuae limine,  
tranſeunti fortè ſibi illac, neque aperuerat caput,  
neque

neque assurrexerat, contumacique insuper ore, & proteruo obtutu contempsisse ipsum videbatur. Treis deinde alij, qui ad eum casum tumultuose vociferanteis commouere sese voluerant, arrepti statim & occisi. Ea tumultuandi materies principio oblata multitudini erat. Mox Germanicae cohortes praedabundae per omneis vrbis vias, de industria occasionem dedere ad arma conclamandi. Satis sciebat Leua, promptum ad talia populum, fore illico in armis, ideoque partem exercitus, quae in suburbijis aestiua agebat, iusserat silentio succedere ad moenia, signoque accepto, gradum inferre & facere vt caeteros vidissent. Populus, ad primos Germanicarum cohortium insultus, momento penè vno, in multa agmina multasque acies tota vrbe adsistit, existimans cum vrbano tantum milite esse pugnandum: alium ad portas stare exercitum nesciebant. Praetorium, & turrim iuxta Archiepiscopi aedes primo impetu tenere, ac neutrò inclinata spe, cum caderent è nostris plurimi, nihilo minor strages fiebat in parte, quae tumultum eum optarat. Mox Germani, ex composito tectis iniicere ignes coeperunt, & dato signo, suburbana alia acies accersebatur. Iam fumabat incendijs vrbs, & maiore superueniente exercitu, nostri opprimebantur. Hinc ferrum, hinc flammae, & vagitu mistus puerili, seminarum senumque vlulatus, improvidam ad belli opera multitudinem, & potius dolore animorum, quàm vlla militari ratione & arte sese regentem subegere vt placare

quacunque

quacunq; conditione Leuam repente auerent .  
Misso ad eum caduceatore, conditiones hasce pacis  
ferebant . Abituros vrbe principes plebis, ipsos,  
asseclasque eorum, & quoscunq; praeterea Hi-  
spanus vellet . Tradere protinus arma, & pollice-  
ri, quod nusquam amplius tributa detrectarent,  
neque eorum causa tumultuarentur . Leua enim-  
uero, quamquam periculosi ingenij populum exci-  
dio destinasset, agitabat animo tamen interim etiam  
pericula & damna, quae direptionem eam clarissi-  
mae vrbis sequi necesse esset . Nam, & ditatum,  
praeda militem, posse contumacia, & luxu corrup-  
pi languescereque autumabat, & in vasto ac nudo  
postea solo frustra requisitum aliquid eorum,  
quae nunc reconciliatis animis & sedato tumultu,  
ad tolerandas belli necessitates, multa & magna  
suppeditarent . Ita pax data populo Mediolanensi,  
suppressique ignes, & in sua quique tecta, non  
politis modò, sed etiam abiectis armis, rediere :  
fidaque deinceps aliquandiu hospitia militibus  
erant, qui nuper incendere voluerant easdem do-  
mos, & cum hospite ipso conseruerant manum .  
Compositis in hunc modum vtcunq; rebus, & ex  
quotidianis ferè praelijs, nouissimoque cruento  
tumultu, redacta in aliquem tolerabilem statum,  
vrbe, spes haud dubie magna foederatis decesse-  
rat, qui Mediolanensium ipsorum manibus vinci  
posse Caesarianos existimabant . Nec sanè alioqui  
res eorum satis ex animi sententia procedebat, ortâ  
etiam inter ipsos haud leui suspicione, quia Dux  
Vrbini,

Vrbini, qui Venetum exercitum ductabat, eratque rerum ipse ferme caput, cum traiecto statim Abdua flumine, debuisset copias admouere vrbi; Sfortiaeque obseſſo, & ad famem iam prope reducto, subsidij ferre nonnihil, cunctabatur in ripa, siue traducto ad Melinianum agmine progressus inde circuibat declinabatque urbem, pro subsidio diu expectato spem vanam ostentans arci. Sanè ille, cunctationis suae causam in concilio hanc afferebat, quòd nollet exercitum committere discrimini antequam mercenaria auxilia Heluetiorum, ad quae conducenda, Iacobus Maedicaeus, & Episcopus Laudensis fuerant missi, aduenissent. Sed qui rem eam altius coniectauere, existimarunt, Vrbinatem, vel occulto Veneti Senatus admonitu, vel sua vetere recentique erga Pontificem Clementem offensione, sic esse procrastinatum, siue, vt authoritatem animumque huius affligeret, siue, vt Veneti ab vltima Sfortiae necessitate Cremonam Urbem extorquere possent. Et auxerat hanc ipse suspicionem, posteaquam ducto denique ad vrbis moenia exercitu, coeptaque Romanam inter & Tonsam Portas acri oppugnatione, retulit subito castra ad Melinianum, obnuntiante multa, multumque reclamante Pontificis Legato, iratis Gallis, & Leua admirante ipso, vndenam sibi tam laeta repente fortuna accidisset. Ita Caesariani liberati erant ingenti metu Sfortiae spes elusae atque ex eo terribile antea foederis nomen euanescere paulatim contemnique & eleuari: ac simul, Mediola-

nensium

nensium calamitates non renouatae solum, verum  
 etiam ad tragica pene & cum horrore abominanda  
 exempla euectae, quas represserat lenieratque for-  
 midata apud Hispanum eadem quae nunc hostium  
 fama contemnebatur. Atque vniuersos Patriae  
 casus ego iam inde ab initio operis apud monu-  
 menta requires ea, quae ad veteris memoriae cu-  
 stodiam fidissima esse existimaui, referensque sin-  
 gula, prout narrator iste sermo vulgò vsurpatur,  
 portenta referam ea Scriptoris alieni verbis, qui  
 aequalis ferè aevi eius, debuit audiens talia com-  
 moueri misericordiae senu erga tam indigna exem-  
 pla, vel etiam debuit indignatione esse commotus  
 aduersus eos, qui Metropoli tam proterue, tam  
 inhumane insultarent. De ea Mediolanensium  
 calamitate per mutuos timores repressâ, per Cae-  
 sarianorum elationem auctâ, Franciscus Guiciar-  
 dinus ita inquit. Diuisi milites in ciuium domos, non  
 „ copiose tantum, & opipare, delicateque propter  
 „ fastidium & violentiam alendi erant, sed libidini-  
 „ bus eorum insuper explendis pecunias ab hospite  
 „ suppeditari oportebat. Aduersus quod intolera-  
 „ bile malum, nihil remedij praeterquam in fuga re-  
 „ linquebatur. Sed eo deprehenso subsidio, miles  
 „ Hispanus necebat vincla hospiti: feminas, paruof-  
 „ que pueros, ne possent abire ligabant: & tristiora  
 „ his silentur. Tabernae clausae omnes: nihil vsquam  
 „ venale prostabat. Defossa ornamenta templorum,  
 „ & quicquid aliud singuli occultarant, tormentis  
 „ admotis proferebant eadem manus. Moeestitia,  
 &

„ & pallor, & desperatio in singulorum vultu emi-  
 „ nebat: viri feminaeque eleganti aliâs nitidoque  
 „ cultu, nunc squalore & illuue deformes in pau-  
 „ perrima veste conspiciebantur. Exemplum incre-  
 „ dibile varietatis humanarum rerum: urbem, quae  
 „ olim diuitijs & frequentia incolarum, artificum,  
 „ ingenijs, finitimorum, externorumque commercio,  
 „ religione, luxu, bello, disciplinisque scientiarum,  
 „ & omni, vel publica, vel priuata amoenitate, flo-  
 „ rentissima Italiae totius fuisset: eam nunc exhau-  
 „ stam peste & fuga, & hospitum iniurijs, desertam  
 „ oppressamque iacere, & fortitudinem inclytam,  
 „ gentis roburque virorum humilitate seruili sic esse  
 deformatum. Haec ferme Guiciardinus alienigena  
 tamquam de sua vrbe, deploranti similior quàm,  
 narranti, refert. Caeterum, urbem ita affectam re-  
 creauerat paulisper Borbonij ex Hispania aduen-  
 tus, quem, & magnis pecuniae facultatibus ad re-  
 fouendam Prouinciam stipendiaque persoluenda  
 militi, instructum à Caesare esse, & fieri Mediola-  
 ni Ducem, miscens falsa veris, siue diuulgans ma-  
 iora vero fama nuntiarat. Attulerat autem ille in  
 syngraphis, nihil amplius quàm centum millia  
 nummum aureorum, ingens priuatis fortasse rebus  
 laxamentum, inutilem bello summam, quae vora-  
 gine exercitus necessitatumque aliarum absorpta  
 foret prius quàm exacta & deprompta. Dux  
 Mediolani, neque fiebat ille, neque si fieret,  
 attinuerat sperare quicquam misericordiae vel  
 humanitatis ab homine transfuga, & Gallo, &

proditore Regis sui, Mediolanenses tamen, vñ in perditis rebus adsolet, faciles ad credenda & tentanda, quae, tempore alio, sicuti stolidi & vana adspñarentur, facto nobilium coetu, & iactatis inter se quae nouo Principi dicenda essent, supplices ad eum accessere spe ipsa naximè miserandi, cum qua ad traditorem accedebant. Quae dixerit electus caeterorum consensu orator, minimè necesse fuit probabiliter & accommodate excogitari, sicuti fieri aliquando in historijs solet. Nam, qui tunc in Italia scriptores rerum erant, attenti ad hosce Mediolanensium casus, sicuti ciuitates totae attentae sinul erant, excepere capita infaustae orationis & prodidere. Summa haec fuit Populum Republicanique Mediolanensem, aduentu Borbonij, quem dari sibi nouum à Caesare Ducem audirent, pro eo ac debuerat, fuisse gauisuram & solenni etiam pompa triumphoque testaturam id gaudium, si calamitates infandae, quibus oppressi tenerentur omneis, alium vllum quàm doloris & moestitiae sensum, pompam aliam vllam quàm lacrymarum, Populo Ciuitatique iam reliquissent. Omnia, quae captis vnquam vrbibus accidere ab irato hoste potuerint, sese ab Caesariano exercitu esse perpeffos: & cùm nihil fieri crudelius potuerit, illud tamen sibi esse longè acerbissimum, quòd propter ciuitatis erga Caesarem perfidiam, licentia permiffa militi dicatur velut in rebelleis. Atque non fuisse rebellium ea, quae facta ab sese memorare possint. Namque tenente urbem Gallo, coortos  
ad



ad arma ipsos, faustis in Caesarem clamoribus animos turbasse hostium, & res eorum profligasse. Bis deinde hoste ab illo obsessos, ut Caesari conferuarent urbem pertulisse omnia, quae Caesar etiam ipse, si intra moenia eadem obsideretur, gloriae imperijque sui causa perferre paratus esset. Cum nulla interim ab Caesare stipendia exercitui mitterentur, fortunas suas, muliebremque mundum ultro in stipendium obtulisse. Singulorum ciuium domos benigne apertas fuisse militi: corpora, non die, non nocte, stationibus, excubijs, periculis ullis extra teli iactum: magno illo ad Bilocam praelio, quo Gallorum arma fracta in perpetuum, aut debilitata sint, si vere aestimetur, populum Mediolanensem fuisse inter victoriae causas, eiusque rei testimonium datum Metropoli prolixè ab Daualo & Columna: & Borbonium vidisse ipsum, qualem pro Caesare pugnam ediderit gens, quae nunc deleatur ut rebellis. Vltimos profecto tumultus, quae vna desperatae plebis noxa obijci possit, ab nobilitate esse sedatos: nobilitatem persuasisse plebi, ut concitatores suos ab sese ablegaret, & traditis armis cum modestia, & quiete clementiam Caesaris opperiretur. Sed oratorem eum, per quem ista dicerentur, scribunt, longius etiam dolore motuque animi prouectum alia quaedam subiecisse propiora confidentiae & libertati quam modestiae vel abiectiōi supplicum. Diruerant, inquit, Aenobarbi manus, urbem hanc, idque saeuitiae hostilis furiosum exemplum viderat ma-



flectere miserabilia haec possent : sed ne irritatus  
quidem feritatis exprobatone , quae verbis inesso  
vltimis videbatur , siue irritatus , & alte amareque  
dissimulans , dixit , facta quae essent , infecta reddi  
non posse , & cordi fore Caesari , sibi que , vt omnia  
deinceps recte administrarentur . Secutis postea  
diebus , accersendo ad se principes eosdem ciuitatis ,  
taliam quaedam aiebat . Incommoda , quae accidis-  
sent , non Caesaris erga fideles amicos negligentiam ,  
non praefectorum Hispanaeque nationis vitio , sed  
ob pecuniae inopiam accidisse . Frequens id in re  
militari malum & Catholicae Regae propria tem-  
poribus hiscelabes coegit , inquit , & facere milites  
ea quae nollent , & dissimulare Caesarem , ea quae  
punire vellet , & pati vos interim quae nuper haud  
sine magno nostro non dolore solum sed pudore  
etiam ab oratore vestro deplorabantur . Nunc id  
agimus , idque molimur , vt nobilissima ciuitas  
redeat in pristinum statum , & sublata militum ne-  
cessitate , simul obruatur quicquid antea licentiae ,  
& iniuriarum fuit . Atque ad sananda & tollenda  
quae oportet , est nobis quidem prouisa pecuniae  
summa , quantam impliciti tot vno tempore nego-  
tius regij curatores transcribere huc potuerunt .  
Sed nequaquam ea lacunas explere omneis potest .  
Ad centum millia nummum aureorum , quae sunt  
nobis in promptu , si triginta alia vos adiicere  
vultis , spes est , breui calamitates & lamenta pro-  
cul hinc fore . Ego certe exercitum educam hinc ,  
& materies ablata malis erit . Si fallam : tunc vt  
hoc

hoc mihi caput ab reliquo corpore auferatur, siue,  
cū in aliquo discrimine belli rem geram, igni  
plumboque absumar. Talia dixerat Borbonius vt  
exitu postea suo nobile documentum caeteris  
etiam ipse ducibus fieret, ne periurio populos  
fallant. Quem Borbonij casum ludibriumque ve-  
cordiae spectauere Romani homines haud sine risu  
etiam in media clade, tunc scilicet cū Hispano-  
gallus, ad moenia vrbis, in ipso petendae coronae  
muralis feruore, deuolutus retro moribundus  
amensque per scalas rueret, & brachijs ludens, &  
crure, ranae instar, cuiusmodi mortis facies Ho-  
meri carminibus inest. Sed Caesarianus quoque  
exercitus interim risit, quia Galli Regis transfuga  
& proditor, in eo quoque Caesarem prodiderat  
vt arma, quae pro salute & libertate Italiae acce-  
perat, ijs armis ad inuadendam urbem Romam sto-  
lide abuteretur. Verū haec aliquanto posterius  
acciderunt. Mediolanenses autem, fallaci promif-  
so decepti luctati cum tenuitate quisque sua, &  
exhaustis omnibus oculis, vt summam eam tri-  
ginta millium conficerent, protulere ipsi quidem id  
quod poscebatur: sed nihilominus manebat vnici-  
que miles in domo, non modestior interea, non  
mitior factus: nec facultas vlli iam eadem alendi  
militis manebat. Borbonij ea fuerat fides. Con-  
stat, ab hac frustratione proditoris, eum fuisse Me-  
diolani cumulum aerumnarum, vt plerique, ne  
inter assidua tormenta animi agerent vitam, vel  
lacto in praecipit corpore, vel iniecto sibi in fau-  
ces

ces laqueo, informe aliquod eiusmodi mortis genus eligerent : qui finire honestius voluerant, occubuerunt ferro. Desperatio eadem in arce erat, nisi quod vnicum ibi malum fames. Cui leuandae, turbam inutilem, ferè ad trecentos, ab ea parte, quae in hortos spectat, exposuere, tantaque negligentia obsidentium fuit, ut intacti omnes euaserint, & per media munimenta exeuntibus obstitit nemo. Pueri erant, feminaeque, & imbecilli senes, qui humanae societatis vinculo aliquo validioribus adiuncti, postquam vltima necessitas ea vincula dissoluebat, coacti abire à suis, vicissim posito omni suorum desiderio abire. Famelicum id atque miserabile agmen ad Melinianum in foederatorum castra processit, accenditque ibi multa indignatione militum animos, tum adspectus eorum, tum verò pudor ipse, si multitudo imbellis erumpere ab obsessa arce potuisset, ipsi subsidium illuc intromittere nullum possent. Itaque, clamore, & strepitu, qualis esse tumultuantium solet, peruiçere, ut singulorum ordinum ductores adirent tribunos : & Tribuni, Vrbinatem, demonstrato seditionis periculo, referre rursus castra coegere Mediolanum versus : quadriduoque proximo, circum suburbana rura Casoretum & Lambratum, & inde vsque ad D. Gregorij & Sancti Angeli Aedem missi Venetis Galli, & in utroque exercitu Romanae legiones steterunt tamquam haud ultra dilaturae quin irrumperent arcem & necessaria tolerandae obsidioni intro ferrent. Vrbinati tam-

men,

men; cui, sicuti dictum est, cuncta obediebant, mens eadem quae iam inde à principio fuit, manebat, ut scilicet, pro subsidio & ope quae tantis quaesita apparatibus fuerat, speciem semper inanem arcis ostentaret. Consultando cum tribunis, agitando multiplices vias aggrediendae rei, docendo in quae pericula iretur, de industria extrahebat tempus. Duces caeteri exercitus illius, videbant quidem cunctationem iam penè infamem imperatoris Veneti, & cunctandi fortasse causas artemque suspicabantur, sed propter auctoritatem & opes, ingeniumque viri, arguere nemo vnus audebat. Sfortia interim inclusus, non modò agebatur suorum fame, sed ipse quoque (rarum, principibus) experiri ac sentire coeperat, quid mali esset fames: additoq; ad tormentum id dolore, quòd sine exitu vllò spem auxilij propinquam videret, agitare coeperat, uti permitteret sese Borbonio, arcemque Caesari dederet moestus simul & infensus & animo corporeque languens. Iam super ea deditioe emissus ab arce Iacobus Philippus Saccus, qui Senatus postea princeps fuit, aliquoties commearat, & vicissim à Borbonio missi in arcem fuerant, qui solarentur aegrum animi Sfortiam: larga ei apud Caesarem & benigna cuncta pollicerentur. Cum in eo statu res esset, & concilia quotidie inter foederatos, de auxilio ferendo arcis, req; tentanda, siue omittenda quotidie haberentur: Iacobus Medicaeus, ille iam in abrupta progressus & ex ancipiti mutatione fortunae pendens, voluit

voluit tentare nonnihil, & non sine magno suo periculo etiam tentavit. Cum enim arce per dolum occupata Mustensi, neque receptum sibi ad Sfortiam reliquisset, & adiungendo sese foederatis, à Caesare etiam post magna merita descivisset, nec segni tutus esse quiete poterat, nec ad rem ullam suo Marte gerendam habebat opes, interimque omnes ipsius motus & dicta omnia suspecta erant apud eos etiam quibus sese tradiderat. Pecuniae quoque partem, nuper in Heluetios ad conducendas inde copias, cum Episcopo Laudensi missus interuertisse insimulabatur. Volens igitur in tam lubrica fortuna ad sese confirmandum conari & efficere aliquid, persuadet Heluetijs, qui iam in exercitu erant, & ab ipso regebantur, ut ab Urbini Duce deposcant sibi periculum penetrandi in arcem, subsidiaque inferendi. Pulcrum ei genti videbatur tantae rei gloriam occupasse, & cuius negotij causa, treis maximi exercitus confociati essent, id Helueticis armis esse confectum. Ipsum consilij authorem rogant, ut legionis nomine verba faciat: & nihil ille cunctatus, ut qui legationem eam ultro quaesivisset, extollit in concilio laudam periculi gentem, seque ducem ei fore periculo profitetur, & posse ita eximi arce Sfortiam, quod maius etiam foret, quam comneatum subsidiaue alia intulisse illuc. Cum in eam sententiam pleraque militariter à Mediceo perorata essent, Urbinatem ferunt, motâ animo irâ exarsisse velut in disturbantem sic atque evertentem ea, quae

Nnnn

ipse



ipse destinasset . Dissimulata ad praesens indignatione, paulò post parata habuisse vincla Medicaeo & ipsum, in tentorio, cùm daretur aqua manibus, notasse turbati oris argumenta malignaeque cogitationis indices vultus, atque dissimulato intellectu, quasi necessitatis alicuius causa egressum inde, dum Principes ordine accumberent, innuisse suorum vni, vt sisteret sibi equum, eoque raptim conscenso funestam eam cenam mutasse felici fuga, neque vspiam constitisse donec Mussensi arce rupibusque suis tegeretur . Et ille quidem cum tanto suo periculo rem eam infenso Vrbinate tentarat : Sfortia verò destitutus omnibus vitae alimentis, cùm ne diem quidem iam vnum durare posset, pactus sibi cum Borbonio nonnulla, quae irrita fuerunt, arce excessit, eratque deinde ad Laudem Pompeiam, quàm urbem foederati habebant, eique attribuerunt . Deditio arcis facta est ad x. Cal. Sextilis, Anno salutis CIO IO XXVI. qui Annus Hispani Imperij principium Metropoli, non tamen finem vllum malorum afferebat : Nam, & antea sine arce imperium id male inchoabatur, &, vt in nouo lubricoque adhuc dominatu, militares iniuriae multae & magnae perferendae erant . Leuamenti nonnihil dedit auersum paulisper aliò bellum : & res eae, quae genus humanum moestitia ac terrore compleuerunt, subsidio nobis fuere, ducto per Borbonium exercitu ad diripiendam urbem Romam capiundumque Pontificem, & agendos in vincla Cardinales, quo facinore inhorruere animi, &  
Caesari

Caesari ipse, dolore & ita contraxisse morbum dicebatur. Quòd nisi authorem tanti sceleris Borbonium vindex Deus in medio scelere oppressisset, credidere gnari cogitationum Caesaris, facturum fuisse eum, vt suae religionis famam, edito magno aliquo in id rebelle caput documento sanciret. Sed, vt demonstraui, iustitia Numinis anteuertit; portentumque illud hominis, vt omni deinceps aeuo memorabile exemplum fieret, per scalarum gradus praecipitauit plumbo absumptum & igni, sicuti deuouerat ipse sese tunc, cum populum Mediolanensem periurio impudenti fallebat. Is igitur annus, captiuitate Romana, bellorum externorum casibus, ambiguaque etiam foederatorum inter ipsos & iam prope dissoluta societate, varius apud alios, turbidus, instarq; prodigij cuiusdam, modica nobis quiete post receptam arcem agebatur: ac nisi per milites in praesidio vrbis relictos staret, tota ad breue tempus parta quies vrbi erat. Interea Medicaeus, quem ob minaces in Vrbinatis supercilio notas, contempta ferali coena elapsum repente tentorio castra fugisse foederatorum memorauimus, coeperat ab Mussensi sua arce altius attollere animos & nihil iam mediocri meditabatur. Neque Caesarem iam, neque principes alios à quibus abierat, sed fortunam qualemcunque suam, respiciebat anceps & paratus sequi quocunque ea vocaret. Hac mente despectans caetera, Venetos legatos proficiscentes in Galliam, aggredi interciperique ausus detinuit apud Mussum in arce do-

X nec pecuniae summam repraesentauere quam poscebat. Aiebat, tantam se pecuniam erogasse de suo, cum in Heluetios auxiliorum causa mitteretur atque idpsum postea missis Venetias ad Senatum litteris excusauit. Rupe deinde arceque minime contentus ea quam periculorum suorum initio occupasset, munitiora quaedam & principali cultu magis digna domicilia exquirens sibi, ne in latebra semper illa, ferae ignobilis ritu occultaretur, ad Montis Acuti arcem animum adiecit. Est eo nomine collis in Mediolanensi agro, medius ferè Briantecos inter & Orobios, multa frugifera arbore, viteque consitus: in summo vertice, recta capacia quamuis amplae nobilisque familiae in arcis emunita modum habet. Tunc habebat eam arcem idque domicilium vnà cum subiecto colle Alexander Bentiuolus Ioannis f. quae familia dominata Bononiensibus olim, principatu amisso, fuerat ob propinquum genus à Francisco Sfortia collocata ibi, priusquam hic quoque principatum amitteret. Medicaeus, posteaquam loci opportunitates ingeniumque adamauit, per litteras simul, & per amicos coram, Sfortiae ipsi demonstrat, segniter & incuriose Montem Acutum à Bentiuolo custodiri: si Caesariani oculos eò adijciant, posse ipsos nullo negotio & expellere inde Bentiuolum, & munita inextuperabilia addere arci, quàm vbi in potestate haberent, circumiecta simul omnia habituros, atque ita de amoenissimo tractu actum fore. Si fides sibi habita sit, non solum posse sua cura &

vigilantia

vigilantia inde summoneri Hispanos, sed stationem quoque Leucensem ex propugnaculo eo infestam genti ipsum esse effecturum. Ingenium credo Medicaei nondum satis cuiquam innotuerat, & quiduis fortasse aliud Sfortia suspicabatur hoc tempore quàm ex interfectore Monsignorini novum hunc sibi parari hostem, cum quo hominem gesturus aliquando esset bellum, ubi pacem, fortunamque pristinam à Caesare impetrasset. Siue ille, amissa Metropoli, de summa rerum anxius imperioque superstes, & iterum iam prope exul, Montis acuti fortasse ne meminerat quidem. Vt cùnque sese ea res habuit, scripsit certe Sfortia ad Bentiuolum, ut ei qui epistolam ferret, tradita arce, abire inde nec cunctaretur. Epistolam Medicaeus ipse ferendam acceperat. Sed existimans posse etiam accidere, ut apud Bentiuolum loci amor plus quàm verecundia Principis valeret, nocturnus eò cum militum manu accessit, & excitato Bentiuolo armatas ei obtulit literas, ita, ut ille Sfortiae mandata simul & parendi praesentem necessitatem intueretur. Arce in hunc modum occupata illa Medicaeus, exercet in vicina rura populosque Brianteorum, quicquid iuris & imperij iustus alius legitimusque princeps in magna aliqua sua necessitate ad cogendas pecunias, exercitumque supplendum usurpare posset. Statim ei tribunalia & magistratus, & forense ministerium, carceres quoque & carnifices, & multis locis erecta patibula erant, ne quis detrectare novum imperium auderet. Milites, & Veteranos

veteranos plerosque habebat , qui fortunae minoris olim periculorumque focij , tantò promptius nunc ad grandiora sese attollentem sequebantur , & ex tota illa circumiecta regione conscribebat novos , qui ipsi à veteranis ad omnia belli opera exercebantur . Ipse , obuia comitare in omneis alloquioque sincero , nec minus effusus beneficijs , quàm poenis acer , caritate simul & metu sanxerat terrarum earum obsequium erga se & fidem . Nobiles Brianteos , prout ingenio prompti , vel stolidâ opulentia inutiles erant , varie etiam tractabat . Illi curationibus arcanisque consilijs admouebantur : hos saeuo ad Montem acutum carcere cogebat indicare quid vbi defodissent , nec dimittebantur antequam accersierant ab domo pretia redemptionis pro captu suae quisque fortunae , & in fortunas conditionemque singulorum accuratissime inquirebatur . Quibus rebus constituta aliqua tyrannidis forma iustoque propemodum exercitu coacto Maedicaeus , magna quotidie inferebat detrimenta Caesarianis , adeò quidem , vt Antonius Leua dicere solitus fuerit , plus negotij sibi exhibuisse tumultuarias istius cohortes , quàm ipsa foederatorum arma . Quas enim arces in Abduae fluminis ripa Venetorum terris obiectas ad Bripium praesertim , Tritiumque Hispani habebant , has ille crebris incurfionibus acerrime infestabat , & obsidendo itinera effecerat , ne quid ab Leuco Mediolanum , siue hinc illuc liberi & aperti esset : ac vltro citroque commeandi facultate erepta  
haud

haud dubie illam magni momenti arcem erepturus  
esse Hispano videbatur. Aduersus hunc hostem  
Leua, vi simul doloque connixus, ab vtraque  
parte infelix fuit. Martinus erat quidam ex igno-  
bili Briantaeorum pago (Mondonacum vocant)  
idque Martino etiam cognomen. Asper homo &  
violentus, infidus, nulla bona arte, sed in alienam  
pecuniam diligentiam probatus Medicaeo electusque  
ad tributa exigenda, tantò capitalior erat in eo  
magistratu, quò plus utilitatis peruenire inde ad  
se simul videt. Sicuti fit, pari gradu procedebant,  
fauor & beneuolentia heri in seruum, & mancipij  
erga herum diligentia magis quàm fides, cumque  
ditaret quotidie principem exactor, vicissim ab illo  
iste ditabatur. Posse hunc ministrum esse Medi-  
caei interficiendi Leua arbitratus, & praesenti pre-  
tior, & maioribus in posterum promissis per homi-  
nes idoneos eum corrumpit. Non recusat agrestis  
publicanus: sed callide reputans ipse secum, quod  
interfecto hero transfuga proditorque vilis habe-  
retur, transire cum alio insuper haud vili munere  
agitabat, occupata scilicet per furtum traditaque  
Hispanis arce & pago, qui Peregus dicitur. La-  
trunculorum habebat manum ad ea, quae parabat  
adiunctam sibi & fidam. Hos tamquam iussu Me-  
dicaei captos, iniectis catenis appetente vespera  
secum trahens, appellat ex itinere praefectum  
arcis familiarem sibi hominem, vt deponi apud sese  
patiatur: & ipsum ea nocte futurum ibi coenatu-  
rosque vnà. Facile acceptus intrò soluit repente  
captiuos:

raptiuos: hi praefectum ligauere resque gesta pulcherrime erat. Sed postero die Medicaeus, comperta fraude exactoris sui, mittit ad oppugnandam arcem latrunculosque vnà cum proditore capiendos. Capti omnes, atque ad montem acutum illico raptati, statutis toto vertice furcis ordine suspenduntur. Martinus, quia primo tormentorum adspectu ediderat insuper ea, quae sibi cum Leua conuenissent, genere alio supplicij punitus vt apud incolas regionis eius in terribile exemplum abiret. Singulos viui artus rotae pondere fregere Ianij, totosque dies dilata & continuata carnificina est, quò lentius ille moreretur. Hunc exitum habuere insidiae, quas Leua in Medicaei caput excogitarat: & ipse tanto suo periculo irritatus in Hispanos, odio deinde nominis eius ac metu, aditum sibi nouum ad foederatos quaesivit, quòd vt saluti suae consuleret, aufugerat è castris, & Venetae legationi iniecerat moram, pecuniaeque nonnihil aucupatus inde sibi erat. Ita foederatorum ab eo tempore totus fuit, instigator eis & minister contra Caesarianos, donec Leua, ob continua damna versus in viri admirationem, statuit per beneficia adiungere Caesari, quem nec tollere dolo, nec aperto Marte superare potuisset. Subegere autem Leuam vt beneficijs vincere Medicaeum tentaret, astutiae horribiles viri eius, & calliditate maior fortitudo, roburque animi inuictum, & belli fortuna conatibus eius raro inimica: & quod denique appareret, si foederati hunc diutius in partibus



partibus suis hominem haberent, haud magnopere ad rei Mediolanensis securitatem profutura esse Caesari, vel dissidia eorum, vel quae inde data laxamenta Metropoli erant. Dum enim dissident illi cunctanturque, & parum sincera inter se fidem agunt eam, cuius rei causa coniurarant, accepta ab eis pecunia Medicaeus, Rhaetica vna conducta legione irrumpere in urbem tentavit, apertam tum forte & opportunam, quia Leua educto ad Melinianum exercitu, nihil fere praesidij ibi reliquerat. Quominus ab legione illa, Medicaei ductu tunc vrbs caperetur; nulla res alia obstitit, quam ipsius Leuae celeritas, qui comperto discrimine obuiam iuit, & Rhaetorum contumacia, qui praelio aduentante superiorem locum tenere noluerunt, in quo ab duce collocati sternere impune Hispanos potuissent. Ille, hinc pertinacia suorum, hinc hostium impetu coniectus in vitae discrimen, atque deprehensus inter loci angustias, & Hispanorum tela, concitato quantum poterat equo, traiecit ingenti saltu carrum, quo obsepta via erat, intactusque euasit. Res gesta est ad Carratum pagum, qui distat ab vrbe quatuordecim millia passuum Lambro flumini appositus, & imminet rupes, vnde paratum Hispano exitium stabat, si parere voluisset gens obsequij ignara, & tunc irritata suspicione, tamquam ab ipso Medicaeo trucidanda Hispanis rupe in illa obijceretur. Sed non, quemadmodum Medicaeus tanto facinore infelicitertentato euaserat ex media Hispanorum acie, ita

O o o o

Hispani

Hispani ex ipsius euadere manibus potuerunt cùm Mussensem arcem adimere ei paulò post tentassent. Hispanus erat Villaterellus apud Leucum praefectus arci, non Medicaeo tantum infensus ob ea, quæ famam quotidie Caesarianorum ille obtinebat, sed nationi quoque suæ iratus, quòd ab nouo homine (sic enim eludentes appellabant) tantopere insultari sibi paterentur. Hominem Medicaeo percarum iste habebat in custodia Sardum cognomento. Quem ubi tentando varie, callidum audacemque cognouit, traxit paulatim in quendam huiusmodi sermonem: si dimitteretur è carcere salutemque acciperet, ecquid posset ipse excogitare ac moliri, quo remuneraretur id munus? Ad ea Sardus dicere, nihil posse amplius ab se praestari, quàm ut Mussensem arcem ei traderet, idque pro ea consuetudine ac familiaritate, quæ sibi cum Medicaeo esset, facili negotio effecturum. Res magna visa Villaterello: sed tanti promissi vadem dari sibi aliquem poscebat. Captiuus Palamedem Abduam Briantaeorum facile ditissimum, vadem fore pronuntiat: nec ille recusauit. Ita Sardus è carcere dimittitur, auideque deinde Hispanus promissa expectabat. Res inter eos ita conuenerat, ut paratis ad inuadendam arcem omnibus proditor Leucum usque excurreret: inde sublata secum in lembum Hispanorum cohorte perageret. Sed ille, statim ubi ex tetro carcere magnoque capitis periculo saluus in Medicaei venerat amplexum, aperuerat ei cuncta, & ubi tempus

pus visum, ad illiciendos in retia Hispanos, simula-  
ta quadam sua profectione Medicaeus abierat pa-  
lam ex arce nocturnusque redierat. Tunc Sardus  
ad Villaterellum exit, & lectissima Hispanorum  
corpora, in his Villaterelli ipsius fratrem virtutis  
eximiae iuuenem, sub titulo gerendae rei ad ne-  
cem ducit. In ipso arcis ingressu obtruncati om-  
neis, duobus exceptis, qui, cum porta cataracta  
demitteretur, nondum illato pede conspicati so-  
ciorum stragem aufugere inde maturarunt, & per  
montium eorum deuia, per abrupta, prope exani-  
mes in tutum peruenere. Hi postea beneficium  
celeste agnoscenteis, cuius prope miraculo uiue-  
rent saluique essent, simul res pertaesi humanas,  
contulere sese ad Franciscanos, & vitae reliquum  
cinerea in toga sancte ibi laudabiliterque egerunt.  
Villaterellus ipse, post tantam cladem, praefecturâ  
damnatâ & contemptâ illâ, fratris praecipuè deside-  
rio moerens, impetrato ad sepulturam corpore, cum  
bona Leuae pace, & venia, Lucio Brisighello succes-  
sori tuendam arcem reliquit. Fraus igitur etiam ista  
Medicaei, siue Imperatoriae prudentiae successum  
appellare quis malit, cum ad pleraq; alia noua, &  
tremenda viri eius accessisset, occulte perculerat Le-  
uam, vt ex hoste facere amicum tacitus destinaret.  
Sed cunctantem adhuc, & in ancipiti consilio expe-  
ctantem tempora Hispanum, ne id ultra differret,  
compulere ea, quae mox ad Leucum gesta sunt.  
In vltiore fluminis ripa locus ille est, frequenti  
mercato, & arcis fama satis notus: tunc quidem

etiam maxima cura, simul Hispanis, vti tuerentur, sinu foederatis, vt capere possent. Aditur ex Briantaeis, ponte, quod Ioannis Vicecomitis antiquum opus & quadrato lapide per decem pilarum intervalla fornicatum, Abduae nomen magnitudine sua auget. Posuit eam molem Archiepiscopus Ioannes cum potentiae Regum equiparatus, Pontificatum simul & arma imperiumque vrbis ipse haberet. Medicaeus, expugnato ponte dissectoque militum praesidio, qui tamquam arcem alteram eum tuebantur, premendo obsidione Leucenses, cogebat Leuam mittere ab vrbe eò subsidia, quae, nec terrestri per Briantaeos itinere commeari poterant ob crebra regionis castella & arces, & si ab altera parte nauibus venirent obsepto catenis lacu arcebantur. Cumque Leua extremo iam fere Leucensium periculo accensus, delectas cohortes, atque robur equitatus, Balbiano, & Torello, & Caesare Neapolitano ducibus misisset: Medicaeus vicissim, accito Venetorum auxilio, curulibus insuper tormentis, & omni alia armatura, si quid forte ad iusti praelij discrimen deerat, id quoque subsidium prohibere conatus obstando ad omnia loca, circumueniendoque agmen, & pugnando, cruentum id Hispano exercitui iter fecit. Quod nisi Venetorum copiae, quas ad angustae crepidinis fauces ipse collocarat, conspectis Caesarianis, terga repente dedissent, fama fuit, totam eam repente manum potuisse deleri: quippe, hinc classe, hinc ponte, hinc crepidine valido praesidio armatis

Vt

ut sicuti aditus in Leucenses, ita fuga retro impedi-  
 retur. Relinquebatur una per Briantacos via,  
 qua redire Mediolanum possent: sed redeuntibus  
 illac, praelia parabantur eadem, quae venientibus  
 afflixissent, tenente regionem Baptista fratre Me-  
 dicaei, & ipso cum septingentis qui post Veneto-  
 rum profectionem reliqui erant, mox insecuturo.  
 Verum enimvero, corrupta occasione nihil aliud  
 quam infida foederis societas, dum partes, nus-  
 quam in commune, sed sibi priuatim consulunt,  
 arcemque Leucensem illam, nec Veneti Medicaeo  
 relinquere habendam, nec Medicaeus ad Sfortiae  
 utilitatem capere admodum curat. Ob id enim,  
 neque datus unquam impetus in eam, est impres-  
 sione facta, & Veneti locum deseruere, qui reten-  
 tus haud dubie victoriam dedisset. Caeterum Le-  
 ua, quamquam & penetrasse utique subsidium,  
 illud videt, & spem magnam defendendae arcis  
 habebat, reputans tamen ipse secum ingenium, &  
 artes, fortunamque Medicaei, & pleraque alia  
 voluens animo, promere denique statuit id quod  
 de reconciliando homine secreto agitabat. Loca,  
 & arces, tractusque terrarum, quos illo defectionis  
 tempore occupasset, confirmat ei Caesaris autho-  
 ritate: Mussi Demarchum appellat: attribuit etiam  
 Leucum: copias & arma parata habere iubet, &  
 praesto esse Caesari ad omnia quae res postularet.  
 Fueritne Leuae consilium hoc reconciliandi Medi-  
 caei, an verò Caesar ipse mandasset, etiam qui  
 tunc erant homines dubitauere. Pro certo illud  
 habitum

habitum est: Moronum, qui, post captiuitatem, deserta infelici fortuna Sfortiae sese Caesari addixerat, & nihil aliud quàm gratiam hoc tempore Caesarianorum sequebatur, egisse de ea reconciliatione cum Leua, multisque rationibus demonstrasse ei, quemadmodum vtile Caesari futurum esset, si hostis rebellis ille mitigaretur. Mitigatus autem ita erat, vt in curas benemerendi de Caesare simul & fortunae suae augendae diuisum, animum haberet: augebatque munimenta castellis: conciliabat sibi per hospitia, & affinitates animos eorum, vnde proferendis finibus auxiliij aliquid speraret: Venetos, vt imperio suo finitimos, vtque Caesaris hostes assidue carpebat. Ad omnia, Caesaris nomen obtentui erat, & Alba Cruce (insigne Caesarianum id fuit) sibi suisque indita, abdicato rubro gestaminis eius colore, foederatorum nomini: sese hostem aperte profitebatur. Aduersus eos, pro parte, in quam transisset, fieri cuncta volebat: ille potius credi, quàm credere homines poterant, siquidem cum aliquo iudicio intuerentur viri animum, & quantum ei fortuna tribuisset, & conditionem temporum, quae erant eiusmodi, vt quod quisque tunc occupasset, id etiam postea esse habiturus videretur. Quin etiam, tunc fuere qui ita differerent: Sfortia propediem morituro, & propter Metropolim conflagaturâ bellis Italiâ, nusquam melius posse placari principum animos componiq; statum rerum, quàm si Medicaeus, vti iam esset in parte dominationis, ita relictâ Veneris Cremonâ,

&amp;

& si quid omitti aliud interesset pacis, caetera obtineret. Alioqui, neque Caesarem vnquam Gallo, neque Gallum Caesari esse concessurum, vt ad pristina regna hoc adiecto principatu tantò potentior fieret: tum vter eorum adipisceretur, caeteris omnibus formidabilem fore. Venetos praecipue hoc adhibito temperamento denique acturos quietem, cui genti calamitatis loco semper habitus fuisset adèdò potens accola sub nomine Reguli Regum opes amplexus. Pauperem Principem fore Medicaeum, qui absque vlla finitimum iniuria, nomen tamen famamque Ducis impletet: fore apud eum gratiae locum, fore beneficio, & subiectos interim, magis cum principe, quàm sine libertate, moderationem esse salubrem, imperij habituros. Homines quidem de animo fortunaque Medicaei, & de eo, quod aliquando futurum esset, ita differebant. Ipse verò nihilo humiliora voluens animo, quàm quae sermonibus hominum tractabantur, tam prope à principe quàm olim ab exsule, in Lario lacu classem, exercitum in Briantaeis, Venetorum Heluetiorumque finibus obiectas terras, montium cacumina, vallium recessus, spatiaque camporum, & vbique arces, obsequium apud subiectos, apud externos famam, & haec omnia velut concessu Caesaris habebat, cui nuper hostis fuisset. Imperij sedes ei apud Montem acutum modò, nunc apud Mussum, quae loca excoluerat, munierat, aderantque bombardae, partim, quas conflauerat ipse sibi, partim quas ademerat



ademerat Venetis : & donatas ei ab Leua fuisse nonnullas constabat . Iam egregie subnixae pluribusque munimentis insistens domus : quatuor fratres , totidem sorores , & quas in fraternam sibi curam adoptarat , consobrinae duae : ipse laboribus & vigilijs attenuato corpore : sed florens integraque aetas subsidio erat . E fratribus , Baptista , & Gabriel , hic adolescens , ille iam virili robore , socij expeditionum participesque consiliorum , erant . Augustus ad spem generis familiaeque successione[m] reseruabatur : Ioannem Angelum , qui postea Pius IV. fuit , ad sacros honores ordine enitentem exspectabat Ecclesia , dum maturam cape[ss]endo Pontificatui aetatem afferret . E sororibus , duae Mediolani solennibus obligatae votis virginali acuum agebant : duae ad Mussum vna cum duabus consobrinis constituta in Monasterij formam domo , procul ab militaris aulae strepitu habebantur : prouideratque seuerus ad talia Demarchus , ne ministerio illic virili opus esset , neu quisquam illuc inferret pedem , excepto decrepito vno capularique presbytero , qui sacrificij causa descendebat ad claustra illa quotidie , & vbi perlitasset , abibat . Harum deinde alteram , Claram nomine , Vultheoderico Sittico nuptum dedit , cum Germaniae procerum clarissimus Mussensi lacu renaugans domum , exceptus ab Demarcho splendidissime fuisset in hospitio apud eum , indeque orta inter ipsos amicitia & familiaritate , iuuenis , postquam domum peruenerat , petere virginem institisset .

Medicaea

Medicaea minor, cui Margarita nomen, paulo post data est Giberto Borromaco Comiti Aronae, modesto iuueni & pio, qualem praeparari D. Caroli patrem oportebat. Sed futuram eius matrimonij gloriam, celestemque fructum coecâ ad rem tantam humanae mentis coniecturâ minime prospiciens bellator audiusque rerum aliarum Medicacus, quaesierat potius id nuptialis pacti compendium, ut inita cum Borromaeo necessitudine, Aronae arcem ab eo eblandiretur, quod tamen, neque conditionibus assequi ullis potuit, neque astu, cum utraque machina expertus conatusque esset. Haec fortuna Medicaei ab iniurijs orta illis, quae demonstrata sunt, aucta deinde, & adulta varijs rerum euentis, & ipsius virtute, sicuti item demonstraui, ita sese habebat ad annum usque vigesimumseptimum seculi eius videlicet CIO IO. ut ab eo tempore fluctuare inciperet, rursusque conflictata redigeretur in eum statum in quo Medicacus fuit, cum vitae finis ei accideret. Caeterum, anno illo quem notaui, cum Caesari natus esset Philippus auus Philippi IV. qui nunc regnat, conuersâ in tot Regnorum heredem humani generis gratulatione, vel inuidia, vel si quae ob eam rem aliae regnantium curae commotae erant, etiam Mediolanenses ad spem crexere animos, posse per eius Regij exortus laetitiam à Caesare impetrari, quae legatione missâ aliâ pro misero vrbis statu nequicquam implorassent. Namque cum sub Borbonij discessum iuissent ad Caesarem legati peten-

tes, vt exonerari militum parte urbem iuberet, spreta ea, & reiecta legatio fuerat in contumaciae poenam, qua crebris aulae sermonibus tumultuati esse aduersus regios praefectos, nationemque pul-  
X fuisse Hispanam incusabantur. Nunc, vt dixi, spe animis sumpta noua, tamquam, ob regios natales hilaritate & clementiâ cuncta apud Hispanum reniderent, mittitur Vallisoletum in regiam ex vetusta urbis nobilitate Philippus Archintus, qui postea Mediolani Archiepiscopus fuit. Mandatum ei ab Decurionibus Urbis, primum omnium vti diceret: Populum Rempublicamq; Mediolanensem ita laetatum esse Philippi Principis ortu, vt veluti natalem suum diem eum semper concelebratura sit. Verè enim Metropolim arbitrari sese renatam, propagata per eum infantem successionem imperij, cuius desiderio, fideque erga illud, & pietate armati ciues potuerint trucidare Gallos, euertere eorum, tribunalia, ferre obsidiones, exire contra, & ad omnia loca pugnare, donec Rex ille captiuus nonnullâ etiam Mediolanensium operâ fuerit ita victtricem aulam attonita omni hostium gente deportatus. Haec de se profiteri Mediolanenses, & si quis negare velit, defendere esse paratos, & posse nationes interrogari, quae rebus adfuissent. Quod si postea constituto apud Insubres Austriaco Imperio, & diuisis per omnia urbis castra militibus nonnulla minus beneuole Mediolanenses inter & Hispanos accidisse dicantur, illud quoque defendere esse paratos, quod nullâ suâ malâ mente sed  
mutuis

mutuis irritationibus acciderint, & sicut in domo nonnunquam eadem inter fratres etiam taedia diuturnae consuetudinis res aliquando dedere odiosas ita in militari contubernio potuisse contingere nonnulla, quae possint deseri magis, quam defendi. Verum enimvero, neque purgandi, neque deplorandi causa legationem eam decreuisse Mediolanenses: petere à Caesare confidenter, ut dum, caetera terrarum gestiunt plauduntque regnatura infanti, velit ipsorum quoque plausus & gestiensem alacritatem esse sine squalore & luctu: velit urbem leuare tributis, & onere insultuque quotidiano militari: simul annuat, ut eiectionis urbe ciues ob tumultus, patriae redonet, authoritasque Senatui pristina restituatur. Philippus Archintus Mediolanensium nomipe haec ferme petierat. Responsum à Caesare est: displicuisse sibi ciuitatis eius miseriae, inuitumque credidisse quod haud immerito ea paterentur. Sed praeterita omnia malle obliuisci: optare in posterum, ut obedienter mansuetique agerent: & hominibus ibi suis mandaturum ut pro magnitudine, & nobilitate urbis benigne vicissim clementerque agant. Caesaris epistola ad Decuriones urbis, in eam sententiam data Archinto est: vidimusque nos autographum eius exemplar inter Patriae monumenta, rem sanè dignam publica custodia ob illustre Caesaris ipsius iudicium de gloria splendoreque urbis. In eadem epistola erat: Caesarem, qua clementia, & magnitudine animi erga Regem Franciscum Mediolanensem,

ipforum virtute captiuum vsus fuisset, ea se Mediolanenſibus ipſis eſſe conſulturum. Inter maximas Imperij curas eſſe hanc, vt ciuitas ea, populusque, & Clerus, depulſis praefentibus miſerijs rediret in eum ſtatum, quo olim fuiſſe diceretur. Ideo, quae ſtatim tribui poſſent, ſine mora conſeſſa eſſe perſcriptumque diligentiffime ad Leuam, vt praefidia ex vrbe deduceret: ſatis praefidij in fide Mediolanenſium fore: vel ſi ea abeſſet, ne arma quidem vlla aduerſus contumaces eſſe valitura. Ab ea legatione Archinti Caefaritque mandato, commodiora omnia Mediolani aliquandiu erant, exonerata vrbe, ductiſque alio in hyberna vel aeſtiua militibus, quae ad eam diem publica, & intoleranda Metropoli calamitas fuerat. Paulo poſt reuocantur in ſtationem quique ſuam recrudefcente circa urbem bello, quod coeptum ſimul finitumque eſt. Namque dum Caefarianus exercitus, Borbonij ductu alibi rem gerit, & eodem ſublato Borbonio, coeptis tamen illius inſiſtit, nouae Gallorum copiae, duce Borbonio altero, qui Sanpaulanus dictus eſt, apud Valentiam tranſgreſſae flumen, perpopulatae Mediolanenſem agrum municipijs urbibusque captis, ad Metropolim obſidendam nemine obſtante tetenderunt. Adeo ſoluta & neglecta repererant omnia, vel ſecuritate Caefarianorum, vel viribus in pericula alia diſſipatis. Seruauit in eo diſcrimine urbem, eadem quae non ſemel alias ſaluti fuerat, ſiue leuitas, & inconſtantia Gallorum, ſiue fortuna quaedam initijs eo-

rum

rum secunda, ad exitum fallax, & tunc maxime  
 aduersa cum prope victoriam eis in manum dedit.  
 Namque Sampulanus animo casuque usus eodem  
 quo caeteri etiam ante ipsum Galli duces à moeni-  
 bus captae iam fere vrbis vltro abscesserant, retu-  
 lit ab Landriano repente castra tamquam iturus,  
 ad inuadendam Genuam, cum si pergeret huc ire,  
 capere Mediolanum potuisset. Et Antonius Leua  
 cum eo exercitu, quem habebat, vrbe egressus  
 persecutusque abeuntem, turbauit primò ac fudit,  
 deinde etiam cepit: qui superfuere Galli, cum  
 insana trepidatione petiere alpes, & rediere do-  
 mum, nec res alia magis extulit Leuam. Relique-  
 rat hunc Mediolani Borbonius cum ipse Romam  
 ad exitium dedecusque suum post illa quae memo-  
 rau, dedecora proficisceretur: fuitque Leua inter  
 Hispanos duces, qui Caesaris nomine Mediolani  
 imperitarunt, virtutè magis sua, quàm origine par  
 caeteris, Dauali prope discipulus, Borbonio me-  
 lior: & pietatis monumenta reliquit. D. Dionysij  
 Aedem & cum ea Aede Monasterium extruxere  
 Seruitae erogata per ipsum pecuniâ, vt militare  
 flagitium expiaretur, quo Monasterium Aedemque  
 aliam ordinis eiusdem demoliri necesse habuisset.  
 Gessit bella consilijs nutuque & nominis authorita-  
 te potius quàm manu, cum ob magnos articulo-  
 rum dolores inuolutus fetæ fascijs iaceret: ac si  
 prodeundum utique erat, gestatoriâ sellâ circum-  
 ferebatur, splendidissime armatus, & cristarum  
 amoenitate fastuque dissimulans poenas. Tam se-



Ilici victoria factus etiam elatior, flagransque ira in  
 finitimos Venetos, quorum praecipue stimulis,  
 nouum illum ex Gallia factum esse impetum scie-  
 bat, dum traiecto Abdua flumine, vastitatem eo-  
 rum terris infert, nuntium accepit, haud equidem  
 crediderim ei animo gratum, de pace, quae diu  
 agitata conuenerat, fessis ob mutua damna regibus,  
 & anxio Pontifice, si tot malorum orbi cristiano  
 causa ipse haberetur. Nuntiata pace, reducto ad  
 urbem exercitu, quies armorum erat, atque erectis  
 expectabatur animis, quo denique modo reconci-  
 liati inter se Reges componerent orbem terrarum:  
 quae summa conditionum fuisset habendae etiam  
 in posterum paci, si pax fida vnquam esse posset,  
 vbi bellorum causae assidue existerent, & semel  
 extinctae renascerentur. Mox fama accidit, venire  
 petendo diademati Caesarem in Italiam, ut vete-  
 rum more coronaretur. Barcinone substiterat  
 quamprimum inde traiecturus. Mediolanenses  
 illuc Archintum destinauere eundem, qui priore  
 legatione functus fuerat. Legandi iterum ea fuit  
 causa, ut, & indicarent Caesari laetitiam gratula-  
 tionemque ciuitatis ex eo quod Imperatorem  
 omnis memoriae clarissimum terra Italia acceptura  
 esset, & ad gloriam ornamentumque urbis non-  
 nulla peterent, quae priores etiam indulserant.  
 Caesar, benigne audita legatione, legatique etiam  
 ipsius prudentia, sicuti fama est, haud parum de-  
 lectatus, concessit Iurisperitorum praecipue Col-  
 legio multa quae manent hodie, nec fastum modò  
 nobilitati,



nobilitati, sed etiam incitamentam virtutis addunt. Est id Mediolani Collegium fundatum antiquitus seuera lege, ac superba, ne recipiatur ullus; qui suos ab origine vltima auos intactos omni natalium & vitae labe exhibere non queat: quae necessitas, nescio, an principum quoque nonnullis molesta futura sit, si talia proferre documenta cogantur. Non pecuniae magnitudine, non gratiâ, claudicans & noua nobilitas aditum eo inuenerit: extantque exempla praediuturni candidatorum, quos suffragia omnia reiecere propter illiberalem maiorum, solertiam, atque mercimonio nonnullo contaminatos penates. Huic tunc Collegio noua decora quae-rebantur, deditque ea Barcinone sedens adhuc Caesar. Inde ille Bononiam venit, eoque Pontifex Clemens, & Pontificem affectati Cardinales, legati praeterea Principum & Regum, principesque multi vnâ adfuere celebraturi coronationem Caesaris, pompamque visuri, qua nulla fortasse vnquam, neque illustrior, neque spectabilior fuit, coronante Caesarem Pontifice, inter quos paulò antea hostilia cuncta facta erant: adstante purpuratorum corona, quos nuper vnâ cum Pontifice captiuos egerat Caesaris miles: adulantibus denique ceremoniae huic legatis eorum, qui Hispani nominis insectatione gratiam inter se certatim, & gloriam apud alios quaecebant. In ea tantarum conuersione rerum, vel mutatis omnium animis, vel compositis certè tamquam mutati essent, peritum à Caesare impetratumque est, vt Francisco Sfortiae  
veniâ

veniâ praeteritorum concessâ pristinum statum, redonare vellet: statimque ille ab Cremona accersitus, Dux Mediolani iterum fiebat. Ob eius rei gratulationem Archintus tertium legatus ad Caesarem iuit: cui deinde legato gratia apud Hispanos, odium apud Sfortiam peperit: & rursus Hispani hominem vexauere, postquam Archiepiscopus urbis factus capeßere Ecclesiam parabat. Nunquam enim per eos inire honorem potuit: ac Bergomi prope exsul est mortuus. Verum, & quomodo suspicionibus apud regnantem Sfortiam ille conflictatus fuerit, & quomodo in Philippi Regno Pontificatu prohibitus, postea ordine exponam. Sfortia restitutus est in Mediolanense imperium ea conditione, vt quadringenta millia nummum aureorum intra anni spatium, decennio deinde proximo decem pensionibus quingenta millia Caesaris fisco persolueret. Prior illa summa donec persoluta esset, arcem Iouis urbemque Nouocomum haberet Caesar: pernumeratis quadringentis millibus ea quoque restituerentur. Haec & alia dum fierent, Antonius Leua cum idoneo exercitu apud Insubres maneret. Quae vltima conditio, velut fidei pignus, stabilimentumque rerum inducta, & rem prope euerit, & labefecit fidem. Semper enim Leua Sfortiae inensus fuerat, & Sfortia vicissim oderat. Leuam, inuicemque alter alteri struxisse insidias dicebantur: & fama fuit: iam illectum prouinciae dulcedine Leuam, secretis apud Caesarem sermonibus agitaße multa, ne rem Mediolanensem

diolanensem vllō modo alienaret . Posse ipsum ,  
 retenta Metropoli , totam subigere Italiam , & qui  
 Italiae potiretur , ad imperium omnium terrarum  
 parum ei abesse . Cuius consilij ratio , licet ab  
 Caesare spreta & repudiata fuisset , recordatio ta-  
 men eius apud Sfortiae animum inter veterum  
 irarum incitamenta assidue voluebatur , vt si caete-  
 ra inter eos amica forent , possent hoc ipso irri-  
 tari , alter quidem , quòd sibi conscius esset , tam  
 maligni consilij , quo Caesaris praeripere benefi-  
 cium voluerat , alter verò , quòd excitatae suae  
 fortunae inimicum ac prope euersorem imminen-  
 tem adhuc sibi legionibusque succinctum intra  
 fines eosdem videret . Hinc crebra materies offen-  
 sionibus mutuis , & veluti stante supra ceruices  
 inimico infestior pene vita nouo duci in principa-  
 tu , quàm ipso fuerat exilij tempore , tunc cum ,  
 Gallicis prius armis , deinde Caesaris irā principa-  
 tu arceretur . Sed exigendo etiam ipse tributa dis-  
 soluendis pensionibus , effecerat , vt Reip. status  
 nihilo melior esset hoc tempore , quàm cum Galli  
 vel Hispani tributis urbem iniurijsque vexarent . Et  
 odio metuque Leuae coeperat in singulos saeuire  
 ciues , quosq; vel deditos ei , vel aliquo ipsius be-  
 neficio deuinctos esse compererat . Mitissimus antea  
 princeps , & ob mansuetudinem ciuitati semper expe-  
 titus coeperat nunc esse praeceps ad credenda dete-  
 riora : praecipitemq; credulitatem poenae in suspe-  
 ctos sequebantur , exilia nempe & proscriptiones ,  
 & exulio vel proscriptione funcstior dissimulatio in

alios, quos in vrbe retineri tutius videretur. Ea noua calamitas nobilitati Mediolanensi exorta erat, manebatq; donec origo mali tolleretur, placatis casu quodam inimicitijs, quas, Sfortiam inter & Leuam magnas, atque capitales fuisse demonstraui. Pacificator autem ille casus huiusmodi fuit. Philippus Archintus, quem ter ad Caesarem Reip. Mediolanensis nomine fuisse legatum ostendimus, quique Archiepiscopus postea futurus erat, egerat semper praecipua apud Leuam gratia, & honores ante Sfortiae reditum obtinuerat ab eo, quoscunque ab regio praefecto in sua patria obtinere honestus ciuis posset. Ea beneficia & honores Archintus tributos torue intuens Sfortia, destinauerat hominem inter capita infida sibi, & inimici sui amicum amouere ex vrbe decreuit. Dicit ei iubet: melius fore si discedat ultro: diesque praefinita, intra quam excessisse finibus deberet. Enimuero, Archintus, repentinam eam vertendi soli necessitatem, aegre admodum ferebat, sibiq; & familiae fore ignominiosam rebatur. Tum quia immerito res ea sibi accideret, etiam impavidus, & irato similior quam supplici, Franciscum Tabernam, iuris praefectum intimumque Principi adit. Vixisse cum fide sese erga Sfortiam testatur, & nullius culpae reum, eijci Patriam quae testis esse posset innocentiae fideique suae. Caeterum, non tam displicere sibi, quod sic immerito eijciatur, quam quod iniuria illa, pulcherrimi operis fructum interceptura esset, in quo tunc maxime ipse fuisset occupatus. Videntem enim

enim sese & reputantem quam damnosa patriae, quam molesta principi essent illa, siue odia, siue diffidia, siue suspiciones & offensae, quae cum Antonio Leua exercerentur, negotium id ultro habuisse susceptum, ut principum animos pro ea quam habere videretur autoritate reconciliaret: ac sperasse rem posse confieri, iamque certissima pignora reconciliationis eius, quod ad Leuam attineret, manibus tenentem, atroci denuntiatione esse percussum. Studiosus homo, tum publici otij, tum principis utilitatum Taberna ille erat, ac pro eo studio magnopere angebatur videns infensum Sfortiae esse Hispanum, qui, cum arma exercitumque haberet, Caesarisque preferret autoritatem, posse videretur in recenti dominatu obesse rebus & cuncta euertere, sicuti Daualus antea obsuisset, atque euertisset collegam fraudis eodem. Itaque spe pacis iniecta illa, simul audita defensione, vel potius querimonia Archinti, demonstrat Principi hominis innocentiam, eiq; persuadet, ut, & salutarem, egregiumque ciuem domi retinere velit, & ad conciliandum sibi Leuam eo interprete utatur. Fuit deinde in vrbe Archintus multam apud Sfortiam, gratiam ob id meritum, quia opus inchoatum absolvens, rationibus inducere suis potuit Hispanum, ut offensione deposita omni, & abiecto siquid hostile meditabatur conferret ultro sese ad Sfortiam & bona fide cum eo in gratiam rediret. Minime dubitatum est apud prudentes, quin perniciēs aliqua vi siue dolo conflata Sfortiam maneret, nisi

inimicitiae illae sublatae essent . Earum fine quiescere ciuium etiam calamitates, quae, & oriebantur inde, & gliscente duorum principum odio crescebant simul . Sfortia, casu magis quodam, & Archinti illius opera, quàm vlllo suo consilio depulsis periculis, quae ab inimico sicuti demonstratum est, Leuâ, imminebant, ipso noui principatus initio deuenerat in pericula alia longe etiam grauiora ob irreparabile damnum existimationis, turpemque notam eius nomini imminentem, si Dux Mediolani ipse, propter quem, inter duos Reges tanta contentione dimicatum esset, cuius causâ, multi Gallorum exercitus, multa Hispana agmina, Romanae legiones, auxilia Venetorum, omnia, fere Christiani nominis arma in vnum conuoluta discrimen fuerant, nunc ab exule Medicaeo, non proditione aliqua, vel incurso tumultuario, dolisue vllis, sed iusti more belli opprimeretur. Nihil enim propius factum est, quàm vt accideret istud: ac, si qua debetur venia nimium iam tricarum atque tumultuum assumentis mihi, nusquam ea iustior, quàm in parte hac operis fuerit, vbi tradentur res gestae Iacobi Medicaei, illius scilicet, qui D. Caroli auunculus, Pij IV. frater fuit, qui vltimis mandatis expiata superiore vita, & sororis filio dignum sese praeiuit, & fratre, quem demum vterque expiantes addere ornamenta publicis Ecclesiae rebus, & militari aenea statua posita in templo maximo quotidianas ei hostias decreuere. Medicaeus, audacia,

&

& virtute sua, & prosperis rerum euentis in-  
eam quam demonstraui fortunam euectus, vbi  
restitui Sfortiam, eamque restitutionem Bononiae  
agitari magno principum studio accepit, profici-  
scitur ipse quoque Bononiam, & deprecatore Le-  
ua, cui debere sese cuncta profitebatur, petere à  
Caesare institit, vt fieret earum rerum auctor, quas  
sibi Leua concessisset, castellaque & arces, & lo-  
ca omnia, sicuti iam ex pacto haberet, munere  
concessuque regio posteri etiam ipsius haberent.  
Id cum praecite negasset Caesar, dixissetque pla-  
cere sibi, vt Sfortiae cuncta restituerentur, reuer-  
sus ille domum, ad bellum haud dubie imminens  
sefe parabat, principesque finitimos, quorum fidei  
sefe antea tradiderat, inuocabat, vt sibi praesidio  
essent. Sabaudj praesertim ope nitebatur, qui pol-  
licitus erat se ei nullo modo defuturum. Is Epif-  
copum Vercellarum ad Sfortiam misit petens ab  
nouo Duce, vt honesta aliqua conditione cum  
Medicaeo transigere vellet: id sibi gratum, & vtilius  
fore ipsi, quam recuperato nuper patrio imperio  
bellum sumpsisse nouum, quo, ne vicisse quidem  
expediret ob ciuium cladem sine qua non posset  
vincere. Sed ne victoriam quidem esse certam ob  
vim ingeniumque hostis, & locorum naturam,  
quibus ille sefe tueretur. Ea cum ab Legato dice-  
rentur, minime Sfortia abnuebat veluti cupidus ho-  
mo otij, rebus accisis, & anxius praecipue pecu-  
niae summâ, quam Caesari ad diem persolutam  
esse oportebat: fessoque insuper tot praeteritis  
casibus



casibus animo, partem vitae suae extremam cum aliqua exigere pace auebat. Apud Medicaeum dispari de causa studium otij idem erat, nec leue lucrum ei, si absque armorum discrimine retinere posset ea, quae armis & dolo inuasisset. Inclinatiss ita ad quietem animis, Sabaudus legatus conditiones haec pacis ferebat. Haberet Medicaeus Mussum, & Leucum, & quicquid in Larij lacus oraiam teneret: cederet omni cis Abduam regione: Montem acutum relinqueret: deduceret praesidia ex Briantaeis, neucolles eos postea attingeret. Populis & terris quae ipsi relinquerentur ita impetraret quomodo quilibet alius princeps imperitat suis: vitae necisque arbitrium, arma & milites, & auri, argenti, aeris, flandi feriundi potestatem, intra suos fines haberet nulla in re subiectus obnoxiosue Duci, nullo in causis iudicij sue respectu vel cura imperij maioris. Quas lites, causas, ipse magistratusue eius alicubi iudicassent, earum litium, causarum iudicia, concessionem item & priuilegia, si cui ab ipso, vel à suis data essent, rata haberentur: neu rescindi & aboleri quicquam earum rerum villo modo licitum esset. Persolueret Duci Medicaeus quadraginta millia nummum aureorum pecuniae praesentis: Dux Medicaeo modios aliquot salis & tritici in singulos annos absque pretio villo exportationis daret. Cum haec pacis condiciones edidisset legatus, neque cuiquam esset dubium, quin res ita conuenire posset, turbauit eam spes casus primo vnus, deinde ipsius Medicaei mutata repente

repente voluntas, additis insuper stimulis eorum, qui bellum illud ciuili simillimum bello, quam patriae otium malebant. Antonius Dugnanus erat ex Medicaei affeculis carus admodum ei ob promptum ingenium ad facinora: & quia multos in vrbe consanguineos amicosque haberet, tantò pluris apud eundem fiebat. Forte hic, interea dum conditiones agitantur, ausus venire in urbem, & pro exploratore comprehensus Sfortiae iussu in vincula conijcitur. Medicaeus ob id factum percutus ira, dimissis in varia loca cum delecto equite fratribus suis, plerosque vicissim capit: è nobilitate Mediolanensi, qui nullo tali metu, velut in media pace rusticatum exierant. Ea nobilium captiuorum manu (& erant fere Principis familiares) ducta ad Montem acutum atque abstrusa ibi in latumias, ad Bentiuolum, qui pro Sfortia ipso regebat urbem illico scribit: Dugnani captiuitate se existimare bellum sibi esse indictum accipereque denuntiationem, & quo animo acciperet, eodem animo iturum esse ad arma. Caeterum ita acciperet sciretque Sfortia: siquid grauius ab eo in Dugnanum fortè consuleretur, id se etiam in captiuis suis absque mora imitari paratum fore. Denuntiatio ea repente Dugnanum soluit, sospesque ille ad Medicaeum est dimissus, & vicissim hic aperto ergastulo emisit suos. Quae dum fiunt, conticuerat omnis de pace actio, rursusque post dimissos vtrunque captiuos, resumitur eadem, deinde deferitur, rescindente scilicet Medicaeo caput illud, quod

quod de quadraginta millibus in praesentia persol-  
uendis inter conditiones erat. Resciderat autem  
abnueratque Medicaeus id pactum, obstrepentibus  
praesertim amicis, quorum ille consilio & opera  
utebatur. Namque fore aiebant, ut si ea pecu-  
niae summa res Sfortiae angustas laxaret, nol-  
let ille postea stare conuentis, atque ad ea,  
quae concessisset reuocanda subsidio illo armare-  
tur. Legatus Episcopus, ubi difficultates exoriri  
tantas, inuicemque refractarios esse Sfortiam &  
Medicaeum videt, ab utroque postulauit, ut sex  
mensium induciae essent. Sic posse mitigari animos,  
remque componi. Interea Medicaeus ab Sfortia  
factus id quietis, ad negotium aliud longe  
maximum, grauissimumque mentem  
adiiecit, si pellere ex Valletolina  
Rhaetos, idque terrarum  
adiungere sibi posset: quod bellum  
accessio  
fuit, eius quod cum Sfortia  
postea gessit, & dimi-  
catio illa hanc  
trahebat.

## IOSEPHI RIPAMONTII

## CANONICI SCALENSIS

CHRONISTAE VRBIS MEDIOLANI

HISTORIARVM AB METROPOLI CONDITA

DECADIS III

LIBER X.



Allemthelinam, cuius tractu & sinu Medicaeus hoc tempore exigere Rhaetos parabat, incolae sic dictam putant ex nominis eius castello, quod, antiquissimum in eo tractu est, & antiquitati manet honos, eaque semper munimenta instaurantur. Clariora tradunt alij Valthellinensium initia: Vulturenam Urbem in faucibus Larij lacus sitam fuisse: nomen eam, dedisse genti, Vulturenosque inde appellatos. Excurrit longitudo Vallis ab ipsis faucibus ingressuque primo, ad vsque alpium Rhaeticarum radices: colligit millia passuum sexaginta. Dimensio latitudinis incerta est, quia montium valliumque conterminarum extrema, prout cedunt aut prominent, nunc contrahunt spatia, nunc dilatant. Contermini sunt, ab Oriente, Tirolenses & Solani: à meridie Bergomates, & Camuni: Pesclauenses in Septemtrionem, Engadinique & Rhaeti miscunt sese Vulturenis: ipsi vicissim, ad occidentem,

Rrrr

Larij

Larij lacus accolas attingunt. Per mediam vallem rapido cursu fertur Abdua, cuius fons in summo Rhaeticarum alpium vertice ortus larga scaturigine tanti aluei gurgites implet. Regio vini ferax est: proueniunt etiam fata quacunque duci sulcus potuit: pascua, & glandiferi colles, id quod in alimenta incolarum deest, aegre explent. Incolae, vel alimentis contenti illis patrium solum fatigant, glebisque suis misera dulcedine perpetuò attinentur, vel peregre egressi per omnes Italiae vrbes, patientiam eandem segnioribus vrbanoꝝ humeris commodant ad ferenda onera, eaque baiulorum Respublica est. Paucae familiae celebrantur antiquitus nobiles & opulentae: reliqua egentium multitudo. Caeterum, de terra hac, vt inter valles alias, amoena, & diuite, vt inter Italiae regiones, paupere & infelici, tamquam de prouincia nobili & magna, propterea quod extremum Italiae limitem aperit clauditq; saepe dimicatum fuerat etiam aeuo simpliciore, cum nondum opportunitates, & compendia ista terrarum tam attente intelligerentur. Et postquam in Romanum imperium cessere Itali, non minima cura limiti etiam huic tuendo Caesaribus fuit. Dein ruptâ Imperij reuerentiâ, duces partium, cum turbarent certaminibus suis traherentque cuncta, Vallem thellinam simul appetuere tumultuarijs illis armis: Guelfique & Gibellini, Vicecomites & Turriani, magnis motibus initia finemue inde sumpserunt. Victis Turrianis, & exorto Vicecomitum dominatu, pars noui imperij fuit

fuit haec Vallisthellina, donec Bernabos, diuiso inter filios imperio, partem Mastino eam attribuit paulò antequàm ab Ioanne Galeatio captus extingueretur. Tunc paterni casus terrore, & dominatione patruelis profugus ad Rhaetos Mastinus Vallemthelinam eis donat. Sed ea donatio quoniam ab exule facta esset, irrita habita, depulsoq; patruo Ioannes Galeatius cùm in auitum imperium ipse successisset, ad recuperandam Vallem, & deiiciendos inde Rhaetos animum adiecit: & vario postea semper circum eas rupes euentu dimicatum obstinatis barbaris ad ea obtinenda, quae semel vsurpassent, & stimulante principes nostros, praeter verecundiam, etiam religione, si Caluini, & Lutheri soboles impura sub oculis pene dominaretur. Non Philippus Maria Ioannis Galeatij filius, non post eius mortem finitae domus fortunam Sfortia adeptus destitere actionem eam persequi armis. Post Sfortiarum inde finem dominante Hispano, inter alias imperij curas dilata res, siue infeliciter tentata est, nimiumque magno Italici nominis dedecore genus infame Lutheri Metropolitanis finibus immiscebatur simul, & ereptam eam Metropoli partem occupabat. Aetate demum nostra, cùm importunitas, & impudentia sectae impensius glisceret, essetque prouecta eò, vt Catholicas familias, quae promiscuè incolunt Vallem, ferro atque igni delere coniurauissent, id malum eaque conjuratio in capita impiorum vertit, auctore operis Gometio Ficeroa Feriae Duce Catholi-

corum exercituum imperatore , qui caesis intra paucos dies Lutheranis , & liberata regione , veterem eam patriam Catholicis tuto secureque habitandam assignauit . Inde hostium foedera , Gallici incursus , & suffecturae voluminibus alijs fraudes : dum regio horrida saxis, inclusa montibus patria infelicium baiulorum, egestatis sedes, desinentis Italiae lacuna, siue rudimentum incipientis, asperitate cautibusque suis, & ipso faucium squalore, Regum prope populorumque omnium inuidiam, arma, sollicitudines mouet, dumque trucidato, vel pulso Lutheranorum coetu, asseritur Catholicae religioni & deuoluta rursus ad impios, eorum insuper furore vastatur . Tanta cura principibus circa claustra faucesque illas : & , cum ab Catholica parte interpretatio anceps ciuilibus ingenijs data esse videatur : studiumne tantummodo religionis, an verò cum religione, opportunitatum etiam aliarum amor mouerit animos : nullam certe religionem iactare possunt , qui captata occasione ingressi illuc, nihil omisere quod impie nefarieque committi posset . Verum quaesiuisse ista & discretuisse, ne tunc quidem iuuabit, cum narrandi, atque dijudicandi talia erit locus . Caeterum Vallemthelinam hanc in quam Medicaeus hoc tempore expeditionem parabat , D. Carolus etiam postea multum diuerso conatu , tamquam Metropolitani Imperij partem recuperare contendit : mirumque dictu, Auunculus ille D. Caroli, ductor exulum, & exul ipse, profano tunc spiritu, & auditate terrarum,



terrarum, praelia ciens illa, nescius futuri, simula-  
 cra praelij sanctioris edebat, quod bellum expu-  
 gnandae impietati D. Carolus Archiepiscopus vr-  
 bis in iuga recessusque eos suo tempore illaturus  
 erat. Et profectò, non sine numine praeceffit illuc  
 Maedicaeus, vt diuinæ prouidentiae miraculum  
 ventura secula loquerentur, & aliquis ita diceret:  
 „ Interfector hominum Auunculus per saxa rupeſq;  
 „ illas cum exercitu arma & caedem exitiumque  
 „ ferens incesſit. Auunculi calcans vestigia ſororis  
 „ filius, cruce, pastoralique alloquio armatus tulit  
 „ hominibus salutem. Montosa igitur & praerupta  
 cauaque haec Italiae Germaniaeque confinia non-  
 dum tantis nobilitata casibus, ceu prouinciã ali-  
 quam inclytam amplexus toto animo Medicaeus,  
 consilia, & apparatus ad rem aggrediendam hosce  
 habebat. Videbat primùm omnium aiebatque in-  
 ter suos: si regionis eius potirentur, non modò  
 inextinguibiles fore ipsos Sfortiae armis, sed alijs  
 quoque metuendos ceu tenentes claustra prouin-  
 ciarum, arbitrosque transmittendi belli, vel ex  
 Italia in Germaniam, vel inde in Italicorum fines.  
 Et vbi semel inuasissent tenuissentque munimenta  
 illa facta naturae sponte, suffecturos aduersus  
 quamuis numerosa agmina, cum satis frugum in-  
 praesidij alimenta praeberet ager, & imminentes  
 tumuli castellorum explerent vicem, ex quibus  
 intacti ipsi propellere subeuntes possent. Sed for-  
 tasse etiam quiete ibi regnatos, magnumque  
 dictu fore, vt & terrori omnibus essent simul, &  
 cum

cum bona omnium pace regionem tenerent, neq;  
vi vlla hostili lacefferentur. Infectam esse Luteranismo Rhaetorum gentem, rebellem Apostolicae Sedis, nomini Austriaco semper infidam: & Regem Gallum, cuius praesidio gens ea nitatur posse conciliari obiectâ illecebrâ, si iter ei per suos fines ad inuadendam denuo Insubriam darent. Talia quidem ab Medicaeo sermonibus consilijsque agitantur cùm ille expeditionem in Vulturenos siue in Rhaetos pararet: expeditionis autem apparatus erat huiusmodi. Mille pedites Italici generis: nationum aliarum fere quingenti: & quotidie plures affuebant iam assueti bello, impatientesque otij, quod Sfortiâ restituto prius, deinde pactis inducijs repente exortum erat: legionem praeterea vnam ex Germania Vultheodericus Sitticus adducebat: tormenta complura minoris formae subditis apratisque totis, vt in montium etiam cacumina facillime agi possent manu: belli duces egregij: Georgius Capucianus Epirotarum equitum praefectus: Caesar Neapolitanus disciplina patris & ingenio suo multum laudatus inter bella. Tecanum quoq; nobilem Rhaetum & inter primores gentis clarum militiâ corruerat occulte deuinxeratque sibi, vt Rempub. suam in medio discrimine proderet, quod tamen postea non successit. Aderat etiam ei Catrauacca homo Hispanus tanta subtilitate ad explorandas hostium res, atque tam varias & nouas latendi artes perpetua meditatione & solertia animi assecutus, vt in alienis castris versaretur ea securitate,

ritate, qua quis domi suae ageret. Instructus ita  
Medicaeus, mittit repente Gabrielem fratrem  
cum septingentis peditibus in Vulturenos,isque  
prima irruptione Morbenium capit, captum vali-  
dis vndique sepimentis firmat, ut apertus antea  
pagus subito munitae urbis instar esset. Ea re co-  
gnita Rhaeti vario telorum genere armatos ad  
quatuordecim millia statim pago circumdedere.  
Sed agrestis & tumultuarius fere milles erat, atque  
rudis ad omnem oppugnandi artem multitudo.  
Stoliditate ingenita sese vltro ad omnia loca obij-  
ciebant, ubi promptissime vulnerari & cadere pos-  
sent. Cecidere ad quingentos: reliqui dissipati,  
valle relicta Albitana Traonam ultra flumen con-  
cessere. Tecanus in ea oppugnatione plumbeo  
missili ab gregario milite percussus frontem, occu-  
bit, cum fretus agili corporis robore, grallatoris  
instar utraque manu alte sarissam tenens, sese in-  
tra septa eiaculari voluisset. Ingemuisse eo casu  
Gabrielem ferunt, & acceptum intro corpus cum  
multis lacrimis honeste sepelisse. Inde orta suspi-  
cio prodicionis apud Rhaetos tam valida ut non-  
dum exolescat, eaque labe Tecani nomen inter  
barbaros secuta est. Partâ victoriâ, captaque in  
hunc modum Valle Medicaeus, quacunque impe-  
ritabat, supplicationes in triduum more Romano  
decreuit, ipseque iuit ad templa supplicatum, &  
omnis alius honos Deo immortalis ob incruentam  
eam expeditionem aliquandiu ad Montem acutum  
totoque Briantaeorum tractu habebatur. Parochi  
omneis,

omneis , & Clerici , & quicquid hominum sacro-  
rum in Monasterijs erat, circummissis ab Medicaeo  
edictis admonebantur , vt in suo quique templo  
populos docerent adorare Numen ob eam rem,  
quae diuino beneficio tam prospere successisset .  
Tanta erat, vel pietas & religio Medicaei in media  
curarum aliarum infania , vel confusio miseria-  
que temporum, vt profanus homo Clericis talia  
imperitaret . Edicta autem ea, ab alijs ob metum  
cum reuerentia obsequioque accipiebantur, apud  
alios irrita erant : & ille, vel quia non intellige-  
ret adspemandi causas, vel quia nollet intelligere,  
tamquam in contumaces seuerè animaduertebat .  
Quosdam & terruisse contentus intactos dimisit :  
referamque id, quod puero mihi contigit vt narrari  
audirem ab montium nostrorum antiquissimo homi-  
ne, qui spectaculo se adfuisse aiebat . Spatiabatur ad  
Montemacutum tempore matutino Medicaeus in  
area, quae ibi subiecta arci & aedibus tunc fuit :  
nunc arbuta & vites occupauere locum . Precan-  
tis more rosarium tenens, globulos illos, vti fit,  
per interualla trans mittebat : & fortasse preces  
erant . Interea lictores adducunt, sistuntque ei  
presbyteros duos, qui spreuisse edicta, neque sup-  
plicationes indictas obire voluisse dicebantur . Ste-  
terant attoniti in conspectu Principis, cùmque ille  
protinus afferri securriculum iussisset, persusi necis  
horrore conabantur vtique dicere & excusare  
nonnihil . Mox, allata securi, innuit ei, qui attule-  
rat, vt ramum illum quendam prospectui officien-  
tem

tem amputaret: dixitque presbyteris: abirent assue-  
 scerentque obedire. Caeterum, tam prope, tamq;  
 feliciter capti Vultureni erant, ut miraculi penè  
 loco, haberetur, quòd in magna hostium caede  
 victor, duos tantummodò è militibus suis, lixam,  
 verò vnum amisisset. Constiterat deinde exerci-  
 tus ad Morbenium, & maiores quotidie copias  
 submittente Medicaeo, Gabriel idem à fratre antea  
 missus pergebat constituere Vallis imperium: isque  
 Traonam, & Clauennam, & Tiranum, intra pau-  
 cos dies capta habebat eadem felicitate, qua prin-  
 cipio Morbenium ipsum cepisset. Tunc Medi-  
 cacus, aucto ad fortunae magnitudinem animò  
 non dubitavit etiam legationibus de re gesta mit-  
 tendis imitari principum morem, & ea, quae au-  
 spicijs suis, fratris ductu gesta in Vulturenis essent,  
 demonstravit Pontifici maximo per Augustum è  
 fratribus tertio loco natum, qui Romae agebat:  
 Caesari per Carraciolum Protonotarium: Senatui  
 Veneto per Leonem Arigonum: principibus Re-  
 gibusque alijs per nuntios alios, perque literas, qua-  
 rum exempla vidimus. At apud Sfortiam, inter-  
 prete Bentiuolo, simulabat, communis utilitatis  
 causa sese expeditionem eam sumpsisse in Vulture-  
 nos, & nova illa conquisitione contentum remis-  
 surum pleraque de conditionibus, & pacem quo-  
 cunque modo vellet ille, conuenturam. Vicissim  
 ab Sfortia simulabatur: quòd regione ea Rhacti  
 depellerentur, gratum sibi laetumque esse: namq;  
 fuisse Mediolani Ducum olim, nec debere ultra;

barbaris relinqui. Talia inuicem finxerant iactantque mutuo infensi, interimque Sfortia diligentissime Caesarem monuerat, de subita impressione Medicaei in Vulturenos, & quid negotij foret, si ille ibi figeret pedem. Inde cuncta statim infesta Medicaeo: subducti Hispani, quos in exercitu habebat, denuntiarumque Sittico: pro hoste ipsum fore, nisi dimitteret legionem, quam illius nomine conscripisset, ipseque maneret domi. Cum tot repente pericula Medicaeum exterruissent: hinc digrediens quotidie Caesaris iussu miles: hinc subtracta Germanica legio: simul instans ab tergo Sfortia ruptis inducijs, & maiore numero defluentes è montibus Rhaeti: pretium ei fuit reuocare Gabrielem ex Vulturenis, militesque qui cum eo erant, ne repente ibi opprimerentur. Omissis ita Vulturenis, bellum deinde aliquandiù gerebatur inter Sfortiam, & Medicaeum aequo prope Marte non sine admiratione hominum & fremitu, quia Dux Mediolani tanti terroris nomen etiam inter magnos antea Principes aduersus exsulem nunc vnum habere delectus, & emittere cogeretur ab vrbe agmina tamquam aduersus irrumpentes nouo agmine Gallos: vel certe tamquam iuncta rursus hostium etiam aliorum arma Metropoli imminerent. Pugnatum est classe primùm in Lario lacu; eoque praelio superior Medicaeus fuit: Sfortiani superstites concitatis in fugam nauibus ad Grauedonam appulere. Ibi assumpta Rhaetorum manu, cuncta fere, quae Medicaeus circa lacustrem

strem eam oram tenebat, inuaserunt, validoque  
praesidio munire Belasium, quo nomine collis in  
promontorij faciem, medio fere spatio Leucum  
inter & Mussum, imminet lacui, quà flectunt sese  
vndae Nouocomum versus. Gesta nauibus haec,  
praebente lacu aequoris vicem spatiaque classi, &  
fluctus, & quicquid etiam in pelago existere fae-  
uum atque atrox potest. At in Briantaeis terrestri  
dimicatione, non minus casuum, & periculorum,  
& caedis in vtraque parte fuit. Summa rerum ad  
Montemacutum constiterat existimante Sfortia,  
nequicquam in Larij vel Abduae ora res prospere  
gestas fore, si arce ab illa Medicaeus, hinc Oro-  
bios, hinc Briantaeos teneret. Itaque misso illuc  
exercitu, obsessa, & oppugnata, deinde capta est,  
quomodo pertinacissimas olim gentes, post om-  
nia, quae pati potest humanum corpus, cessisse  
demum necessitati litterae veterum prodidere:  
ibique ciuium Mediolanensium, quique secuti Me-  
dicaeum propugnabant arcem, quique ab Sfortia  
missi perrumpere illa rebellium munimenta nite-  
bantur, enituit prope ad miraculum, & cum hor-  
rore spectata est, siue virtus, siue quaedam ex  
virtute rabies. Criminalem quendam Medicaei  
signiferum ferunt, cum ipsius frater ad custodiam  
defensionemque propugnaculi vnus appositus ex  
vulnere cecidisset, eoque casu perteriti caeteri se-  
gnius iam repellerent scandere nitentem munimen-  
ta illa hostem, conspecto discrimine profilijse illuc  
& arrepto mortui fratris crure, proiecisse cadauer



è muro, ne tristis ea species auerteret à pugna animos, & ipsum deinde pugnasse vi tanta, truces undique circumferentem oculos, ut Sfortiani plerique adspectum ferre non possent. Idem postea captus perductusque Mediolanum, adeò commouerat animos admiratione virtutis, ut ingentium rerum promissa adhiberentur ei, si in Sfortiae militare castris, & fidus esse Principi vellet. Abnuentem dimitti iussit Sfortia, virtutem etiam in rebeli & transfuga admiratus. Crediderat enim Ioanni Baptistae Speciano praefecto rerum capitalium, qui spectatorem se fuisse aiebat tunc cum debilitatis commilitonum animis praesidioque labante ob centurionis necem, insiliens ille in muros contemptor fraterni sensus in praelij discrimine, contemptor vitae capitique sui, proijceret in medios hostes corpus exangue fratris idque strage hostium sepeliret, & undique incidentibus in ipsum telis pertinacissime tueretur locum, donec eo capto, propugnaculum simul locusque ille caperetur. Ob tantum animi robur, & quia pertinaci in Medicaeum suum fide maius constantiae specimen dederat, est dimissus. In Sfortiae exercitu penè par huic Franciscus Bernardinus Petrasancta celebrabatur. Eum quoque corpore vno multas acquantem hostium manus, & erexisse vexilla in muros, & deiecisse qui propugnabant, & scandere conantes alios manibus alleuasse suis aiebant. Montem acutum per dies aliquot oppugnatum ita atque obsessum nocturno egressu deseruere inclusi conspecto

conspecto pridie signo , quod Medicaeus ex obiecti montis vertice sublaturum sese docuerat cum discedi inde vellet . Eo nunc edito signo , desperata defensione Montis acuti vocauerat suos ad caetera tuenda , Mussum nempe & Leucum , & si qua alia ex Lario lacu , vel ex Abdua flumine spes maneret : Collatis in eam partem viribus , & reparata classe dum ab Musso Leucum nauigant , obuia circa Mandellum Sfortianorum naues fuerunt , protinusque dimicatum . In ea pugna Gabriel Medicaei frater cecidit , quo luctu ad desperationem ille ferme est prolapsus . Iuuenis erat annorum *xxii* eximia corporis specie , sed indole animi , omnique bellica arte longe praestantior , negligentiaque sui , male cinctam illam , ideoque terribilem adolescentiam Caesaris referebat . Aperto pectore , nudus crura , capite intecto , vili paruoque cibo contentus , sed quoties expedierat , in Germanorum praecipue conuiujs effusissimus citra noxam deformitatemque potator , & pecuniarum idem ad belli usum accumulator occultus , quarum latebras moriens vltimis vocibus indicauit . Huic dum ducitur funus , annuere hostes , vt induciae essent , corpusque in D. Iacobi Aedem quae supra Leucum est , militari pompa delatum : atque mortualem eam ceremoniam quieti Sfortiani spectauere e castris suis , & indoluisse multos constabat . Adeo grata fama iuuenis eius etiam apud hostes fuit . Templum postea ipsum , in quo situs ille fuerat , fratris expians manes Pius IV. auxit donis ,

donis, quae ad salutem animorum fructumque vitae alterius indulgere maxima & amplissima mos est Apostolicae Sedi. Medicaeus, vbi fratri dederat inferias, magno insuper aliquo Sfortianorum damno, sanguineque hostili parentare eidem volens simul, & obsidione eximere Leucenses, nocte, quam sacer Virgini Martyrique Barbarae dies sequebatur, assumptis è suorum numero nonaginta duobus, quorum virtuti maxime confidebat, monitisque eis, vt alba tegmina singuli, pallio superiniecto atro assumerent, inuocata Martyris ope, cuius peruigilio rem gesturus erat, feliciter hostium munimenta transgressus, alios somno demersos obtruncat: semisopitos attonitosq; alios, & aegre molienteis arma prostermit ipse interim cum sua palliata acie intactus. Stricto deinde ferro sicuti ibat, per media hostium castra sibi aperiens viam, peruenit in tribuni militum tentorium, ibique hominem reperit agentem impudice noctem eam ob amorem agrestis feminae, quam viro abductam, trahebat secum habebatque coniugali licentia. Exterruit tumultuoso ingressu tribunum simul & scortum, cumque verbis increpans insuper adiecit: siccine Sfortiae negotium geritur? iniecit vincula tribuno, captiuumque abduxit. Alexander quidam is erat Mantuanus, qui magno postea pretio redemptus à suis, ob dedecus abiit domum, neque Mediolani amplius fuit. Sic nocte illa Medicaeus parentauerat fratri, solueratque prope obsidionem, & pari deinde per dies aliquot fortuna

tuna fere potiebatur iterum lacu. Gabrielis Cerebelloni virtutem inter eas expeditiones plurimum enituisse ferunt, cum penè puer adhuc ille esset. Affine genus ei cum Medicaeo, atque propinquus ab materna origine sanguis erat: & vtriusque fortunae socius consobrinus iste, alumnusque eius in re militari, debuit etiam eidem ad famam praekonijque virtutis harum literarum testificatione coniungi. Fugerat vnà cum eo Gallicas indignitates, miseriaeque vrbs, & ipsam deformatam tam captiuitate vrhem. Vnà carus acceptusque Principi: rebellis & fugitiuus vnà: calamitarum expeditionumque omnium comes: & simul atque per aetatem potens armorum esse coeperat, nihil sine eo Medicaeus gessit. Securis postea temporibus, cum regente Vrhem Vasthio Medicaeus ob suspensiones exortas in Iouis arce detineretur, penetravit illuc alieno habitu, custodibus elusis, & salutis viam consobriño ostendit. Rursus, postquam, mutata in melius fortuna, blandimenta in Medicaeum omnia ab Hispano regnante conquirebantur: particeps item eius mutatae sortis fuit: ac vicissim ipse quacunque in parte Hispana arma essent, ceu praesidium aliquod singulare expectitus, praefuit militiae muneribus, quae illa regnantium natio relinquere apud Italum hominem posset. Tunetanum quoque Regnum pro Rege administrare iussus, & tota mox ingruente barbaria circumuentus, luit captiuitate illa tamquam flagitium inter Hispanos, quia imperitare ausus fuisset.

Sed

Sed vir tantus , & tanta fortunæ varietate confli-  
ctatus , in ætatis rudimento hoc tempore erat ea  
apud consobrinum opinione prudentiæ , vt quo-  
tiescunque grauius aliquod discrimen aditurus iste  
esset , relinqueret ei obsignata consilia & mandata ,  
quid geri tentarique oporteret si casu fortè aliquo  
ipse fuisset interceptus : atque noctè præsertim illa  
cùm plena hostium castra numero exiguo aggrede-  
retur , docuerat secreto colloquio adolescentem ,  
quàm insistere deberet spei salutisque viam , si capi ;  
vel perire ipsum contigisset . Caeterum , post eius  
nocturnæ irruptionis euentum , post alia etiam  
prosperè à Medicaeo gesta , post amissi fratris cla-  
dem , Episcopus ille Vercellensis , quem à Sabau-  
diæ Duce legatum in urbem de pace venisse me-  
moraui , prospiciens , hinc labantem Sfortiæ vitam  
imbellemque animum , & apud eum aptiora cun-  
cta paci quàm bello , hinc apud Medicaeum res in-  
certas & in lubrico fortunam , & fractos Gabrielis  
nece spiritus , funestamque domum , sperauerat in  
ea rerum & animorum inclinatione rem ipsam  
posse confici cuius causa missus ipse esset : neque  
spes eum fefelit . Repetita actione , & iactatis ite-  
rum conditionibus , pax denique conuenit inter  
Franciscum Sfortiam Mediolani Ducem , & Iaco-  
bum Medicaeum gladiatorem primò , deinde exu-  
lem , postremò , hostem ac prope debellatorem ,  
Principis sui , & facta pace , post illius mortem in  
nouo dominatu fidum Regi & carum . Summa  
conditionum hæc fuit adductis ad æquitatem capi-  
tibus ,

tibus, quae Medicaeum antea propè aequando  
fortunae Principis, vt iniqua & indecora offende-  
rant animos remque turbarant. Nunc erant ho-  
nestiora omnia, discrimenque agnoscebatur inter  
eum qui veniam dabat, & eum, cui venia fuerat  
opus. Omitteret Medicaeus cuncta quae occupas-  
set, Mussum & Leucum, loca alia omnia, terras  
omneis: instrumenta quoque belli, tormenta, na-  
ues, sulphurei pulueris copiam, pilas, & quicquid  
frumenti siue salis haberet. Persolueret Sfortia  
Medicaeo quadraginta millia nummum aureorum,  
mille annuos assignaret: Meliniani Demarchum,  
appellaret ipsum posterosque eius: fratribus Me-  
dicaeis, & omnibus, qui partes secuti eas fuissent,  
reditus in patriam daretur: venia obliuioque pra-  
etitorum esset. Haec ita conuenerant. Sed ma-  
luit Medicaeus relictâ patriâ conferre sese ad Sa-  
baudiae Ducem, quàm in eius imperio viuere cui  
rebellis fuisset: abiitque cum fratribus suis, datis  
etiam ab Sfortia militibus, qui ad extremos vsque  
prouinciae fines praesidio simul & ornamento es-  
sent. Sfortia deinde ipse moritur facto testamen-  
to, quo Caesari legabat imperium: & missa in  
regiam legatione Mediolanenses, sese urbemque  
ei, & sua omnia illico permiscere petentes simul vt  
quanta fide & alacritate ipsi venirent in ditionem  
imperiumque eius, tanta clementia, & benignitate  
Regum maximus ciuitatem populumque & Eccle-  
siam Italiae maximam suscipere ac tueri semper  
vellet. Principes legationis fuere, Maximilianus

Stampa, & Philippus Archintus, de quo postea Archiepiscopo Urbis alibi dictum est, caeteraque de irrito eius Pontificatu, postea, sicuti succedere, tradentur. Tam gratae, & rebus opportuna suis legationi respondit Caesar omnia, quae renuntiata Mediolanum gratissima esse ciuibus possent. Agnoscere se Mediolanensium suorum obsequium & plenam fidei voluntatem: agnoscere quod temporum culpa accidissent quaecunque essent vitio data ciuitati generosae, populoque nobili & graui. Quoniam ea sua opinio de Metropoli esset, re etiam ipsa effecturum, vt omneis intelligerent, nullam in imperio suo gentem esse, quam in pretio & caritate maiore haberet. Eius suae voluntatis animique pignus id referrent domum, quod omneis magistratus, omnia iura, quae Mediolanenses antiquitus tenuissent, tenere etiam imposte- rum iuberet, formamque & leges manere ciuitati, quibus legibus fundata olim per tot saecula florens incolumisque stetisset. Haec in commune legatis responderat Caesar: Archinto deinde separatim, dixit, velle se opera eius vti: proinde ex aula ne discederet. Simul consiliarium suum eum creat: muneri tituloque huic conuenientem & decorum in aula locum assignat. Fuit deinde apud Caesarem in eo munere Archintus, donec Pauli III. Pontificatu de re maxima & grauissima missus Romam & Pontifici illi probatus, inuitatione hortatuque eius ad Ecclesiasticam vitam adiecit animum: idque principium ei honorum fuit, vnde per gra-  
dus



ad Patriae Pontificatum peruenturus erat ,  
vt in honoris denique eius aditu prope exul  
cum ciuium dolore extingueretur . Nunc fausta  
ei secundaque cuncta erant : flagrans apud  
Pontificem Maximum cognitae virtuti dexterit-  
atque honos : quodque maximum cognitae  
virtuti dexteritaeque honos : quodque maximum  
omnium fuit ; in Caesaris aula , inter Hispanos ,  
homini Mediolanensi , nulla interim maluolentia ,  
quae praesenti , vel absenti , palam , siue occulte  
noceret . Id namque demonstrauere Caesaris tes-  
timonia de ipso : & inuitus ab se hominem dimisit ,  
ne Pontifici negaret , cuius demerendi occasiones  
omneis tunc vltro etiam conquirerentur . Peraeta  
Romana ea legatione , cum Archintus reditum ad  
Caesarem pararet , appellat eum benigne Pontifex  
Paulus , quod bona Caesaris venia facere queat ,  
vt Romae esse deinceps velit , ac sperare ibi prae-  
mia , quae virtuti nunquam defuerint apud  
Apostolicam Sedem : honeste sentire se de eo ,  
nec dubitare quin ipsius opera publicis Ecclesiae  
rebus utilis esse possit . Ille praefatus pauca de eo  
quanti tale de se iudicium Pontificis faceret , excu-  
sata Caesaris maiestate , dimittitur in praesentia  
quidem & Caesari impigre nauare operam iube-  
tur . Sed paulo post , dum renuntiata legatione ,  
alia deinceps , atque alia Caesaris mandata exse-  
quitur , adfuere Pontificis literae , quae Apostoli-  
cae Sedi hominem concedi eum postulabant , lit-  
terisque eis acceptis Caesar haecenus dubitauit , vt

Archinti voluntatem super ea re exquireret . Postquam is nihil arbitrij sui esse , nutusque heriles fore sibi pro imperio simul & pro voluntate aiebat , hortatio Caesaris est insecuta , Romam vti proficisceretur : sic Pontifici Maximo placitum esse : eius auctoritate se quoque commotum annuisse , vt viro egregio fidoque ministro careret . Ab eo colloquio Archintus Romanae profectioni sese accingebat . Sed antequam ex aula abiret , retulit ad Caesarem in supremo concilio , sanctioreque Senatu de lite Montisferrati , quae per eos dies magnis agitata contentionibus , & ad bellum prope deducta , Caesaris arbitrio componebatur : isque Archinto mandauerat , vt cognitis causae momentis , rei statum & sententiam suam exponeret , quod promptius aequa , & iniqua discernerentur . Cum enim Bonifacius Montisferrati Marchio , & Ioannes Georgius eius patruus , ille lapsu & consternatione equi , hic morbo absumptus , vterque sine vlla liberum stirpe decessissent : treis simul exorti , Sabaudus , & Mantuanus , & Salutiensis hereditatem adire volebant eam : & sua iura singulis erant , singulos armabat spes & fiducia praesidij alieni , cum instinctu & fauore potentiorum vnusquisque niteretur . De ea controuersia exposuit Archintus apud Caesarem & Selectos , quicquid inspecto successionum & gentilitatis iure , originibusque examinatis , ad iudicij eius aequitatem pertinere statuisset . Romam deinde proficiscitur , & parato statim ad sacros honores aditu , Protonotarium

Aposto-

Apostolicum Pontifex Maximus eum creat, non ex centum millibus illis, qui pretio definito paruoque acre nulli denegata vocabula emunt, sed ex nobilioribus inclytisque septem, qui iam inde à Clemente Primo, scribendis Martyrum casibus instituti, in tantam postea dignationem peruenere, vt Episcoporum dignitati antestarent, donec à Pontifice Pio, modus imponeretur. Mansit tamen honos vetustae origini, & ampla emolumenta titulum sequuntur, ac patrum nostrorum memoria Pius IV. cum D. Carolum sororis filium adiuuere sibi & summis Ecclesiae rebus vellet, initia tantae spei ab rudimento hoc sumpsit Protonotariumque creauit eum vnum è septem. In eundem nunc ordinem numerumque Archintus ipso Pontificiae familiaritatis initio ascitus, per vestigia illa D. Caroli ad Patriae Pontificatum ingrediebatur. Paulò postea, Praefectus Urbis ab eodem Pontifice est factus: eamque praefecturam ita gessit, vt seueritatis, & innocentiae eius pleraque exempla magistratum eundem inituri perhorrescerent, donec, sicuti caetera mortalium, ex fama praedicationeque communi exoleuere. Sed & come ei inter facetos humanae vitae casus fuisse ingenium memorant: atque inter caetera tale quiddam narratur ex Romana illa praefectura litteris mandatum ab ijs, quibus custodire ista curae fuit. Peregrini duo homines in vrbe, Hispanus quidem alter, alter vero Germanus, cum eidem mulieri assueuissent, eaque neutrius fortasse satum peperisset, quod natum

tum erat, ambo vindicabant sibi, & eius incertae prolis vterque dici sese parentem volebat. Cum cedere inuicem nollent, ad praefectum Urbis in ius iere, ut alterutri partum ille adiudicaret. Archintus scorto interrogato, mensibusque computatis, nihil tamen ad eius iudicii veritatem aliquandiu extricabat. Demum circa patriam eorum, qui prolem sibi eam asserere vellent, callide, philosophatus, rationem inijt, qua naturam quodammodo ipsam interrogaret. Relictus ob eam litem in materno tecto infans iam pede certo signabat humum, poteratque voces & nutus intelligere quosdam elementa quotidiani sermonis. Hunc in conspectum suum produci iubet. Vbi adfuit, mandari fassamenta nonnulla puerulo, atque sic irritata siti, procula duo admouentur, ut tam ex vini, quam ex aquae capedine bibere posset. Ille, contracto ad Bacchi liquores vultu, vinumque adspersatus auide lambebat aquam. Tunc vero Germanus (aderat enim vterque litigator) sublato incondito clamore negat vltro suam esse prolem, atque is controuersiae exitus fuit. Seueriore mox alia subtilitate nobilitata est praefectura illa Archinti, de qua item, sicuti accepi, referam. Iuuat enim memorare ista, ut quoniam erepto nobis per hominum iniurias interceptoque tali Pontifice, fructus simul animi ingenijque eius periere vbi Ecclesiaeque huic: quales futuri fuerint saltem ex antea facta ipsius vita rebusque apud alios gestis, notitia aliqua extet. Vir princeps Romae testam-

mentum

mentum in haec verba fecerat. Ex duobus gentilibus meis, Lucio & Caio, vter eorum maior natus erit, mihi ex asse heres esto. Cum autem essent listi Lucius & Caius eodem die nati, alterquidem Viennae in Germania, alter verò Cordubae in Hispania: inde lites & vt in magna hereditate, tota causidicorum rabularumque turba occupata, concursationibus, & iurgiis, & quaestu: princepsque ipsi vrbis, studio & fauore in hunc aut illum rabulis & causidicis tumultuose immiscebantur; neque contentioni finis erat. Archintus, vt totam Mathematicorum artem iam inde ab adolescentia egregie percalluerat, ab scientia studioque illo petiit argumenta dijudicandae liti, quam nulla Iurisperitorum responsa dijudicare potuissent. Inspecta namq; positione coeli plagarum exortiuoque puncto, qua in parte sol prius oriretur, in ea natum hominem, maiorem esse natu demonstrauit, quàm qui eodem die in parte altera natus diei lumen posterior vsurpasset. Subtilis & vera ratio visa iudicibus est, atque testatoris voluntati ita satisfactum. Crescente deinde quotidie magis fama Archinti huius, Sacerdotijs amplis ornauit eum, Pontifex Maximus & Sancti Sepulchri in Etruria Episcopum fecit: nec idèò tamen ex vrbe dimittebatur: credo, quia magnis Ecclesiae negotijs fieret, magnisque necessitatibus, vt nota iam prudentia viri magnaeque virtutes honestandae simul & retinendae in aula essent. Ad consilia negotiaq; omnia adhibebatur, & grauissimi cuiusque consilij

author

author ipse erat. Is Pontifici suavit, vt Carolum  
Caesarem & Regem Franciscum Nicaeam ad spem  
pacis exciret : cum Pontifice illuc est profectus :  
atque in agitando ibi pace, tum ab Regibus ad  
Pontificem, tum à Pontifice ad reges conuicasse  
quotidie Archintum constat. Vt verò ab irrita illa  
actione Nicaenoque congressu reditum est Romam  
Camerinatenſi expeditione legatus exercitui datus,  
ſapientia & authoritate recepit urbem maiore  
gloria quàm ſi acie dimicatum foret. Tum Vicarius  
Pontificis creatur, & pro Eccleſia priore quam obti-  
nuerat, Salutiensẽm ampliorem adeptus, id quoq;  
quo nihil dare Pontifices auguſtius poſſunt, acceptu-  
rus erat, niſi Paulum vita repente deſtituiſſet. Ab  
Iulio III. ſucceſſore Pauli miſſus Venetias Archintus,  
quomodo ex ea legatione ad Mediolanenſis Eccle-  
ſiae Pontificatum arcitus fuerit, poſtea demonſtra-  
bo. Nunc hoſce Archinti progreſſus interiectis alijs  
Patriae caſibus temporibusque diſiunctos coniunxi  
vno narrationis tractu, vt expeditiora mihi ad nar-  
randum cuncta eſſent, quae Mediolanũ euenire,  
poſtquam, Sfortia mortuo, Carolus Caſar im-  
perium urbis tenuerat. Namque ad primos de  
Sfortiae obitu nuntios ſimul & rumores, ſicuti  
Caſar inuadendae urbi erexerat ſua ſponte ani-  
mum, & accepta dein Mediolanenſium ipſorum  
legatione, tantò promptius incubuerat in cam-  
pũ adieratque poſſeſſionem imperij huius : ita Re-  
gem Franciſcum Galloſque proceres, vetus &  
toties infelix, & nunquam ſatis punita libido lym-  
phaucrat

phauerat ea spe, cuius temeritatem, Italiae terris abominata gens, & cladibus semper, & ignominijs luisset. Itaque stimulis nunc acti iisdem, aggredendam esse Metropolim fremebant. Actum tamen cum modestia & ratione nonnihil: missoque Mediolanum caduceatore Rex Franciscus, dedi sibi urbem postulauit antequam ab domo exercitum moueret. Verum, vbi Senatus populusque Mediolanensis, contempta postulati eius leuitate, Austriaca vexilla Caesarisque nomen locis omnibus attollebant, & eo imperio laeta ciuitas, quasi libertatem adepta gestiebat: rei eius inuidia frementes in Hispanum Galli rursus armantur: bellumque nouum inde exortum est, quod per vintiquinque annos varia fortuna exercuit Reges: ducenta millia mortalium absumpsit: maria terraeque infecit caedibus, & urbem, de qua dimicabatur, intactam reliquit. Non enim fuerat animus & audacia Gallis, per vestigia cruenta maiorum, suorum tendere in Insubres: sed omissa Metropoli, campisque circa eam, qui sepulcra semper suae gentis fuissent, incurſauere Subalpinos, quia Dux ille Caesaris sororem in matrimonio haberet, eiusque praesidio niteretur, laedi sic oppugnarique Caesarem existimantes, & Metropolitano quoque bello viam tutius ita aperiri. Caesar vicissim cum infesto exercitu transgressus est in Galliam: atque vt ad id bellum vteretur terrae eius milite, quae causa belli erat, asciuit legiones ex agro Mediolanensi: primoresque vrbis & ex reliqua nobilitate

Vuuu

clarissimum



clarissimum quemque militiâ, duces esse legionibus;  
ac secum ire voluit, siue vt obsides publicae  
fidei illos haberet: siue vt spectatam iam satis co-  
gnitamque fidem ea vicissim animi sui significatione  
complecteretur. In eo Gallico bello Antonius  
Leua moritur absumptus mœrore ob rem ibi ma-  
le gestam: eiusque corpus, amici, quibus ipse  
mandauerat, deportauere Mediolanum, & in D.  
Dionysij Aede, quam ab eo exstructam fuisse dixi-  
mus, splendide sepelierunt. Imperium atque po-  
testatem, quam ille Mediolani habuerat, diuidi  
melius visum: diuisaque est ita, vt exercitus, &  
arma, & res tota militaris Alphonso Daualo, quem  
Vasthium dixerunt, traderetur: vrbs & prouinciae  
gubernacula penes Carraciolum Cardinalem essent.  
Carraciolus hic ille erat, qui sub Protonotarij no-  
mine fidus Caesari saepe etiam antea in parte re-  
rum & historiae huius fuit. Nunc Caesaris com-  
mendatione ac beneficio sacrum latum clauum  
adeptus, atque ob id beneficium auctâ apud di-  
gnitatis & fortunae suae authorem gratiâ, idoneus  
habitus erat, cui nouae prouinciae securitas &  
magnitudo in tanto rerum discrimine niteretur.  
Primam Caesari coronam ad Aquas Grani impo-  
suerat: legationes obierat: & à Paulo III. fuerat in  
Patres, Caesare, sicut dixi, producente cooptatus.  
Ita de eo perhibet ad dextram Templi maximi par-  
tem iuxta sacrarium tabula subiecta, vel potius in-  
stita monumento, quod posuit Cardinali Ioannes  
Baptista frater ex atro marmore cuius fulgor, atq;  
coagmen-

coagnientatio, naturae illud, hoc artis opus, detinet elegantia, & maiestate homines etiam, vel spectandi tantum causa ingressos templum, vel iam operum ibi aliorum admiratione fatiatos. Non enim tumultus ille res est una, quae alliciat oculos sed saxa speculi vicem praebent: color micat ater: & prope inaedificatum parieti templum aliud cernitur, ut contrariorum quasi mixtura possit esse spectaculo, si nihil aliud in artificij magnitudine spectabile admirandumue esset. Tum vero intentum operis descriptioni artificioque spectatorem, gloria statuarum auertit. Hinc parens urbis Ambrosius, hinc Hieronymus stant iuxta defunctum velut argumento literarum, & sacrae doctrinae, quae Cardinalem deceret: superne principes Apostolorum velut Ecclesiae propugnatori praesidium vicissim opemque pollicentur: ipse protenso supra cenotaphium corpore, in abolla & infula cubito leuat caput ad instar fere dormitantis. Haec ex candido marmore simulacra moles illa nigra & funesta attollit, quae intuentes eruditi, caetera parum mirantur, & unum istud quaerunt: quomodo potuerit pecunia artifices inuenire tam praeclaros. Sed me prope pudet admiratum esse ista, quasi putrescere cum pompa, & fastu, gloriosam esse rem & historia dignam putarim. Carraciolo hoc tenente urbem, Vasthio rem militarem administrante, Medicaeus una cum fratre suo Ioanne Baptista, Mediolanum redierat, velut in nouo imperio, spem gratiamque nouam ibi sua in patria

libere secuturus : & rediens in Hispaniam Caesar ,  
benigne ipsum allocutus esse ferebatur . Agitasset  
ne adhuc ille turbulenta aliqua consilia , rebusque  
notis impatiens aequi studuisset , an verò , quietum  
iam , experiendoque fatigatum , aliena inquietudo ,  
malitiaue , & liuor , & falsae fortasse suspiciones  
in periculum adduxerint , incertum fuit . Vasthius  
certe perniciem ei machinabatur , & hominis absq;  
tumultu comprehendendi rationem inierat hanc , si  
deliquerat ille , solertem & grauem , si immerito  
circumueniebatur , indignam atque perfidiosam .  
Natalitia Christi aderant , quorum dierum gratula-  
tione mittunt inuicem xenia ciues , mutuoque inui-  
tatu exhilarantur . Vasthius iam antea communi-  
catis cum Cardinale gubernante suspicionibus de  
Medicaeo suis , ita cum eo composuit rem , vt ipso  
Protomartyris die , seque & Medicaeos fratres , &  
aliam praeterea amicorum manum in Aulam ille  
inuitaret . Posse ita sub vesperam conuiuio egre-  
dientes , circumfusa repente Praetoria cohorte  
comprehendi duci in arcem : factumque ita est ,  
& sesquianni deinde spatio Medicaei in vinculis  
fuere , donec interrogati & absoluti , vadibus tamen  
datis Caesaris iussu dimitterentur . Sunt autem di-  
missi multum concursante Protonotario , qui de  
fratrum capite sollicitus , & apud Nicaeam Caesari  
supplex abstulit ab eo literas , quae Vasthio red-  
ditae , fuere eis saluti , cum alio quodam modo di-  
mittere eos hic pararet . Sed & alij plurimum so-  
liciti fuerant , ne Medicaeis capita detruncarentur :  
mirumque

mirumque videri potuit, quòd ad eripiendos periculo eos exarsere principum etiam studia, quorum intererat sanciri exempla aduersus rebelles: & prope Hispanorum inter ipsos pugna erat, de puniendis Medicaeis, aut dimittendis. Aluarus Luna praefectus arcis, Mediolani apud Vasthium: & Granuelanus in Hispania causam eorum mirifice egerunt. Simul ex Germania, Rex Romanorum, adiuuante Sittico deprecator fuit. Neque dignatus est Florentiae Dux Alexander, cum super ea re litteras ad Vasthium scriberet, consanguineum suum appellare Medicaeum hunc: & gloriam inde petisse videbatur. Amici quidem & propinqui, periclitante Medicaeo, velut socij discriminis ita laborabant: ipse verò nihil vnquam interea dixit nisi bellatore spiritu: nec vlla commendatio cuiusquam, vllumue testimonium perinde valuit ad innocentiae fidem, quàm contumacia silentiumque ipsius. Rupit quin etiam minaciter fere vocem aduersus Vasthium ipsum tunc cum dimissus ex eius conspectu abiret. Namque monente Vasthio in digressu, vt honeste deinceps integreque ageret, honoratum se virum esse respondit, & ei qui aliter sentiret, gladio probaturum. De captiuitate Medicaei fratrumque ita accepimus non tamen omittenda varietate, quae memoriam adeò recentem labefecit. Nam Gabrielem Cerbellonum eadem coniuiali fraude circumuentum, & in eadem vincula abductum aliquis tradit: vult alius, eaque sententia verior est: non fuisse Gabrielem in arce captium:

captiuum: sed vt antea memorauimus, caritate desiderioque Consobrinorum, deceptis custodijs fugae artes ad eos introtulisse repudiatas ipsis eodem spiritu, quo vincula crimenque contemnebant. Voluerant enim, aut mori illic, aut cum gloria fama exire hac, vt falsi criminis inuidia onerati, & Caesaris sententia ipsius absoluti fuisse dicerentur. Caeterum, cum dimissi, vadimonio interposito essent, iam Cardinalis Carraciolus provinciae administrator diem suum obierat humili accepto tumulto, dum illa, quae visitur hodie quaeue dicta est, sepulcri moles in templo maximo excitatur. Successerat ei Vasthius idem, qui militare antea imperium tenebat, & cum in eo munere, nullus ei successor à Caesare mitteretur, exercitum simul provinciamque habebat, quae ante Cardinalis obitum diuisa inter duos fuere. Fuit Vasthius moribus optimis, animo excelsus, prodigus opum suarum, sed minime rapax alieni, neque malam ullam prioris Dauali similitudinem in eo reperires, cum familia genusque idem esset. Nec abfuere belli artes quascunque seniori illi tribuit fama. Studiofus insuper artium bonarum, & vbi quid persuadere vellet, veterum ducum facundiae par habitus. Iam simplicitas ei tanta, candorq; animi tantus, vt Medicaco ipso, post captiuitatem de qua demostrauimus familiarissime vteretur, & rebus deinde aduersis sollicitudines cum eo suas, velut cum amicissimo homine communicaret. Oblitum quippe putabat eum praeteritae suae calamitatis & periculi, perinde

perinde atque oblitus ipse erat criminationum, quae non aliter quàm coniectis in vincula reis dissolui potuissent, eoque necessitate & arte fuisset usus. Sed Medicaeus alte condiderat animo memoriam eius facti, ridebatque amarum, tacitusque & infensus ex colloctionibus arripiebat illis omnia, quae pro crimine vicissim obijcere aliquando ei apud Caesarem posset: ac tanto plura ille quasi apud amicum quotidie effundebat. His moribus, & hac innocentia magnitudineque animi praeditus Vasthius cùm ad prouinciae gubernacula admotus fuisset, cunctaque Mediolanensium ei vni obedirent res etiam Ecclesiastica sub tali principe tantum spiritus & incrementi recipiebat, quanta erant damna, quantusue moeror ex diuturno Pastoris desiderio, qui per tot iam annos assidue absens tenebat Ambrosiana vectigalia & fundos: operam vicissim Ecclesiae nullam impendebat. Mox etiam Vasthium, res aduersae ac turbulenta occupauere primò. deinde abduxere: moerore demum senioque confectum eripuerunt Caesari simul, & nobis, Ecclesiae pariter & ciuitati: eademque mala, non tam Vasthij quam ciuitatis & Reipub. huius fuere, penè vt ad pristina calamitatum humanarum exempla redigeremur. Initium ortum ab Hispanis legionibus, quae apud Subalpinos oppositae Gallo, pro Caesare simul & Sabaudiae Duce rem gerebant. Is miles, ob non persoluta mensium aliquot stipendia, palam exsuerat obsequium: & praefectos, manipuli, vel centuriae quaeque suos adspernatae relictis



relictis castris, aliae statim, aliae exemplum secutae, simul omnes ceu exercitus aliquis hostium, Metropoli circumfunduntur, & vastatis agris, qui circa urbem sunt, Urbi ipsi minitabantur. Vastius & promissis, & denuntiatione Caesaris irarum, conatus mitigare vel compescere eos, ubi frustra esse cuncta, gliscereque in singula momenta seditionem videt, irruptionis metu armat ciues: in singulas urbis regiones praesidia stationesque disponit. Ipse cum praetorijs cohortibus idoneaque alia manu, campum iuxta D. Eustorgij Aedem capit, ut ad omnes obire subitos motus queat. Ad Sanctae Crucis Aedem, ubi tecta tunc Humiliatorum fuere, conterminaque Eustorgianis regio est, stationem Cremonensium habebat. Ibi in vicino, quae Turris Imperatoris dicitur, statio alia Germanorum erat. Connexae ita & armatae cohortes ad nutum intentae ducis expectabant quam mox signum daretur, vel erumpendi in rebelleis Hispanos, vel obuiam eundi per urbis vias, si irrumperere illi ausi essent. Sed cum Hispani contenti populatione agrorum, quacunque auocasset eos praedae spes, vagarentur, neque uspiam consisterent, & otiosa ideo statim miles urbanus haberet, coepere, ut inter otiosos, & truces, & diuersi generis, & vicinos, militares ioci primum, dein iurgia contumeliaeque verborum oriri: demum ad manus quoque deueniebatur. Germani interea, qui ad turrim Imperatoris positi erant, Cremonensem forte vnum longius ab suorum globo digressum interfecere



fecere. Cremonenses vicissim ab Sanctae Crucis Aede vadunt agmine ad turrim eam Imperatoris ibique compotantes nacti Germanos, arripiunt ex temulenta illa statione treis quatuorue, & quæ tigillum, arbusculaue fortè vna inuitarat, illic in vicino suspendunt. Praelia inde quotidiana inter ipsos, & ex praelijs licentia in urbem, vt armatae manus ad direptionem vsque sacrarum rerum proterue grassarentur. Id malum Vasthio sedauit alio malo, centum millia nummum aureorum exhaustae tot iniurijs ciuitati cum imperasset. Angebantur ciues grauitate tributi: sed metus ex rebellium incursum, & damna defensionis grauiora erant. Legiones, acceptâ pecuniâ quieuerunt & abierunt quò poena seditionis eas manebat. Poenae nunc miseriaeque omnes in populum Mediolanensem expetebant: & misso ad Caesarem Ioanni Baptistae Archinto super calamitatibus vrbis triste responsum datum. Nolebant aulici vera esse quae de legionum Hispanarum scelere ille attulisset. Granuelanus praecipuè infestus fuisse legationi, & Archintum, vt liberius acerbiusque inuectum increpuisse dicebatur. Deinde, nimis etiam modeste peroratum esse cognouerunt: & in legiones eas Romano more animaduersum, decimi cuiusque supplicio siue expositis apud desertas insulas plurimis, vt illuue fameque & miserabili exitu caeteris exemplum praeberent. Militaris ea seditio casusque Vasthio calamitatis initium fuit, vt post aliud deinde infortunium, ex magna florentique fortuna, ini-

micorum quasi manu ad exitum vitae raperetur. Namque, cum nullum ex ipsius vita crimen arripere possent, fortuita criminantes, alienaque etiam flagitia vitio dantes ei, Caesaris aures animumque implebant, vnde diminuta gratia, & ex eo moeror quem ferre non potuit. Ac Medicacus inter caeteros toruo semper animo reuoluens veteris offensae memoriam seponebat accurate cuncta quae ad inimicum euertendum possent vsui esse, ac minime Longobarda Mediolanensique arte fingens amica verba & vultum, instinator & minister aduersae factionis ipse erat: accideratque opportune ei ad exercenda odia in absentem, vt Gandauensium, rebellionis causa transgresso in Belgium Caesarem, illuc euocaretur. Caesar inde compositis Gandauensium rebus, Genuam proficiscens, vt inde in Africam traiceret, ex itinere venit Mediolanum; pertinetque ad Urbis, & Reipubl. gloriam, narrari, qua ille, ciuium, & Populi totius gratulatione acceptus Metropolim vicissim exhilarauerit, ac tantae maiestatis adspectu ex omnium animis tot praeterita mala delerit. Per Tridentinas alpes in Veronensem agrum descenderat, tanto statim illuc principum Itatorum concursu, quanta magnitudo nominis eius, & quam insueta res Italiae terris Caesar. Vasthius ad Dulcium, vsque progressus bis mille & quingentos equites ab Mediolano eduxerat secum, omnesque iuxta viam, qua intrandum Caesari erat, disposuerat ordine in subiectis pratis, vt sicut exculti ad certamen

tamen ornatique stabant, ingredienti apparerent. Nobilissimi Mediolanensium erant vnà cum statuiis turbis, quae ad prouinciae praesidium perpetuo aluntur: eorumque adspectu laetus admodum, Caesar dixisse ferebatur, & equos, & equites dignos esse fama vrbis. Dimisso inde equitatu alio, qui ipsum ex Belgio secutus erat, itemque dimissis principibus & legatis, qui ad primos Italiae fines occurrerant, cum Octauio Farnesio genero suo, & Cardinale Mantuano pergebat venire Mediolanum versus. Vrbs, tum copia artificum, tum ciuium ingenijs haud vnquam secunda populo gentiue vlli, ad Caesarem accipiendum exulta in hunc modum fuit. Statim ab Portae Romanae ingressu porta triumphalis attollebatur, adstructo ad ascensum ponte, statuis ab vtroque latere erectis, quae totidem subiectas Metrópoli vrbes referebant: & dispositae eae sic fuerunt. Ad dexteram, in parte pontis ima, primoque aditu, Derthona stabat ferens humeris Apenninum, scilicet, quia ad montis radices posita vrbs ea vltima Insuabrum est. Hanc, sicuti caeteras, basis quadrata & lata sustinebat: altitudo singulis decem cubitorum fuit: è gypso erant, sed auro superinducto spargebant late fulgorem. In proxima basi, discreta iusto interuallo vrbs Nouocomum praegrandi Larium suum fundebat vnà cum piscium prouentu quos lacus alit. Inde Ticinum urbem inclytam studijs literarum, & amoenitate coeli referebat statua incundi oris onusta voluminibus. Metropolis

ipsa iuxta arcum altiore loco, ceu propugnatrix, & Regina caeterarum, induta thoracem, altero calcans pede galeam, altera tenens manu clauēs vrbis, & sceptrum, & diadema coronando Caesari, manu monstrabat altera subiectas vrbes nouo ingredienti domino tamquam commendaret. Posita haec simulacra ad dexteram fuere in spondis, quae per totam pontis longitudinem ab vtroque latere praefixae cancellis excurrerant. Ad laeuam oppositae illis, Alexandria, & Nouaria, & Laus Pompeia, & Cremona steterē singulae suo habitu, qui cultusque diuitias, ingeniumue & originem indicaret. Turritum Cremonae caput: Alexandriae tempora & frontem spicca corona cingebat: Laus Pompeia redimita Pampineo serpo tumentia vbera lacte ostendebat: & Nouariam ara pateraeque, & acerrae, & sacrificalis omnis apparatus decorabat; propterea quod ea Noua Ara antiquitas dicta est. Inter harum vrbium simulacra pons ducebat ad arcum, altitudine, & ornatu, arteque operis parem superbiae, & arti veterum Romanorum, qui adulatione erga Caesares primi haec instituere. Ipso in arcu, coronides & emblemmata, foliaque columnis, flores, cauliculi, volutae, superiores inferioresque tori, trochili, scotiae, moduli, plinthe, scamilli, supercilia, cymatia, acroteria, tympana, transtra, zophori, denticuli, astragali, capreoli, friae, teniae, guttae, apophyges, echini, scapi, & quicquid aliud

aliud in eiusmodi molibus ad elegantiam siue maiestatem prisca aut recentiores excogitauere. Quod inane & vacuum in substructione illâ, ornamenta haec relinquebant, id implebant simulacra victoriarum Caesaris, expressa coloribus: vt Mauros, vt Indos ille subegisset: vt domuisset rebelles: vt Regem Franciscum captiuum suum dimisisset ab se, redondassetque Regno. Arcus deinde alius fuit in pontis aditu, quo nauigabilis fossa proximae turri iungitur. Ibi flumina, quae Prouinciam rigant, marinis assimilata Tritouibus, quae verâ, quaeue fabulosa de origine & natura ipsorum tradita sunt, sicut urbium etiam statuâe, praeferebant habitu: atque non ingrata peregrinis historia illa exhibebatur. In summo Romano stadiq, quod vocant, triumphalem tertiam portam nobiles Romani constipabant facti omneis è gypso & inaurati cum insignibus paludamentisque suis, prout eorum quisque Mediolani olim gesserant rem, siue imperitarant. Ad fauces viae, quae tabernas aurificum hinc inde aperit, quarto in fornice, picta urbis primordia legebantur: & muliebres statuâe colosseae magnitudinis aderant monumenta victoriarum. Sed nulla horum operum magnificentia aequauit quadriforem arcum, qui contra Templi maximi valuas quadrato fastigio equestrem Caesaris ipsius statuam alte erigebat. Victrici resupinauerat hasta Indum & Maurum, eademque manus nutantem in vicino Turcam appetebat.

bat. Austriacorum simulacra, quorum facta latinae litterae admirantur, intuentia nepotis ingressum simul spectaculo erant. Cum execulta in hunc modum via esset, quā Caesari incessus parabatur, pompam tamen ornatumque maiorem, effusa & intenta ad spectaculum ciuitas praebebat. Cupidine videndi tot victorijs clarum, tot gentium Regem, sub quo, post diuturni seruitij miseras, pristinae ciuili vitae bona fructumque recuperaturi essent, velut natali Reipub. die festam agentes lucem, loca omnia conscendebant, vnde prospectus aliquis pateret. Prae multitudine spectantium, occupabantur tectorum etiam culmina, fulcrisque passim erectis quasi noua vrbs pendeat. Canonici Templi maximi, Clerusque vrbanus vniversus, Senatores simul, & Quaestores, & Magistratus reliqui, separatis agminibus, insignibusque discreti, ad portam processere quā Caesar expectabatur. Ille ad x. Cal. Septembris anni eius cio id xli. paulo ante solis occasum intrauit urbem, cum in Clarae Vallis Monasterio quietem eo die cibumque sumpsisset. Tradunt, in ipso portae ingressu, conspecta cruce, sub qua Metropolitani Canonici tetenderant, desilisse illico ad pedes, trophaeaeque illa nostrae salutis venerabunde amplectentem atque osculantem, & ipsum fudisse, qua erat pietate, lacrymarum aliquid in nouo imperio Metropolitique adeunda, & omneis, qui viderant, ita commouisse, vt pari animorum

animorum teneritudine gaudioque collacrymarentur. Conscenso deinde rursus equo, per ea quae dixi spectacula ad templum maximum, inde in regiam processit. Sed non, sicuti breui confinio ac diuerticulo coniunguntur inter se Regia & templum, & sicuti breuiore etiam prece principes alios expleto ibi ultimo illo pompae actu statim in proxima Regia tecta diuertisse vidimus, ita flexerat in speciem genua Caesar abieratque. Multum, quin potius ille precatus ad Aram, multumque postea contemplatus, tum vniuersae structuram Aedis, tum partes singulas, prout ab senioribus Canonicis praecipua quaeque monstrabantur, specimen hoc populo Mediolanensi dederat animi, qui deponere etiam aliquando imperium, & intra sacrata claustra reliquam vitam agere meditaretur. Postero deinde & secutis diebus, ad visenda contemplandaque eadem redibat: ac de statu interrim rerum sacrarum, deque Metropolitana iurisdictione, & de absente etiam per tot annos Archiepiscopo pleraque percunctatus esse dicebatur. Sic tradidere scriptores, quibus tunc curae fuit obseruare eos Caesaris incessus, & excipere quae interim ab eo dicerentur. Iidem retulere pari cura ordinem agminis, quo Caesar ab Portae Romanae ingressu, in templum, et Regiam usque est deductus: insana vestium et equorum pretia, et certamen opulentiae Mediolanensium, non inter ipsos modò, sed cum gentibus populisque alijs, quacunque ille incessisset. Et parte nonnihil etiam  
ista



ista publicae hilaritatis narratio nostra recreabitur, quando semel contigit, ut post saeva bella, faciliores in pace dolos, in laeta haec atque innoxia digrederemur. Ducebat in primo agmine pompam Alvarus Luna praefectus arcis holoserico caeruleo indutus. Hunc fistulatores Hispani sequebantur in equis ad ducentos, suo, & equorum tegmine colorem eundem imitati. Post Alvarum Lunam eiusque turmas, trecenti nobiles viri familiares Caesaris equitabant in quibus erant honorarii ephoebi triginta principum, fere filij vetere magnorum Regum consuetudine ut fiant instrumenta servitutis etiam principes. Huic Regiae ephoeborum cohorti, quasi gemellam aliam cohortem addiderant Mediolanenses à proceribus urbis intra tertium decimum aetatis annum: torques eis & cristae: gladioque succincti distinctas argenteis clavis & obductas holoserico albo hastas tenebant. Vestimenta singulis ex auro gemmisque contexta. Par habitus trecentis alijs nobilibus ab decimo octavo ad vigesimum annum, ut tantam in iuenum cultu opulentiam Hispani intuentes magnopere admirarentur, atque inter se etiam quaerere, quomodo tot defuncta casibus iniurijsque ciuitas, toties direpta & vastata, tantas nuper apud Caesarem ipsum conquesta calamitates, sic repente ditescere atque luxuriari potuisset. Tam splendido iuenum agmini succedere Praetoriani spiculatores, ne ipsi quidem absque luxuria & fastu, cum saga  
braccasque

braccasque , & pileos , ipsasque sarissas plurimo  
internitente argento Vasthius cunctis ad eandem  
formam dedisset : ac fulgore gestientes illo non  
sine admiratione Germani se ipsos intuebantur .  
Sexaginta erant : qui postquam transire bini ,  
tum verò equestri nobilitate ciues ducenti pro-  
diere . Hi quaterni in ordinem prodibant : post  
ordines singulos armigeri ibant cum herili lancea  
& crista , quam ex animi sui libidine , & ingenio  
vnusquisque variauerat . Frontalia ephippiaque  
pretiosa equis , & in superiorum temporum quasi  
contumeliam iumenta ipsa vestita serico auroque  
conspiciebantur . Senatores ceterique Magistratus  
urbis in longo Syrmate omnes . Dein Magnus  
Cancellarius , & Senatus princeps , et praefectus  
rerum capitalium , et Aerarij praefectus sequeban-  
tur . Hic argenteos nummos ad populum iactabat  
Caesar ipsius imagine percussos , monstranturque  
adhuc ea numismata ab posteris eorum , qui sti-  
pem eiusmodi aliquam arripere potuerunt . Ex-  
tremum agmen fuere procures Aulæ , Granuela-  
nus , et Auila , Salernitanus , et Estensis , et Far-  
nesius , Vasthiusque , et Sabaudus cum hastatis  
Praetorianis alijs centum . Ea principum cohorte  
antecedente , toparchis duodecim interiectis , qui  
seruorum à pedibus vicem explerent , sub vmbel-  
la Caesar vehebatur , cingente latus Cardinale Con-  
tarenò , subsequenter principum legatis , totam  
claudente pompam equitatu Praetoriano , nocte-  
que interim superueniente accensae faces renoua-

Yyy

uerant

Xuerant diem. Eximia interim erat species luctantium ignium cum splendore auri, perstringebatque oculos pugna illa duarum naturae rerum, & quasi certamen inter ipsas, vtra splendidior esset. Et iucundior simul oculis animique species erat alia, cum nobilissimi ciuitatis, ob Caesaris maiestatem, sumpta pedissequorum persona, circumpedes irent, eminente inter famulares illos amictus atque incessus fastu, quem die illo deposuerant, rursus famulorum greges incederent onerati vestium sumptu, quo ne principes quidem extra pompam abuterentur. Sed in tota scena dici noctisque illius nihil fuit, quod magis in se conuerteret omnium oculos, quam Caesaris ipsius simplicitas, & modestia cultusque parum ab plebeij hominis cultu abhorrens: mirumque dictu, ille propter quem cuncta haec fiebant, cernebatur atro palliolo & vulgari pileo caput humerosq; tectus vt nisi frontis honos & umbella monstrarent virum, quaerere spectantes possent, vbinam Caesar ipse esset. Admirationi quoque fuit, comitas, qua per totum iter cum Cardinale Contareno sermonem hilare confociarat. Hac ciuium gratulatione Caesar ingressus urbem, moratusque ibi per aliquot dies, leuata oneribus ciuitate, multorum quoque merita priuatis large remuneratus, habito per totam provinciam delectu eorum, quos secum in Africam ducturus esset, discessit quintodecimo die postquam venerat: ac laeti deinde noui imperij mansuetudine, & aequitate Mediolanenses, vicissim firmata erga

id imperium fide, nomen olim amabile Vicecomitum & Sfortiarum, atque adeò ipsa libertatis suae tempora dedere obliuioni. Tantam Caesaris aduentus, & breuis illa commoratio fiduciam animis securitatenique attulerat. Anno altero postquam ille venerat sic abieratque locustae superuolitaere agros, fortuitum naturae malum, & inter prodigia olim habitum Romanis. Inumbrabant multitudine sua coelum, & ubi arborum cacumina humumue infederant, frondosa & herbida cuncta depascebantur, earumque contactu velut ambusta tellus, vim omnem eius anni frugiferam perdebat. Decuriones urbis ei malo auertendo, simul ab Archiepiscopi Vicario postulauere, ut supplicationes de more haberentur: simul praemia proposuere omnibus, qui plenos earum saccos in publicum referrent. Ad centum millia modiorum relata fuisse aiunt, pestemque ita sublatam. Si portendunt ista quicquam aut minantur, pertinuit haud dubie prodigium ad magnam insequentis anni cladem, quam Galli intulere Hispanis, & Hispani mox reddidere Gallo. Namque bellum, quod post Sfortiae mortem ab Rege Francisco, inuadendae Urbis causa renouatum fuisse memorauimus, aliquandiu intermissum recruduerat nunc apud Subalpinos ab qua parte orsi illi commodiore aditu sese Prouinciam ingredi posse sperarant. Ibi commisso ad Ceresolam praelio, duodecim millia è nostris cecidere: qua victoria elati Galli cum ab ea parte simul, & ab alia maioribus Petri Strotij ductu copijs Metro-

polim circumuenire voluissent, in vltimo tantae rei conatu ab Vasthio oppressi obscurum antea, Stradelaë nomen nobilitauere clade sua, & fauces eae sunt hodie nihilo tristiores apud Gallos, quàm apud Romanos olim Trasimenus aut Cannae. Vasthius tamen, depulso quamquam hoste laborabat acceptae cladis infamia: cumque, vel propter animi moerorem, vel ob militiae labores in morbum incidisset, & ab infenso semper Medicaeo per amicitiae simulationem inuiseretur, tulit aetas illa fraudum humanarum exemplum, in quo referendo erubescere nos cogit patriae simplicitatis fama. Ac sanè, non pudenda solum, sed etiam miseranda res fuit, falli sic ab Medicaeo Vasthium, & illudi: mihiq; adhuc ex longinquo rem intuenti ipsam, sicuti inter eos agebatur, turbant animum indignatio simul & misericordia & pudor aliquis ob patriam, si talium artium aliquando altricem eam fuisse fatendum sit. Crediderat Vasthius, bona fide Medicaeum rediisse secum in gratiam, & quoniam ab eo inuiseretur aeger, tantò magis credebatur. Fallacia igitur hac & magnitudine animi sui deceptus communicabat cum eo cuncta & libere etiam conquerebatur incusans modò proceres Aulæ, modò Caesarem ipsum, qui susciperet bella, & sine pecunijs, sine milite geri ea vellet. Dum non persoluuntur stipendia militibus, extenuatas & inanes fuisse copias: dum plures imperitare volunt, male ab omnibus esse imperatum. Haec, & liberius alia dictitando rogabat denique Medicaeum,

vt quoniam iturus ad Caesarem propediem ipse  
esset, vellet sibi apud eum esse patrocinio aduersus  
inimicorum calumnias, quibus opprimeretur ab-  
sens. Medicaeus, neque vt solaretur aegrum, ne-  
que vt in Regia defenderet absentem, sed vt va-  
letudinis aduersa rimaretur, ibat visere: laetaba-  
turque malis inimici simul, & querimonias precesq;  
eius, velut tela in ipsum, implacabili, & exulcerato  
alte animo arripiebat falsus sermone & vultu quod  
plura eliceret. Ad Caesarem deinde profectus,  
deprompsit cuncta & maligne oneravit adeò felix  
in perfidia, vt Caesar, ob ea, quae audierat, in  
ordinem redigere Vasthium statuerit, & ille per-  
cussus decreto succubuerit moerori: quo morbum  
aggravante vitauit ignominiam, eiusque viri obitu  
damnum ingens fecere Mediolanenses. Refouebat  
enim miti imperio Prouinciam, adeoque munifi-  
cus etiam in sacra fuit, vt absentis Archiepiscopi  
damna quodammodo releuaret, eaque sub tali  
praeside minus sentirentur. Mortuus est Vigleuani  
vnde translato corpore in urbem, velut Reipub.  
parenti funus duxere ciues, Clerusque vniuersus,  
& oratio de laudibus eius in templo maximo  
( nam ibi sepeliebatur ) facunde habita publi-  
cum moerorem recordatione tantarum virtutum  
auxit. Prouinciam deinde Ferdinandus Gonzaga  
regebat dilectus à Caesare in id munus ob eximia  
belli pacisque decora, & Vasthij virtutibus parem  
animum, sicuti rerum etiam exitu pene similis fuit.  
Gonzagam hunc inter conditores Urbis merito  
nume-

numerauere quicunq; de Patriae rebus post eius aetatem scripsere aliquid, & publica opera sunt monumento. Cura ei muniendae Urbis prima fuerat, vt quoniam munimenta alia vetustas labefecisset, alia rudibus saeculis, instituta damnaret vsus recens, cuncta aduersus novos oppugnationum, impetus atque artes, valide & perite firmarentur. Itaque veteres demolitus muros, nouam moenium descriptionem, quibus vrbs hodie cingitur, instituit, inclusitque suburbia, ne maxima ea pars populi, quandocunque ingrueret hostis, aperta, & indefensa, sicuti olim iaceret. Absoluta ea descriptione munimentorum, operisque publice imperatis, Gonzaga rogauit Archiepiscopi Vicarium, vt ponendo primo lapidi, inchoandaeque securitati urbis, Diuinas quoque caeremonias auctoritatemque sacram adiungere vellet. Ita statuto die sacrificatum in Templo maximo solenni ritu cum ea precatione, vt Metropolitana propugnacula, muriq; pro salute urbis inchoati prospere attollerentur. Dein pio agmine processum in campos, qui circa D. Dionysij Aedem late excurrunt. Ibi Gonzaga, Clero populoque circumstante primum lapidem in fundamenta coniecit, ac strenue inde vrgebatur opus, donec munimenta, quae nunc rursus disfluente passim lorica, labare incipiunt, toto ambitu urbis steteret. Versatiles ponticulos ad nauigabilis fossae labra appositos tolli placuit, eorumque loco fornicati pontes extructi: Turrim ad Portam Vercellensem quae erat, dirui tutius visum:



visum : item ad Portam Cumanam turres aliae excidio datae, ne quando receptacula ea hostium essent, si qua violentia transgressa muros foret. Haec ad firmandam urbem pertinere : quae simul expoliebatur pari cura . Iam enim allatum erat : Principem Philippum Caesaris filium in Belgas ire ad Patrem , iterque ei per Prouinciam fore , & Mediolani aliquandiu commoraturum . Tanto maior sollicitudo , tum Praefidi Urbis Gonzaghae , tum Decurionibus ciuibusque ipsis , ut Metropolim, sicuti ipsius fama dignum esset , magnifice splendideque excultam regnaturo iuueni exhiberent . Forum quod Metropolitanae Aedi praeiacet , vetustissima , & ruinosa D. Teclae Ades obscurabat, atque impendebat . Placuit eam complanari aedem, ut, & translato in templum maximum, cultu ministerioque eius, cultus Diuae amplior in Metropolitana sede esset, & foro laxitas spatio illo exaugurato adjiceretur . Tum vias urbis dirigere ad lineam, aediumque frontes perpendicularo exaequare sunt aggressi : eaque instauratio , tota dedit vrbe stragem veterum aedificiorum, dirutis porticibus, podijs , fornicibus, transuersisque tigillis, quae rudia & impolita prospectum impendebant . Cloacas receptacula purgamentorum omnium , quia fordibus , tetroque odore & adspectu foedabant urbem, operuere Neque contenti remouisse ista ab oculis, pleraque urbis loca decoranda picturis locauerunt . Muniebatur igitur vrbs & ornabatur eodem tempore, non ad praesentis modo utilitatis,

& elegantiae fructum, sed vt posteritas quoque  
omnis tutius honestiusque habitaret, cùm de Prin-  
cipis aduentu certior iam instantiorque fama coegit  
cura omiffa lentiore apparari celeriter ea quae po-  
nenda ad tempus & extruenda erant. Iam enim  
erat Genuae Princeps, & vrbe in illa fatis mora-  
tus, propediem inde moturus esse dicebatur, vt  
Mediolanum veniret. Alexandria, vile quondam  
nafta palearum cognomentum, nunc ob munimen-  
ta fimilior nomini, prima est vrbium, per quas ab  
Genua venienti Prouincia Mediolanenſis intratur.  
Eam urbem cùm intraret Princeps, pleraque Me-  
tropolitana nobilitas & Cleri primores obuij fuere  
vnà cum Ioanne Berguaco, quem à Bruxellis mi-  
ferant duae illius amitae, Eleonora & Maria: illa  
Galliae Regina, haec Pannoniae, quae tunc Bel-  
gio pro Caefare fratre praefidebat. Miſerant  
autem muliebriter ſolicitae de iuvene, ad ſalutan-  
dum eum, & vt certa omnia de ipſius incolumita-  
te legatus referret. Ab Alexandria Vogheriam:  
ex eo loco Ticinum acceſſit, perque ſuos fines  
eunti iam hinc Principi, non modò ſubiectorum  
ſtudia, ſed etiam veſtigia paternarum rerum occur-  
rebant. Ticini in arce erant aenea tormenta prae-  
cipuae magnitudinis, ſpes olim & robur Saxoniae  
Duci, nunc monumenta cladis, quae capto Saxo-  
ne Caefar in eam arcem ex Germania miſerat.  
Ea Princeps inſpexit perite diſſerens apud ſuos,  
qui proximi ſtabant de longitudine ac diametro  
ſingulorum, de metalli temperatura & oris hiatu,  
&

& quantos quaeque globos paterentur . Incisas etiam literarum notas , quia propter aeruginem aut vetustatem confusae, non facile explicabantur, tum sedulo tergeri iussit , tum admotâ cerâ enotari : ac ferebatur interea de Germanici belli consilij & tota illa rebellium conspiratione arcana quaedam , & ad eam diem occulta patefecisse . Forte tunc in Academia Ticinensi versabatur Andreas Alciatus Mediolanensis scientia legum inter primos , aut sanè primus aevi , neque id optimum eius viri fuit : sed interiores literas in barbariem illam inuexerat penè ad formam antiquitatis , poteratque loqui de Regum negotijs , & ob vitae auctoritatem alloqui Reges . Ei datum est negotium vt Reip. nomine peroraret apud Principem , quod fecit ille veterum Romanorum lingua , non quotidiani Oratoris ritu : princepsque celerius multò quàm vellet, orationem euolasse illam aiebat . Summa haec fuit . Hilaratam esse terram, Insubriam adspectu iuuenis, quem superûm fauor, & Patris arma, & ipsius virtus , Regiae magnitudinis exemplum pararent . Urbem, in qua tunc esset maximi Patris magna proles, ambitu quidem, & specie minimam esse potentiae illius partem : obsequio & fide & teneritudine animorum erga Caesarem, Caesarisque filium , & , si quid illud etiam ad rem attineret, antiquitate sua, nulli vrbium aliarum concedere . Habitasse ibi Reges olim, & gessisse bella : nec procul à moenibus esse locum, in quo Rex Galliae captus, memoria hominum

Zzzz

teste,

teste, terribile Gallicis exercitibus Hispanum Austriacumque nomen fecerit. In ea vrbe, perinde atque in Metropoli ipsa caeterisque subiectis Metropoli terris, quotidie nuncupari vota pro Catholicae Domus incolumitate: & postquam ipse profectus ab domo sit, nullo non die Insubres à superis petijisse, vti sospes rediret. Petere nunc ab ipso, vt cum in Regna, tam multa, & tam longinqua diuidet curas, etiam meminisse fidei Longobardorum velit. Haec ferme ab Alciato perorata. Princeps inde Mediolanum ibat: cumque ad quintum ab vrbe Ticino lapidem, monstraretur ei septum, intra quod inclusi cum Rege suo Galli, potiundae Insubriae spem atq; cupidinem captiuitate Regis, & exercitus internecione luisent: incessit animo cupiditas locum eum intrandi. Spectauit agri partem, in qua concurrisse acies dicebantur: syluam ex qua prodierant ad Gallorum perniciem insidiae: parietinas, quà subruti dolabris muri aditum Hispanis dedissent: fossam denique ipsam, in quam Rex effuso super ipsum equo prolapsus erat. Ea vestigia recentis victoriae Princeps inspexit commoto simul animo ob sortem humanorum casuum, cum tanti Regis ignominia & periculum ante oculos obuersaretur. Eadem imago mixtum dolore gaudium aliorum etiam pectoribus intulerat, neque alia sermonibus materies breui hinc ad Carthusiense Templum via. Posuere Templum illud & ditauere Vicecomites nostri, tempore, quo rem Mediolanensem haud procul, ab magnitudine Regij nominis obtinebant.

nabant. Et miretur hodie quilibet Regum, opus quidem etiam ipsum, sed multò magis attributas Monacis opes, quæ domus illa sufficeret gentium hospitio: nec in Principum aduentu moueri ibi quicquam attinebit. Princeps, adorato ad Templum Numine, Binasum: ex eo pago, postero die Mediolanum venit. Ciuitas opulenta, admiratrix Hispanorum, vnica erga Cæsarem fide, prodiga eadem contemptrixque auri, cedere nefciani alens nobilitatem, foecunda ingeniorum, connixa est, vt agnosceret Princeps Insubriae Metropolim, auferretque memoriam secum duraturam vltra fluxam in Regum animis talium obsequiorum gratiam atque recordationem. Statuerant tota passim vrbe simulacra Cæsaris victoriarum, eminentibus figuris, vel picturâ, cui artificum nomina pretium forent. Cernebatur fugiens ex Germania Solimanus cum illo trecentorum millium, equitatu, quem à Cæsare dissipatum, etiam pinxisse arduum videretur. Sexaginta millia Turcarum equitum caesa cadebant ante oculos: captae de Turcis vrbes, patrae, Corone, Tunctum, Hyppo, Tunetanum Regnum, Imperium Libyae, Mauritania tota restituta veteri Regi: deiectus Aenobarbus: viginti millia captiuorum reducta in Patriam: purgata latrocinij maria: triremes hostium captae aut demersae restituta Genuensibus libertas: traiectus Albis: Indiae patefactae, Saxonis immane corpus oneratum ferro: caeteraque rebellium Germanorum capita promissis in pectora barbis

Zzzz 2      grandique

grandique capillo sub iugum ibant. Haec omnia, veluti tunc fierent, aduenienti Principi Mediolanenses ad spectaculum simul, & exemplum proposuere. Urbem verò suam, sex hostium exercitibus fuis, toties à Caesare conseruatam tantò splendidius fecerant, quanto maior est vnique genti circa rerum suarum memoriam ambitio & cura. Et ea quidem annalium instar fuere, siue potius annales ipsi versi atque commutati in hominum ora & vultus. Genus erat aliud, quod per veteris Historiae symbola hosce Caesaris euentus atque res bello gestas includebat. Simul admonebant ambages variae Principis iuuenis animum, quae post Patris finem publica fama & expectatio eum maneret. Ea mysteria fuere in arcu, qui stetit ad templi maximi valuas aemulus penè Aedis ipsius maiestati. Rutilo crine puer Dauid strato ad pedes gygante Golia. Iolue sistens imperio cursum solis. Cum Holofernis capite Iudith: & pascens inter iumenta Nabucadnethsar, imagines & simulacra residuarum expeditionum. Ad introitum Regiae sedebat in pegmate celsissimus colossaeus Caesar, quem Princeps ipse venerabundus adiret. Effigies eadem, alibi armata erat, alibi pacis cultu. Depictam ita & ornatam urbem inclinato in vesperam die Princeps intrauit, antecedente varij generis equitatu & armatura, quae propria fuerat regij agminis, quaeue ex prouinciali copia extra ordinem accesserat. Sclopetarij, cataphracti, velites, suis quaeque turmae ordinibus

bus tendebant . Tegmina & ornamenta turmis  
fuere ad Regiae familiae colorem , & formam siue  
ex ducum ipsorum ingenio . Duces ipsi vestem  
auream in peregrinum habitum assimulauerant, quò  
magis conspicui forent . Hos armiger quemque  
suus anteibat . Albae Ducis pueri vicenaria turma  
succedebant . Senatus inde Mediolanensis, Magi-  
stratusque , & prima Urbis nobilitas processere .  
Mox Aulae Principes , Hispani , alijque gentium  
aliarum secuti Aulam , & summo quisque studio  
meditati , ne splendor alienus obscuraret suum .  
Regiae cohortes hastatae , in Germanicum & Hi-  
spaniense genus ad viarum latera discriminabantur .  
His proximi vadebant quinque & viginti nobiles  
ab iuuentae flore delecti, ab gratia quoque corpo-  
rum & venustate formae . Candida ea cohors  
inaurataque sarissis & amictu ducebatur ab Mutio  
Sfortia , cuius pater exciderat Imperij Mediola-  
nensis iure proptereaquod absq; Matrimonij cere-  
monijs ille procreatus fuisset . Post iuvenes eos  
incessere , Gometius Ficeroa , & cum Demarcho  
Inarimes Demarchus Astorgae , Dux Sinuessae ,  
Castellae Almirarchus . Ferdinandi Gonzaghae  
filius adolescens cum aequalibus quatuordecim in  
conchyliata tunica Principem antecedeat . Dux  
Albae suo loco subsequatur . Vexillum hinc  
regium , & legati Regulorum aut ciuitatum . Prin-  
ceps ad Templi maximi valuas exceptus ab Sacer-  
dorum Collegio atque in templum introductus  
ab solita precatione in Regiam diuertit . Ibi per  
aliquot



aliquot dies equestria certamina sunt exhibita, quorum arte Mediolanenses expressere confessionem Hispano: si tales in acie forent, esse robur militiae penes urbem hanc. Opportune congruebat, ut Principis aduentus incideret in nuptias, quibus Fabricio Columnae iungebatur Hippolyta Gonzaga filia Ferdinandi. Ea res laeta iuueni fuit ob solitam talium rerum hilaritatem: & nuptias ipse decorarat, haud dedignatus inuifere sponsam, festis interesse dapibus, & modico saltatu choreas inire, quaeue alia celebrando Matrimonio instructa erant. Laetitiam auxit aduentus Alphonfi Aquilarij, qui missus à Caesare ad Principem prospera de eo & salua omnia nuntiat, attuleratque mandatum, uti maturaretur iter. Hoc allato nuntio Cardinalis Tridentinus ad paranda omnia domum praecessit, quae per eos fines ituro Principi grata esse possent. Duae sunt ab urbe Mediolano Tridentum viae: per Mantuae fines una, per Cenomanos altera, utque compendij breuioris haec, sic illa per suas terras secutura longius Hispanum, erat. Princeps delecta priore via ad VIII. Idus Ianuarij Melinianum proficiscitur qui locus abest ab urbe decem millia passuum & Iacobo Medicaeo sicut antea demonstraui, attributus domicilio nunc eius nobilitabatur. Poterat iam ipse stare inter principes, & hospitium illud, non magnifice modò sed etiam erudite portis & emblematis adornatum Hispani aduenientes inuenere. Post Principis discessum laetus Gonzaga pergebat addere in perpetuum

petuum decora & munimenta Vrbi, cum exorta in eum criminatio atrocior quam quae Vasthium absumpserat, non quidem absumpsit, peremitte ipsum, sed ab eiusmodi operum eleganti cura ad tristem, & necessariam sui defensionem auertit, diuque occupauit. Crimini maxime dederant inimici aemulique eius, quod natus in familia assueta dominationi, animo elato, & ob magnas propinquitates inquieto, Regij praefecti vocabulum adspernaretur, affectaretque imperium vrbis, nec Caesari, sed sibi Metropolim muniret. Fauere Venetis, & quaerere sibi gratiae locum apud eos; remittere Mediolanensibus tributa: cum Ferrariac Duce plus habere necessitudinis coniunctiusque viuere, quam cum alienae factionis homine Caesarianum deceret. Id ipsum, quod interfecto à coniuratis Farnesio, Placentiae possessionem Caesaris nomine adiisset, prouinciaeque fines protulisset vsque ad Tanarum flumen, vt inutiliter & ambitiose factum criminabantur. Infestissima denique interpretatio erat, quod mortuo sub idem tempus Pontifice Paulo, Cardinalem Saluiatum Florentinum patriâ, studijs, & propensione animi Gallum contemnens, siue dissimulans mandata, quae habuerat, commendasset Patribus, vt in Pauli locum ille subrogaretur. Haec omnia in suspicionem crimenque vocantes inimici, asperare Caesarem conabantur, irritisque aliquandiu, & sermonibus, & libellis, animo eius obrepebant. Iactando deinde saepius eadem augendoque fecere vt capitibus aduerteret

aduerteret illis monerique Gonzagam iuberet : recte & ex dignitate sua facturum eum, si dilucet obiecta & purgaret. Simul cuiusmodi essent ea demonstrabat. Gonzaga datis ad Caesarem litteris, homineque remisso, quem rerum earum causa Mediolanum ille destinarat, defensione hac utebatur. Muniendae curam urbis ideo suscepisse, quoniam in eius rei consultatione post varias utrinque sententias, permisisset sibi Caesar liberam eius negotij facultatem arbitriumque & verbo hoc esset usus: quod notiora ei ciuium ingenia & conditio prouinciae totius essent, hoc melius posse statuere quid tutissimum optimumue factu censeret. Mediolanenses praeterea ipsos reputantes superiora sua tempora, & tot hostiles incursus, ultro cogitationem habuisse muniendi: voluisse id facere suo sumptu, & ea de causa vectigal in vini metretas quae importarentur, instituisse. Defectionem populi Mediolanensis timeri debuisse nullam, vel quia nunquam antea descuiissent, steteritque omnis eorum motus intra leuem tumultum, vel quia subiectae urbes semper infensae Metropoli, spem & societatem subsidiaque rebellionis negent. Nullam sibi gratiam priuatim apud Venetos quaeri. Curae esse tantum, ut pax, & concordia, quae cum eo Senatu sit instituta conseruetur, neue dissidia, inter accolae solita existant. Ferrariae Ducem consanguineum esse suum, nec posse naturae vincla dissolui. Cardinalis Saluiati nomen, non inter Gallos, sed inter Caesarianos reperire sese in occultis

cultis illis literis, quae ad classem vtramque distinguendam inter alia imperij arcana sibi traditae fuerint. Tributa populo Mediolanensi lenius mitiusque, quam olim esse imperata, non per ambitionem artemue malam, sed vt ciuitati redactae ad extrema consuleretur. In Placentina expeditione, nullas suas praeterquam obediendi & exequendi partes fuisse. Scripserat haec dixeratque Gonzaga sicuti erant, vel certe tanta confidentia, & libertate, vt conscientiae securitas intelligeretur. Criminales tamen acrius infestiusque coorti, velut arreptis ex ipsa defensione facibus saeuiebant apud Caesarem, moliebanturque omnia vt ambustum secreti iudicij flamma Gonzagam Prouinciae administratione dimouerent. Horum scilicet demum instinctu Caesar exciuit ad se reum: iussitque, tradita interim Prouincia Gometio Ficeroae ad dicendam causam veniret. Centores duo Mediolanum missi, Bernardus Boleus & Franciscus Pacecus, qui postea Cardinalis fuit: his mandatum, vt quaestionem haberent de ijs rebus, quas Gonzaga dolo malo egisse, tentasse argueretur. Ea cognitio propter hominis dignitatem famamque & genus occultissime exercebatur: palam verò in Magistratus alios inquirebant: ac notatis, quos probri compererant, innoxium fidumque Caesari Gonzagam pronuntiauerunt. Quin etiam intuentes publicorum operum vtilitatem ornatumque vrbis, & cuncta per eum eleganter & splendide renouata sicuti monstrabantur, tum verò pietatem in sacra,

iustitiam in omneis, & orba suo Pastore Metropoli  
velut expletam eam quoque vicem sustentatione  
pauperum, & defensione sacrorum, cuncta ea, sicuti  
fuerant, & sicuti fama loquebatur, admirati Cen-  
sores in Regiam cum ampla testificatione perscrip-  
sere. Vnde maior gloria Ferdinando huic apud  
Caesarem, liuor aemulis: & tam accusasse, quàm  
credidisse, hos illumque pudebat. Erat deinde  
Gonzaga Caesari assiduus primusq; minister bello,  
quod inducijs & Francisci Regis obitu paulisper  
intermissum, Rex Henricus etiam infelicior patre,  
& petendae ex Hispano vltionis penè audior in-  
staurabat. Mediolani per eos dies absente Gon-  
zaga, Ludouicus Biraghus Galliae Regis apud  
Subalpinos chiliarcha per dolum inuaserat prope  
ceperatque Arcem, si iatis prouide compositus  
ordo insidiarum fuisset, vel potius nisi hoc etiam  
tempore pro salute vrbis sterisset contra Gallos,  
benignitas & prouidentia Numinis, quae aduersus  
eam gentem tutata Metropolim semper, ingrata  
& temeraria interpretatione saepe dicta casus fuit.  
Notum eum omnibus historijs tanto discrimine  
annum, ne mulieres quidem & pueri ignorauere  
ob Georgij proditoris caluam, quae in rotundae  
turris fastigio praefixa hastae ostentui fuit. Eius  
anni principio Cardinalis Hippolytus Estensis,  
nonnulla fortasse tactus religione, vel sermones  
certe hominum in extrema iam aetate metuens,  
abdicare se Mediolanensis Ecclesiae Pontificatu  
tandem decreuit potius quàm vt percipiendo sic  
emolumenta

emolumenta absens in flagitio dedecoreque illo  
extingueretur. Abdicauit autem ea conditione,  
vt Ioanni Angelo Arcimboldo Episcopo Noua-  
riensi Ecclesia traderetur: si diem suum ille obiisset  
prior, ius omne ad se ipsum rediret. In ea Pon-  
tifex Iulius autor factus. Successerat enim hic no-  
minis eius tertius tertio item Paulo: nec tertium  
fere Pontificatus annum excessit, vt trium hebdo-  
madum Pontifex Marcellus longiore dignus aeuo  
post hunc regnaret. Praefuerat Arcimboldus Eccle-  
siae Nouariensi quatuor & viginti annos. Clemens  
VII. cum ex Senatore Episcopum crearet dele-  
ctatus viri literis & dexteritate, cum is Sfortiae  
legatum Romae ageret. Ab Estense, qua diximus  
conditione productus, & Iulio III. probatus, quar-  
tum annum Metropolitanae potestatis implere non  
potuit. Eius morte redierat res ad Estensem, qui  
rursus suo more absens Ecclesiae vectigalibus frue-  
batur laborum curarumque expers. Cum Arcim-  
boldi huius obitu mors prope continuata Iacobi  
Medicaci moerore alio ciuitatem affecit: & prop-  
ter viri claritudinem spemque de Cardinale fratre  
summam sacri etiam ordines indoluere. Mortuus  
est in aedibus suis ad Braidam, & funere amplissi-  
mo elatus ad Melinianum: rursusque inde ossa  
Mediolanum in Aedem maximam translata fratris  
Pontificatu. Vir propter exempli magnitudinem  
nulli aetati silendus, post abrupta sua initia despe-  
rataeque expeditiones, & gestum cum Principe  
bellum, constitutâ denique fortunâ, quinquies

imperator alienorum exercituum fuit : Senarum urbem ab alijs frustra obsessam cepit : aperuit fratri viam ad id quo nihil amplius mortalitas capit : parumque fuerat dedisse Pontifices maximos è suo sanguine, nisi per sororis nuptias, ascito in domum Borromaeo, Sanctos etiam dedisset . Parabantur vrbi Populoque Mediolanensi decora & subsidia haec : atque post paucorum adhuc annorum remissum ac fluctuans & inutile regimen futurum erat, vt ciues duo sanguine inter se coniuncti alter humani generis Apostolicum principatum adeptus, singulari studio Patriae salutem amplecteretur, alter ab eo datus Patriae Pastor, faceret hanc disciplinae sanctioris exemplar, illatusque demum ipse Coelo terrarum orbem & celestium choros nominis sui gloria augeret . Pius IV. & Sanctus Carolus fuere isti, minime ambiguâ mortalium famâ, quin Auunculum filius sororis magis multò quàm Pontificatus ipse nobilitauerit, & ille vicissim hunc per fluxos honores opesque caducas induxerit in tantae sempiternae gloriae campos . Sed duo haec Mediolanensis Reipub. lumina, nondum publicis illata rebus stabant adhuc tantummodo in limine earum, spemque & votum, nondum ipsius voti fiduciam ac robur expectatio publica conceperat . Interea Cardinalis Hippolytus, post Arcimboldi mortem ex pacto recepta Metropoli, Vicarium subinde aliquem dabat : Ecclesiae statum ipse obibat nusquam, & nihil perfecti aut emendati, vel in publicis ceremonijs ritibusque sacrorum, vel in co-

runi



rum vita cernebatur, qui ista tractarent. Et Ferdinandus Gonzaga, cuius imperium & verecundia nonnihil ad Clerum quoque continendum valeret, ob calumnias absens, quicquid illud auxilij, & disciplinae fuisset, abstulerat. Gubernante eo Provincia, vxor ipsius ob pietatem erga Sanctum Franciscum de Paula Ordinis eius homines Cumana viâ extra urbem benigne collocarat, quâ nunc Sanctissimæ Virginis Aedem salutiferi laticès & votivæ tabellæ nobilitant. Per idem tempus, Franciscani minores qui sibi ab legum suarum Observantia nomen indidere, commigrarunt in eum locum, vbi nunc Sancti Angeli Aedes Monasterio adiuncto pietatem civium & sanctimoniam Ordinis testatur. Non enim alibi quàm apud pium ditem populum talia domicilia superùm hominumve cultui extruerentur, quale templum, & qualia tecta Fratres illic tenent: rursusque non nisi spectata probitas & innocentia aedificantium illa ex alieno tantas ab vilo populo stipes eblandiretur, quantas hodie molibus insumpras eis iidem illi qui contulere admirantur. Antea, Ordini ei Monasterium Aedesque sacra non longe inde propius moenia fuerat antiqua & humilior: quæ tecta cum in proferendo pomoerio murisque perducendis, dirui oportuisset, Patres translata huc materia nouam sibi & Diuo Sedem inchoauere: Antistesque monasterij, vel Fratrum vocabulo, Custos, P. Franciscus Cusanus tunc fuit. Aedificationem Monasterij Templique nouam Gonzaghæ liberalitate pluri-

munum esse adiutam ferunt, vel quia erat, ut demonstravi, cupidus excolendae urbis, animoque munifico erga publica omnia opera: vel quia dirutae prioris Aedis religione aliqua sollicitaretur. Sancte integreque ita Mediolani versatus, & quibus dixi criminibus ab obtreptione & liuore oneratus, deinde cum incremento famae purgatus, & defensus noua sibi fortibus militiae factis egregijsque consilijs apud Caesarem quaerebat praemia: & praemijs iam fruebatur eis, quae vel ad calumniae solatium, vel ad innocentiae testimonium data erant. Non tamen redditus vrbi est, cui pietas hominis & praeclarus animus in ea quae dicta est solitudine, pastoralis curae loco esse potuisset, & summa ei gratia cum Principe Philippo erat. Iam Caesar hunc Mediolani Ducem crearat, atque cum perscribi traditionis eius auctoritatem iuberet, ita in diplomate erat praefatus. Tradere se Philippo filio Prouinciam Mediolanum, quae esset recepta suis armis & defensa: quam vetusto Caesarum iure possideret. Id satis visum ad coercendas linguas, quae super ea re mussitantes, procerum Imperij consensum requirebant, & ex Gallia praecipue fremitus audiebantur. Diploma confectum est in Bruxellarum vrbe, cum iam Vallisoleti Philippus ad moderanda Hispaniarum Regna constitisset, iterum in transitu adita vrbe, caeterum minore apparatu exceptus, quia propere ibat, accideratque fama, molestum fore principi, si officia iam vlla morarentur iter, ac de ea re moniti Mediolanenses erant. Equidem haud scio ego, quo possit ore quisquam vnquam priscos narrare casus quandoquidem

quidem in tam recenti memoria variant annales :  
nec tamen magni momenti res erat : sed volui se-  
niel notare calamitatem historiae , quae tam breui  
aeuo corrumpi possit & infalsari haud vlla re ma-  
gis quàm scribentium culpa . Namque Capellonus  
homo Gallus , in tradendo Principis reditu , cum  
Maximiliano patruale suo rediisse ipsum refert ,  
Mediolanique commoratum alius addit . Alphon-  
sus Villosa rerum Caroli scriptor , itinera illa sciun-  
git , principesque iuisse separatim mauult . Regij  
Chronographi temporum eorum aequales , & par-  
ticipes rerum , tradunt Maximilianum euocatum à  
Patre Ferdinando , dissimulata maiestate excurrisse  
priuato cultu : post breue colloquium , pari arte  
deceptis hominum iudicijs remeasse vt Mariam  
uxorem ex Hispania publice deportaret . Rursus  
in vrbis monumentis memoria extat , qua pompa  
Maximilianum vnà cum Patruale Philippo Medio-  
lanenses acceperint , cum Principes in Hispaniam  
redirent . Prouincia interim rectorem acceperat  
Ferdinandum Toletanum , cui viro potestas Medio-  
lani maior fuit , quàm quanta permittitur alijs , qui  
à Catholico Rege cum imperio huc mittuntur .  
Vicarium in Italia Generalem appellabant , quod  
ferè vocabulum & par potestas Exarchis fuit , cum  
Graecia nobis imperitaret . Anno salutis millesimo  
quingentesimo quinto Toletanus ille Mediolanum  
venit : vir seueri imperij : sed à quo propter trucem  
& bellicis tantummodo rebus intentum animum  
res Ecclesiastica solatij nihil speraret . Paulò postea  
Caesar

Caesar res omneis humanas pio animo pertaesus; quaesito sibi ad vltima meditanda secessu, tradidit cuncta filio, qui deinde feliciter regnavit, eiusque propensio animi erga Metropolim & multa comiter in prouinciam benigneque collata per totum eius deinde Regni tempus extabunt. Non securitas & quies, non alia populis expetita bona minus vnquam defuere vrbi, quàm ex quo Philippus hic accepto à Patre imperio regnare coepit. Sub eius initia tamen etiam periculum Mediolani tumultu quàm re maius fuit, coniuratis cum Paulo IV. Gallis ad Neapolitanum Regnum inuadendum; quod Pontifex ille ad Sedem Apostolicam pertinere aiebat: & quia Regno illi semper socia periculis vrbs nostra fuisset, etiam itineris occasione ipsius, exercitum, qui in eam expeditionem ex Gallia proficisceretur, Mediolani tentarurum esse aliquid, inceserat metus. Ea suspicione Rex Philippus Toletanum quidem ad Neapolitani Regni tutelam transire iussit: vrbs verò, & Prouinciae gubernacula diuisit inter Daualum iuniorem, & Christophorum Madrutium Cardinalem Tridentinum, cui viro commendatione Cæsaris purpura data erat, fidusque habebatur. Sed rem militarem Daualus adiutore Ioanne Baptista Castaldo administrare iussus: Cardinali ciuiliū rerum concredita separatim cura est. Quae partium & imperiorum diuisio, ab initio prudenter instituta, rerum exitu damnosa inutilisque reperta est: & infausto Triumuiratui postea nomen fuit. Hi, cùm triginta  
millia

millia armatorum iam in Subalpinos descendisse, atque Neapolim versus iter habere cognouissent, omisâ discordiâ, quae mutuis inter se odijs infensos habebat, properi ac festinantes coeperunt agere ac parare omnia, ne subito ipsi incurſu opprimerentur. Suspicabantur enim, ne Galli, tumultu quidem & fama Neapolim irent, re autem ipsa, animisque & secreta destinatione peterent urbem Mediolanum, idque ab domo consilium attulissent. Erat hoc tempore Mediolani summa rerum omnium difficultas, quae res pertinerent ad gerendum bellum. Afflicta tot superioribus bellis & exhausta prouincia, fessa vrbs collatione pecuniarum: & plerique ciuitatis Principes, aut post arma respexerant otium, aut perierant in armis: nec minima calamitas, incommodumue rebus, intestina, licet ad praesens dissimulata dissensio, quae Cardinalem inter & Daualum, consilij quodcunque alter attulisset, inimicos faciebat. Attamen, externo metu urgente quasi certaminum suorum, ut dictum est, obliuiscerentur, nonnulla, quae in praesenti periculo prouidenda erant, expediuere comuni consilio, quod ciuitas etiam ipsa alias experta discordes, admiraretur. Expleuere subitarijs operibus si quid absolutioni moenium deerat: primores vrbs ad portarum custodiam: cataphractos equites in prouinciae finibus summa cura disposuere: munire raptim vrbes, Ticinum, Alexandriam, Cremonam: ad Valentiam, quae Pado flumini apposita est, treis cohortes Italorum, treis

Hispani generis, totidem Rhaetos iussere praesidio esse, & castellum ibi excitauere cum eorum lacrymis, quorum aedes, fabrica illa deijciebat. Armauere Mediolanensium vigintiquinque millia, quae copiae, aut dimissae fuerant, aut, ob non persoluta stipendia ultro abierant à signis. Hispanum item Germanumque peditatum flagitiose diminutum expleuere conferentis inter se consilia, quos raro antea congregienteis videres, aut si congregerentur, salutatio tristis, & breue alloquium erat. Ab Triumviris quidem ea parabantur: Galli verò, trajecto Dora flumine, pars circa Padum subsistere, pars tetendere ad Casalem, quam in Monteferrato urbem habebant, atque per regionis eius pagos diuisi, nocturno tempore aggressi Pontem, quem Hispani in Stura amne fecerant, post grauem pugnam cum Emmanuele Luna, qui ibi in praesidio erat dissipauere pontem, & quatuor armatis nauibus transmisere flumen. Iter deinde habebant ad Vercellarum Urbem: quod ubi Cardinalis Tridentinus accepit, mittitur ab eo Ioannes Gheuarrus cum fistulatum ala, prope- rum vrbi subsidium, priusquam hostium exercitus ad illa moenia circumduceretur. Sed cum Galli mutato consilio repente inde auertissent iter, viderenturque Alexandriam esse petaturi, Gheuarrus etiam flexit, vt anteueniret Alexandriam, monente Lopezio Acunia, ne faceret: nam posse rursus Gallos flectere ad Vercellas, & ab Casale deinde prohibere subsidium. Gheuarrus tamen cum sua

ala (quadringenti & quinquaginta equites erant) Alexandriam intrauit. Galli, neque Alexandriam, neque Vercellas, sed ad Valentiam iuere, cumq; Pontificis nomine ab oppidanis exercitui com meatum petissent, quia non dabatur, quater tementis oppidum instituerunt, idque deditur quinto die postquam oppugnari coeptum erat. Ibi substitere per aliquot dies principes Gallorum, vel ob necessariam quietem, ut reficerentur ex itineris labore, vel ob consilia, quae in terra hostium iam subiecta oculis, capienda erant. Consilia autem haec fuere: Brisacchius, ut in Taurinos ad duplicanda praesidia custodiasque intendendas rediret, ne auersis ipsis ad maiorum rerum conatus, Triumviri Mediolanenses impetum eò aliquem darent: postea veniens ipse ad exercitum, Termensem ibi dynastam relinqueret: is non desineret obseruare tempora & occasiones carpendi Mediolanensem Prouinciam, & omnia quaecunque posset damna inferendi. In id ipsum, ab Sanctiaco Biragus, ab Catale, Bironus imminerent. Haec ad Valentiam consilia Galli inierant. Roganti Cardinali Tridentino, per legatum, quid ita, locum eum occupassent, atque repetenti Philippi Regis nomine, monentique ut abirent, responderunt, Pontificiae ditionis esse locum & liberos illac apertosq; aditus ab se praestari oportere. Pergit inde Ghisa dux exercitus ire in Placentinos, Neapolitanumque capeffit iter, liberata ingenti metu prouincia vrbeque Mediolano, quam situnc inuasisset, minime dubitant, quin aliquanto felicior



potuerit esse repentina haec & fortuita expeditio, quam altera illa, quae gentem armarat. Adeo scilicet infirma fuere omnia, cum regentium inter se discordijs, tum prouinciae ipsius conditione, ob superiora bella, quae sobolem militarem priuatorumque fortunas affligerant. Enimvero suo raptus impetu & festinatione Gallus transijt pacato agmine per Prouinciae fines, admirantibus interea securitatem suam, qui cohorruerant praesentis terrore belli: variaque fuit fama, cur omissa, quae in manibus erat occasione Galli sic abiissent. Distulisse, non omisisse negotium dicebantur: foederis lege praeuertendam illis esse Neapolim: postea Mediolanum ituros. Vere fuit celeritas insita genti: & vbi longinqua penitus occupauere animos, praesentia negliguntur. Cardinalis autem cum aemulatore suo Collega, postquam, id quod sibi expectarant, aliò transire discrimen viderunt, terrorem vltro statuunt inferre hosti, quò celerius abiret, idque ipsum tentauere praeue atq; inconstanter, sicuti discordes oportebat. Nam Cardinalis cum exercitu collectitio ac tyrone Binascum vsque progressus, tumultuaria illa manu passim à signis abeunte, retro vertit iter: & collega Daualus, misso ad insequendum Caesare fratre cum Italico equitatu, mandauit ei, vt ne Padum transiret. Atque cum debuissent in primis cauere, ne quid alendo hosti relinqueretur in agris, rerum omnium copia quasi de industria relictà in aperto est. Ita Galli, neque lacessiti, neque lacessentes

iere

iere per hostium terram, cum partis vtriusque dedecore nisi Gallus ad maioris spei certamina properus raperetur. Fama fuit etiam, Daualum, contemnentem Insubriae arma, & iniquo ferentem animo, quoddam sui nominis fortuna penderet ex tam exiguis viribus, egisse ob eam rem pleraque velut indignabundum, & velut inuidentem eorum gloriae, qui defensuri Regnum erant. Ibi arma & gloriam, ibi Catholici Regis vires esse aiebat. Ita III. viros inter exercitumque Gallorum, dum iurgantur dissidentue illi, dum per Prouinciae fines hic transit, haud leui periculo defuncta ciuitas erat: ac tantus ab repentino barbarico itinere metus fuit, vt postquam abierant Galli iurgiaque Praesidentium conticuerant, insidente animis tristi specie tempestatis eius, habito nouo per totam urbem delectu, vigintiquinque millia ciuium armarentur, quod statuum praesidium Metropoli esset. Ei militiae factum nomen ex Parente Urbis Ambrosio cohortesque Ambrosianae appellatae, nimirum, quia in campo circa Basilicam, ad Cardinalem Tridentinum dabant nomina omneis, qui ferre arma possent: & militarem etiam egressi aetatem plerique adscribi in eum numerum petebant. Tantum Gallorum odium erat apud vniuersos, vt memoriâ periculi recentis infensi etiam seniores degere vltro in armis vellent. Urbanae eae cohortes conscriptae sunt anno altero postquam Carolus Caesar tradita filio rerum summa in Hieronymianum Monasterium sese abdiderat. Atque hic demum

demum annus fuit , quo Cardinalis Hippolytus circa vitae finem acrius oblatrante conscientia omitttere Metropolim agitauit , non spe iam vlla sicut olim respiciens ea quae omitteret , neque pacto aliquo interposito recepturus , sed constanter & serio , tamquam suae & Mediolanensium saluti tantae rei iacturam daret . Volebat tamen ita abdicare se Metropolitana iure , vt quae sacerdotia , octo mensibus , diuiso sic inter Sedem Apostolicam & Archiepiscopum anno , vacua esse contingeret , ea suae dispensationis manerent : idque à Pontifice Paulo indultum ei & concessum Rex Philippus postea abnuit , nimirum quia domus illa Estensium prouisor semper in Gallum fuisset . Caeterum , permissio ei , vt viros idoneos nominaret , quatuor ipse commendauit , è quibus Archintus Pontifici statim absque exceptione vlla probabatur . Is Venetijs hoc tempore Legatum Apostolicum agebat , sub tribus iam antea Pontificibus maximis eo munere perfunctus , & nuper accepto successore ob negotia , quibus apud Senatum eum agendis noua mandata certumque hominem miti oportuerat . Ibi nouus Archiepiscopus accepto nuntio de nominatione facta per Cardinalem , ac de iudicio auctoritateque Pontificis scripsit ad Regem Philippum , & petijt vt sibi ad capeffendam Metropolim benigne annueret . Non potuisse honorem alteri demandari , qui , maiore , vel obsequio & fide erga Regem suum , vel erga Patriam studio & cura minus illud Pastorale obiret . In eandem sententiam scripsere

scripsere Decuriones Urbis , congrueratque fortè ,  
 ut ab Senatu Sfortia Moronus ad Regem eodem  
 tempore legaretur . Ei data est epistola scripta  
 patrio sermone totidem verbis . Catholice Rex:  
 „ Philippus Archintus illustri apud nos loco ortus ,  
 „ ad annum hunc aetatis suae sexagesimum inno-  
 „ center & modeste vitam egit , atque in grauissimis  
 „ Reip. muneribus cum magna laude versatus Ma-  
 „ iestatis etiam Vestrae Parentem Caesarem Augu-  
 „ stum commouerat opinione prudentiae , ut Con-  
 „ siliarium suum esse iuberet atque haberet inter fide-  
 „ les intimosque seruos . Nunc à Pontifice Maximo  
 „ Archiepiscopus hic datur Vrbi nostrae , quae per  
 „ annos iam ferè quinquaginta destituta Pastore suo  
 „ inter superiorum temporum damna cladem etiam  
 „ hanc lugebat . Petimus à Maiestate vestra suppli-  
 „ ces , ut quoniam felicissimo Regni eius exortu  
 „ caetera depulimus mala , quibus vrgebamur , etiam  
 „ ab Ecclesia depellere solitudinem ipsa annuente  
 „ possimus , eaque datum Archinto Pontificatum  
 „ ratum esse velit . Sunt litterae viro aptae regimi-  
 „ ni populorum : est animus imbutus Ecclesiastica di-  
 „ sciplina & sacrarum rerum vsu : vita , quae alijs  
 „ instar esse disciplinae possit : talique Pontifice , si  
 „ Maiestas vestra annuat , Populus , & Clerus , &  
 „ Respub. Mediolanensis , faciem recipient eam ,  
 „ quae aliquando fuit , & quae Metropolim decet .  
 „ Optimo & maximo Regij precamur imperij &  
 „ vitae spatia , quae Catholicae fidei propugnator  
 meretur . Hanc Decurionum epistolam pertulit  
 Bruxellas

Bruxellas ad Regem ea legatio, quae de rebus  
 fortè alijs mittebatur. Sed cùm occupato ibi di-  
 uersis curis Rege ob bella & ambiguum Prouin-  
 ciarum fidem, Mediolanensium litteris postulatq;  
 tardius aduerteretur: post quintum ab ea legatione  
 mensem litterae aliae petentes id ipsum mittuntur:  
 eis quoque irritis tertia mittitur epistola scripta in  
 hunc modum. Catholicae Rex. Cùm superiori-  
 bus diebus Sfortiam Moronum ciuem nostrum ad  
 Maiestatem Vestram Ciuitatis nomine supplicem  
 mitteremus, mandatae cum primis ei preces fue-  
 rant super Philippo Archinto, quem datum nobis  
 à Pontifice Maximo Pastorem, vt Maiestas Vestra  
 probaret admitteretque petebamus. Et huic no-  
 stro postulato, quia responsi nihil dabatur, aliae  
 nostrae missae litterae, de negotio reque ea frustra  
 supplicauerunt. Nunc nouas mittendi preces, ter-  
 tiumque supplicandi, necessitatem nobis fiduciam-  
 que praebent, hinc Maiestatis V. benignitas, hinc  
 corruptior in dies disciplina Cleri, atque sacrarum  
 rerum quotidie remissior apud nos cura, quia ca-  
 put deest. Petunt à Maiestate Vestra fidelissimi  
 semper Mediolanenses, ne cunctetur huic malo  
 remedium afferre victrice sua dextra, scribendo  
 placere sibi vt Archintus Metropolim capestat. Id  
 & propter postulati aequitatem, & propter M.  
 V. religionem posse impetrari magnopere spera-  
 mus: ac veluti iam impetrato, victricem eandem  
 dexteram gratis erga tantae rei munus animis ve-  
 neramur. Haec ipsa Decuriones Urbis ad Regem  
 scripsere:

scripsere: Cardinalisque Tridentinus, de moribus,  
 & gravitate fideque Archinti congruentia testifica-  
 batur. Distinebant adhuc Regem eadem curae, f  
 quae cognitionem & responsa distulerant: & in  
 eodem aliquandiu silentio res erat, admodum in-  
 terim sollicito Senatu Decurionibusque Urbis,  
 proptereaquod, ad eam diem, neque audita lega-  
 tio esset, neque ad trinas iam scriptas publice  
 litteras quicquam ex Regia rescriberetur. Adfuere  
 deinde totidem epistolae Regis: ad Gubernatorem  
 Urbis una, ad Decuriones alia, tertia ad Archin-  
 tum ipsum, quem, & Reuerendum Patrem, &  
 Archiepiscopum, & amicum inscriptione prima  
 Rex appellabat: atque in omni deinceps parte  
 litterarum, quamquam regia breuitate scriptae  
 illae essent, honorifica & proluxa cuncta legeban-  
 tur. Exemplum earum huiusmodi fuit. Reueren-  
 de in Christo Pater Archiepiscopo dilecte nobis,  
 „ Acceperamus litteras tuas, quibus, & significabas  
 „ nobis, quemadmodum Archiepiscopus Ecclesiae  
 „ Mediolanensis à Pontifice maximo factus esses, &  
 „ petebas, ut tibi ad honorem ineundum authorita-  
 „ te nostra suffragaremur. Sed tum occupati bello,  
 „ tum volentis prius inquirere nonnulla, quae co-  
 „ gnosci ad Dei cultum & res nostras intererat, di-  
 „ stulimus in hunc diem id quod ad possessionem  
 „ Ecclesiae tibi decernendam arbitrij nostri fuit. Nunc  
 „ scribimus ad Gubernatorem istius Prouinciae no-  
 „ strum, ut absque cunctatione vlla agat rem, teque  
 „ nostro nomine in iura omnia Pontificatus Ambro-

„ fiani admittat , quemadmodum quidem ex ipſo  
 „ cognoſces . Caeterum , ſicuti nos fidei ac virtuti  
 „ tuae libenter cuncta credidimus, ita tuum erit eniti  
 „ ac prouidere vigilantia & ſolicitudine omni , vt  
 „ ſacra pure ac ſancte adminiſtrentur , & Populus  
 „ iſte quotidie melior fiat . Et Archiepiſcopo quidem  
 „ ita ſcripſerat Rex : ad Decuriones verò minime  
 „ diſſimilis forma litterarum fuit . Magnifici fideles  
 „ amici noſtri . Redditae noſtri fuerunt litterae vestræ  
 „ datae ad III. Cal. Septembris , per quas expone-  
 „ batis ſtudium eius rei veſtrum , vt Philippus Ar-  
 „ chintus , quem Cardinalis Ferrariae Archiepiſco-  
 „ pum ſuo loco renuntiauiſſet , collocaretur in poſ-  
 „ ſeſſione Pontificatus , & nos vt ſuper ea re manda-  
 „ ta opportuna daremus , cum magna teſtificatione  
 „ virtutum ipſius Archinti orabatis . Itaque , & pre-  
 „ cibus veſtris , & hominis virtute commoti , & in  
 „ primis quia diutius carere Paſtore ciuitatem Eccle-  
 „ ſiamque veſtram minime decebat : mandauimus  
 „ Gubernatori iſtic noſtro , vt ei rei finem imponat ,  
 „ itque quomodo fieri velimus , ex ipſo cognoſcetis .  
 „ Gubernator iam Prouinciae vrbiſque erat Ioannes  
 „ Ficeroa , quem diſſoluto Triumviratu , Cardinale-  
 „ que reuocato , paulo antea miſerat Rex . Ad eum  
 „ epiſtola fuit hoc exemplo . Cum ſuperioribus  
 „ menſibus à nobis petatum eſſet , vt Philippum  
 „ Archintum nouum Archiepiſcopum in poſſeſſio-  
 „ nem Eccleſiae Mediolanenſis induci mandaremus :  
 „ eam rem differri neceſſe fuit , vt certiora cognoſce-  
 „ remus , tum de vita , & conditione Archinti ipſius ,

tum



„ tum de rebus ijs, quas Cardinalis Estensis eo ab-  
 „ dicato Pontificatu sibi referuabat. Ac cetera qui-  
 „ dem, & Mediolanensium ipsorum testimonio, &  
 „ affirmatione Cardinalis Tridentini, reperimus  
 „ qualia vellemus esse: Archintumque probamus,  
 „ vt fidum nobis, & muneri suffecturum: Illud verò  
 „ non placet: octo mensium sacerdotia Estensi eidem  
 „ dispensanda relinqui. Quamobrem, ita admittes  
 „ collocabisque in sua Sede Archintum, vt Cardina-  
 „ lis Archiepiscopusque prior dispensatione illa Sa-  
 „ cerdotiorum excludatur: atque totum hoc vt ex  
 „ animi nostri sententia administretur curae tibi erit.  
 Tempore, quo Mediolanum hae litterae perfere-  
 bantur, non erat Ficeroa Gubernator ad Urbem:  
 sed accepto in Subalpinis Regio mandato, Sena-  
 tui scripsit, vt rem eam ordine exsequerentur.  
 Simul acceptis ab Archinto litteris humanissime re-  
 spondit: Non potuisse honorem eum vlli deman-  
 dari, quem ipse faceret pluris carioremque habe-  
 ret. Optare, vt laetus incolumisque diu gerere  
 Pontificatum possit gloriosum ipsi, ciuibus, & Pa-  
 triae salutiferum. Aegre ferre quòd in eiusmodi  
 tempus inciderit res, vt fructus sibi optatissimus  
 eripatur, quo, spectator, & particeps, & mini-  
 ster esse publicae laetitiae solenniumque initiorum,  
 ac nouo Pontifici auspicanti pastorale munus co-  
 ram inferuire voluisset. Mandasse Senatui, vt vice  
 sua omnibus fungantur officijs, quòd sint expeditio-  
 ra cuncta ei ad Ecclesiae regimen, salutemque po-  
 pulorum inchoandam. Quanto maiorem Ecclesiae

sq̃ualorem videat ex diuturno Pastoris desiderio, tanto magis id esse accelerandum. Hoc accepto responso Archintus summa omnium voluntate & gratulatione Ciuitatis solennia parabat ineundo Pontificatui, cū Regij Oeconomi exorta repente actio impleuit suspicionibus animos, cunctaque turbauit, & Archiepiscopum optimum ex Metropolitana sede in exilij miseras haud sine publico luctu coniecit. Oeconomus, Mediolani, iam inde ab Catholicae dominationis initio vocatur inter alios Regios Magistratus è sacrorum ordine vnus, qui Regis nomine fit author, quotiescunque, vel à Pontifice maximo, vel ab Archiepiscopo, sacerdotium impetratum adire quis velit: idque nomen, & ea potestas, exortis saepe controuersijs, maiore aliquando fuit, aut minori iure, quàm hodie habetur. Fungebatur munere tunc eo Calaber Sacerdos, de quo homine sinistra fuit in vrbe fama, tamquam, praeter asperitatem ingenij vitia quaedam alia Graecanica secum attulisset. Minimam eius vitae labem esse aiebant, quòd sub Regiae praefecturae obtentu interciperet Ecclesiae vectigalia, & sibi, non Regi vsurparet. Postquam is sensit Archintum iam inibi esse, vt iubente Rege, annuente Gubernatore Vrbis, deducente Senatu, in Metropolitanano folio collocaretur, dolore amens, per speciem suae fungendae vicis adit Senatum, & multa, quae commentus erat, profert, vt doceat, minui maiestatem atque periclitari si summum vrbis Sacerdotium Archinto ei relinquatur. Scripta quin  
etiam

etiam edidit capita accusationis suae : quae com-  
perta sibi , quae suspecta, quid insuper accidere  
posset , quid natura vrbis , quid ingenia populi,  
quid conditio Pontificatus asserre daninosum Regi,  
siue anceps, cuncta ordine exponendo, commoue-  
rat Patres, non quidem vt assentirentur, sed certè  
vt Archintum ipsum de rebus eiusmodi commone-  
factum vellent. Et ille quidem audita criminatio-  
ne, ad vnumquodque caput ita respondit, satis vt  
Patribus appareret, neque in animo , neque in  
fortuna eius & familia, neque in superiore vita  
quicquam esse eorum, quae ab calumniatore Cala-  
bro iactata erant. Itaque regia mandata exsequen-  
da, Pontificemque accipiendum consensu decerne-  
bant. Mox Calaber, sicuti pedum doloribus inhi-  
bebatur, sella gestatoria delatus in Curiam, tam-  
truci spiritu, tam importuno ore causam egit, vt  
onerati Senatores & fatigati querimonijs atque  
denuntiationibus descenderent ad exceptionem,  
denique eam: posse Archintum ita admoueri regi-  
mini sacrorum, vt praeter diuina mysteria & aras,  
animarumque salutem, nihil aliud ille attingeret:  
caetera relinquerentur, in suspenso donec Ficeroa  
Gubernator in urbem rediisset. Videbat Archin-  
tus infringi Ecclesiae auctoritatem, si sacer honor,  
& alimenta honoris, quae iure antiquissimo, &  
quotidianae consuetudinis humanorumque vsuum  
necessitate coniuncta inter se essent, tali ea  
diuisione separarentur. Destitutum se opibus,  
queis Archiepiscopi nomen & persona niteretur,  
etiam

etiam ad sacra cum dignitate obeunda inualidum fore: constanterque ideo abnuebat. Satius esse, abnuentem sacri honoris contumelias, in ea gloria extingui, quàm ex Insubriae Metropoli Pontificeque Anibrosiano Semiepiscope factum praebere sic ad ludibrium os, neque habentem ipsum, adiumenta splendoris sui, neque alijs alimenta suppeditantem. De ea ratione consilij sui, deque Oeconomi intercessione, & iniecto per eum impedimento cum ad Ficeroam scripsisset, eiusmodi responsum accepit, vt ipsum quoque rationibus Oeconomi nonnihil esse commotum appareret. Rescripsit enim, nihil erraturum fuisse Reuerendum Patrem, si possessionem sacrorum quocunque modo adijisset, vt fidem faceret, non emolumenti alicuius cura, sed pastoralis studio sollicitudineque animarum id munus expetisse. Nunc etiam hortari, vt sicuti censeat Senatus, diuina complectatur, caetera non defutura ei cum primum ipse redijset: & rediturum breui. Hoc responso accepto, maluit adhuc Archintus expectare Gubernatorem, quàm truncum, & mutilum, deformemque Pontificatum suscepisse. Postquam is redijt, tanto rursus fremitu, tantaque contentione Calaber Oeconomus exaggerabat damna simul & pericula Regiarum rerum ex Archinti Pontificatu, vt amplius deliberandum, consulendumque denuo Regem omneis censerent. Datis igitur ad Regem, litteris, dum responsa expectantur, Pontifex Paulus, cognita interim Oeconomi intercessione, Regiorumque

que motu, Pallium Archinto transmisit. Est insigne  
id Metropolitanae potestatis, inter sollennia gesta-  
men collo summa pectoris humerosque cingens:  
ac munere utique tali possessio Ecclesiae Mediola-  
nensis, ius in Prouinciales Episcopos, & cuncta  
alia iterum Archinto affirmabantur: quae tunc  
essent data cum Archiepiscopus ille crearetur.  
Simul Apostolicae literae missae una cum eo insi-  
gni, quae Paulus Gubernatorem monebat, iniu-  
riam, quae Archinto fieret, communem esse ei  
cum Apostolica Sede: damnosam Vrbi, quae tali  
interim Pastore priuaretur: ingratam Regi, qui  
probatum iam sibi, & acceptum, calumnijs impro-  
bari alienis videret. Has literas Pontificis iussu  
offerre Gubernatori Archintus debebat: sciebatq;  
Gubernator ipse esse allatas: sed quatenam esset  
sententia, vaticinando angebatur. Crediderat,  
anathematis esse denuntiationem, & diras intentari  
ni pareret. Itaque, & sermonibus iecerat haud  
obscuris, melius fore, si literae eae sibi non trade-  
rentur, & quoties crediderat adesse qui redderet,  
varie tergiuersatus erat. Demum redditae sunt arte  
& via, quam Archintus lenissime fallacem excogi-  
tauit: apertaeque & lectae minus offenderunt, quia  
mitem tantummodo obiurgationem, & paterna  
monita afferebant. Archintum tamen, quominus,  
nec autoritate Apostolica subleuaretur, nec ei  
dies ipsa, qua cuncta mitigantur, nec leue alioqui  
Gubernatoris ingenium prodesset, multa assidue  
simul vrgebant: Calaber furiose importunus sem-  
per,

per, & elatior nunc ob successum: alienata Curia, atque audiendo saepius eadem suspensi iam etiam qui calumniatorem antea constantissime repulissent: perculsa ciuitas, & obiecto rebellionis crimine nutanteis etiam propinqui: Clerus ipse laetus praesenti licentia, & exorienti disciplinae seueritatisque infensus. Neque quicquam horum tam aduersarium Archiepiscopo erat, quam homo vnus è Clero, qui missus olim ab Estense Vicarius perseuerabat adhuc in eo munere, & magnae cladis loco ducebat, si translatis rebus, ac mutato summo Ecclesiae regimine abeundum hinc foret. Instigabat iste Oeconomus, & ab Oeconomio vicissim instigabatur: vterque verò simul, nunc Senatui, nunc Gubernatori suggerebant iras causasque irarum: gnarusque Vicarius occultarum Ecclesiarum rerum, prodebat Regijs arcana Pontificatus, docendo, quae iura quasque literas aduersus Maiestatem depromere aliquando Archiepiscopus posset. Per eas artes & furta minister improbus, non praesentem tantummodo inuidiam eiectionemque Archiepiscopo, sed gratiam sibi in posterum apud Hispanos, eorumque commendatione aditum ad munera honoresque alios quaerebat. Et materiem locumque crescendi prae-buerat huic Archintus ipse actione vna, quae prima ei & nouissima Pontificalium fuit. Cum enim accepto Pallio promulgasset edictum, quo monebat scribas hominesque suos, vt conficerent rite documenta publica, formulasque custodirent Ecclesiasticae iurisdictioni conuenientes: confestim Vica-  
rius

rius eam rem ad Oeconomum defert. Oeconomus Gubernatori aperit : ac demonstrat, haud aliò pertinere id factum, quàm vt consensus authoritasque Regia tollatur, ex omni iure sacrorum, ac inuito Rege maximam eam vrbis & prouinciae partem teneat quisquis ab Romano electus urbem prouinciamque turbare possit. Dum consulitur Rex, dum responsa eius exspectantur, irruisse in possessionem Ecclesiae Archintum, & Regi sic Regijsque illulisse. Si promulgare edicta actionibusue alijs usurpare potestatem pergat, haud leuiorem fore indulgentiae culpam erga contumacem, quàm contumaciae ipsius aduersus Regem. Non dici plura attinebat. Per Franciscum Crassum, qui postea Cardinalis fuit, monetur illico Archintus : quoniam Regis mandata super eius Pontificatu exspectentur, interim ei manendum esse extra prouinciae fines : Excellentissimo Gubernatori sic visum : & ad dignitatem ipsius otiumque publicum id enimvero pertinere. Tradunt, Archiepiscopum eam denuntiationem excepisse tranquillo animo mansuetoque vultu, ac ne verbo quidem commutato vno, vertisse patrium solum : patriam vniuersam, exceptis impijs, ita indoluisse, quasi capite in illo salus publica exulatum iret. Bergomum abiit, opportunitatem credo Urbis, & Ecclesiae illius secutus, quòd, & vrbs esset Venetae ditioris, & Ecclesia numeraretur inter Prouinciales alias, praesideque ac pastore tunc careret. Ibi, nec Regi Regijsue suspectum, in aliena terra, nec



in orba ciuitate desidem fore . Progressus igitur  
quamplacidissime in eam partem , ad extremam  
Mediolanensis agri, traiecto flumine quod inter-  
luit, Bergomenſes eos populos, ceu Metropolim  
alteram excolebat haud magnopere iam memor  
Ecclesiae qua arcebatur, Pontifex Paulus, re co-  
gnita sicuti gesta esset, ferire Apostolico fulmine  
Regios parabat; estque ab eo inhibitus collatâ in  
Oeconomi suspiciones culpâ; & Regiae litterae  
propediem adfuturæ dicebantur, quae exſulem  
honorificè reuocarent. Is, tertio mense postquam  
vrbe exceſſerat, Bergomi moritur: atque allatis  
in ipſo fere obitu literis, quae exſpectabantur,  
Mediolanenſes, velut ereptum tertio iam ſibi Ar-  
chiepiſcopum luxere, Innoxios Archinti mores,  
& acceptam Coelo virtutem declarauere ea, quae  
mortem inſecuta ſunt, & obitu in ipſo proteruiâ  
Daemonum manifeſtè tumultuata eſt: Namque  
inter caetera ſtudia proximis adiuuandis, & pro-  
curandae multorum ſaluti, fuerat hic etiam ſpiri-  
tus & confidentia Archinto, obſidentes mortalium  
praecordia Daemonas euocare & pellere exorcif-  
mis; multaeque nobiles palmae celebrabantur;  
quas proſtigato ſic hoſte retuliſſet. Bergomenſi  
negotiatori diuiti & honeſto filij fuere quinque  
daemonijs obſeſſi totidem, & vnusquiſque eorum  
ab Daemone ſuo ita agitabatur, vt foeditatis &  
vaccordiae certamen inter ipſos eſſe Daemonas  
videretur. Lymphatorum certe aliorum nullum,  
vnquam vidiffe aiebant vrbis eius homines, quentiam

amentia & furore cum fratribus hisce compararent. Post irritas multas Exorcistarum artes & fallacia, promissa, aggressus Archintus infelicem eam miserrimi parentis prolem: grandiores quidem quatuor exemit faunorum ludibrijs, minimus verò natu qui erat, pertinacius adhuc obsidebatur, & actus à Daemone in fugam, ex patria domo proripuerat sese, Mediolanumque peruenerat paulò antequàm Archiepiscopus moreretur. Secutus abeuntis vestigia filij pater, non equi velocitate, non sollicitudine sua potuit aequare furialem illius gradum, Mediolanique demum affecutus infelicem percunctatur quid ita consciuerit fugam. Respondit ex puerili ore Daemon: factum id esse importunitate Exorcistae, cuius violenta carmina stomacharetur. Neque enim, sicut ignobiliores alios spiritus ille pepulisset, ita vim eandem in se esse valituram. Dixerat haec, & paulò postea, compellato patre puer, momento, inquit, isto Archintus expirauit. Ei scilicet praesagio congruens deinde reperta est hora, qua Bergomi decesserat Archiepiscopus exul. Celebre per ea tempora negotium fuit, auxeratque rei admirationem reddita puero etiam huic salus postquam pater cum tumultu Pontificis admouit. Anno CIO IO LVIII. ad xv. Cal. Sextileis obiit Archintus precatus ultimis tabulis, ut sepulturae sibi locus Mediolani in Metropolitana Aede concederetur. Si id impetrare non posset, locum eundem in Basilica Thebaei Martyris Alexandri à Bergomensibus petebat.

tebat. Inscriptionem quoque sepulcro composuit ipse mansuetudine eadem: scilicet, ut neque per ambitionem honores ultimos contempsisse videretur, neque propinqui vel amici, caritate in mortuum, vel adulatione in viuos ad inania delaberentur. Inscriptio fuit in hunc modum. Hic est, titulus, monumenti. Philippi. Archinti. Archiepiscopi. Mediolanensis. Siue in patria, quod magis optarat, siue Bergomi tumularetur, retineri sepulcralem cum titulum volebat. Cumque peniles tumuli fierent tunc illustribus fere viris, despectans sese infra caeteros, mandauit intra terrae viscera cadauer abstrudi pauperum ritu. Non idem populorum sensus erga id quod vile adco ipsi & projectum; certaminaque & lites ob cadauer extitere. Bergomenses, quia, & viuo Archiepiscopo terra illa ad exulandum placuisset, & ibi esset mortuus, vindicabant sibi Pontificis reliquias. Ciuitas nostra & natalium, & testamenti iure easdem reperebat. Pontifex Max. ex Alexandro Archinto fratrem mortui cognita causa, precibus dedit huius, ut Mediolanum arca deportaretur: quae deportata & aperta, corpus illud, sicuti compositum in ea fuerat, nulla corruptum tabe ostendit: annusque iam alter ab excessu exibat. Considerantes huius Archinti instituta & mores animumque nonnulli, qui deinde D. Caroli Pontificatum, & Sancti Pontificis vitam, ab initio ad finem vsque, praesentis & assidui Diuo spectauere, crediderunt, si vixisset ille diutius, neque prohibitus Pontificatu fuisset, formam

formam Ecclesiae, quam sub Borromaeo instaurari posterior aetas vidit, sub Archinto prius iam tunc fuisse renouandam, & Archiepiscopos duos, qui temporum successione coniungebantur, rerum exitu dissimiles, similitudine inter se animorum aptissime potuisse comparari. Ac sane mihi etiam intuenti Pontificalia rudimenta, quae posuerat Archintus, cum Sancti Sepulcri prius, deinde Salinarum Episcopus fuisset, multum pastoralis vigilantiae, multumque sollicitudinis ex ea minorum Ecclesiarum administratione occurrit. Quos ille spiritus, si ad huius, & Urbis & Prouinciae magnitudinem adiungere potuisset, credere licet, vel excolendis Ecclesiae rebus, occupaturum eum fuisse gloriae partem, quae tota in Borromaeum cessit, vel ex-cultâ iam Ecclesiâ, purgataque per ipsum vrbe, maiorem aliarum rerum campum diuinis Borromaei artibus ita potuisse aperiri. Non quidem adierat ille traditos sibi populos, Etruscum illum priorem & Gallicanum alterum, Romanis nempe negotijs impeditus semper, & eodem retinente Pontifice, qui Ecclesiam vtramque mandarât. Caeterum, etiam absens omne pastorale munus impleuit, & quia Salinarum praecipue vrbi haereticæ contagionis periculum ex finitima Galliarum peste aderat, conscripto ad homines eos Catechismo, ita firmavit erudiuitque gentem aduersus imminens malum, ut institutio ea praeferat elementa disciplinae, qua Sanctus Carolus postea constituit Metropolim hanc labantem. Insensus Ecclesiae

corruptelis

corruptelis erat, nec ea morum parte Borromaeo ipsi dispar. Tradunt, obuio fortè Purpuratorum vni submisisse contemptim oculos, quia ille sui ordinis insignia non praeferret. Et sub Pauli III. obitum cum nouo Pontifici creando comitia haberentur, Collegio toti litteras obtulit scriptum habentes, quae vitia possent irrepere comitijs, & quomodo negotium id sanctissime administraretur. Amauit vnice Patriam, & ciuium ornandorum valde cupidus fuit, si quidem indolem aliquam virtutis praeferrent. Eo studio Franciscum Sfondratum Pontifici commendauit, quem amissa vxore aptum Ecclesiae rebus censebat: adeoque non est in ea existimatione deceptus, vt Cardinalis hic fieret, & illata semel in domum purpura multiplicaret honorem, fastigiumque etiam inferret illud vnde is honos datur. Namque Nicolaus Francisci filius item Cardinalis, ac deinde Pontifex Maximus fuit Tantum nobilissima Domus Archinto debet. Sed Angelum quoque Medicaeum qui paulo postea sub Pij IV. nomine regnaturus in Ecclesia erat, produxit, plurimumque adiuuit auctoritate testimonij, & consiliorum prudentia ac fide, quò certiozem ad summa viam calcaret. Quae ipsa retuli, vt intelligeretur, habuisse Archintum istud etiam è Sancti Caroli moribus, vt ad summos Ecclesiae honores ipso potissimum duce atque adiutore clarissimi, & optimi ciuium peruenirent. Dabantque Archinto in id auctoritatem honores gesti, vita acta constanter, & cum dignitate, apud  
Caesarem

Caesarem, apud Pontifices Max. gratia, consilia saepe pacis ac belli penes eum: & amplissimorum munerum emolumenta repudiabat. Talis viri morte, Caesarem ipsum, accepto nuntio, commotum fuisse aiebant, & Oeconomus succensuisse, cuius calumnia, & infestatione ille vexatus fuisset. Tertio post mense moritur etiam Caesar anno quinquagesimo octavo postquam natus erat. Eius memoriam mansuram in hominum animis & ore famae, quamdiu literae & homines manebunt, non recoluisse hoc loco, iniuria nostrae Urbis fuerit, quae ipsius armis exempta barbarico iugo, exulta saluberrimis institutis, muneribus privilegiisque aucta, & quod maximum omnium fuit, in Catholici Imperij corpus assumpta celebrauit tanto luctu exsequias summi mortalium, quanta olim gratulatione aduentum eius celebrarat. Mediocre corpus ei, grata regio honore facies obtigerat. Bellator animus puero, nataque tot victorijs indoles, otij studia non perinde adamauit. Sed litterae, & Philosophi sub alio nusquam Rege pulcrius steterè, incusabatq; ipse postea, quod non didicisset. Locutus est linguis omnium fere gentium, quibus imperauit, & naturae dono facundus erat. Multae secundae res ei, sed nec aduersa defuere per omnem vitam: orbemque terrarum ad vtrasq; Vices quodammodo diuiserat ei fortuna, ut in diuersa parte contrarios euentus assignaret. Fuere dimicanti Caesari prosperarum rerum sedes, Italia, Germaniaque, & Hispaniae Regna quoties rebellionem coeptauere.

America



America simul, & quà nouus orbis semiferis mortalibus habitatur, obnoxia vincenti Carolo semper fuere. Ambigui bellorum exitus per Graeciam, & Africam, Galliamque & Flandriam eadem, quasi sortis dispensatione contigerunt. Minus ad felicitatem fida pax ei semper fuit: semperque magnae rerum iniquitates, & magna discrimina lacefluere Caroli Caesaris gloriam, quoties quiescere voluerat. Pacem tamen ipsam sancte integreque administrauit, & arbitrium egit omnium ferè Europae rerum, propositi tenax ad cuncta quae destinauisset, Catholicae religionis defensor, qualem Ecclesia ipsa admirata est. Veluti proprium eius fuit, appeti coniuratorum insidijs & punire seu debellare coniuratos. Sic magni & occulti rebellium conatus, quos India, Hispaniaue, & Belgium & Neapolis dedere, sanxerunt exemplo suo per terras illas aeternam fidem: & exempla in omne aeuum ibunt. Aperto Marte vicit Franciscum I, Galliae Regem, captiuumque habuit domi & dimisit, quod gloriosius habitum est quàm etiam vicisse. Saxonem & Lantgrauium capita Germaniae furentis, sub iugum missos, & coactos accipere leges, viuere iussit, atque pristinam fortunam habere. Turcarum Imperatorem Solimanum nihil habentem ex barbaro praeter nomen & sectam, cum vniuersa prope barbaria coortum & armatum in spes vltimas afflixit clade, quam res Othomanae semper sentient. Ad auiti Imperij fines adiecit: Americam, & Mexici Regna, & Regna



gna Peruana, mortalitatemque illam, & alterum planè Mundum expertem salutis & caligini damnatum collustrauit Euangelij luce: Prouinciam, praeterea Mediolanum & Prouincias alias, quas deinde largiendo alijs constituit domos, quae nunc opulentia & maiestate Regum agunt. Vnico matrimonio contentus fuit, & spretâ ad extremum gloria, quam tantis rebus meruerat, deposito imperio quiescere voluit in piorum coetu, at ue ibi mortalitatem expleuit, nondum ille quidem in termino breuis aevi mortalium, si iustum exigere cursum plenis annorum spatijs liceret: sed maturauerant senectam labores, & curae, delicata corporis constitutio laboribus impar, animi vigor assidue curas accersens: vnde nunc ingruerant morbi, & super caetera, non ferre erat insanos articulorum dolores. Annus, quo Caesar decessit, syderalis scientiae vanitate caneatur fatalis Principum Regumque funeribus, ciuitatum excidio, conuersioni rerum omnium humanarum, addebanturque minae aliae celestes, fulgura, terra emotus, & procellae cum multiplici strage hominum, & quicquid aliud pauet. Ei tam infaustae vaticinationi fidem adstruxerat Caesaris obitus, & crediderant prouinciae subiectae Catholico imperio defunctas se esse suis malis hoc ipso, quod mors propera Caesarem abstulisset. Parentauere Mediolanenses ita vt ob laetitiam triumphumue vllum nusquam, aliàs antea perinde spectaculo fuerit omnibus Insubriae populis ciuitas, quàm tunc ob moero-

Eeee

rem

rem fuit : & spectantium animos ab ipsa contemplatione moeroris auertebant funebrium operum sumptus, quæ in luxuriæ faciem testati suum luctum Metropolitani erant . Orationem habuit Franciscus Crassus, tunc Senator postea Cardinalis eloquentiæ & dignitate vitæ per munerî .

101 1472929



















K.46.

